

mario
sanna

Bennardu



editziones montegurtei





Mario Sanna
Bennardu
Sos ricatos de su 1978

Romanzu

editziones montegurtei . nùgoro . 2009

<http://www.mariosanna.com>



LICENZA D'USO DELLA PRESENTE OPERA



Attribuzione-Non commerciale-Non opere derivate 2.5 Italia

Tu sei libero:



di riprodurre, distribuire, comunicare al pubblico, esporre in pubblico, rappresentare, eseguire e recitare quest'opera

Alle seguenti condizioni:



Attribuzione. Devi attribuire la paternità dell'opera nei modi indicati dall'autore o da chi ti ha dato l'opera in licenza e in modo tale da non suggerire che essi avallino te o il modo in cui tu usi l'opera.



Non commerciale. Non puoi usare quest'opera per fini commerciali.



Non opere derivate. Non puoi alterare o trasformare quest'opera, né usarla per crearne un'altra.

- Ogni volta che usi o distribuisi quest'opera, devi farlo secondo i termini di questa licenza, che va comunicata con chiarezza.
- In ogni caso, puoi concordare col titolare dei diritti utilizzi di quest'opera non consentiti da questa licenza.
- Questa licenza lascia impregiudicati i diritti morali.

Testo integrale della licenza:

<http://creativecommons.org/licenses/by-nc-nd/2.5/it/legalcode>

Legal Code in English:

<http://creativecommons.org/licenses/by-nc-nd/2.5/legalcode>

more infos:

<http://creativecommons.org/>

<http://www.mariosanna.com>

Apo iscritu custu romanu in su 1993/94, cando Jubanne, emissàriu de sa familia Toniutti, pro su ricatu de su fizu Bennardu, m'at dadu sos apuntos chi aiat iscritu supra custu sequestro. Cheriati èsser unu contu, "un giallo" sardu a sa sarda. Si bi so resessidu, lassos chi siant sos letores a lu zudicare. Est istadu publicadu, a banda de su 1995, in su situ de s'Universidade de Koeln, in Zèrmania, chi fiat in cherta de testos sardos. Cando l'apo torradu a lègher ocannu, mi so abizadu chi bi mancaiant nessi 4 capitulos e duncas fiat pretzisu de lu cumpletare. Apo furdichinadu in sos papiros chi aia collidu e mi l'apo letu. Mi so abizadu chi andaiat mendadu e mendadu l'apo. No apo cambiadu s'ortografia chi abarrat cussa chi impreaiat in antis de sa Limba Sarda Comuna (LSC). Peroe apo cambiadu su rezistru de sa sintassi, est a nàrrer chi como s'isterrida de sas frases sunt in sardu prus chi no in antis; parte de su lessicu est diferente e est in sardu prus anticu, ca medas vocabulos chi fiant italianizados, los apo torrados a cussos chi impreaia a minore e chi mi fiant essidos fora de mente. Torrandelu a lègher, m'est piàchidu e m'at peri assustradu. A tempos de tando Nino Sole no aiat iscritu "Psicologia di un sequestro". Mi so abizadu de àer iscritu cosas chi, petzi a las pessare, arpilant sa carena. Si diet cara a sa mentalidade de su pessonazu de Pascale Tidu pro nd'àer un idea pretzisa. Difatis dant a bider una mentalidade barbarica, crudele e no sos ricatadores ebia, ma totu sa zente chi zirat a fùrriu de sos malafatores; si podet nàrrer sa zente sarda de mentalidade antica, intzivile. Bos nde abizade si dazes cara a sos negòssios de su missu cun sos amicos suos chi l'azudant a liberare su presoneri; in parte si notat in sos negòssios cun s'abocadu matessi e mescamente in s'addobiu cun Boni e Pirro. Su primu relatatu de s'ingàrriga chi li cheriant dare sos ricatadores de Bennardu, s'àteru fachet cumprènder chi pro issu est normale chi ochidant su presoneri petzi ca nd'at bidu unu in cara, pustis chi pro disisperu nd'at iscarotadu cussu chi nche lu fiat picande dae su garazu; pro non nàrrer de sas ùrtimas abertèntzias chi sos bandidos dant a su ricatadu in su mamentu chi lu sunt liberende e s'abocadu, a pustis, si prestas a cussu jocu barbaru. Su fatu tristu est chi totu su contu e, duncas, sos negòssios, deo non los apo istudiados. Los apo iscritos che cosa normale, comentu a nàrrer chi peri pro mene fiant normales. Non mi fiat abizadu in antis de canta malesa fiant garrigos e cussa malesa l'aia in s'animu, peri chi l'aere superada e non dia èsser istadu a tretu de la pònner in opera. Sos istudios fatos, s'educatzione retzida e sa zente in mesu de sa cale vivia e vivo, m'ant resu tzivile. Ma cantos àteros sunt abarraros a livellu de mentalidade de malas intrannas? Letu in cust'òtica su romanu at un'àteru pesu e balore. Chie lu torra a legher como, a pustis de sa de duas isterridas at a bider sas diferentzia manna intro de una e de s'àtera.

Nùgoro, 16.03.2009

In copertina :
Senza titolo
(Ritagli di sugherone su pannello di mediodensit)
Mario Sanna 2007

Progetto grafico a cura di Maoro Sanna



Questa opera ed altre ancora sono scaricabili dal sito :
<http://www.mariosanna.com>

Per contattare l'autore :
info@mariosanna.com

Bennardu

Sos ricatos de su 1978

SU SERO DE SU RICATU

Su 26 de Nadale ja nde l'ant dadu ite fàcher a carabos e polìtzia. Note note los ant mantesos a s'alerta, currende da una bidde a s'àtera, da unu zassu a s'àteru. Unu ricatu in prus. E custa borta pròpiu in su coro de sa Sardinna, in Macumele.

Custa bidde est sa capitale de sa Màrghine, collocada in cussos montes chi, moghende dae terras de Aristanis, secant a rucadura sa Sardinna, dae su Monte Ferru a cussos de Alà, pro nche finire in sos montricos de sa Gaddura, a banda de Oviddè. Pro cantu sunt longos sichint su Tirsu, a cust'ala de sa badde. Fachent fronte a sas puntas chi, cuminzande dae s'Iskra, crompent a Orune, Bitti e Lùgula pro nche finire in sas artas campuras de Buddusò a un'ala e in Monte Arbu a s'atera. Colant, si podet nàrrer, ata ata de Nùgoro.

E ite fàcher b'at, ca non est petzi un'àteru secuestro, est su de nobe in d un'annu. Paret chi sos Sardos apent declaradu gherra a sa sotziedade tzivile, a sa zustiissia. Sa Sardinna intrega, ispantada si dimandat: a ube amus a andare a parare, sichinde de custu passu? Si est beru, comente contant sos de Ollolai, chi issos e sos de sas biddas a fùrriu sunt depesos dae sos anticos llesos, b'at de narrer chi s'anticu ànimu belluinu non est mortu e chi est torradu a galla in zente chi cussiderat s'istranzu, chi siet de sa pròpia isula o de Terramanna, comente bèstias de bardanare.

Cussa zente bènnida da innedda a s'irrichire in terras sardas o cussos sardos chi, in bidde issoro, ant fatu fortuna, ischidant apititos anticos in chie sa bida l'at o credet de l'àer sèmper tribulada.

Unu sole cun sas dentes at lampadu totu die, in cussu 26 de Nadale, ma fit fritu a mòrrer. Unu fritu chi t'astragat sa carena e chi mancu su clima de mare resessit a indurcare in terras de s'Alighera.

Bennardu Toniutti a s'Alighera b'estt andadu, pròpiu sa die in antis, a bisitare a Angholedda, sa muzere, prinza manna, chi fit in s'isetu de s'illiberare de su secundu fizu. E nàschida est, sa die in antis de nadale, una bella criadura. Issu est unu pitzocone, fizu ùnicu e bissiadu dae totus, chi non nch'at finidu sos istùdios in s'Universidade de Tatars; ma non li mancat s'intelletu e su bonu tratu. Mancu sa muzere nch'aiat acabadu sos istùdios, ma est de cumprènder, ca sa familia non li permitit de bi pònner aficu.

Bennardu, a sos parentes, aiat dadu sa notìssia per telefono e gai sa mama nche est sichida deretu, cun sa prima betura chi l'est capitada. S'in pustis Vitòriu, un'amicu corale, nch'at zutu su restu de sa famiglia de sos Toniutti: su socru sennor Zuanne, sos connados Mariedda e Sirigu e sennora Irene, sa jaja de Bennardu.

Su bortaedie de Nadale detzidint de ghirare totus a Macumele, ca issu est istracu e mortu e at bisonzu de pasu. E ghirant a domo de sa jaja, ube Bennardu s' isterret in letu e si fachet unu bellu surcu de sonnu. In s'intantis sa jaja preparat una bella chena pro issu e pro sos amicos a fàcher festa paris. Sa jaja, bresada, rispondet a sas telefonadas de augùrios e prus bresada puru nd'est, ca Radiu Macumele nd'at dadu sa notìssia a sa bidde intrega.

Si colant su sero chenande e brulletande. A tardu pessant de andare a si bìder unu tzinema, pro la conchuire in glòria.

Bennardu at post in motu sa beturona sua, una Fiat 132, pro nche la ghirare a su garàgiu, in antis de andare a su tzinema. Sunt sas nobe in punta cando infurcat sa machinona sua pro andare dae domo de sa jaja, in carrera de Roma a sa carrera de Reina Elena, ub'istat issu. Non at de fàcher tretu meda e sos caminos sunt desertos. Su fritu de Macumele est de cuddos chi frazicant sa carena a su cristianu. Sas luches, si sunt bastantes in sos caminos printzipales, sunt iscarsas in sos gùtuos e gutureddos de sa bidde.

Una Alfasud, chi sa paca luche non permitit de distingher su colore, s'est posta in motu in carrera de Mazzini, cando Bennardu at firmadu sa sua a in antis de su garàgiu. Issu a su sòlitu falat dae sa màchina pro apèrrer sa saratzinesca chene timoria peruna, ma cando est pro allùgher sa luche, duas manos potentes si li falant in palas e nche l' ispingent a intro de un'àtera. Deretu li tapant sa buca no ghetet boche. - Mùtricu! Non semus pessande a ti fàcher dannu. - Li narant e su sàmbene si li fughit dae sas benas. est pro si dismajare. Moghet sas manos a si liberare, ma in poddiches non l'abarrat che un'istratzu. Est iscuru che in buca. No ischit si sos duos bratzos chi l'istringhent, est pro lu sustènner o pro non si mògher. Non b'i ponet meda a si rènder contu de su chi l'est capitande, in pessu s'at intesu una canna, fortzis de pistola, chi l' est intrande in costas.

- Lestru, a cussa màchina, in cuche. Non bòchines, non nares nudda, si non cheres chi ti sutzedat carchi cosa.

Est un'òrdine e non b'at rispostas de dare, ne tempus li dant de rispònder, ca deretu l'ispingent, in presse e a fortza, a intro de s'Alfasud. Mancu su tempus de si pompiare a fùrriu.

In sa carrera non b'at anima. Bennardu, como, zirat a in goi e in gai duos ocros disiperados. Duas pessones, malamente carotadas lu sunt fachende sèder in palas e un'àtera at zai postu in motu sa betura.

In cussu, arribat una 127 bianca e si firmat a pacos passos dae s'alfasud. Bennardu si nde sapit e chircat de atirare s'atentzione illonghiande su trucu in cherta de azudu, ma duas manos rudes, chene perunu cumplimentu nche l'ispinghent a s'ispalliera de sa màchina.

S'autista, in pessu s'assicurat chi sas portinas sunt tancadas, moghet deretu imbucande in carrera de Vittorio Emanuele.

Nche suprit Vitoriu, cando s'alfasud est in pessu aviandesi, a sensu contràriu, in su gùturu de Quadrio, ube non b'at ispera de luche.

Pro èsser meda b'at coladu petzi una paja de minutos cando s'iscuricore de cussu gùturu si nch'ingurtit s'alfasud.

In su mentras Bertu falat dae sa 127 e curret a sa janna de sos Toniutti, ma sonat de badas, ca non li rispondet nemos. Si duda aiat, deretu nche li passat e curret a sa betura, ube est abarrada s'amorada.

- Ita b'at?

- Un ricatu.

- E chi est?

- Sennor Bennardu Toniutti.

- Cale? Cussu de Ràdiu Macumele?

- Pròpiu issu. - E cun sa màchina sunt zai in caminu, andande a sa politzia.

Cando Vitòrio s'est firmadu a in antis de sa domo de Bennardu, sa faina est fata. S'alfasud est isparida cun s'amicu e sos bandidos e sa 127 cun Bertu e Dumìnica est in su cumissariadu e zai s'intendent sas sirenas de sas gazellas chi s'acurtziant a totu fuga.

Su ràdiu de Bennardu, in sa betura cun s'isportellu chi su mere no at fatu in tempus a cunzare, a in antis de su garàgiu apertu in campu, sonat musica a cantu andat. Su Cumissariu Scotto sàrtiat in presse dae sa gazella e deretu si nche ponet in intro de su garagiu. Si pompiat a fùrriu; nche collit carchi cosa dae terra e impressidu torrat in betura. S'atacat a su radiutelèfono e dat òrdines a sos collegas de sa caserma e a sos presentes.

In pac'ora benint alertados sos de sa Cuestura de Nùgoro, su cumandande de sa Cumpannia de sos carabos de Macumele, Gianvigio Curti, cussu de s'iscuadra mòbile de Nùgoro, Dejana e su capitano Gilberto Mùrgia de sos NOCS, issos puru de Nùgoro. Fintzas sa Criminalpol benit posta in alerta e sos pulitziotos de sa "Sientifica".

Mancu chi esseret iscopiada sa gherra, in tempus de mes'ora, dae Nùgoro e dae sas biddas de su tzircundàriu si ponet in motu un esèrtzitu de zente armada e motorizada chi serrant a Macumele che bidde assediada. Una mòghida de zente gai non si fit bida mai, in cussa bidde, mancu cando aiant ricatadu a Luca Loci, unu pitzinnu, fizu de unu benestante, chi pro disaogu fachiat su rallista.

In cussa note de Nadale, in su ziru de pacos minutos, ant postu a pare su de nobe secuestros de s'annu 1978.

Est su de nobe e cimbe pessonas sunt galu in manu de sos bandidos.

Non b'at coladu deche minutos, chi sunt deche, cando totu sos caminos chi moghent e arribant a Macumele sunt blocados, punterados.

In cada rucradòrju non b'at si no est carabos e pulitziotos, a tretu chi non si podet intrare ne essire dae sa bidde chene èsser controlladu.

Marco Maltesi, su cumandante de sa Cumpannia de Orane, at dispostus sos òmines suos a kontrollare totu sas bias chi dae Macumele e dae Ottana, colande in Ortzai e Teti, ch'essint a sas chimas de sa Barbaza e a su Supramonte. Àteru e tantru at fatu su cumandante de sa tenentza de Bono, chi at sistemadu sas patùllias in sos caminos de Bolòtana, Bòtida e Bultei, in cada istradone chi crompet a sas arturas a cudda ala de su Tirsu.

Àteros carabos, a grùstios, moghende dae Bono e dae Bitti ant cumintzadu a furdichinare campos e crastos, cubiles cantos b'iat interi sa Marghine e su pradu de Orune, avantzande in diretzione de Buddusò.

Sos ràdios de sos carabos si sunt allughende in focu cun sas notissias in andada e in torrada dae cada parte de locu.

Totu sa Sardinna interna, mescamente sos loco connotos pro su reparu chi dant a sos bandidos, sunt afurriados, comente in d un'assèdiu. Dae Nùgoro, Orune e Bitti a nord; dae Mamujada, Orgòsolo, Fonne, Gaboi a sud, artziande fintzas a sa capitale Ollolai, non si podet intrare ne essire chene èsser abirguados, postos fatu largu largu, sinzolados. Si podet nàrrer chi mancu un'acu bi podet colare chene la bìder in mesu de cussu ischieramentu de armados.

Ma de sos bandidos chi ant postu in pedes su secuestro mancu umbra. Bolados. Isparidos in su nudda. Non trata, perunu sinnu essit a campu.

Si no aerent ischidu, si podet nàrrer pro l'aer tocadu cun manu, b'iat de pònner in duda su fatu, su ricatu de pacos minutos in antis.

Nues nigheddas, ispintas dae su bentu de susu, si moghent in chelu che pantumas malas, apalatande s'atmosfera.

S'amicu corale de Bennardu est in carrera Reina Elena, ponende fatu a sas chertas de sa sientifica, chi pacu at de fàcher in cussu iscuricore. Non b'at àteru che de pònner sa betura de Bennardu in garàgiu e tancare.

Sirigu, su connadu, non podet fàcher mezus nen de prus. S'at postu sas manos in pilos disisperadu e nch'est curtu a domo de sa mana de Bennardu a li dare nobas de su disatinu cumbinadu.

In carrera de Roma, a numeru tentu de su 26, in pac'ora bi suprint totus, sa cumbricola chi at chenadu paris, amicos e conoscentes e non podent mancare sos operadores de sa Ràdiu Macumele, cussa ube Bennardu traballabat o, a su contadu, nd'est mere. Àteru e tantu non podent mancare sos chi si contant pro èsser zornalistas de sa bidde, collaboradores de sos zornales Sardos, mescamente de Sa Noba e de S'Unione.

Su prus ispitzu est istadu Bobore Seche de S'Unione, armadu cun sa sua infallibile istilogràfica e su sòlitu tacuinu. Totu s'apuntat, prenande de iscritura fozos e fozos, chene nche li rùgher paràgula. Un'oricra a goi, un'ocru a s'àtera, nche collit totu su chi podet amanniare sa notissia. Non nche perdet nudda.

Sa sennora Solinas, mama de Bennardu, sende chi lu conoschet bene, non lu fachet intrare a intro de domo e non li cheret rispònder, ca non sunt mamentos chi

una esseret a tretu de nàrrer cosas sensadas de pòder publicare in unu fozu ch'esseret unu zornale de bonu rispetu.

Sa sennora Solinas est tropu foras de se, cun sos ocros rujos pro su prantu e su disisperu. Non si sentit a tretu de rispònder a sas dimandas, de sas cales in pessu intendet sas paràgulas. Non petzi cussas de sos zornalistas, ma ne mancu sas de sos amicos chi chircant de la cossolare.

Sa jaja Irene Perta, chi est suprida in su mamentu, non est in cundissiones mezus. Sirigu no atuat prus nudda. Petzi sennor Zuanne si sarbat in cussu disisperu de locu e resessit galu a si l'isbroliare in mesu de tantas nobas malas e cunfusas chi si acabaddant in andada e in torrada.

Pro parte issoro, carabos e pulitzia ant tropu ite fàcher pro àer su tempus e sa gana de rispònder a sas dimandas de sos zornalistas contulàrjos. Chi isetent sa solita velina chi ant de lis colare, comente est costùmene issoro. Ma s'ora diat èsser istada sèmper tropu a tardu pro pòder detare sas nobas a su zornale chi andat in s'istamperia a bia de mesu note.

Est una notìssia de prima pàzina e, a la brincare, est a pèrder dinare, ca cussas las pacant bene. Bobore Seche non si la sentit de isetare e, a pustis de àer remonidu unos cantos elementos, chi li parent bastantes, supra sos fatos privados de sa famiglia Toniutti, de sos possedimentos issoro e gai sichinde, curret a domo sua a cumbinare su petzu pro su zornale. Cun sa redassione cuncordat fintzas s'articulu "corsivu" e nche imburzighinat cussu puru. Totu dinare est! Deretu nche telefonat a Casteddu, a banda de sas undichi. Su titulu l'ant zai pessadu in redassione e sa notìssia est issida puntuale s'in cras. Carchi mancànsia b'est, ma pacu l'importat. Est istada s'occasione pro bi torrare s'in pustis, a mente serena aende prus materiale de publicare e sèmper in prima pàzina, chi est s'importante.

Su cumissàriu Scotto at zai cumintzadu sas indazines moghende dae carrera Reina Elena, ube su crìmine est printziadu. Chircat de pònner a pare totu sos elementos chi li capitant a manu e chi podent èsser ùtiles. In caserma, a pustis, chircat de aunire e analisare cada particolare; de cunfrontare nùmenes e locos e tempos in una cherta, disisperada, de acatare unu capu da ube cumintzare; da ube abirguare unu rastu, una trata, unu printzìpiu de caminu de imbucare.

Non li paret beru, a sennora Assuntina, chi istat in cue a curtzu, de èsser posta in cunsideru dae un cumissàriu e mezus puru dae sos zornalistas chi la porrogant.

A note manna, contat e torrat a contare de àer bidu un òmine a fùrriu, in sa corte de sos Toniutti. Zurat de l'àer bidu. Contat chi fit artu e ecante istrizile. Su matessi pessonazu de su sennorinu Bennardu.

Nat chi fit a ziru in sa corte che si l'aeret a pràticu, che unu de sa domo. Non l'est artziadu a conca perunu suspetu e nàrrer chi podiat, pro pacu chi b'aeret pessadu, impedire unu ricatu. L'aiat picadu e lassadu pro èsser su sennorinu, mancarì l'esseret pàssidu istrambu chi a cuss'ora Bennardu esseret gai a ziru, ma jai s'ischit comente sunt sos sennores, chi nemos nde lis picat capu. S'amentabat peri, chi cuss'òmine zuchiat unu capeddu in conca. Custu o non custu, non aiat dadu peruna importansia a su fatu.

Sos Toniutti sunt zente reservada e de totu riguardu; sunt sennores. Custu l'aiat ingannada, ma como est cumbinta chi depiat èsser unu de sos bandidos. Si su cumissàriu si tratenet e la lassat contare, aiat finidu chi s'imbentabat àteru puru.

Ma Scotto at cumpresu s'antifona e l'at litzentziada gai. In tantis pacu de azungher at a sas indazines. Issa peroe at oramai postu in motu sa limba e totu contat e torrat a contare a sos bichinos azunghendebi un'asa cada borta.

Su cumissàriu si nch'est torrada a caserma e inibe acatat a Roberto e s'amorada e a issos depet porrogare, ca non li restat àteru de fàcher, ja i chi àteros testes non bi nd'at, mancu a los chèrre imbentare.

Mancu un'ora a pustis in carrera de Reina Elena non b'aiat prus nemos. Sos connados de Bennardu, su socru, sa mama e sa jaja si sunt serrados in sa domo de carrera de Roma in s'isetu de nobas.

Un'isetu chi àteras familias sardas aiant cumintzadu dae meda: dae su 28 de capidanne pro Peter Rainer Besuch, su tedescu secuestradu dae tando; pro Pupo Troffa dae su tres de Santandria e pacu prus o mancu dae su matessi tempus pro s'ingenieri de sa Ferrari, Zuanne Caralu Bussa, chi nche l'aiant picadu dae sa villa de Villasimius; ne mezus istabat donnu Efisiu Carta, s'ùrtimu barone de su rennu sardu, chi est mancande dae su 16 de su matessi mese e non si nd'ischit prus nudda, sende chi est betzu e malandadu de salute; dae chimbe dies a pustis est mancande fintzas Rosalba Rosas, chi sos bandidos ant secuestradu unu bortaedie cando fit essinde cun s'amoradu dae domo sua, in Nùgoro.

Su cumissàriu est torradu a caserma nigheddu pìchidu e arteradu.

Intrat a s'aposenteddu ube at lassadu, totu su tempus, a Roberto e Dumìnica, falados a pare in d una otomana.

Ambos duos pitzocos sèrios, fizos de operaios de Tòssilo, ne unu ne àteru ischint ite est sa contestassione de cussos annos; sunt zente de tzitade chi non conoschet sas lezes de sa Barbaza, ube nemos ne biet ne intendet. Issu est manibale, sèmper in cherta de traballu e traballat cando nd'acatat; issa at s'illusione de intrare in sa fràbica de s'Alas, ma chie ischit cando.

In pessu los bidet, su cumissàriu si dat una calmada, chircande de cumpàrrer serenu, mantendesi in corpus s'ira chi lu trumentat; ma non pessat mancu de lis dimandare iscusa pro èsser intradu chene mancu los abèrter e pro los àer fatos isetare gai a sa longa. Chene si nde sapire si colat sas manos in pilos a si los remunerare.

- Sedidebos in custas cadiras, ca nos chistionamus.

Roberto e Dumìnica, imbaratzados e istracos de isetare, s'acurtziant e si sedint in sas cadiras de fronte a s'iscrivania, in s'intantis chi su cumissàriu ispostat sas cartas suas apiradas supra sa mesa.

- Tando, sennorina Duminica, chircamus de nos cumprènder deretu. Si rendet contu, namus, chi dae sa relata sua dependet sa beridade supra custu fatu.

- Mi paret ...

Un'azente, mudu mudu e discretu, pedinde in pessu in pessu su permissu, est intradu in s'ufissiu e si sedit a in antis de una màchina de iscriver, prontu a cumpònner su verbale.

- A ischire comente de pretzisu sunt andados sos fatos, lu cumprèdet, est meda importante. Nos podet dare zai un'indìssiu; nos podet azudare a cumprènder cun chie amus de trattare, cun cale tipu de bandidos, cherjo nàrrer. No isco si mi cumprèdet, ma cada zestru, cada mossa, cada paràgula ...

- Ma ego paràgulas non nd'apo intesu; apo petzi bidu carchi cosa e pacu puru.

- Eja, eja, custu l'ischimus. Zai custu est unu puntu firmu: sos bandidos non ant ispizicadu paràgula, nessi sende issa presente. Pare pacu, ma est meda importante fintzas custu particolare. Si aerent chistionadu, abamus pòtidu pessare chi esserent pitzocones inespertos, a sa prima esperièntzia, chi si lassant impressionare pro sa presèntzia ispessada de zente istranza. Issa est sicura de no aer intesu mancu unu murrunzu, un'ufa, cherjo narrer un'espressione de fastìdiu?

- Su cumissà', l'apo naradu ...

- Apo cumpresu. No at intesu nudda e andat bene. Mi l'aiat zai naradu. M'iscuset est s'arte mea chi mi punghet a ripìter sas dimandas, peri zai fatos; ma a bortas non l'esseret torradu a mente carchi particolare chi non nos at galu contadu.

- No,no: Nudda.

- Apo cumpresu. Chircamus tando de torrare a amentare su naradu. Ischimus de securu chi sennor Bennardu fit ghiradu dae s'Alighera a sas tres de bortaedie cun sa 132 sua. Ma non torrat deretu a casile, ube ischimus chi non b'aiat nemos a l'isetare. Ghirat a domo de sa mama, sa sennora Jubanna Solinas, chi istat in carrera de Roma

in su numeru 26. In cue est abarradu fintzas a sas nobe de note e, pessamus, chi si siet chenadu in cumpannia de sennora Solinas, chi amus numenadu e chi est sa mama, comente amus naradu par'ora. Bi fit peri su socru, sennor Zuanne, e sa fiza sua Maria; bi fit galu sennor Sirigu, su fizu e a sa fine Vitoriu Ruju, s'amicone de sennor Bennardu, chi a su chi semus bennidos a ischire, fit andadu a s'Alighera a bisitare sa muzere de s'amicu.

A cantu paret totu custas pessones, a sa ghirada dae s'Alighera, ant festadu sa nàschida de sa pitzinna noba, totu paris e a pustis ant detzisu de finire in glòria andande a tzinema ...

- A la narrer zusta, ego de custu non d isco nudda.

- Eja, eja. Tue non lu podias ischire, ma semus ripassande sos fatos pro los cumprènder mezus. E totu custu est sutzessu intro de sas tres e de sas nobe. A cuss'ora, sennor Bennardu detzidit de torrare a domo sua a nche acolozire sa betura in su garazu. A custu puntu intras in issena tue, artis, bois duos, ca fisis paris, beru?

- A narrer su zustu ecante a pustis ...

- Zustu zustu, ecante a pustis. Ponimus chi sennor Bennardu apat istentadu 10 minutos; tando, posta in motu sa betura, ispostamentu de custa dae carrera de Roma a carrera de Reina Elena, ube issu di fatis istat, sa firmada de sa màchina, sa falada dae sa màchina e s'aperta de su garazu, a custu puntu cumparint sos bandidos, l'agantzant e nche lu garrigant a un'àtera betura de cilindrada manna e a custu puntu cumparides bois puru. Goi est, beru ...?

- Nosse, sennor cumissàriu. Ego no apo bidu sos bandidos garrigandenche su sennorinu in s'àtera betura. Cando semus arribados nois, mi pesso, su sennorinu nche fit zai garrigadu. Non m'amento de àer mai bidu su sennorinu, mancu in intro de sa betura.

- Chircamus de pretzisare sos particulares: bois sezis arribados cun sa 127 bostra a sas nobe e deche in carrera de Reina Elena.

- Su cumissà, nois no amus pompiadu su relozu.-

- Est beru. Peroe dae totu su naradu, risultat chi bois fizit a cuss'ora in cussu locu.

- Si lu narat isse.-

- Andat bene. Bois sezis arribados e ite azes bidu?

- Nois in carrera de Reina Elena depiabamus firmare sa màchina. B'aiat una alfasud ruja, targada a Casteddu.

- Est sicura de no amentare su numeru de sa targa?

- No, cumissà', non mi l'amento. Apo apidu in pessu su tempus de pompiare a intro, gai, a s'ispessada. B'aiat tres pessones. Sa chi fit in sa guida, fit un òmine artu, cun unu passamuntanna a bisiera.

- Comente fachtet a narrer chi fit artu?

- Dae sa positzione chi aiat a in artis de su volante. S'est bortadu a mi badiare, a pustis s'est ziradu a s'àtera banda, comente pro si securare chi su cumpanzu esseret sètzidu e aeret cunzadu s'isportellu. A cussu puntu est moghidu a totu fuga.

- E no at letu sa targa?

- Apo naradu chi no. Fipo badiande sa màchina de su sennorinu, chi fit firma e zuchiat sa portina aperta e su radiu sonande a totu andare. Fit bodia. Non b'aiat nemos in intro, su garazu fit apertu. S'alfasud fit isparida in d unu nudda. M'amento ecante ecante sa targa. Tando amus pessadu a su sequestru. Nos semus mirados a pare, amus firmadu sa nostra e Roberto est faladu. Est abassiadu e est andadu a sonare a sa janna de su sennorinu. Non l'at rispostu nemos. Est torradu in presse in presse in màchina, at postu in motu e semus curtos a inoche. Su restu l'ischit.

- Eja, l'isco. S'òmine in sa guida fit carotadu?

- Zuchiat petzi su passamuntanna.

- Eja, ma li cuzicabat totu sa cara o sa conca e sas olicras ebia?

- Ego apo bidu petzi sos ocros, mannos, ispaparados.

- E a pustis?

- A pustis nudda.
- Ma de ite colore fit su passamuntanna?
- M'est passidu nigheddu, ma non potò zurare de ite colore fit. Fit note, non si bidiat bene.
- Est sicura chi s'alfasud fit ruja e no in colore de arantzu?
- Ego l'apo bida ruja, ma, ripito, fit note; a s'iscuru potò àer cunfusu sos colores.
- E sa targa? Fit propiu CA?
- De custu nde so sicura.
- No at notadu si sa targa fit fissa, cussa pròpia de sa màchina cherjo nàrrer e non de cussas chi impreant sos mecànicos?
- Amento ebia chi b'aiat iscritu CA e basta.
- Duncas sa betura podiat esser de colore arantzu?
- Custu sisse, si bi pesso bene, non potò nàrrer chi no. Fit troppu iscuru ...
- Andat bene. Carchi cosa tzerta nessi bi l'amus. Sa machima: fit un'alfasud, de colore arantzu o belle e ruja, fit targada CA; in intro b'aiat tres pessones e una de issa fit arta e zuchiat unu passamuntanna in conca, nigheddu e a bisiera. A custu puntu azes pessadu chi si tratabat de secuestro. Ma cando? Cherjo ischire su mamentu pretzisu e su fatu chi bo l'at fatu pessare.
- Cando s'alfasud est moghida a totu fuga e amus bidu sa betura de su sennorinu a in antis de su garazu cun su ràdiu allutu. Est a custu puntu chi so faladu pro mi securare e so curtu a sonare a sa zanna de sos Toniutti. - E gai, a sa fine fintzas Roberto est resessidu a intrare in su negòssiu interi su cumissàriu Scotto e s'amorada. E, de pustis, at sighidu:
- Totu est sutzessu in unu sinzale de rughe; si podet nàrrer chi non nos at dadu mancu su tempus de pessare e semus curtos a inoche; fit craru chi si tratabat de unu secuestro.
- E cun custu s'est isfogadu issu puru.
- Craru; e comente?
- Fit a tardu; sa fiat 132 cun sa portina aperta e su ràdiu a totu volùmene. Alfassud de colore arantzu o rujas in Macumele no est chi bi nd'apat; antis, non m'amento de nd'aer mai bidu una e fit peri targada a Casteddu ... in fines sa mòghida a totu fuga ...
- In àteras paràgulas cunfirmat totu su chi at naradu sa pitzoca?
- Cumissà', ego apo bidu sas cosas da àteru puntu de bista. Pessones in intro de s'alfasud non nd'apo bidu, non las apo contada a su nessi.
- Cunfirmat su colore de sa betura?
- Cussu eja; fit in colore de arantzu; ma podiat èsser bellamente ruja, ca sa luce de su caminu est paca e podet ingannare a chiesisiat.
- E sa targa?
- Ego m'amento Ca, comente Casteddu. Su restu l'ischit; ite cheret cumissà'?
- Eh, ite cherjo! Nde cheriat ischire de cosas Lassamus pèrder. Bois sezis bona zente. Ma àtere... Naze, comente mai a cuss'ora fisis in cue?
- Ite?
- J'at intesu. Mi naret comente mai a cuss'ora fisis in cussu locu.
- In cussu locu? Cale locu?
- In carrera de Reina Elena. Non bos paret chi fit ecante tarditu?
- Pro fatos nostros, su cumissà': ite cheret ischire?
- Non li paret fora de norma, a note manna, a sas nobe est note, in custu tempus, e bois solos andades a bos firmare pròpiu in carrera de Reina Elena; no est cosa usuale.
- Sunt fatos privados, ite importu ant?
- Duos zovanos solos, a ora insolita, e bi sutzedit unu disatinu...
- Cumissà', ego fipo cun s'amorada mea e l'ischit totu su parentadu...
- Ite bisonzu ababes de bos apartare in unu locu gai ... a s'iscuru ... est periculosu: Non s'ischit mai su chi bi podet sutzèder, in custos tempos:

- Ego no apo nudda de timer. E nde l'apo dadu prova benende deretu a inoche a denunziare su fatu.
- Est custu su problema. Tue ebia, artis, petzi bois bi fizis.
- Su cumissà, ego no apo de rènder contu de fatos meos a nemos; isco su chi faco e ischit ite faco.
- Custu est beru. Ses unu bravu pitzocu, no apo de ti nàrrer nudda; serràmula inoche. Podides andare. Si amus bisonzu de bois ischimus ube bos chircare; za sezis de inoche. Andade, andade.
- Za fit tempus! - Roberto si pesat deretu e dat un'ocrada a su relozu. Nche sunt coladas belle e duas oras. Duas oras pro unu pòrrogu, nche li parent tropu, ma estt cuntentu chi totu esseret finidu. E cun Dumìnica s'aviant a sa zanna. Sunt pro essire, cando su cumissàriu nche ghetat un'àtera dimanda a Dumìnica:
- Nara, dias reconòscher su bandidu, biendelu, mancari in fotografia?
- No - li rispondet detzisa sa pitzoca.
- Mancu s'ocrada?
- Sas ocradas s'assimizant totus. Non fit diferente dae cussu chi so biende in cussos òmines impicados in cue in palas, in su muru.
- In pala de su cumissàriu b'aiat una cantas fotografias de zente chircada pro imputos bàrios. A los mirare pariant totu mortores e delincuentes malos; totu petzos de galera. Dumìnica e Roberto si los aiant badiados bene, in totu su tempus chi sunt isetande. A fortza de los bìder li parent chi non sunt gai malos comente si podet pessare bidendelos in cue. In fines prus che malafatores lis parent zente assustrada. Chi b'esseret cussu de su passamuntanna, pròpiu non lu podet nàrrer o si b'estt non lu podet reconòscher
- No, su cumissà'. Non nde conosco manc'unu de cussos. Zente mai bida in artis de oje. Non si podet conòscher una persone da un'ocrada.
- Andade, andade, ma non bos moghedas dae Macumele.
- Semus sèmpèr inoche. Nos podet mutire cando cheret.
- Andat bene, andat bene. Andade.
- Cumissàriu, su verbale:
- Zustu. Mi nde fit essidu dae conca. Perdonade; cun totu su chi apo de fàcher, a bortas mi nche fughit su pretzisu. B'at de firmare su verbale. Sedìebos ecante, su tempus de lu lègher e de lu firmare.
- Gai narat, ma fit unu modu suo de fàcher. Unu tentativu de pònner sa zente a pessare e de li pòder fàcher carchi àtera dimanda.
- Sos pitzocos si sedint e intendent su verbale letu dae s'azente.
- A sa fine, su cumissàriu, che dimanda de obrigu, lis narat:
- Andat bene? Est totu? Azes carchi cosa de annàngher?
- Su de nàrrer li apo naradu. Non b'at àteru.
- E issa, sennorina Melas?
- Nudda. Andat bene gai.
- Firmade inoche e adios..

CAPITOLO 2 SU PÒRROGU

Nch'est tardu ma pro su cummissàriu Scotto non est finida. In un'àteru aposentu b'est Vitoriu Ruju. Issu puru est isetande pro su pòrrogu.

Lu fachet mutire e s'òmine intrat, nigheddu, cun una cara che trumentu. Artu e grossu, unu zigante, at sos lineamentos arterados dae s'inchietùdine. Est bestidu elegante comente a cando fit andadu a sa festa de sos Perta-Toniutti.

Istringet sa manu a su cumissàriu, chi conoschet, peri chi non sient sèmper a bratzete paris. Si falat in una cadira e cumintzat su pòrrogu.

- Mi perdonet, ma sas dimandas lias depo fàcher, mancarì l'ant a pàrrer ecante indiscretas. M'est dovere. Naret, comente mai fit in carrera de Reina Elena a cuss'ora, a parte s'amichèntzia chi at cun su secuestradu, su sennorinu Bennardu?

- Ma tando est cosa tzerta chi si tratat de secuestro?

- Perdonet, ma est mezus chi rispondat cun ordine a sas dimandas. Sos contos lo lassamus a pustis.

- At resone, sennor cumissàriu. Li poto nàrrer chi non fipo inibe pro una vèsita usuale a s'amicu. Chèrjo nàrrer non fipo in cue pro cumbinassione. Est chi cun totu sa famiglia de sos Toniutti abamus detzisu de andare paris a su tzinema. Fimus ghirados dae s'Alighera, chi fimus in bìsita ca est naschida una pitzinna noba a s'amicu. Conosco a Bennardu e a Maria dae largos annos.-

E fatu fatu nch'at contadu s'andada a s'ispidale, sa bìsita e sa ghirada totu paris a domo de sennora Irene.

- Bennardu aiat detzisu de nche remonire a domo sua sa betura e ego depia colare cun sos connados a nche lu picare, ca sa mama e sa jaja si cheriant tratènnere in sa domo ch'ant in carrera de Roma.

- Comente mai fit solu in cuss'ora? Non depiat andare cun sos connados de sennor Bennardu?

- Zustu, ma issos depiant sichire cun àtera betura.

- Ah! Mi contet totu sos particulare de comente s'est mòghidu dae carrera de Roma e comente est arribadu a cussa de Reina Elena. Cada particulare podet èsser importante pro sas indàzines.

- Est su chi li fipo contande. Dae carrera de Roma nos semus mòghidos paris cun Bennardu: issu a domo sua e ego a domo a nche colare a muzere mea chi non cheriat prus bènner a tzinema, a s'ùrtimu mamentu si fit isbortada. Ite apo àer pèrdidu? Duos o tres minutos. Cando apo imbucadu carrera de Reina Elena mi so sapidu una alfasud chi mi fit benende de fronte; ma in cussu mamentu e totu at cambiadu caminu e s'est aviada in su gurutu de Quadrio, andande in sensu proibidu.

- Su colore de sa màchina. At bidu de ite colore fit sa betura?

- Eja; fit un'alfasud de colore arantzu. Unu colore istrambu pro una màchina. In Macumele non d'apo bidu mai.

- Sicuru chi fit de colore arantzu?

- Sisse, sennor cumissàriu. Fit de colore arantzu, ma prus ruja chi non groga. L'apo bida bene ca l'apo illuminada cun sos faros in s'atu chi fit imbucande in su guturu de Quadrio. Sa betura de cussos zòvanos chi sunt essidos pac'ora, non bi fit; ma deretu apo intesu sas sirenas de sas beturas bostras chi fint suprinde. Cando est arribadu isse, ego fipo falande dae sa màchina, chi aio in pessu firmadu oru oru de su coladorzu a pedes. No apo àteru de nàrrer.

- Cosa de non crèder!

- It'est de non crèder?

- Totu. Mi naret, a it'ora est mòghidu dae domo de sos Toniutti?

- A sas nobe e carchi minutu.

- Ite tempus at impreadu pro arribare dae carrera de Roma a domo sua e dae ibe a carrera de Reina Elena?

- Si b'apo postu tres minutos est meda.
- Chircamus de fàcher unu suntu. Isse cun sennor Bennardu bos sezis mòghidos a sas nobe.
- Sisse, a sas nobe. Aiat pompiadu su relozu pro mi securare chi fimus in tempus pro s'ùrtimu ispetàculu.
- Bene. Tres minutos a pustis, sennor Bennardu at artziadu sa saratzinesca. Ponimus chi tres minutos a pustis, isse fit firmande sa màchina in cue oru oru e su delitu fit cumbinadu. Si pro azunta nche dobamus su tempus de pesare sa serranda e intrare pro allùgher sa luche, su chi restat est pacu a beru. E in cussos pacos secundos l'ant tentu, nche l'ant tiradu a intro de s'alfasud e sunt isparidos.
- Li paret possibile?
- Possibile, possiile est. Est sutzessu, b'at pacu de fortzicare. S'alfasud chi at imbucadu su guturu de Quadrio si nch'at picadu s'amicu suta sos ocros suos matessi. Non s'est sapidu cantas pessonnes b'aiat in sa betura?
- Mi sunt pàssidas duas.
- Sicuru est chi non fint de prus?
- Pro chi m'isfortze non mi nd'amento prus de duas. B'apo pessadu totu su tempus.
- E in sos sediles de secus, chie b'aiat?
- No amento de àer bidu a nemos.
- Fit zente carotada? Nessi custu si l'at a amentare.
- De carotas non mi nde so segheradu; petzi una bisiera amento.
- Unu bonete a bisiera o unu passamuntagna a bisiera?
- De securu non poto nàrrer.
- Est sicuru chi non zuchiant carotas in cara?
- Mi paret pròpiu chi non nde zuchiant.
- Sennor Ruiiu, non si tratat de pàrrer o non pàrrer, las zuchiant o non la zuchiant. Si rendet contu ite cheret nàrrer?
- Depo nàrrer chi no.
- Non podet èsser prus pretzisu?
- Prus de custu non li poto nàrrer.
- Duncas non fint carotados.
- Namus chi est gai
- E fint duos.
- Nd'amento duos.
- B'at chie at naradu chi fint de prus.
- Non lu poto cunfirmare.
- Apo cumpresu. Si b'aiat un'àtera pessonna podiat èsser abassiada in palas e fit mantenende bassu su sennorinu, pro cubare s'unu e pro si cubare s'ateru. Si apuramus chi est beru su chi isse at contadu, nde podimus tirare carchi concrusione. Fint chene carota: cheret nàrrer chi non los podiat conòscher nemos, bastet chi no esseret un'istrùssia pro non dare a pessare a chie los podiat bìer. E si non fint carotados, podet chèrrer nàrrer chi non fit zente de inoche e ne mancu de fùrriu. Auguro a su sennorinu chi siet goi, ca si nono, si la passat male. Cumprendet a ite bisonzat de èsser pretzisos in sa depositzione? Una paràgula podet sumire chentu sinnados.
- Lu cumprendo, ma non poto nàrrer de prus. Mi rendo contu chi s'ipotesi sua est plausibile.
- Isse istudiat antropolozia culturale, no?
- Sisse. Est annos chi mi nde so interessande.
- E tando ischit chi in sa sièntzia sua cussu "plausibile" b'istat totu intregu; in s'arte nostra no. Una cosa o est o no est. Pro nois no esistit su fortzis, sende chi sas ipotesis las fachimus nois puru; ma como depimus andare a in antis e li depo fàcher àteras dimandas.
- Bastet chi li pota rispònder, naret.

- In custos ùtimos tempos, sennor Bennardu at manifestadu carchi timoria?
 - Suspetos no, ma sa timoria de èsser secuestradu la teniat. Antis su cumportamentu suo pariat pròpiu de unu chi timat chi nche lu pichent dae unu mamentu a s'àteru. Dae cando ant secuestradu a Luca Locci non si sentiat securu mancu in domo sua. No essiat mai a sa sola. Chircabat sèmper cumpannia. Si sentiat tentadu. Non colabat prus mancu a sa Ràdiu Macumele, sende chi est su presidente.
 - At mai manifestadu carchi suspetu? At contadu a bortas de minetas?
 - Fit suspetosu de totus, mescamente de zente mai conota; ma de nemos in particulare.
 - Sos pastores de sas tancas suas?
 - Non credo chi mancu los apet mai conotos; a su nessi, non nde chistionabat mai, si no est pro si lamentare chi sas terras non rendent prus, dae cando b'est sa leze De Marzi-Cipolla. Su brìdicu s'interessabat de sas cosas de campu e de monte. E pustis mortu issu, sa mama. Isco chi sos afàrios non l'andabant prus bene che a in antis.
 - Custu l'ischimus. Est àteru chi non cuadrat custu sero. Podimus nàrrer chi sennor Bennardu fit in pessu ghirande dae s'Alighera e isse lu cunfirmat. Chie ischiat, foras de isse, de custu fatu? Chi esseret foras, podet èsser patzificu a s'ischire, ma chi ghirabat oje?
 - Tzertu non fit difitile a ischire chi fit fora, ma fintzas chi ghirabat; non bi cheriat meda; bastabat de punterare sa domo sua.
 - E sennor Sirigu ...
 - Oh no; issu? Poveritu. Est derrutu. No est mancu chèrfidu bènner a inoche. Fit s'amicu prus caru chi aiat Bennardu. Non credo chi iscat o apet bidu prus de su ch'apo bidu ego. Custu secuestro non si l'isetabat de tzertu, ca de secuestro si tratat, beru?
 - Pro como depimus nàrrer chi eia. Sos modos sunt de calidade de unu secuestro. Ma non s'ischit mai. Fortzis su sennorinu at inimicos, chi isse non conoschet. Ite podimus nàrrer?
 - De custu non nd'isco pròpiu nudda. Ite cheret chi li naret?
 - B'at pacu ite azùngher. Ma si cussos fint chene carotas, cumprendet, sa cosa si fachet pesante. Ite cheriant? Dinare o s'òmine? Su sennorinu fachiat carchi trasmissione in su ràdiu. Fortzis at tocadu interessos chi non depiat ...
 - No isco nudda e no isco ite pessare.
 - Andat bene. Su pòrrogu est finidu. Podet andare. Si amus bisonzu lu mutimus.
 - Semper a òrdine, sennor cumissàriu...
 - Cumissàriu, su verbale. B'at de firmare su verbale.
 - Zustu. Mi nd'ismentico sèmper.
- S'azente lu leghet, chene mancu nche lu dobare dae sa màchina. A pustis su cumissàriu li nat.
- Cunfirmat totu o at carchi cosa de azùngher? Ite dia nàrrer? Un'amore secretu de sennor Bennardu? A borta custas cosas ispinghent un'òmine a fàchèr su chi mai si pessat. O chi apet àpidu carchi ribale in amore. Sa sennora Maria, a bachiana, e galu como, passat pro esser una bella fèmina e est possibile chi l'apent chircada in medas...
 - Non mi resultat nudda de su chi m'est contande. Sennor cumissàriu, it'est pessande a carchi pratu torradu?
 - Las depimus pessare totus, ca totu est possibile. Depimus indagare in cada diretzione, est s'arte nostra.
 - A mime pròpiu non resultat fatu de cussa casta.
 - Bene, bene. Firmet e si nche ghiret. Si si moghet dae bidu nos abertat. Un'ùrtma dimanda, ca la faco a totus: diat èsser a tretu de recònscher calicuna pessone, peri in fotografia?
 - Non credo pròpiu. Su caminu fit a s'iscuru e totu est sutzessu gai in presse.
 - Ma isse los at illuminados cun sos faros?

- Zustu, ma in cussu mamentu aiant zai bortadu in su guturu de Quadrio. Non m'ant dadu su tempus.

- Depo verbalizare totu?

- No est su bisonzu, Iscrive ebia chi no est a tretu de los pòder reconòscher.

- Andat bene - e s'azente iscrivet s'ùrtima riga.

Isfilat sa pira de fozos chi aiat postu in màchina, lo separat unu pro unu e los fachet firmare. A cussu puntu Vitòriu Ruju est liberu de si nch'andare e si nch'andat.

- Cumissàriu, depo pònner àteros fozo in màchina o la serramus inoche?

-Sèrrala sèrrala. Non t'abizat it'ora est?

In cussu intrat un'azente, suprinde dae su tzentru de trasmissione:

- Cumissàriu, un'òmine chi non s'est declaradu at indissiadu un'alfasud de colore aranzu, targada Nùgoro colande in Santulenardu.

- In Santu Lenardu naras?

- Sisse, su cumissàriu, in Santu Lenardu.

- E bois b'azes crètidu? Si s'alfasud fit in Santu Lenardu, ego so in Grecia. Dae su gùturu de Quadrio, s'unica essida est a su Cursu e dae cue a Nùgoro o a Casteddu.

- Nosse, sennor cumissàriu. Dae su Guturu de Quadrio est possibile a nch'essire in su caminu chi andat deretu a Santu Lenardu.

- Su colore est cussu, ma sa targa no est cussa.

- La podent àer cambiada.

- Custu puru est beru. Dae meda l'at bida?

- Un'ora e passa.

- Mandabi zente pro nos securare; ma si fit issa non s'at a èsser pipada in cue.

In domo de sos Toniutti, ub'istat sas sennora Solinas, non b'at àpidu pasu. Sos amicos e parentes fint a s'andalitorra. Petzi a tardu mannu los ant lassados in su dolore issoro. Sa sennora est falada in una poltrona, disisperada a curtzu de su telefanu. In s'isetu de una mutida.

Cando arribat Vitòriu los acatat gai. Andat a si sèder a curtzu de issa, chi lu pompiat cun ocros de prantu e disisperu.

- Maria, - Li narat.- no ischit galu nudda e cras b'at de andare a nche la ghirare a Macumele, pòvera fiza.

- Non bos preocupedas pro custu, Bi ando ego. No isco comente apo a fàcher a biazare cun issa chene li nàrrer nudda. E ite at a pessare non bidende su maridu.

- Chirca de la preparare. Cun cautela. Non t'ant a mancare sas paràgulas. Ma como bae. Muzere tua est in pessamentu. Oramai ischit totu. Fit inoche pac'ora. Bae ca t'est isetande. Nos bidimus cras.

E Vitòriu si nche ghirat, istracu e mortu e deretu si ponet a letu. Ma in domo de sos Toniutti, pacu bi dormint. Chie imbaradu a sa mesa, chie in sa cadira e chie in sas poltronas. Cussu non est dormire, cun sos ocros a s'aperi e tanca.

E su manzanu, chitulanu, nche suprit su cumissàriu. Non est cosa de mutire a casermas sos familiares de sa pessone mancante.

Lu fachent intrare a un'aposeddu bene amobiliadu cun mobiles chi pariant anticos e cun carchi pintura in sos muros. Lu fachent sèder in una cadira e sa sennora Solinas s'imbolat in un' otomana.

- Sennora, li depo fàcher unas cantas dimandas. M'est pretzisu. Chirchet de mi rispònder in taca. Cada particolare podet èsser importante.

- Ja l'isco. Est su dovere suo. B'apo a provare. Naret puru, su maressa'; o, perdonet, sennor cumissàriu. Ego pacu m'intendo de divisas e cunfundo unu maressallu cun unu cumissàriu.

- Non b'at importu. Mi naret, prus a prestu: li risultat chi su fizu aeret carchi inimicu?

- Inimicos? Ch'isca ego no. Non poniat su pede a una furmica. Issu za fit bonu.

- Supra de custu non b'at duda peruna. No est custa sa chistione. Ma est issa chi conoschet bene sa bida de su fizu; a bortas in zoventude...

- No,no. Mai. Non fachiat male a nemos. Mai una briga...

- Sennora, non ponzat fatu a sos pessos suos e chirchet de rispònder a sas dimandas chi li faco: chene duda peruna, ca no est su fizu s'acusadu.
- At resone, mi perdonet. Bidet comente so.
- Za lu so bidende. Mi naret: cantas amoradas at àpidu su fizu; in antis de si cojubare, chërjo nàrrer.
- Ch'isca ego, petzi Maria, chi a pustis at isposadu.
- Non so narande de isposas, ma amorozos gai ...
- Ite cheret chi li naret? Amoraduras gai, de pacu impinnu. Sos zovanos za s'ischit comente sunt. S'amorant e si lassant chene chi nois nd'ischemas nudda. Mai nudda de sèriu.
- No est chi nd'apet àpidu calicuna chi fit diferente dae sas àteras? Una cumpanza de iscola, carchi fiza de àmicu de familia.
- Fortzis Tzicanzela, una cumpanza de istudios. Ma non fit, mancu cussa, cosa sèria.
- Lasset pèrder su chi paret a issa e mi naret, cuia est?
- E ite importat? Sunt abarrados sèmper amicos. Est una cosa de tempos colados. Ite importu b'at?
- Podet èsser importante. Non podimus lassare perunu indìssiu. S'amentet ch'est in zocu sa bida de su fizu.
- Ma ite cheret chi bi potat intrare Tzicanzela cun su ricatu de Bennardu?
- Non s'ischit mai. Un'amore est un'amore e, sicunde comente l'ant truncadu, podet lassare rastos malos in s'ànimu.
- O no. Tzicanzela est una pitzinna discreta, bene educada, de bona famiglia. Su babu est pastore, ma sa famiglia est sèria; est zente bona ...
- Totu custu andat bene. Ma ite li tocat a sambenadu? Istet tranchilla. Amus a èsser discretos e amus a impreare totu sa cautela chi bi cheret. Sa zovana no at a bènner a ischire nudda de totu custu.
- Est de Lanus, fiza de Pera Murja, unu pastore chi aiat sas pasturas a curtzu a sas tancas nostras. Ant istudiadu paris cun Bennardu in Tatari. Issa non s'est laureada e cun Bennardu si sunt lassados luego. Aiant interessos diferentes.
- Sicura chi non si sunt prus addobiados?
- Cumissà, ite cheret nàrrer? Bennardu no at mai traitu sa muzere. Cun mecus at meda cunfiàntzia e non m'at mai cubadu nudda. Nudda de su chi est pessande bostè. Bennardu si la colabat in domo. No at ateru interessu si no est su ràdiu.
- Zustu, su ràdiu: ite raportu at cun su ràdiu?
- Bennardu est su presidente de su sòtziu.
- Custu andat bene, ma ite àteru fchet in su ràdiu. A bi traballat?
- Bennardu no aiat de traballare. A bortat interveniat a discùter sas notissias. Unu corsivista est, comente si narat in limbazu zornalisticu.
- Custu est su puntu. Podet àer ofesu calicunu. Issu fit su criticu de sas malafatas de sa comuna, de sas lotizatziones de sos terrinos frabicàbiles, de postos in comuna e in s'indùstria. A bortas si ferit prus faveddande in zenerale chi non chircande a custu o cuddu. E credo chi apet tratadu peri de custos ricatos e no est istadu meda timorosu. Su de nàrrer lu narabat.
- Custu podet èsser, ma dabat cara a no ofènder sa zente.
- A bortas paret gai e b'at sèmper calicunu chi la comprendet diferente.
- Non resesso a cumprènder ite bi potat intrare totu custu.
- Non lu comprendo mancu ego, ma non s'ischit mai. Nois depimus sichire cada rastu. Una cosa chi oje paret chene sinnadu, cras, sicunde andant sas indàzines, podet èsser importante a cumprènder. Un'àtera cosa. Isco chi paret indiscreta, ma sa dimanda lia depo fàcher. Sa nura est una bella pitzinna. In antis de si cojubare at amoradu cun àtere o est istada chircada dae àtere, zente de importu?
- Custu lu poto esclùder deretu. Fit una pitzinna sèria. Mai una paràgula mala, mai una calùnnia.

- Non cheria nàrrer custu. A la nàrrer crara crara, no apet àpidu carchi indiosadu; calicudu chi la cheriat a per fortza e si nd'at àpidu una corcofica manna, puru chene neche de sa nura?

- Custu non lu poto ischire.

- Lu cumprendo. Mi naret, issa at mantesu sèmper unu bonu tratamentu cun sa nura. Cherjo nàrrer b'andat a ispissu a domo sua.

- Custu sèmper. Inter nos s'acordu no est mai mancadu. Si podet nàrrer chi su fizu mascru l'apemas pesadu paris. Como est in domo de sa jaja.

- Cheret nàrrer chi conoschet bene sa domo issoro, fintza sas bestes e sa biancheria.

- Custu lu poto garantire.

- Nde fipo cumbintu.

In su mamentu, su cumissàriu bocat dae sa bùssia, chi zuchiat sèmper in fatu, un'imbòlicu. L'aperit e nche tirat unu mucadoreddu. est totu afrunzeddadu,. Liu presentat e li dimandat:

- At a conòscher custu mucadoreddu. Non lu tochet, ma lu badiet bene. Non mi paret difitzile a lu reconòscher. Podiat apartènner a su fizu.

Sa sennora lu badiat bene e deretu rispondet:

- Lu escludo chene duda peruna.

- Non si lasset picare dae sa presse. Lu miret bene. Est importante.

- It'est, de sos bandidos?

- Mi naret petzi si lu conoschet.

- No, no est de Bennardu. Conosco bene cada capu de bestiàriu chi tenet.

- Andat bene. Cun custu est totu. No apo àteru de li dimandare.

- Ite b'intrat cun su ricatu de fizu meu unu mucadoreddu?

- Fortzis nudda. Ma non podimus trascurare nudda; totu inoche. Mi podet mutire su sennor Sirigu?

- Deretu.

Essit e mutit a Sirigu.

- Li depo fàcher carchi dimanda. Mi rispondat in taca. Cada indissiu podet èsser importante pro sas indàzines. Non trascurat nudda. Mi naret totu su chi ischit.

- Tzertu, tzertu, comente cheret.

- Conoschiat su connadu in antis de si cojubare cun sa sorre?

- Non fimus cumpanzos, ma lu conoschia. Fit a sa manu cun totus.

- Li costat chi apet àpidu raportos cun àtera pitzoca?

- No isco. Ite raportos intendet isse?

- Raportos particulares. Carchi amurada, a nde nàrrer una.

- Sas pitzocas non li mancabant. Totus si l'inghiriabant, ma no isco fintzas a ite puntu arribabant.

- Conoschet Tzicanzela Mùrja?

- La conosco. Est razoniera no isco in cale ufissiu. Fint amicones cun Bennardu. Istabant sèmper paris, cando fint istudentes.

- Amorande, cheret nàrrer?

- Podet èsser puru. Indiosada, issa nde fit de tzertu. E non fit s'ùnica.

- Nde conoschet calicuna in particolare?

- Non mi nde benit a conca manc'una.

- Nessi una cumpanza.

- No abamus sas matessi cumpannias.

- Pessat chi s'amichèntzia de sennor Bennardu cun Tzicanzela esseret de impinnu mannu?

- Fortzis. Totu lu invidiabant ca fit una bella pitzoca.

- Ischit si àtere bi teniat a custa pitzoca, a puntu de nd'èsser zelosu, de si pònner carchi puntillu in conca? Sunt cosa chi podent capitare interi sos zòvanos ...

- Custu non mi costat.

- E sa sorre est istada mai indiosada o isposa cun àtere, in antis chi cun sennor Bennardu?
- A su ch'isco, no.
- Bi pisset bene. Non cherjo nàrrer chi esseret carchi cosa de ufiziale, ma un'indiosamentu ecante fora de su normale.
- Maria non est sa tipa chi si lamentabat de custas cosas. Podet èsser puru chi esseret indiosada de àtere, ma non l'at mai dadu a bider.
- Non b'esseret carchi zovanu chi la cheriat, namus, a per fortza? Issa puru fit una bella pitzoca. Podet àer dadu corcofica a calicunu chi bi teniat a beru.
- Sennor cumissàriu, ego non b'apo mai dadu cara e Maria non si nd'est mai bocada.
- Podiat èsser calicunu chi bi beniat a domo sua.
- Non mi nde so mai abizadu.
- A parrere suo, chie podiat àer interessu a rughinare sennor Bennardu? Cun chie podiat àer unu contu in suspesu?
- Chi calicunu b'esseret, podet èsser puru, s'invidia non mancat mai.
- Non si tratat petzi de invidia, s'est, est cosa manna. Sennor Bennardu traballabat in sa Ràdiu Macumele; carchi inimicu si lu depet àer fatu o nono?
- Bennardu non traballabat in su Ràdiu e sa collaborassione sua za fit paca. Non s'interessabat de sas notissias chi beniant trasmittas.
- Peroe nde fit su responsdabile.
- Custu est beru, ma sas notissias non fint anonimas; fint firmadas dae sos currispondentes e collaboradores e totus ischint chie sunt.
- Apo cumpresu. Miret cussu mucadoreddu, ischit de chie est? L'at mai bidu in manos de sennor Bennardu?
- No. No amento de bi liu àer mai bidu.
- No. Non lu tochet. No est importante. Mi naret: chie podiat àer interessu a nch'eliminar a sennor Bennardu?
- Nemos, chi ego isca. E chie podiat àer unu interessu simile? Ite mi cheret nàrrer, sennor cumissàriu, chi l'ant mortu? Azes ischidu carchi cosa istanote?
- No,no. Istet calmu. Peruna notissia. Ischimus petzi chi nche l'ant picadu. Est chi cada indissiu nos est pretziosu pro li sarbare sa bida e su patrimoniu e s'est possibile pro arrestare cussos delincuentes. Custu nos interessat, peri si isse est pessande chi l'apent lebadu pro nch'eliminar.
- No,no. Ego non so pessande custu. Mi pare chi custu isse mi chèrjat fàcher crèder.
- Tranchillu. Non semus galu a custu puntu, mancarì totu podet sutzèder in un ricatu. In concrusione isse negat chi si potat tratare de un'òmine ch'apet àpidu una mezzana corcofica o de una fèmina ingannada dae sennor Bennardu, in pitzinnia ...
Su cumissàriu ischiat chi in tempos colados, non pro un'ingannu, ma pro àer ebia cantadu in poesia sa beridade e de àer abirgonzidu una zovana de bona famiglia, unu poeta locale l'aiant pacadu cun un'ispinta in unu trocu malu. Sos malumores pro amore non fint gai fàtzile a ismaltire in sa bidada de Macumele e mancarì b'èsser coladu unu seculu dae tando a como, non s'ischit mai. Sa zente non càmbiat gai in presse e sos sentidos mescamente abarrant.
Sirigu negat sèmper e totu. In cussa diressione b'aiat pacu ite fàcher. Tando nde tentat un'àtera.
- Isse est andadu a s'Alighera cun sennor Bennardu, zustu zustu eris manzanu. Non li paret curiosu chi pròpiu eris sero nche l'apent picadu, eris sero cando s'est ischidu chi li est naschida sa pitzinna? Chie podiat ischire de sa torrada?
- No est cosa ch'isco.
- Ischit si per casu b'at àpidu malumores in famiglia pro sa partimenta de sos benes de su zaju de Bennardu?
- Sirigu sichit in sa negativa e su cumissàriu si bidet custringutu a nche la secare in truncu; lu litzentziat e issu puru si nd'andat.

S'ABOCADU E SU MISSU

Est cumintzadu male su 1978 e est fininde pejus. S'ùrtima morte l'ant fata in ghennarzu e est sa de 43 de custu annu. Unu craparzu de Benettutti fit chircande sa roba chi nche l'aiant furadu. L'ant amarturiadu a istocadas e, pustis, una fusilada pro nche lu finire in presse. Fit cumuintzada gai sa gherra pro sas pasturas, chi si s'est istringende sèmper de prus, ca su bestiàmene est in aumentu, pacu prus o mancu tres miliones de capos in d unu territòriu sèmper prus istrintu, ube azomai non nde podent pàscher mancu sa midade.

In su matessi annu sunt cumintzados sos secuestros, oramai chene régula peruna. Una costumàntzia, sèmper respetada in su coladu, l'ant violada como: su respetu de sas criaturas. Nch'ant picadu a Mauro Carassale e ant sichidu cun Luca Locci.

Non podet mancare una fémina e sos bandidos, in cust'annu, nch'ant ischertadu una bachiana de dechessette annos, Pascualba Rosas, fiza de su primu de sos bandidos de prendas chi si podet acatare. Nche l'ant picada a die die in d unu caminu in mesu bidda. Su 21 de santandria, festa de Sas Grassia, non b'at zente in sas carreras a primu bortaedie. Est in pessu essinde dae domo cun s'amoradu pro andare a sa nobena, cando una betura l'at custringida a artziare a supra. Ite est istadu? Unu nudda e sa màchina est falande cara a Uliana, picande s'istradone chi abassiat in pedes de Santunofre

Dae cue si podet picare cada afilada. Prus che su pacu tempus chi b'at chérfidu a nche prelevare sos duos ricatados, sa fémina e s'amoradu, los favorit sa conoschèntzia chi ant de sos locos, in antis chi cumintzent sa chirca.. S'ant istudiadu cada movimentu. Carabos e politzia, in pessu abèrtidos, ant istabilidu sos postos de bloco e sas chircas in cada parte de locu netzessàrias. Totu inùtile e pro sos Rosas printzipiat longu s'isetu de àer nobas dae sos bandidos e sas tratativas chene fine.

S'amontare de su ricatu lu benint a ischire in pessu liberant s'amoradu. Chi s'esserent preparadu 800 miliones si chere chi lis torrent fiza e sorre. Su 27 de nadale sos Rosas narant galu de no àer perunu indissiu dae sos bandidos. Su zocu est cussu. Amiter nudda, mai; cunfirmare nudda, mai. Petzi pacas paràgulas, cussas pretzisas e basta.

In su mentras, a in antis de sa fatzada de Sas Gràssias b'aiant postu una tela pintada che pandela, manna de chimbe pro sete metros, illustrada cun totu s'esperientzia ch'aiat, dae unu pintore locale. Fit unu Zesus criaturedda, a buca tancada cun d una veta e bardadu a vista dae sos bandidos carotados a mitra in manos. In su fundale sas zimineras artas de Ottana cun sos operajos in issòpero acurtzu a una barraca de pastores: Totu sos sinnos de sa Barbaza in crisi chi nch'at pèrdidu totu sas andatas de sas costumàntzia anticas.

Sos Rosas sunt chircande dinare a sa disisperada, pro collire su tantu chi lis ant pedidu. In prus sa leze lis at firmadu sos benes de familia. Sos bandidos non si fachent acatare a sos addòbios cun sos emissàrios pro pòder tratare. Cherent, in purtzione, prus de cantu ant pedidu a Anna Gabella, muzere de Pupo Troffa, pro su cale pedint unos tres miliardos. Comente esserent tres castanzas e bator nde isetant pro su Donnu Efisio Carta, chi nch'ant picadu unas cantas die in antis. Nche l'ant picadu dae una cussorza sua a banda de Aristanis e no ant prus fatu ischire nudda.

Anna Gabella at retziu nessi sa de duas literas su chimbe de nadale ube su maridu contat de istare bene. Sas tratativas andant a in antis, sende in mesu sos impedimentos chi lis ponet sa leze. In sos zornales cumparit custa essida: *si mi dazes unu fuste apo a custringher sa zente a vivere o mòrrer pro issu*. Est crara una boche dada a notu a sos bandidos chi petzi issos nde cumprendent su sinnadu.

Sas tres fèminas de sos Toniutti sunt galu in isetu chi esseret sonadu su telefonu. Angela Maria cun sa socra Giovanna Solinas e sa jaja Irene Crobu Bertini non lis essit mancu prus tziulu, si no est cando si lis acurtziat Sirigu Gallisai. Su jaju de Bennardu si nch'istat in àteru aposentu chene ischire ite fàcher, pompiandesi in su mentras sos zornales. A su

frùschiu de su postinu, de isbotu, paret chi sa domo torret a biba. Jaja e socra current a zosso a ischire de nobas. S'ispera chi sient sos bandidos si lis bolat suta manos. Su postinu li cunsinnat duos telegramas: unu de Luca Locci, s'àteru de sa mama, chi non sunt andados a las bisitare, ca nche sunt ambos in Roma. Sunt cun su babu e maridu ch'est impinnadu in d una cursa de automòbiles.

A las chircare andat sa muzere de Predu Riccio, ricatadu e mai torradu a domo, mancu a pustis de àer pacadu su ricatu. E gai in domo de sos Toniutti s'annaghet un'àtera pessone chi non at e non fachtet àteru che pràngher. Si colant una bella iscuta paris.

Intantis a su cumissàriu Scotto non l'abarrat che de torrare e sichire a indagare in Macumele, si li resessit de buscare carchi informazione de importu.

Cussu ricatu est o li paret diferente dae sos àteros, a su cumissàriu Scotto. B'at carchi cosa de apurare in s'ambiente matessi de sos Toniutti. Cuddu mucadoreddu li ballat in ocros die e note. Non est de su ricatadu, a cantu aiant relatadu sa mama e s'amicu de Bennardu. bi mancat sa cunfirma de sa muzere, chi podet esclùder de tzertu chi cussu istratzu siet de Bennardu.

Sa sennora Maria est ghirada s'in cras sero chi nch'ant ricadu su maridu. Est andadu Vitòriu Rujù a nche la ghirare.

Su cumissàriu l'acatat in letu, ca est galu tropu débile pro si pesare e in prus est derruta dae su disisperu chi sa mancàntzia de su maridu li causat.

Non est a tretu de rispònder comente su cumissàriu cheret, ma pacas dimamdas lias depet fàcher.

- Nono, sennor cumissàriu, liu poto garantire, mai una paragula mala b'at àpidu inter nos. Est istadu sémper premurosus e fit cuntentu mannu de àer custa criadura.

- Issa ischiat de Tzicangela Murja? Sennor Bennardu nde l'at chistionadu ...?

- No, mai. Su coladu no at importu pro nois.

- Ischit si si sunt torrados a bider cando bois fizis isposos o a pustis? Perdonet si insisto, ma podet ésser importante. B'at in zocu sa bida de su maridu, mi comprendet?

- No, no. Poto garantire pro issu. Non mi cubat nudda de su chi fachtet o li sutzedit in foras. Non apo mai intesu mancu una calùnnia in totu custos annos chi semus cojubados.

- Sennora Maria, chirchet de fàcher un'isfortzu, de si fàcher memoria: mi naret craru craru, comente a unu cunfessore, si b'at àpidu àteru òmine in sa bida sua.

- No, sennor cumissàriu, liu poto jurare supra custa criaduras.

- Non si lasset traìcher dae sos sentidos de oje. Chirchet de rispònder in taca. In antis isetet chi l'acraro su pessamentu meu. Non cherjo nàrrer chi issa apet àpidu un'amicu; no est custu, ma si est bènnida a conoschéntzia chi carchi pitzocu de Macumele o de sas biddas a fùrriu esseret indiosadu de issa in manera non usuale, namus meda forte e si siet crètidu trairu. Namus unu de cuddos amoronzos chi lassant su sinzale e dae amore si podet bortare in òdiu. A fines, issa fit e est una bella fèmina; non la det àer chircada petzi unu ...

- Chi b'esseret calicunu indiosadu de mene, custu l'ischio; mi lu contabant sas cumpanzas, ma non m'amento mancu su lùmene issoro. Non las credia cosas sérias o nessi goi mi pariat.

- No at mai amradu, mai cun nemos in antis? Mancari pro pacu tempus e depustis at truncadu chene dare peruna ispiegatzione?

- Custu non lu poto negare. Calicunu chi piachiat a mime puru bi fit; ma totu si tancabat in cue.

- Calicunu fit contràriu a si cojubaret cun sennor Bennardu?

- De sos de domo, chi isca, nemos. De sos Toniutti non m'ant fatu ischire mai nudda. No apo idea chie podiat ésser contràriu. Fit fizu solu e totus lu cheriant bìder cojubadu.

- Pròpiu gai. Lu cheriant bìder cojubadu ma cun chie? Non bi fint petzi sos Toniutti; depimus pònner in contu sos Muras e su restu de su parentadu.

- No isco, no isco, no isco. Amus sémper mantesu bonas relassiones cun totus sos parentes. Àteru, ite cheret chi l'annaga?

- Nudda, nudda. Tranchilla. Mi bastat custu. Ma pro ite s'est fata ricoverare in s'Alighera, sende chi in Nùgoro b'at una clinica ostètrica de bona fama?

- Ca b'amus amicos in s'Alighera.

- Petzi pro custu? S'est abizada si a bortas, in uspidale, calicunu istranzu bos poniat fatu, mancari largu largu?

- No, sennor cumissàriu.

- Su maridu non l'at mai manifestadu carchi timoria?

- Custu sisse: Bennardu timiat de esser secuestradu da unu mamentu a s'ateru. Lu juchiat che cravu fissu in conca., mescamente dae cando nch'aiant secuestradu su fizu de Locci.

- Ite fundamentu podiat àer sa timoria sua? Si nd'est mai bocadu?

- Bocadu no, petzi est chi no essiat mai a sa sola; si chircabat sèmper cumpannia. Est fintzas pro cussu chi m'at fatu ricoverare in s'Alighera. In Nùgoro non si sentiat securu.

- Biende est chi carchi cosa b'aiat.

- A b'àer non b'at nudda. Sa familia sua est meda conota in Macumele e passat pro èsser benestante, prus de su chi est. Est custu chi lu poniat a s'alerta. Fintzas Locci non est chi aeret àpidu su dinare a imboladura e sende gai nche l'ant secuestradu su fizu Luca.

- At letu su ch'iscrivent sos zornales?

- Los apo letos, los apo letos. Bell'azudu nos sunt dande. Non cumprendo a ite nch'ant postu in mesu sos Massaros. Cussos si chi ant atividades chi rendent, ma sunt in pessu parentes dae largu de Bennardu. Ant chistionadu de terras! Cale terras? Totu ischint candu rendent in afitu oje. Cando fit bibu su bridicu de Bennardu, chi si nde interessabat, tando rendiant, ma como? Non nos bastant mancu a nos campare e Bennardu fit chircande ocupassione. Sas domos chi ant in bidda? Fintzas cussas a afitu blocadu, non rendent una misèria. Socra mea est sèmper in cherta de si bender sa terras, ma no acatat mancu chie las comporet, ca bi sunt sos pastores in intro.

Si su cumissàriu l'aiat lassada allegare, fit istada a chistione galu oje. Aperit sa balizedda chi zuchet semper in fatu e nche bocat su mucadoreddu, isterrendeliu supra sa manta.

- Naret, ischit de chie est custu?

- E it'est?

- Unu mucadoreddu.

- No, sennor cumissàriu. Mai bidu in antis de oje.

- Est segura chi non est de su maridu?

- A ite m'est nande custu? Ite m'est cubande? Bennardu est bidu, a beru sennor cumissàriu? Non l'ant mortu, no ...

- Nois ischimus petzi chi nche l'ant picadu.

- Non pro l'ochider, beru?

- Nos auguramus chi nono. Semus fachende su mèdiu pro l'impedire.

- Tando est in perìculu. Cheret nàrrer ch'est in perìculu?

- Pro como est petzi ricatadu. Est in manos de malafatores. Totu dipendet dae issos. Totu est possibile. Isco chi issa est débile. Est torrada s'àtera die dae s'uspidale; ma est una fèmina forte e si depet fàcher corazu e depet èsser pronta a parare fronte a su chi b'at a sutzèder. Pro cantu nd'ischimus nois, sennor Bennardu nche l'ant picadu a iscopu de ricatu. No est su primu, ocannu, e galu no ischimus si at a esser s'ùrtimu.

- Custu mucadoreddu est de unu bandidu. Bennardu nche liu at istratzadu dae cara...

- Zesus Maria! Podet àer conotu su chi nche lu fit picande e como est in grandu perìculu. Deus sarbet. A disfortuna ch'at apidu! Maridu meu...

E sennora Maria iscapat in d un prantu chene fine.

- Sennora, istet tranchilla. Non b'at galu sutzessu nudda. Non b'at nudda de securu. Podet èsser gai. ma fintzas diferente. De tzertu no ischimus nudda. Podet èsser de persona chi non b'intrat nudda cun su secuestru. Podet èsser un'istrùssia pro bos aumentare sa timoria e pro bos cumbincher a pacare prus in presse.

- Nono, sennor cumissàriu, chi no est gai. Lu sento. Bennardu est in grandu perìculu.

- Ch'est in perìculu l'ischimus totus. Ma nois amus a fàcher cada mèdiu pro chi totu si concruat bene. Si benit a ischire carchi cosa chi potat infruire in custu fatu nos informet deretu. Pro su restu lassade fàcher a nois. Sennor Bennardu at a torrare sanu e bidu. L'at a costare, non naro chi nono, ma at a torrare.

La salutad e si nd'andat, lassandela cun sa socra e cun disisperu issoro, chi s'aunit a cussu de sos parentes de sos àteros secuestrados. Bi nd'at in cada parte de locu. Sos malafatores sunt iscadenados e in totube ant semenadu prantu e disisperu

Su pintu de Sas Grassias non est in cue de badas. Su 21 de santandria, di fatis, sa die de sa festa, sa festa relizosa prus manna de Nùgoro, a s'ora de sa protzessione nd'ant prelevadu, comente contadu prus a susu, una zovana, Pascualba Rosas cun s'amoradu. Pascualba est sèmper in manos de bandidos comente sos àteros chimbe ricatados. Petzi s'amoradu aiant lassadu deretu a fàcher de missu, informande sos familiares de su tantu chi cherent pro la liberare. Sos Rosas sunt in cherta disisperada de dinare, ma sa sennora Solinas, sa mama de Bennardu, de su fizu no ischit galu nudda.

Mama, e zajos sunt sèmper mudos acurtzu a su telèfono in s'isetu de una mutida Nudda. Cando unu bortaedie sonat su postinu, sunt pessande a sa prima litera, a su primu addòbiu, ma nudda. Sunt duos telegramas de sos amicos chi sunt zai colados in cussos pannos. Ateros parentes de secuestrados andabant a los bisitare, comente b'est andata sa muzere de s'abocadu Eritu, chi aiant mortu a pustis chi aiant pacadu, de badas, su riscatu

Sennora Solinas detzidit de mutire s'abocadu de sa famiglia, Perantoni Boi, conotu dae totus comente Antonio Boi, ca s'àteru lumene non paret bellu, "tropu sardu", chi s'esseret incuradu de chircare unu emissàriu, in pessu fit netzessàriu, e aeret tratadu su riscatu, ca issa no ischiat mancu ite fàcher.

Sa cosa non nch'est fughiat a Bobore Seche su zornalista chi s'incras la publicat in zornale, nande, a pessu suo, chi s'abocadu at àpidu fatu de emissàriu e chi fortzis sos bandidos si sunt zai fatos intènder, sende chi sa famiglia de su secuestradu negat totu, comente b'aiat de s'isetare.

S'abocadu est andadu a chistionare cun sas tres feminas, muzere, mama e zaja de Bennardu Toniutti. B'at de picare acordos e de chircare de nd'ischire de prus de su chi publicant sos zornales, chi issu leghet cada manzanu.

Sennora Maria li contat de su pòrrogu de su cumissàriu Scotto, mescamente de su mucadoreddu chi l'at posta in penas prus mannas.

- Nos at fatu bìder unu mucadoreddu imbolicadu in papiru de zornale. Nos at pedidu de cunfirmare si est de Bennardu o de persona nota.

E sennora Maria nche l'acabat in cue, ca nche li falant sas lacrimas. Ma sichit sennora Irene:

- Non nos at chèrfidu nàrrer si est de sos bandidos, ma nos l'at fatu cumprènder. Antis non l'at esclusu. M'est pàssidu unu mucadoreddu impreadu pro cuzicare una cara. Fortzis Bannardu nche l'at istratzadu a calicunu cando nche lu fint picande. Si sos fatos sunt andados goi, Bennardu est in perìculu mannu; in perìculu de morte.

- Firmade, firmade; chi no est totu gai, comente bos paret. Est possibile chi si tratet de un'istrùssia de sos bandidos pro bos fàcher pacare prus in presse bestindebos timoria. Non diat èsser sa prima borta.

- Fintzas su cumissùriu nos at naradu sas matessi cosas, ma deo so timende.

- Non b'at de si preocupare prus de su netzessàriu. A su ch'iscrivent sos zornales non b'at àpidu gherrizu. Cheret nàrrer chi sennor Bennardu non l'ant lassadu mancu su tempus de nàrrer paràgula.

- A nch'istratzare unu mucadoreddu dae cara est unu nudda.

- No esazeremus. Sennor Bennardu est una persona responsàbile e un'atu gai non lu diat fàcher mai; ischiat chi podiat rischiare sa bida.

- Cando unu est disisperadu ...

- Non bi pesso nemancu. Prus a prestu, pessade a comente ponner a pare su dinare chi ant a cherrer pro lu liberare. Custu est importante. Cunsiderade chi no ant a èsser

masedos e chi dinare bi nde cheret a beru. No est zente chi si cumovet pro b'esserent in mesu pitzinnos minores, antis, in pessu naschidos.

Est su modu pro las torrare a cosas pràticas. Non est tempus de istare isbarionande. B'at de si mògher e chi si mògant.

Sa sennora Solinas lu cumprendet bene e lu salodat cando si nch'est andande.

S'istoria de su mucadoreddu li ponet pistichinzu. A sos Toniutti non l'at dadu a bìder, ma no est cosa de trascurare. Su suspetu de sa sennora Solinas non est chene fundamenta. Ghirat a s'istùdiu suo e deretu s'atacat a su telefono. Cumbinat un'addòbiu cun su cumissàriu Scotto e cun su capitanu Curti. S'at de si mogher, cheret ischire comente e in cale diretzione.

- Su mucadoreddu b'est e comente - li cunfirmat Scotto e liu isterret in da in antis, gai comente l'at collidu.- E su pejus est chi zuchet duas puntas afrunzeddadas comente chi esseret ligadu a nodu mortu.

Antoni Boi li dat un'ocrada e si cumbinchet chi est gai.

- L'apo acatadu in su garazu de sennor Bennardu, acurtzu a sa serranda, da ube nche l'ant prelevadu. Chi siet serbidu pro carotare unu bandidu est possibile, a dolu mannu de su ricatadu, chi nche lu depet àer istratzadu dae cara de unu de sos malafatores. B'at de pessare chi sennor Bennardu nche liu apet istratzadu cun sa fortza de sa disperassione e cun s'ispera chi l'aerent lassadu andare. Non est andata gai, ca nche l'ant picadu e totu; sinzale chi si tratat de zente chene perunu bonu sentidu, disposta a totu e segura de fatos suos. Goi paret nessi, dae su chi semus bènnidos a ischire e cumprènder. Non resta che s'ispera chi sennor Bennardu, in s'iscuricore de su garazu non apet bidu in cara su bandidu o chi custu pisset chi non l'apet conotu.

- In àteras paragulas, isse est cumbintu chi custu istratzu apartenzat a unu de sos bandidos.

- Non mi benit àteru de pessare. Sa notissia, lu cumprendet, est secreta e tale depet abarrare.

- Supra custu non b'at duda peruna. Est in zocu sa bida de Sennor Bennardu.

- Custu puru l'apo cumpresu. Sa situassione est prus grave de cantu si podiat pessare.

- Meda grave. Abocadu istimadu, meda grave - insistit Curti.- Su fatu est delicadu. Isse lu cumprendet: S'atrivia est chi sos bandidos tentent de incassare su riscatu e ochidant su ricatadu pro no èsser iscopertos. Inoche est bisonzu chi sa famiglia si mogat a unu cun nois; b'at pacu de fotzicare, cumprendet?

- Si lu cumprendo! Ma no isco comente s'at a pòder fàcher.

- Ant retzidu carchi imbassiada?

- A su ch'isco non si sunt galu fatos intènder.Sa betura est istada acatada a lacanas de Orune e Benettutti, comente ant publicadu sos zornales?

- Custu est securu e ego so cumbintu chi in custu secuestro b'at in mesu zente de Orune. Petzi issos podent conòscher cussos caminos chi lis ant pèmitidu de essire dae Macumele chene incapare in sos postos de bloco. Cussa est zente chi conoschet non sos caminos ebia, ma peri sas camineras dae tanca in tanca.

Depent èsser colados dae Mularja, Monte Rasu e sa badde de su Tirsu fintzas a Barranzellas. Dae cue no ischimus comente apent sichidu. Fortzis in betura pro carchi tretu, fortzis a pede. In ube si sunt imbertos l'ischit petzi deus.

- Pessades chi si tratet de contos in suspesu?

- Cale contos? - Li torrat Curti - De secuestro pro dinare si tratat. Unu ricatu est e bastat.

- E sa simca de sos zornales?

- Non nd'ischimus nudda. Est bera? Est un'imbentu de zornalistas? Boh!

- Bruta fatzienda est!

- Chie at a èsser s'emissàriu? L'azes zai chircadu?

- Non galu e no isco chie at a pòder èsser, in custu ricatu gai difitzile.

- Si lu chirchet bonu e nos informet, si cheret collaborare. Lu chirchet bonu, chi siet capassu de trattare cun zente chene cussèntzia.

- Apo a bìder. Si b'at nobas, nos torramus a intènder.

- Facat comente li detat sa cussèntzia; est interessu suo a nos chircare e a traballare paris.

Si salutant e s'abocadu si nch'andat

Torrat a s'istùdiu, ma su pistichinzu, non de minguare l'est aumentande. Depet fàcher àteru, non est ora de si firmare. Cada mamentu podet èsser pretziosu.

S'amentat chi su zuze istrutore cumpetente de su fatu, ch'istat in Aristanis, ube traballat, est unu cumpanzu suo de iscola. non b'at che de lu mutire e cumbinare un'addòbiu peri cun issu.

Li rispondet deretu e sende a tardonzu, amentandesi de s'amichèntzia chi aiant cando fint istudentes, li narat de falare a Aristanis, mancarì deretu, si pròpiu at presse e si sa cosa est de tantu importu.

Torrat a sèder in màchina e in pac'ora est in s'istùdiu de s'amicu.

L' acatat chi est leghende; a moda sua. At una domo, chi non est domo. Paret de intrare a un'aula de tribunale. Sos mòbiles sunt de nughe, de colore iscuru e sa domo, a fùrriu a fùrriu, prena de iscafales gàrrigos de libros e zornales de leze. Supra s'iscrivania una pira de cartas chi non si cumprendet si sunt pertinentes a sos protzessos o a iscrituras suas. Ma un'iscafales est prenu de libros sardos. Su zuze non nch'at pèrdidu s'abitudine e sa passione pro sa limba e sa cultura sarda. B'at de totu: libros de istòria rechetes e anticos; contos e poesias; medas, si bident, sunt grogos comente chi esserent istados annos in su fumu de sos cubiles; grobes, poesia popolare e literadas. B'at de pessare a beru chi lios aerent regalados sos pastores chi conoschet, publicados in fozos minoreddos dae istamperias locales, de cussos chi si bendent in sas festas de àteros santos in cada bidde.

Suta ocros peroe zuchet leghende unu libru de unu collega suo de Nùgoro, chi nche esit finidu in continente comente zuze e chi est diventatu pustis mortu unu famadu iscritore; ant publicadu unu libru suo chi chistionat de sa familia sua pròpia e de sa Nùgoro de àteros tempos.

Est andadu a l'adobiare a sa janna e l'at fatu sèder in una poltrona e issu de fronte; non cheret chi su negòssiu apat su sapore de unu pòrrogu. Depet èsser una cosa inter amicos.

- Lassamus perder totu sas letrancas e benimus deretu a su fatu, - li narat. - Si m'as chircadu no est de badas. Cosa manna b'at.

- E cosa manna est. Si tratat de sa bida de Bennardu Toniutti.

- Apo cumpresu, s'urtimu chi nch'ant ricatadu in Macumele. E tue ite b'intras?

- Sa famiglia ...

- Zustu, at ingarrigadu a tibe de t'incurare de sas tratativas. Ma ant zai retzidu carchi imbassiada?

- Galu nono.

- Credia ... Ma in tantis, non diat èsser bonu a nos cumbidare? Si b'at una ampulla in mesu si negòssiat mezus.

- Non nch'as pèrdidu s'abitudine!

- Sas bonas abitudines non si perdent mai. Bastet de no brinchiare su l'imate. A sa sola non bibo mai, in cumpannia carchi cosa mi la permito. Nara, ite preferis? Unu tzichete de rosoliu, de filuferru o ti bastat su binu? Mi nd'ant batidu unas cantas ampullas dae Jerzu. Ischis chi in zona sos binos bonos non mancant, ma cussos istranzos parent prus bonos. B'apo fintzas binu bonu macumeresu, de terras de Bara, ma non mi mancat su cannonau de sas cantinas barbarichinas o binos de s'Alighera.

S'abocadu non s'isetabat tantu acasazamentu, ma nd'at piachere.

- Mi diat andare unu cannonau de Jertzu. L'apo intesu bantare meda.

- E siat. Mira, s'ampulla est inoche, totu pro nois.

S'abocadu si pompiat cussu binu prenande su caliche chi su zuze l'at postu a in antis. Su colore est invitante. Azicu grogònzù, trasparente e su lu bider ebia nde fachet batire sa gana de lu bufare.

Su zuze s'at prenadu su caliche suo e s'est torradu a si sèder in sa poltrona de fronte.

- A sa salude, che in àteros tempos!

- Salude.

E ambos nde bibent una bubulicada, comentate a si lu tastare bene. S'abocadu si pessat chi bi cheret a beru cussu lubrificante a s'infunder sa buca e su gurguzu, chi su fritu de su biazu l'at sicadu.

- Como podes nàrrer, ma amenta sa positzione mea. Non mi ponzas dimandas chi non ti pota dare risposta.

- Ti fipo nande de su secuestro de Bennardu Toniutti. Lassamus perder totus sas fantasias publicadas in su zornale. Dae su ch'isco ego custu secuetru presentat un'aspetu chi dat ite pessare.

- E cale est custa cosa gai trazica? Conta e bidimus si ti poto èsser de azudu. Podet dare chi sos suspetos no apent fundamenta o si l'ant bidimus paris su de fàcher.

Chene pònner àteru in mesu, Antoni Boi nche li contat de su negòssiu cun sos familiares e cun Curti e Scotto.

- A dolu mannu pro sennor Bennardu, su fatu est beru. A mime puru l'ant contadu gai.

- Sa familia m'at dadu s'ingarriga de chircare un'emissàriu e de trattare ego totu su problema. Su chi timo est chi sennor Bennardu apert bidu in cara carchi bandidu, ca cheret nàrrer ch'est in periculu de bida, si puru est galu bibu.

- Totu custu est possibile. Ego puru l'apo pessadu e apo dadu òrdine a sa zustissia chi si mogat cun cautela manna. As zai pessadu a chie ingarrigare comentate missu?

- Un'idea bi l'apo puru ...

- Missu bonu bi cheret. Custa borta non basta su solitu pride. Bi cheret persona chi iscat trattare. Dia nàrrer de prus: chi iscat indagare si su suspetu nostru currispondet o si nono. Ca si currispondet, bi cheret un'interventu particulare. Non bastant carabos e puliziotos, bi cheret sa Criminalpol, chi interbenzat a su mamentu zustu, si cherimus sarbare sa bida a cussu mischinu disfortunadu.

- Su puntu est propiu custu. Non est bagatella!

- Persona esperta bi cheret, ti so nande; mezus puru s'est de s'ambiente.

- Un'àteru bandidu?

- Como no esàzeres; mancarì diat èsser s'unica, no est custa sa bia chi podimus imbucare nois. Zente de campu o de monte, cherjo nàrrer.

- Custa l'ao pessada fintzas ego, ma est bisonzu chi s'emissàriu, nessi in sos primos mamentos si potat mògher chene impedicu perunu e chi nemos benzat a l'ischire. In ateras paragulas depet abarrare secretu.

- Sa proposta mi paret zusta e so dispostu a mi picare s'impinnu. B'at in mesu sa bida de un'omine; antis, namus chi sa bida de cust'omine est in pisiliche.

- Mi paret pròpiu gai.

- Andat bene.- E si nche pesat e andat a s'iscrivania, picat sa pinna e iscrivet.

- Mantene, custu est su nùmeru de telefono meu, de s'ufissiu, su nùmeru in diretta, si serbit cando so in servitziu; su de suta est su de domo. Si b'at bisonzu mi podes mutire; apo a fàcher su mèdiu:

- A calesiat de ora?

- A calesiat de ora. E auguramus chi nos andet bene, antis, chi l'andet bene.

- Isperemus.- E s'abocadu si pesat ritzu cun su caliche in manos.

- Sedi chi li ponimus s'istafa. Non t'apo naradu chi s'ampulla est totu pro nois.

- Ja mi l'as naradu, ma no est s'ora nen su mamentu. In àtera occasione non nd'abamus lassadu gùtia. Còllilu a sos concruos de s'afàriu.

Li ghetat sa tassa de s'istafa e Antoni Boi si nche la bibet a un'ingurtia. Si saludant e issu torrat deretu a Macumele.

Mancu bene arribadu e est torra atacadu a su telefono. Cada mamentu podet èsser pretziosu. Mutit a su motel de sa bidida.

- Zuanne b'est?- dimandat.

- No; no est de servitziu custu sero.

- Mi diat su nùmeru de domo sua.

Lu detant e deretu lu cumponet, ripitinde sa dimanda a su primu prontu.

- Chie lu cheret?

- Un'amicu.

- Isetet chi lu muto.

Zuane ispartadu dae cussa telefonada chi l'arribat a s'ispessada, curret a su telefono, no esseret sutzessu cosa in campu, a sas bèstias suas.

- Ite b'at? - Dimandat deretu.

- Nudda, nudda. As cumpresu chie so?

- Comente nono. Ma non mi l'isetabo. Ite li serbit s'abocadu?

- Nos bidimus a sas nobe in su motel, est cosa urzente.- E non l'azunghet àteru e deretu tancat su telefono.

Zuane abarrat prus ispartadu de in antis. Cussa telefonada non si l'isetabat a beru e cuss'urzèntzia la cumprendet prus pacu.

Pesat de coddos e narat: Boh!

In su motel, cun s'abocadu si bidiant a s'ispissu e s'iscambiabant carchi negòssiu in su mentras interi una tassa de binu e s'àtera. Non fit dae meda chene lu bider; ma totu li pariat franchillu. Su solitu negòssiu, de cosa de pacu gabale e su solitu caliche de cannaonau de Jerzu, chi est su preferidu dae Zuane e nch'aiat cumbintu peri a s'abocadu. Est uno de sos pacos binos chi sa zente atzetat de bonu grabu in sos tzilleris chi no ant binu locale. Ma como non si tratat de binu, nen de cannonau. Àtera cosa b'at in mesu. Dae cando si conoschent non l'at mai telefonadu, e pro ite, puru? Sa conoschèntzia issoro est cumintzada in su tzillero de su motel e in cue si nche morit cada borta. Una cosa discreta. Si podet nàrrer chi sunt cumpanzos petzi ca si addobiant in cussu tzillero. De àteru mai nudda. Su travallu de s'unu est tropu diferente dae cussu de s'àteru pro nde chistionare paris. E tando pro ite custa telefonada oje e a cust'ora?

Zuane est abituadu a bider zente de cada casta e zenia. Est s'arte sua. Traballat in mesu de sa zente in su motel. Sas bonas maneras non li mancant, ma no andat prus in gai. Sèmpre securu de sesi, dat sicuresa a sos clientes chi bi pernotant. Lu rispetat, pro dovere e pro caràtere. S'at de dare una informatzione la dat cun sicuresa e detzisione, che de persone chi non s'iseta s'ustrina. E nemos lia dat, comente nemos si permitit de lu mutire a sa frantzesa, garçon; pro totus est sennor Zuane. Rispetat a totus e totus lu rispetant. Non si permitit de si pònner in mesu de peruna briga, pro cantu de pacu importu esseret. Su servitziu est cussu. Su motel ofrit cussu: pica o lassa. Non discutit. Fachet petzi sas dimandas pretzisas, de leze, e basta. Non dat cufiàntzia e non nd'atzetat. Non fachet parte de su dovere suo. Pro su chi non est de cumpetèntzia sua, indissiat sos clientes a sa persona zusta e si nde labat sas manos.

Cun Antoni Boi non est diferente. Mai negossiadu de travallu. E s'abocadu fachet àteru e tantu. Tantu de rispetu e cadaunu a domo sua. De una cosa chistionant cun passione, ca l'ant in cumone, de cabaddos e de bàrdias.

S'abocadu invidiat a Zuane su tempus chi at pro andare a si bisitare sas bèstias chi mantenet in Barbaza e chi àtere li custodit. Issu no at mancu su tempus de andare a si bisitare sa terras chi l'at lassadu su babu. S'arte e sos clientes lu ligant tropu. No at unu mamentu de pasu. In super tantu Zuane non la finit de pessare a cussa telefonada e si la moricat de cada manera.

SAS PRIMAS CHIRCAS

A sas 11 e quartu, su cumissàriu Scotto est in reunione cun su cumandante de sa Cumpannia de sos carabos, Gianvìgio Curti. Los aiant reunidos su capu de s'iscuadra mobile de Nùgoro, Dejana, e su capitanu Mùrja, cumandante de su Grùstiu Operativu de sos Carabos, custu puru de Nùgoro. A issos si sunt azuntos cussos de sa Criminalpol. Una reunione de tantos petzos grossos non s' est mai bida in Macumele. Zente chi cumandat prus in artu l'at pretesa, ca cheret chi sas indàzines andent pari pari e non est tempus de cuntierra interi sas duas armas. Sa situassione imponet s'unione. In prus, duos ricatos in Macumele, su de Luca Loci, in antis, su de Bennardu como, la rendet pretzisa. Sa presse narat chi ponet sa zente a cùrrer e in custa occasione de presse carabos e pulitziotos nd'ant a beru. S'arriscu de arribare a ugualare su numeru de secuestros de su 1968 no est brulla. S'annu fint 11 sos ricatos fatos e chimbe sas pessones in manos de bandidos in su matessi tempus. E como, dec'annos a pustis, non bi cheret meda a arribare dae 9 a 11. In àteras paràgulas totu est possibile.

Dae tando a como medas cosa sunt cambiadas. Ant fatu s'indùstria de Ottana e paret chi campos e montes siant abarrados desertos, ca pastores e massajos lassant s'arte pro s'ocupare in sas fràbricas chìmicas. In prus in sas costas Gadduresas de Artzachena b'ant costruidu biddas intregas pro ricos de totu su mundu, chi benint a si colare s'istiu isterricorjados in su sole de cussos zassos de mare. Zente gai rica non si nd'at mai bidu in Sardinna e como benint a bàtiles, chi parent isfidande sa misèria de chie at sèmper traballadu totu bida pro non si bìder mai una die de bonu. Chi siat cussu o non cussu a ischidare s'apetitu de zente chi, paret, no at mai bidu tanta gràssia de deus, su chi b'at sutzedende paret una cumprova. Su fatu istat, chi in su 1978, sos bandidos de s'Isula parent iscadenados, furande e ricatande a manca e a destra.

Pròpiu dae sa costa Gadduresa, chi sos bènnidos a nobu ant batizadu Costa Ismeralda, nch'ant picadu unu tedescu ricu, Peter Rainer Besuch. Antis custu est in manos de bandidos dae su 21 de capidanne. Est mancande prus a longu de sos àteros. Unu miliardu chere pro l'iscapare. Sas fèrias las at finidas in Porto Taverna, ube sa muzere e sa sorre lu sunt galu isetande, agarradas a s'ùrtima ispera. Ant pacadu zai una chentina de miliones, ma de su parente non nd'ant ischidu prus nudda e prus nudda lis dant a ischire. A lègher sos zornales non sunt a tretu de pòder pacare una summa gai arta. Oramai sunt a su disisperu. A tretu chi sa sorre at fatu ischire chi est pro si nche torrare a Zermania, si non li dant sinzale securu, chi su frade siat galu bidu e sanu.

Mancu de s'inzenieri de sa Ferrari, Zuanne Caralu Bussa s'ischit prus nudda. A issu nche l'ant prelevadu dae Villasimius, trecentos chilometri de distàntzia prus a zosso, in provìntzia de Casteddu. Villasimius est diventada in pacos annos s'ata de mare de sos ricos e benestantes de Casteddu. In sos montricos cara a mare s'ant fatu sa domo pro sas bacàntzias, importandesinde si sunt guastande unu de sos angrones prus bellos de sa Sardinna.

Su locu paret securu. In cussas alas, sos ricatos non si conoschiant finas cuss'annu. Ma oramai pro sos bandidos, lacanas non bi nd'esistint prus de perunu ghetu. Si moghent da una banda a s'àtera de sa Sardinna che in locu issoro e nemo est prus securu, mancu intro de domo sua matessi.

Antis pejus. Non b'at prus règula. Chie nche benit picadu non est securu, puru pacande, de pòder torrare, comente fit sutzessu a s'onorevole Eritu, chi pustis chi sos familiares ant pacadu non si l'ant bidu torradu.

Sa situassione de sa sennora Vettoni, muzere de Zuanne Caralu Bussa, non est mezus de custa. Si diferèntzia b'at, est in pejus, ca in prus de su disisperu de s'isetu, chi paret inùtile, retzit, pro la cossolare, sas telefonadas de zente de pagu gabale chi li narant:

- Sos emissàrios tuos ant pacu de andare in ziru a zùcher dinare, in tantis a maridu tuo non l'as a bider prus!

Àtere li pedit dinare, ma sa politzia iscooperit sèmpèr chi si tratat de zente de mala intensione o ferta a conca. E non mancant sos malafatores chi cherent profitare de su disisperu suo. E cantas bortas at depidu fàcher publicare in su zornale unu messazu in suspu! Chi sos bandidos torrent sas tres rispostas chi petzi su maridu podet dare. Est unu messazu isconsoladu e s'ispera de lu torrare a bider minguat dae die in die.

Sa zustissia non s'abarrat firma. Patùllias e patùllias sunt sèmpèr a ziru dae montricu in montricu, dae cubile in cubile, artis, dae cubilete in cubilete. Totu e in totube furdichinant, in ube in pessu apent unu suspetu. Non b'at pastore chi non siet controlladu die e note. E gai unu bortaedie nche suprint a unu cubile ube acatant a Jorji Elzi, unu serzentone de s'aereonàutica de Foghesu, paris cun su collega Gaetanu Palumba rebotande in sa de Zuanne Batista Locci e Antoni Cau, ambos artzanesos. Cun issos bi sunt puru duos àteros pastores de Sadali, Eziliu Carcanzu e Luisi Maronzu.

Chi nche l'aèret indissiada un'ispia o chi b'esseret cròmpera a s'ispessada, sa zustissia arrestat sos primos duos e lis imputat su secuestro de Bussa. In mesu de tantu iscuricore, custa est un'azicu de luche. Una luche metzana. S'aperit un'orizzonte nobu, mai pessadu. In artis sos secuestros s'imputabant a sos pastores, ca sunt issos chi istant in campu e conoschent coladorzos e cubadorzos, ma como ... como bi si ponet peri s'arma de s'aereonàutica! Cheret nàrrer chi non est petzi sa zente amiserada da una bida de sèculos de istentu a si ghetare a mesu de tanta gràssia de deus. A la contare totu, sa zustissia a custu bi credet pacu. Ischit pro esperièntzia chi sos malafatores non ant classe sotziale.

Su capitano Gianvigo Curti e sos àteros de sa reunione de Macumele pacu pesu ant dadu a custa notissia. Sunt armados de cartas zeograficas e mapas chi parent in unu cussizu de gherra chircande de abirguare s'inimicu e de istudiare comente li parare fronte.

Conoschent cada coladorzu, cada caminera. Si tratat de imbrocare cussu zustu ube pònner sas vedetas e sos blocos cun zente e mezos. S'arcanu est chi su territòriu est tropu largu e sa zente paca. Su Supramonte ebia s'isterret dae Artzana, Urtzullè, a Orgosolo, Uliana, Durgale e Bauné. Mizas e mizas de ètaros de terrinu cuzicadu de padentes e matas de cada casta. E in cada punta de locu b'at percas, grutas, isperdissios in mesu de sos rocarzos, chi mancu unu elicotero colande a bassa cuota est a tretu de abirguare un'elefante. E cun resone ca est unu padente innidu primarju de arbores mai tocados a istrale.

De una cosa sunt cumbintos totus, Curti, Dejana, Scotto, Mùrja e sos àteros presentes, chi totu zirat a fùrriu de sas Barbazas, mescamente de su Supramonte e de sos monte de Orune e Buddusò. E tando detzidint de patulliare sos coladorzos chi andant e benint a sas biddas a fùrriu. Istabilint de presidiare a istrintu istrintu su passu de S'Ispiritu Santu de Orane e su caminu chi andat a Corte de Nùgoro; totu sos caminos largos e istrintos chi artziant a Teti, Austis e Meana, serrande in una morsa Sorgono, Tiana, Ovolla, Fonne e totu sas biddas chi torrante a s'Ozastra e a Nùgoro, inghiriande dae Lugula Bitti Benettutti e crompte a Sa Costera.

Picant sa detzisione e la trasmitint a totu sas casernas, cumpannias e cumandos. Sos ràdios parent brusiane in focu, isparghende òrdines da un'ala a s'àtera de sa Sardinna. Ischint chi b'est su perìculu chi sos bandidos intendant in sos ràdios issoro sos òrdines. Ma fintzas custu est carculadu: chi l' iscant. In artis o a pustis a bidda a chircare recatu depent puru torrare; fintzas cussa podet èsser un'occasione pro lis cròmper.

In tantis in fora de sos ufissios de sa Cumpannia de Macumele za bi sunt, a su solitu, sos zornalistas isetande nobas. Mescamente Bobore Seche est su prus fichidu. Cheret conòscher sas detzisiones picadas; sos passos chi cherent fàcher; sas nobidades de sas indàzines, si bi nd'at. Ma fintzas sos àteros currispudentes de sos

zornales non si nch'istant cun sas manos in manos. Cando sos ufiziales iscampiant a sa janna, totus lis sunt supra.

- Ite b'at de nobu? Ite azes ischidu? Acata da l'ant sa màchina chi nch'at prelebadu a Bennardu? Est zente de s'Orgolesu o de Orune? Sos de sa zustissia los lassant cantare e cadaunu andat a picare sa màchina sua pro ghirare a sa sede pròpia, a si prànder. Scotto nde zuchet sas iscàtulas prenas e a Bobore Seche, chi dimandat cun insistèntzia prus mannas de sos àteros, li rispondet.

- Andade a bos las chircare sas notissias. Carchi borta podies èsser bois a las dare a nois.

- Cando bos las amus dada non nos azes crètidu. Azes dèpidu nàrrer chi est un'imbentu nostru fintzas sa presèntzia de una secunda màchina, una simca chi l'ant bida in su locu de su delitu.

- S'est cosa bera, chircadela e mutidenos cando l'acata des.

- Est beru chi s'alfasud est targada a Casteddu e no a Nugoro, cosa prus tzerta?

- Iscoferidelu bois àteros.

- Sennor cumissàriu, bois non cherides collaborare. Nois puru amus sos deretos nostros, ca sunt deretos de crònaca, de sa zente chi cheret ischire.

- Dimandàdelu a su serzente Piras ch'est essinde.

Ma custu puru est de pacas paràgulas e lis narat petzi chi a sero aiat àpidu distribuidu sa sòlita velina; chi isetent. A bortaedie sunt torra reunidos a finire de pònner a puntu su pianu issoro.

- Si custos zornalistas aèrent collaboradu in manera diferente e nos aèrent contadu totu su ch'ischint, fortzis non fimus istados a custu puntu.

- At a èsser beru. Ma ite cheres chi facant? Non si diant cacare sas mudandas in antis de fàcher indàzines pro contu issoro, comente fachent sos americanos?

- Carchi cosa l'ant iscrita de diversu dae su chi semus bènnidos a ischire nois.

Cussa simca, pro nde narrer una; ma chie nos narat ch'est bera?

E Scotto si rendet contu in su mamentu chi non l'est mancu artziadu a conca de dimandare, in sos pòrrogos fatos, si s'est bida a beru àtera betura.

- No est possibile chi b'esseret àtera màchina presente e chi aeret àpidu ite fàcher cun su secuestro. Sos bandidos non sunt tontos a custu puntu. Un'àtera betura est pessàbile in àteru tretu, pro nche cambiare sa persone e pro no èsser sichidos. In ibe no. Non s'est mai intesu.

- Su fatu est chi totu fachet pessare a unu secuestro organizadu dae zente esperta, collaudada. Non s'ispiegat si nono, comente ant fatu a nos fughire sende chi semus istados postos in s'abisu deretu, in su mamentu chi fit sutzedende e totu, si podet nàrrer. Semus de fronte a professores de s'universidade de su Supramonte. Cun totu sos postos de bloco, cun totu sa zente iscadenada in campos e montes e nos sunt fughidos!

- B'at de pessare a una organizzazione de tipu mafiosu.- Nche narat Curti.

- Non bi credo e non b'apo mai crètidu. Fintzas in su '68, calicunu at avanzadu una ipòtesi simile e, de pustis, totu s'est isgonfiadu che una bollonca de sapone. Est zente chi su territòriu e sos caminos, caminneras e andatas los conoschent prus de nois, ca bi bivent in cue. Su sardu est tropu individualista pro s'aunire a un' àteru pro meda tempus. Azes a bìder.

- A bìder istamus. - concruit Curti.

In cussu sonat su telefono. Rispondet su serzente Piras.

- Est da Orune.

- Orune? - Narat Scotto.- Bi semus.

- Dami a inoche! - Ordinat Curti e agantzat su telefono.

- Eja? Cando? - e chistionat unu bellu tretu. A pustis informat sos collegas.

- L'ant acatada, a lacanas de Benettutti e Orune. In Barrantzellas, pro èsser pretzisos: una caminera in mesu de cussas tancas. Est una alfasud de colore arantzu, ma est targada a Nùgoro.

- Lu nabo ego chi cussos sunt issidos dae Macumele, a manu de susu e ant picadu sa Carlo Felice. Depent àer iscassiadu in su caminu de Mularja e dae cue nche sunt cròmpidos o a Iscuvudè o a Foresta Burgos, pro nche jumpare a su de Benettutti. Depent èsser colados suta Monte Rasu pro torrare a su de Botidda e colande a lacanas de Botidda e Benettutti sunt arribados a su de Orune. In ibe bi depiat èsser s'àtera vetura, ma dae cue a ube dent àer dadu?

- A credes chi sa simca est mòghida cun issos dae Macumele, a manu de josso, pro èsser securos chi totu fit andadu bene e si sunt jobiados in Barrantzellas?

- Ello tando, cantos depiant esser?

- Grùstiu mannu est. Cras los tenimus! Zente de s'arte est.

Dant òrdine de abirguare de chie est s'alfasud e si resultat furada o nono.

In pac'ora sa chirca est fata e su mere bocadu a campu. Est de Lillinu Raju de Nùgoro, un'impresàriu chi aiat denunziadu chi li fit mancande sa betura da in antis meda de Nadale. Cheret narrer chi su secuestro fit preparadu dae meda e in cada particulare. In àteras paràgulas est zente de s'arte. Como si tratat de intzertare in ube chircare. Barrantzellas est in lacanas de Orune e de Benettutti. Custa bidda est de iscartare deretu, ca non est capitadu mai chi unu secuestradu esseret mantesu in cussos zassos. Ma Orune non si podet iscartare e prus suspetu est su solitu Orgòsolo cun Nùgoro in mesu. Si tratat de mobilitare totu sas cumpannias de Nùgoro, Orani e Durgale e sos cumandos de sas biddas a fùrriu. Deretu in Nùgoro, su coronellos de sos carabos, Zuanne Zappi, istabilit su tzentru de coordinamentu e ponet in alerta totu sos òmines disponìbiles. In pac'ora totu sa Barbaza, a sa muda, est posta in assèdiu. Marcu Maltesi, de sa Cumpannia de Orane iscademat sos suos in totu sos bortadorzos de sa zona: a Badu Acas de Ortzai, a Sa Itria de Gaboi, in s'istradone chi artziat dae Taloro a Ovolla, in sos pejus isperdissios de cussos locos; e non s'est ismenticadu de Fumadu, de su caminu chi andat dae Sarule e dae Gaboi a Mamujada. Carchi cosa depiant bocare a pizu. A sas nobe de sero paret iscopiada sa gherra mundiale, totu sa zustissia est in allarme.

In su caminu chi artziat a Ovolla, duos carabos e duos ufiziales de sa matessi arma firmant una simca targada a Nùgoro. In intro b'at bator pessones. A s'alt, sa betura si firmat zusta, ma, in pessu arrimada, dae s'isportellu de secus nche brinchiat un'òmine e deretu isparit in mesu de sos tupales de eliche chi moghent oru oru de su caminu e sichint in sos padentes de sa tanca a serente.

Sos carabos no ant àpidu mancu su tempus de isparare unu corfu de fusile.

S'òmine s'est imbertu in mesu de matas e rocarzos e non b'at versu de lu pòder abirguare. Sos carabos non s'isetabant un'atzione gai de improvisu. Cando allughent su faru supra sa vetura issoro e la puntant a sa simca, in intro sunt abarrados in tres.

Sos carabos puntant sas armas, a s'alerta, e sos ufiziales s'acurtziant a pedire sos papiros. In antis de badiare sas cartas, nche conoschent a Zosepe Cuga s'ovollesu, notu a zistru comente Garibaldi, ca zuchet sèmper una bete barba longa. Sos àteros duos, boh!, mai bidos.

Dae sos documentos unu resultat de èsser Antoni Maria Pitalis, operaju in Ottana, de mancu 25 annos; s'àteru est Frantziscu Cucui, tratorista, de Ovolla issu puru. Sa notìssia benit dada deretu a sa Cumpannia de Orane e a su Cumandu de Nùgoro. In unu sinzale de rughe fachet su ziru de totu sas casernas, pedinde rinfortzos si podent tènner su chi si nd'est fughidu. E azudu pedint peri pro iscortare sos tentos a Orane o a Nùgoro, ca b'at pacu de si fidare cun una màchina ebia.

Sos presoneris los fachent falare e los compudant, ma nemos est armadu. Los ponent a un'ala, semper cun sas armas puntata contra a issos, in su mentras chi sos ufiziales furdichinant sa Simca. Custa paret un'arsenale. In intro b'acatant unu moscheto 91-38, arma de gherra, ma de sa gherra de printzipios de seculos, galu capassa de isparare che a tando, ca est bene mantesa e non mancant sas munitziones; b'at una pistola e una bomba a mano de tipu SACA, e in prus unu murutulu de mitza a brusiadura lenta. Bene armados sos zovanos, non b'at ite nàrrer!

Totu benit contadu a sa Cumpannia de Orane, chi, pro risposta, ordinat chi presoneris e betura nche los esserent falados a bidda deretu. Los fachent intrare a sa campannola e cun issos artziant sos duos carabos armados chi los mantenen suta tiru. Sos ufiziales sedint a in antis e unu si ponet a sa guida. Non si sunt galu bene assestados, cando Garibaldi bocat a campu una pistola calibru 9 Glisenti, chi zuchet bene cubada suta su gabanu. Lestru che lampu la puntat a su costazu de unu carabinieri.

- Firmade e lassademi falare o l'uchido.

Sos ufiziales si bortant e si rendent contu de su chi b'at sutzedende. Fachent chi eja cun sa conca e firmant. Sos duos carabos s'ispostant pro lu lassare colare. S'incurbiat pro falare e chircat de nch'istratzare su mitra a su chi l'est prus a curtzu. Non li resessit, ma comente ponet pede in terra, fachet in pessu in tempus a bider chi fintzas sos duos ufiziales sunt sartiados a terra unu dae cada banda, ma non li dant su tempus nen de puntare sa pistola nen de isparare, ca unu primu ventallu de corfos de balla moghende dae unu mitra lu corfit male e cando insistit a chèrrer isparare nde partit un'àteru e s'òmine rughet a terra issambentadu.

Pitalis e Cucui in totu custu pista pista si nche sunt abarrados supra sa campannola chene si trèmer pro nudda, che cosa chi non los interessat. S'àteru ufiziale s'atacat a su telefono e mutit deretu a Nùgoro chi mandent un'ambulàntzia e in pacas paràgulas lis contat su fatu. Maltesi si moghet dae Orane e s'ambulàntzia dae Nùgoro. In antis s'unu, 20 minutos a pustis s'àtera sunt in ibe, ma Garibaldi nch'aiat finidu dies, oras e minutos.

A s'arribada a Orane, Pitalis e Cucui benint porrogados, sende chi Maltesi ischiat cale podiat èsser sa defesa issoro. E dae cussu non si sunt fughidos. Cuga e s'àteru chi non conoschent, ca non l'ant mai bidu, los ant firmados e custringtos a nche los trasportare a sos sartos de Ovolla. E dae custu non si moghent. Sa màchina est de Pitalis e l'impreat pro andare a traballare.

- Ponimus chi siat beru su chi sezis narande: bois non l'azes mai bidu; non lu conoschides, ma nessi una cosa l'azes abirguada: de cale bidda est?

- Nosse, mancu cussu. Non nos at naradu nudda

- Non pretendo chi bos apet naradu de ube fit, custu lu cumprendo, ma nessi carchi cosa a bois o a Cuga la depet àer narada e dae s'allega podides bellamente cumprènder de cale bidda est.

- Mancu cussu. At allegadu petzi Cuga, ca lu conoschiabamus. Petzi issu nos dabat òrdines e abertèntzias. Amus fatu pacu tretu paris. Nos ant firmadu pacos chilometri prus a zosso.

- E no at naradu mancu una paràgula?

- A nàrrer su zustu una l'at narada, no a nois, ma a Cuga e una paràgula non bastat pro aberguare sa bidda dae su limbazu.

-Bidende ses chi carchi cosa l'at narada! E ite at naradu?

- Petzi: tira!, cando fint artziande a sa màchina e nch'aiant garrigadu sas armas; ma "tira" lu naramus uguale in totube.

- Non mi narezas chi non nche l'est essidu carchi irrocu cando at bidu sa vetura de sa zustissia.

- Non m'amento.

- E tue, Cucui, non t'amentas pròpiu nudda? Non bos rendides contu chi si non contades passades pro còmpritzes?

- Mi paret, ma non so bene securu si at naradu: per deus, sos carabos! Non frimes, atzelera e mofe deretu.

- A bellu a bellu bos torrat sa memoria! Si at naradu gai, pesso chi podemas nàrrer chi non fit de Ovolla.

- Custu l'abamus cumpresu chene chistionaret. Non est persona nen connota, nen mai bida in bidda. Chi esseret istranza, non b'at duda, ma de ube no isco nàrrer.

- A s'allega diat nàrrer de Uliana!

-Sennor capitano, ego non poto cunfirmare, ca podet dare chi s'allega esseret

ecante diferente.

-Un'ùrtima cosa: at naradu per deus o per deus e pe-santos?

- Est probabile.

- Non si tratat de probabilidade. O est o no est.

- Poto àer intesu male.

- Dae totu su ch'azes naradu podimus concruire chi non fit nen de Ovolla nen de bidda a fùrriu.

- Si a isse paret gai.

E dae cue non est possibile de los bocare. Narant e non narant. Nudda dant pro securu. Los tratenent belle e totu note, ma a manzanile lo lassant andare. Dae Macumele telefonat Scotto a dimandare de sa Simca, no esseret cudda famada de su secuestro de Bennardu Toniutti.

- Chi nono, li rispondet Maltesi. Chi si nche la bochet dae conca, ca non est cussa. Àtera màchina, sa note de Santu Istene non bi nde podiat àer in Macumele, implicada in su secuestro, chi depiat èsser un imbentu de sos zornalistas. A chircare in àtera diretzione.

L'informat de su pòrrogu de sos duos ovollesos chi fint paris cun Cuga e de su suspettu chi su chi fit cun issu e fit fughidu podet esser de Uliana, Orgosolo e Orune. In àteras paragulas, sa diretzione de indagare est a cussa banda.

Scotto incassat e ponet a un'ala.

S'INGÀRRIGA A SU MISSU

In su motel si firmat in su bancu e ordinat una tassa de su solitu cannonau .Est sèmper pessamentosu. S'abocadu est resessidu a lu pònner in pistichinzu. Cando lu bidet intrande, puntuale che relozu, li passat totu e li torrat sa calma.

Zuane non dat cara a s'istrinta de manu, chi est prus forte de sa chi li conoschet.

- Ite est bibende sennor Zuane?
- Su solitu cannonau. Nde faco servire un'àteru?
- Prus a prestu unu cafe pro como.Ite nobas?
- Sas de sèmper, si no est pro su fritu.
- Mi nde so abizadu. Custa tramontana non mi piachet pro nudda.A bellabatu chi non nibet in antis de nos nche andare.- e si bibet su caffè. Anto' batinos duos cannaos e chi siet de Jerzu.

- Sisse, s'abocà.- e fachet de tzinnu.

S'iscostiant a sa aposenteddu reservadu.Si istat mezus, sètzidos in sos divanos, aende a in antis una mesichedda de cristallu. Antoni intrat e dassat sa duas tassas de binu e deretu a foras.

S'abocadu bocat a campu sas sigaretas e nde porrit una Zuane. L'allughet cun s'allumadore suo, luchente che prata, de una elegàntzia ùnica. Est totu su fàcher de chie depet cumintzare unu negòssiu importante e depet chircare sas paragùlas zustas pro cumintzare..

- Li depo dimandare una cortesia manna.- Cumintzat.
- Depet èsser manna a beru, si m'at dèpidu telefonare pro custu addòbiu.
- At letu sos zornales de custas dies e custu mi rispamiat de li contare tropu cosas.
- Letos los apo letos. Ma ite b'intrant?
- Si tratat de s'ùrtimu sequestru cumbinadu in Macumele a sa bizìlia de Nadale.
- Sisse, cussu l'isco. Su de Toniutti. E deo ite b'intro?
- Zustu, est su de Bennardu Toniutti. Unu pitzocone, diamus nàrrer, si no est pro s'edade. Sa famiglia non morit de gana, ma no est gai rica comente contant sos zornales! Est fizu solu, alloddiadu dae totu sos familiares e, fortzis, est pro cussu chi paret unu pitzinnone. Non si la colant male in familia, de securu. Ischimus chi ant benes mannos, ma sos zornales nch'essint fora de taca. Possedint peri carchi palatu, ma sunt a terra in fatu de contante.

- Si si tratat de dinare, s'est isballiadu de persona, s'aboca'. Est meda si b'apo su dinare pro sas sigaretas e pro carchi tassa de binu.

- L'isco, l'isco. Non ti so chircande pro custu.- e sichit su negòssiu trancuillu. A pusti narat:

- Pesset chi sa mama, sennora Giovanna Solinas, duas bortas biuda de sennor Emilio Demuro, istat cun sa zaja de su pitzocu. Sunt sos ùrtimos de sos proprietàrios mannos de sa Margine- Planaria; si sunt bidos a culu in terra in custos tempos cambiados. Sa leze pro sas pasturas, chi isse conoschet bene, ca at tocadu peri a isse, e como pro sos afitos de sas domos sunt istados duos corfos mannos e metzanos pro issos. Los at brivados de sos introitos mannos de una borta, Bivent de su pacu chi lis restat de sas rèndidas ch'aiant. Sa Sennora, como, pro si mantènner discretamente, s'est bendende su patrimoniu.

- Non la facat tropu manna como no. Si l'ant ricatadu su fizu, cheret nàrrer chi su de pacare su riscatu bi l'ant. Cussos non s'imbrutant sas manos cun zente miserabile.

- Totu pro dare a bider a foras, in palas paca sustàntzia b'at. Su benèssere anticu lu sunt iscontande como. Sos bandidos, semus pessande, ant a pedire una summa fora de misura, chi sos familiares non ant a èsser a tretu de pacare.

- Cussu chi li narat pitzinnone, non est mere de Ràdiu Macumele?

- Est petzi presidente, sennor Zuà. Su Ràdiu, nessi pro como, non rendet nudda. Podet dare chi in s'imbeniente... Como at tropu cuncurrentes. Bennardu est galu istudente universitàriu e peri sa muzere, ambos in cherta de impiegu.

- Est cojubadu e li narat galu pitzinnu?

- L'est naschida sa de duas fizas sa notte de Missa de Puddu, sa die in antis de nche lu picare.

- At a èsser peri gai, ma galu non cùmprendo. – Nche morit sa sigaretta e agantzat una tassa, de sas chi sunt in su pianu de cristallu comente duos santicheddos de su presepe. S'abocadu paret chi si nde est ismenticadu o l'at fatu a posta. Zuanne l'artziat a labras e nde dassat falare unu ticu in labras e in buca. Chircat de cumprènder bene sa situassione dande cara a s'ocrada de s'abocadu. Peri issu nd'assazat un gùtiu.

- Est zente chi si campat cun cussu chi li restat de s'eredidade. At bisonzu de azudu – sichit a nàrrer comente chi no apet mai tzeladu de faveddare

- - Andat bene, l'apo cumpresu, ma ...

- Est in oche chi contat issu.. Serbit un'emissàriu chi tratet cun sos bandidos

A Zuanne nche l'essit unu respiru forte e nche narat::

- Za fit tempus, a sa fine est arribadu a sos concruos! Si lu podent chircare, no? Bi nd'at de prides chi non isetant àteru. Est un'opera de bene, pro issos. Gai contant.

- Àteru che pride bi cheret Custu de Bennardu est unu ricatu diferente. Est dramaticu, chi non s'ischit comente podet andare a finire..

- Ant istabilidu su primu addòbiu?

- Eja. Pedint unu miliardu pro lu liberare

- Non si ponent pro nudda, balla!

- Su problema est custu. Comente li narabo, una summa de cussa fata non si la podent permìter. Est pretzisu de trattare cun issos, de si pònner de acordu.

- Ite b'intrat issu?

- So s'abocadu issoro. M'ant chircadu pro trattare custa imbenièntzia.

- Lampu no ant isseperadu male. Menzu nde chere de tratadore, ch'iscat trattare mezus cun bandidos e malafatores .

- Li paret chi sia sa persona adata? Diat finire chi nche tratenent a mene puru. Cun sos tempos chi semus conoschende; cun totu su chi si contat in ziru.

- Unu cliente bonu bi lu det àer, o nono? Unu pastore, un òmine de campu, unu chi conoscat sos locos e chi iscat comente si mògher. – Non liu at naradu ma fit pessande a uno de sos tantos bandidos chi at difesu in dibatimentu.,

Ma s'abocadu puru non est tontu e sa risposta si la depiat isetare Zuanne.

- Zustu, bi cheret zente chi iscat fàcher.

- Beru!

- Zustu. Chi s'iscat mògher e iscat trattare.

- Mancu naradu!

- Chi conoscat territòriu, caminos e zente chi bi trabicat.

- Non m'est narande nudda!

- E chi si potat mògher chene suspetu.

Zuanne non ischit prus ite nàrrer. At cumpresu. S'abocadu l'at serradu totu sas essidas. No at prus iscampadorzu. S'abocadu est pessande, est ingarrigande a issu. Est issu su disinnadu. Est arribadu a ube cheriat arribare cun s'oratoria sua de chentupizas, che mariane betzu de sos tribuales sardos. E chene pònner contos in mesu, sichit::

- Una persona mai trisinia cun àtere; chi bortulet suspetos. Chie podet dare custa garantzia mezus de issu? Chie prus de issu at custas dotes? Traballat in oche in tzitade, ma mantenet galu terras e bestiàmene e in campu e in monte; b'essit a s'ispissu, e, mancu naradu, in sas Barbazas. Sa faina est sèria. B'at de zirare. De cuntrattare cun rispetu e fachendesi rispetare. Bi cheret calma, ma peri firmesa. Chene dare a bìder mai peruna duda, perunu pilisu. Issu custu caràtere, custa forza l'at. Sa minima debilesa, sa minima duda podet causare dannu mannu.

- Custa malafata mi l'est pintande aberu tràzica. Ite m'est cubande?

- Cubande non so cubande nudda, no. Non potò nàrrer su chi no isco. Totu est de bider, de abirguare cun intellighènzia. Ma custu est s'impinnu suo e sa capassade non li mancat.
- Beru, ma ...
- No at secadu sas funes cun sa zente de campu o de monte e cun issos si l'at a bider.
- Da ite l'ischit?
- Pastores sunt, pastores. Conoscos su bèstiamene meu. Lu cumprendet: mi l'imponet s'arte. Si b'at zente de àtera zenia non liu potò ne assecurare ne nàrrer: est cun pastores o cun zente chi lis zirat a fùrriu chi at de trattare. Bi cheret persona chi la pisset che a issos; chi faveddet su limbazu issoro: dat prus fidùtzia e minguat s'arriscu, ca, carchi arriscu l'at a colare non liu potò cubare.
- Depo impreare su sardu in su chistionare?
- No; no est chistione de allega. Antis, at a faveddare in italianu e l'ant a allegare petzi in italianu. Non diet a bider ch est chircande de abirguare de cale bidda sunt, peri chi non li siat a petorru; si l'abirguat, si lu collat pro se. Est su pesu de sas paràgulas su chi contat. Custu est unu limbazu chi issu conoschet bene: s'andata de su negòsiu, sos zestros, sa mirada, si puru l'ant a dare occasione de la bider. Est su modu e sa sustàntzia chi contat. Non l'at a èsser difitzile totu custu. Comente non l'at a èsser a petorru a bos cumprènder, ca issu conoschet su modu de pessare e de allegare, sas paràgulas e sos isetos. Ischit ascurtare e a si fàcher ascurtare. Totu est importante.
- S'aboca', non l'apo naradu galu chi apo atzetadu!
S'abocas non ponet oricras a cussa essida.
- B'at un'àtera cosa chi m'at cumbintu a chircare a issu: Ca no est solu. At frades e una parentela manna e amichèntzias in cada bidda, mescamente in cussos prus importantes
- At a èsser prus minore s'atrivia!
- B'ant a pessare bene, in antis de lu toccare. E no est totu. L'ant a ascurtare bene. Depet balanzare sa fidùtzia issoro e issu ischit comente. E su chi at a nàrrer det àer prus pesu. Ant a istare a l'intènder e ant a pesare sas paràgulas suas.
- A fines so una potèntzia? Custu mi cheret nàrrer o de custu cheret chi mi cumbinca?
- Como l'at narada zusta. Issu est una garàntzia sicura.
- E gai mi ligat!
- No est custu chi mi serbit. Su fatu istat chi issu est sa persona zusta pro custu ricatu. Non s'ismentichet totu su chi l'apo in pessu naradu!
Finint e fachent sa pasada, acabandenche sos duos binos. Zuanne fachet s'iscampiada a su tzilleri e nde ordinat àteros duos.
- Cun custu fritu bi cheret aberu, - narat bortandesi a s'abocadu e sichit – Pro ite no ant pessadu a uno de sos Gallisai, sende gai li sunt connados e depent àer carchi arrampu cun cussos de Teti.
- Pacu tratamentu apo cun sos connados. A su chi nd'isco deo, sunt pitzocones chi timent peri s'umbra issoro. Pisset si sunt capassos de zirare a denote pro andare a zobiare sos bandidos. Non mi so mai interessadu de sas parentelas issoro e no isco si tratant cun sos Gallisai de Teti..
- A sa fine m'at cumbintu. E b'at de cussiderare chi una ghetada de manu non si podet negare a chi est in cussas cunditzones. Sos de Toniutti in pessu los conosco. Ma s'amentet, deo ando petzi a su primu addòbiu, isse pisset a si buscare àteru imbassadore.
- M'isetabo su chi eja. Una pessone chi at caratère non si dogat mai. Non timet sa dificultade. Miret custa est sa litera de Bennardu, Mi l'at imbiada issu matessi.
- Como cumpremdo su pro ite de su mudighine de sos bandidos.
- Zente tonta no est! L'ant indovinada a l'ndissiare pròpiu a mime. La legat: est unu òrulu disisperadu, una dimanda de azudu de chie si sentit in perìculu mannu.

- Isse la fachel sèmper tropu tràgica. A sa fine non est su primu!
 - At a èsser ma s'arriscu chi lu diventet b'est totu. Est unu miliardu chi sunt pedinde, non sunt frichinias.
 - Supra cussa bi si podet sèmper trattare. Bastat de dare sas informaciones zustas.
 - Sa situacione la conoschet. A currèzer sas informatziones isballiadas, b'at a pessare sa sennora Solinas in sos zornales. Cun bandidos non b'at mai de si fidare.
 - Pessat chi b'apet àteru, in prus de su ricatu pro otènner soddu?
 - Non mancant sas dudas, mi paret de obricu, ma nudda de pretzisu. Paret chi apent presse. Su primu addòbiu l'ant istabilidu a su duos de ghenarzu. A sa sennora l'apo cussizadu che chircare sas personas zustas pro pònner a pare su tantu bastante. Sa muzere de Bennardu non est in cunditiones de si pesare dae letu. Est galu partorja frisca, indebilitada dae su partu rechente.
- In cussu li porrit sa litera e Zuanne, pustis leta, s'iscrivet biddas e caminos ube depet colare. Sos locos inditados non l'ispantant. Si los isetabat: Macumele – Bortigale - Silanus - aggrucadorzu de Iscra – Botidda – Bono – Benettutti – Nule – Bitti – Onanì – Lula – Durgale – Baunei – Tortolì – Launsei. Sunt totu biddas de un'ala e àtera de su Tirsu. Pinnica sa parte arta de custu depet zirare, dae sa Mrghine a sa Costera, a nche rucrare in s'artupianu de Buddusò torrandede a su de Bitti, falandenche in su de Orune fintzas a Isalle a s'aggrucadorzu de Nùgoro pro Siniscola, pro nche cròmper a Durgale. Totu sas àtera biddas indissiada non li parent de pònner in contu. Las ant azuntas, in s'idea issoro, pro ingannare s'imperjadore. Cumprendet deretu chi totu su treatu de su manizu zirat a fùrrios de Nùgoro. Ant issepertadu peri sa vetura de impreare, una autobianchi 112 ruja cun su lantione a manu manca mortu e gai peri su lantioneddu destru de secus. Non li bastat cussu, l'imponent peri sa velotzidade a sa cale depet fàcher su biazu. Non depet superare sos trenta chilometri a s'ora e si depet firmare cando in ata de caminu a manu destra bidet tres chimas de sida frisca.
- Cun d unu sinzale de custa ratza, chissai canta bortas m'apo a dèper firmare. mescamente cun custu tempus!
 - Prus pacu de cantu mi cheret fàcher crèder. No ant a èsser chimas rutas de gai. L'at a distingher bene isse. Si las at iscritas sas paràgulas in suspu, sas chi depet nàrrer e cussas chi li depent rispònder? Diat èsser un arguai si non si las amentat.
 - L'as apo iscritas e mi dimando ite b'intrat: "morte Andreotti".
 - Mantenzat a mente sa risposta: "Viva brigate rosse rosse". Non dia chèrrer chi nche rugat in s'addòbiu isballiadu. No s'ismentichet chi àteros chimbe ricatos sunt in pede cun tratativa andande.
 - Totu traballu pro issu unu cras, cando ant a tènner sos bandidos, si los tenent. Custas paràgulas in suspu mi fachent pessare chi b'apat brigatista in ziru in cherta de soddu pro sas malafatas issoro.
 - Non mi ponzat a rider. Custa est zente in cherta de dinare e basta e de sa politica si nd'impipant. Petzi chi b'apet àtera pestulèssia in mesu. Una vendita, a nde nàrrer una, unu pratu torradu. Non at a èsser de custa ispètzia su ricatu de Toniutti?
 - A dolu mannu non poto nàrrer chi nono in totu. A d onzi modu istet trancuillu: sas BR non ant ite b'intrare; in oche non ponent radichinas, no est terrinu pro issos. B'aiat zai provadu un'editore, a pustis de sos fatos de Supramonte, cun Mesina, non amentat? Nessi goi si narabat. Ischit candu nde lis importat de sa revolutzione a custos. Sicomente sa BR sunt de moda, pro istrabiare sas indazines ..., pro dare indissios malos, camineras frassas, totu andat bene.
 - Sende gai, carchi duda mi benit.
- Sas dudas de Zuanne non fint totu campadas in àghera. Amentabat bene. Sa note de ùrtimu de annu de su '77, pròpiu a s'intrada de sa presone de Badu de Carros, in pessu foras de Nùgoro, b'aiat àpidu una isparatòria a traitorinu: unu vitzecuestore e unu maresallu de sos carabos sunt istados fertos da una isgarrica de pallettones. Unu tentativu de gherriza comente imponet sa regula, cun fusiladas e dare sos meritos de su disatinu a su Grùstiu de sos Comunistas Cumbatentes. E non cussu ebia. Tempus a

pustis, in Casteddu una caserma, s'èmpèr de carabos est istada bumbardada de molotov e in Tatari aiant tentadu unu zuze. Sas organizziones terroristas fint apizicande cussu malufàcher peri a sa Sardinna.

Si aberu sos bandidos de sos ricatos non sunt terroristas de natura politica, pacu b'at de s'alligrare. Una iscola b'est istada e best in sa recrusione de Badu de Carros, de su cale ant aumentadu sas sicuresas pro bi remunerare e acasazare terroristas e mafiosos batidos dae foras. Sos efetos no aiant istentadu a si fàcher intènder!

Sos sardos sunt ponende in pratica sas letziones imparadas in recrusione. Carabos e politziotos si sunt sapidos deretu de su càmbiu in su manizu de sos secuestros. Sos malafatores si la picant cun còmodu. Non si preòcupant de informare sos familiares de sos ricatados. Non dant a bìder de àer presse. Dassant sos familiares in pena; antis fachent de totu pro chi custa aumentet s'èmpèr de prus, pro fàcher prus fetu. Pedint muntones de dinare chi assustrant sa zente e cunsentint peri chi pachent a ratas, che si si tratet de mobilia. Chi su malassortadu nch'essat bibu non est mai securu. Peri sas paràgulas in suspu ant sapore assustrosu e gai est in totu s'isula.

Zuane e s'abocadu Perantoni Boi ant finidu su negòssiu. Si pesant ritzos e fachent tapa in su bancu pro sa tassa de s'istafa. Una istrinta de manu e cadaunu a domo sua. Sa traschia minetat nibe meda e non si diant ispartare si peri l'àer ghetada. Oramai nde sunt avesos dae sos annos colados. A d'onzi modu diat èsser una bella disaura si frocat. Cun sos terrinos cuzicados non est fàtzile a si mògher in Macumele; no si nde faveddet de andare a Bitti e Orune a belle 1000 metros de artària, ube cando nibat, non brullat. Biazare in cundizione simile non diat èsser unu zocu, sende chi diat èsser de òbricu.

S'abocadu, in pessu essidu dae su tzilleri si nche cravat in sa Fiat sua 131 isparinde in su fritu de sa die. Zuane essit pacu apustis ma dae sa zanna de su motel, a costumàntzia sua. A s'arribada a domo si ghetat a su zornale. In prima pazina b'est sa notissia de su ricatu de Toniutti. La torrat a lègher, ma cun aficu diferente. Nde cheret ischire de prus; controllare ite est chi no at letu su manzanu. Ite nche l'at fughidu. Cumprènder su chi aiat letu fughi fughi. Chircat sos zornale de dies in antis; torrat a lègher cada informatzione iscrita. In su chi aiat naradu s'abocadu b'at carchi cosa pacu crara, ma in cussa pazinas non acatat peruna cosa in prus. In s'interi pipat a sichidu una sigaretta a pustis de s'àtera. Piantat sa letura e colat a s'apostu de retzire pro intènder s'ùrtimu telezornale. At s'abistesa peroe de nche mòrrer sa sigaretta. Su bulletinu de sos ricatos est unu bulletinu de gherra. Unu esèrtzitu de carabos e àteru e tantu de politziotos sunt in gherra contra a un esertzitu de pupas in mesu de rocas e matas in sos campos de su de Nùgoro. M'àrghines, locos oramai peri tropu conotos. Las presentant in cada notiziàriu, s'èmpèr uguals, s'èmpèr sas matessi.

Est nerbosu comente pessona chi circat de ligare s'unu a s'àteru duos pessos a nde fàcher unu negòssiu craru chene bi resessire. Li paret de èsser mesu politzioto e mesu aberguadore. E chi esseret in antis custu e non s'àteru, pessandebi bene, liu aiat naradu peri s'abocadu. Si fachet note, li benit sonnu e si corcat.

S'incras est puntuale in su traballu in ufissiu. Non resessit a cumbinare nudda. Non chi b'àpet meda ite fàcher in dies gai, Si leghet su zornale, cosa chi non fachet mai. Si los colliat pro su sero in domo.

Custa borta nd'at comporadu duos. Ambos sardos. B'acatat in prima pazina una notissia noba. Un'àteru ricatu in Nùgoro.

Pro bona sorte de Elettrio Corda andadu in bòdiu. Est ghirande a domo sua cando in pessu bene intradu a su passadissu de su palatu, in cussu iscuricore, duos mai conotos li crompent a supra. Si difendet, li falat carchi corfu. Impreat totu su chi li benit a manu, imprende sos pedes a carchides che cabaddu e mescamente sa limba, a orulos pro cantu at boche in corpus, in cherta de buscare azutòriu dae chie colat in caminu. Cussu o non cussu l'est istadu un'azudu. In cussu caminu de zente bi nde colat. Pròpiu unu, colande, si firmat a cussas boches. Sos bandidos si fughint assustrados dae sa règhida chi bi ponet o timende de èsser arregrados in su passadissu dae sa zente chi bident suprinde. L'ant iscapadu e sunt curtos perdendes in sos gùtuos de su bichinadu. Sunt in

pessu sas ses cando Elettrio Corda resessit a contare su fatu a Gianni Pititu de sa Unione Sarda e a Bussu de La Nuova Sardegna su chi li fit sutzessu in antis. Zuanne lu podet lègher su manzanu in su zornale in pessu essidu..

Sa timoria de sos ricatos , Elettrio Corda, la zuchiat in conca dae meda, che idea fissa. Timiat chi nche l'aerent picadu dae como a tando. Pro cussu fit sèmper a s'alerta. Aiat peri cambiadu bida, si bida si podiat mutire sa sua, su si tancare in domo a sa prima intrighinada de sa die; misurare, limitare sas essidas, sepertande bene sos caminos ube colare; cambiande sèmper modu de fàcher, orarios, ghirare sèmper chitanu e a sa matessi ora. Pròpiu custu l'at traitu. Sos bandidos l'aiant a notu e l'aiant isetadu, si poet nàrrer intro de domo sua. Fit istadu su de deche ricatos de su '78 e su de 9 ricatados in manos de bandidos in su matessi tempus.

Sas àteras nobas sunt coladas in "*secondo ordine*" amisturadas in d una ispètzia de minestrone de totu sos ricatos sardos de su mamentu. De su macumeresu, in totu cussu impastu si contat ebia chi dae bator die non si nd'ischit prus nudda; chi sos bandidos non si sunt galu intesos; chi sa familia est galu in isetu. S'addòbiu de Zuanne cun s'abocadu est coladu "sotto silenzio" e custu lu ponet a rìder. Sa familia Toniutti est galu in cherta de unu imbassadore a pustis de àer dadu ingàrriga a s'abocadu Boi de curare s'afàriu. Sos zornale la finint contande chi sos familiare sunt chircande de pònner a pare su dinare pro pacare su riscatu.

In sas pazinas internas bi sunt sas relatas de politicoa e sindacalistas chi analizant cussu andamentu de sa bida sarda. Sa curpa, contant, est totu de sa crisi economica. Sa mancàntzia de sicuresa in sos postos de traballu de Ottana e in sos àteros polos industriale de Portu Turre e de Sarroch; sa disocupatzione in aumentu, s'agricoltura e su pastoràmene, galu firma a tempos omericos. Sas propostas sunt sèmper sa matessi: amodernamentu de su sistema produtivu industriale e de s'agricoltura. Mescamente pro custa, sa netzessidade de l'iscrostare dae su rusticùmene anticu.

Perunu chi àeret cussideradu chi Ottana e sos àteros polos non ant imbentadu perunu postu de traballu in prus, chi los ant petzi ispostados dae su pastoràmene e dae sos campos e montes a cussa chi mutint industria rennobadora de mentalidade e de costumàntzias betzas crauddas; chene s'abizare chi totu custu fit e d est su punteddu de s'economia e de s'identidade sarda. Chi dogandenchelis cussu, a sos sardos lis negant s'istòria issoro, sa limba, sa dinnidade, s'istima de sesi. Chi gai non podent fàcher petzi che dannos, a su postu de dare balore a sas richesas issoro. In s'agricoltura de bona calidade, dae sa frutora a su binu, a s'intelighèntzia de impreare in traballos chi non rechedent matèrias istranzas de trasformare, guastande s'ambienete, ma chircas de sientzia chi produint traballu intellettuale e manuale in siendas nobas aberu.

Totu custu si pessat Zuanne. Su chi contant sos zornales no ispostant de una virgola sas ideas suas.

Isbariadu in su traballu, in cussas ùrtimas dies de nadale de 1978, non nche perdet s'abitudine de badiare in cara sa zente; antis, nd'istudiat cada amiada, cada tratu cun su caràtere suspetosu chi at, mescamente in momentos che i cussos chi est colande. Cada cliente podet èsser unu indissiadu.

Non sunt petzi sos politicos a predicare chi non si depet dare totu sas curpas a sos pastores. B'at de crèder chi a palas de custos si cubent mandantes mannos, de cussos chi peruna operatzione de politzia podet iscarotare. Nd'est cumbintu peri issu, ca su traballu lu ponet de fronte a zente de cada zenia. Sende gai no est andadu o no est chèrfidu andare a domo de su ricatadu. Non conoschet e non cheret conòscher sa sennora Solinas. Cussiderat chi est peri periculosu a li tefonare. At cussu pistichinzu chi li rodet in conca, chi l'at bestidu s'abocadu cun s'oratòria sua malinna. Si si benit a ischire chi est issu su missu, non diat pòder fàcher mancu unu passu cun sa trancuillidade chi bi li serbit. Cun totu sa lertade chi chèret àer.

Pessat a totu sas pessones chi li podent dare una manu a isòrber su rajolu chi lu turmentat. Picat in cussideratzione totu sas pessones chi in Barbaza lu podent azudare. Est custu chi l'isbariat sa mente in su traballu.

A fine turnu ghirat a domo.e si prandet cun muzere e fizu. Cando si sunt picande su cafe e su fizu s'est ispostadu a s'àteru aposentu pro fàcher sos dovere de iscola, sa muzere nd'aprofitat pro li dimandare:

- It'est chi as da eris sero? T'at sutzessu carchi cosa? Problemas in su traballu? Ses goi da eris sero. In totu s'ora chi semus prandende non t'est essida paràgula. Ses nerbosu, ispassentziadu. It'est chi rodet?

- No apo nudda; dassami pèrder.

- Lu bides? T'irfadat cada dimanda. Ses goi dae cando t'at telefonadu cussu abocadu. Non t'apent postu in mesu de carchi mala faina. Eris fizu tuo s'est acatadu male, ca non l'as pompiadu su problema e tue l'ischis cantu bi tenet a chi pompies sas cosas de iscola.

- A la nàrrer zusta, carchi pessamentu l'apo, ma fortzis est petzi ca su traballu, in custas dies m'at istracadu tropu.

- No, no. Non mi la contas zustas! Tue as àteru. Ite ingarriga t'at dadu s'abocadu.

- As resone, peroe non mi dimandes tropu. Sunt cosa chi non ti poto nàrrer. Su duos de su mese ch'intrat depo andare a Bitti e a Lugula pro una questione dilica.

- Bidente ses chi carchi cosa b'at. Za ses mannu e ischit comente ti l'isbolicare. Chistione de bestiàmene?

- Eja, ma non meu.

- Daebi cara. Sos tempos sunt metzanos. – E cun custu sa muzere l'at dadu a intènder chi belle e belle at cumpresu e sichit:-Tando a ufissiu non b'andas?

- Depo mògher a tardu e intro de note so torra in domo.

Credet de l'àer isbiada, peri si carchi duda l'abarrat. Su nd'àer faveddadu li torra sa calma. Sa cosa non li paret prus gai tràzica. Su primu addòbiu est fisadu pròpiu pro su duos moghende dae Macumele a sas chimbe. Depet biazare a denote e cun cussu fritu, cun s'ispera chi non nibet. Su fatu chi si depet mògher a velotzidade ridota li rendet su biazu prus securu. A cussu passu b'at periculos in mancu, peri si àeret nibadu. Lu cunfortat chi sa màchina depet èsser bene caentada, si s'abocadu b'àeret pessadu. Dae cue a su duos b'at su tempus de s'organizare, de bi pessare bene.

S'incras si pesat chito e andat s'edicola a comporare sos zornales a in antis de s'istatzione de su trenu e a si picare su cafe in cue acurtzu.

Est in puntu de intrare cun su zornale zai apertu a sa de duas pazinas, cando s'intendet tocande in palas. Si bortat deretu e s'acatat a in antis a Pascale Tidu. Est in pessu faladu dae su postale. Si lu pompiat bene in cara, dae conca a pedes. L'artziat deretu a conca unu suspetu, ma in presse si lu catzat dae mente.

Artu e lucente in bestire de belludu birdonzu, a cambales bestidos, su bonete sèmper in conca, est un'amicu de familia da anticos tempos. Lu conoschet dae sèmper. Òmine conotu e istimadu in sa bidda, dae totus; rispetadu in totu sa Màrghine e in totu sa Barbaza, paret unu pastore sàpiu e riguardosu; pastore de antica e bona ratza, chi pacos bi nd'at galu in ziru che a issu pro s'aspetu fieru e s'andamentu tèteru e securu. At un'àghera seria chi imponet su rispetu e li pintat in cara una chiza arcana e ispirat fidùtzia a su matesi tempus.

Si ministrat galu su bestiàmene, peri si non bi ponet s'aficu de una borta. Sos annos si li leghent totus in cara, ma si la sentit galu. At peroe totu s'inchizada de s'òmine sàpiu e sincheru.

Superadu s'ispantu de sa prima mirada, Zuanne l'istringhet sa manu e Pascale li dat una iscuta de manu a palas, comente a l'ischidare sos amentos, a li nàrrer ch'est sèmper issu..

- Ello a ite ses pessande. Non mi conosches prus?

- No,no. No est gai. Fipo badiande su zornale. No ischis ite b'at sutzedende? Ite lampu sunt pessande? Sunt totus diventande macos. Cando mai azes bidu tantos ricatos in su matessi annu? A ite puntu semus torrando?

- Tempos malos, caru Zuanne! Semus a chie prus si nde podet messare e in presse, chene meda fàdicu!

Zuane ponet pedes in intro e deretu ordinant unu cafe pro issu e unu binu pro Pascale Tidu.

- Unu cannonau, bene andat? – Pedit su tzillerarzu.
- Ite roba est? – Dimandat Pascale.
- Binu bonu ... de Jerzu. Trancuillu, sennor Pascale, a mime cosa metzana mancu nde proponet.

- Dep'andare a cubile e depo picare su trenu. Custas bestias cartadas a gomma non las isco manizare. Fachimus duos passos paris, gai nos negossiamus ecante. So andande a computare su bestiàmene e prus che a issu, cussu dimòniu de Chelleddu, chi est dae meda chi non ghirat a bidida. Non scherzo chi mi lu trabient. B'at tropu zente mala in ziru in custos tempos.

Zuane s'amentat chi Mialeddu, su fizu mannu est in presone. Est iscontande una cundenna a decheoto annos. L'imputant una morte e issu o no issu, issu nd'est pacande sos dannos. Unu de sa bidida chi narant chi apet mortu a istocadas pro bagatellas. Su protzessu no aiat acràradu ne su pro ite nen comente. L'aiant acordadu sas atenuantes, ma non sa lezitima defesa, comente aiat naradu e chircadu de dare a bìder s'abocadu. Tziu Pascale non nde paret meda cumbintu nen pro una ne pro s'àtera cosa e, sende dipiàchidu, non nde morit pro cussu. Si l'at fatu motivu bi depet àer! Sutzedint a sos bibos. Zuane nde dimandat nobas. Pascale si ghetat a ulicras surdas. Non s'ispantat si a pustis li narat chi istat bene. Est in sa presone de Civitavècchia.

- Dat a ischire chi est imparande a eletritzista. Paret chi si firmet in Roma in pessu lu liberant, pro sa cunduta, narat. Non chi nde sia cuntentu. Un'àteru òmine in cubile bi cheret, si peroe at detzisu gai, at a ischire su ch'est fachende. Narat peri chi li cherent bene e est in s'isetu chi li cuntzedant sa libertade de istare fora a didie pro traballare. Gai si fachet peri carchi soddu e conoschet a Terramanna.

Terramanna, pro Pascale, est su continente italianu chi issu at in pessu abirguadu fachende su militare e non l'est mai piàchidu. Aviados si sunt e Zuane amentat de s'ingàrriga sua.

- Bos nche jzucò deo, cun sa vetura mea, a su cubile.- Li narat.
- No, non de pes trascurare su traballu tuo pro mene. Amus àer modu de nos torrare a zobiare in oche e si bi colas in bidida.
- Pro custu manzanu non b'at problemas. Cumintzo a sas duas. So liberu e mi fachet piachere a mi la colare cun bois.

Pascale si lu pompiat bene in cara: non lia contat zusta.

- Ite as de mi dimandare oje?
- Non b'at nudda de importante.
- Tando andamus.

Zuane aperit sa vetura, una Fiat 124, e Pascale si sedit in intro. Su cubile no est a largu, in sa firmada de Birori. Carchi chimentro prus in gai, una domedda, peri male mantesa ube bi proghet che in foras.

Moghent e deretu dassant sa bidida. Su manzanu est fritu. Sa panòria est ispoza; petzi de tretu in tretu carchi suberju est distimonzu de anticos padente derrutos pro bi semenare o pro àer tretu liberu pro sa pastura. Petzi sos muros a sicu si ponent fatu, agrucandesì e cubandesì in mesu de matas de chessa o rubu. Cunuzant canticheddos de terrinu, avanzos de terras chi in anticu fint cussorzas mannas e chi de erede in erede sunt istadas partidas in canticheddos, ube non b'at tretu a bi semenare unu cartu de labore o a bi pàscher una bèstia totu s'annu. De cando in cando iscampiat un'ozastru o un'olibàriiu. Sa traschia e s'astragu chi est cumintzadu dae santandria, impedit a s'erba de ifroscare in mesu de su gardu sicu, bundante de s'istiu coladu. Unu nuraghe mesu derrutu, supra unu montricu est cue a bardia de sa panoria aperta a sos bentos de susu. Sas andatas de sa roba rucrant sas pastura e sas berbeche, che predas biancas in cussu birde amiseradu dae s'astragu, ponent fatu a sa paca erba chi b'est essida.

- Tando cal'est su male chi ti rodet. conta.
- M'ant dadu una ingàrriga metzana.

- Chie? Cando?
- No est su chi sezis pessande. Si tratat de àteru. Non m'ant fatu nudda de male. Mi cherent pònner a palas una ingàrriga manna e no isco ...
- Conta t'apo naradu. Si b'at de ti dare un'azudu so in oche.
- Si podet nàrrer chi apo atzetadu, ma est mala a suportare aberu ...
- Ite est ch'at de malu custa ingàrriga. Si ti l'as picada est ca ischis chi la podes concruire. L'ant acatadu, mira, unu puddichinu essinde dae s'obu! Conta conta.
- Unu ricatu ...
- Balla! Tando est manna aberu!
- Frenade sos caddos, tziu Pasca', non so su tipu de mi nche tzcare in d unu secuestro! Apo su traballu meu e mi bastat.
- Tando ite b'intras tue.
- M'ant chircadu comente imbassiadore.
- Cosa dilica cussa. Comente mai ti ses fatu agretiare? Chie t'at chircadu? Sa famiglia? Est zente chi as a pràtica? Non ti ses potidu iscassiare?
- No. B'est in mesu s'abocadu Perantoni Boi.
- Chie? Barracu?
- Pròpiu issu, cussu chi bois mutides Barracu.
- Tando sa cosa cambiat. Si est issu, non ti podes isbortare.
- Sa cosa est sèria.
- E comente mai?
- Su ricatadu est orfanu de babu. In domo sua b'at petzi tres feminas: sa muzere cun duos fizos, sa mama e sa jaja. Sunt issas chi ant ingarrigadu s'abocadu de famiglia.
- Zustu, zustu. In custa cosa bi cheret un'òmine.
- E issu at mutidu a mime.
- Abistos, aberu abistos. Òmine sàpiu est custu e òmine de leze puru... at isepertadu bene. Est unu chi zuchet sale in cherbeddos. Los ischit conòscher sos òmines cussu. A chie est tocada sa disgràssia?
- A unu pitzocone, narat issu. Un'istudente universitàriu, isposadu e cun duos fizos. L'ant contadu totu sos zornales.
- Si los àer letos non t'ايا fatu sa dimanda. Mi narant chi contant unu muntone de fàvulas. Mi las ant cantadas a s'epoca de su fatu de Mialeddu! Pacu de lis crèder b'at.
- Est fizu unicu de sos Toniutti Bertini, a su chi contant sos zornales favularjos chi narades bois.
- Cussos dassalos a banda Ite àteru m'ischis nàrrer d'issu?
- Sa mama s'est cojubada duas bortas. S'ùrtimu maridu est istadu Demuro de Bosa, ca como est torra biuda.
- Apo cumpresu. Una borta fipo in tratativa cun issu pro una pastura; nos fimus postos de acordu, ma a pustis no apo comporadu, ca non m'aiant cuntzessu su prètidu: òmine abistu cussu: ischiat de fatos suos.
- Ant terrinos. Sunt proprietarione .
- Ant peri duos palatos in Macumere. Si l'ant ricatadu, prus ricu de mene est de securu. Como sa richesa l'at a servire a li sarbare sa bida. Bides, su dinare serbit peri pro custu, cando b'est.
- Ricos gai non sunt. A contante paret chi sient belle a zero.
- Ma ant terras e domo. Si bendant cussas e pachent su riscatu. Peri issos cherent pacados. No ant fatu sa faina debadas. Chene nudda non nch'ant a chèrrer essire. S'arriscu est mannu e carchi cosa est pretzisu de li la dare. Sos Demuro no ant a torrare a sa bèrtula.
- Sunt sos Toniutti ...
- Eja totu issos sunt. Non torrant a sa limùsina.
- Cherent unu miliardu!
- Unu miliardu ant naradu? S'ant a acumentare de prus pacu. A cando su primu addòbiu?

- A nàrrer su zustu fipo pessande de mi dobare.
- No.no.no. Custu no. Non si nde faveddat nemancu.
- Est un'arriscada manna pro mene.
- A Barracu non si torra su chi nono.
- A mime ite mi nd'infruit? Chi s'ispitzent sos parentes.
- No,no. Bi depes andare e comente. Bi depes andare intantis ca est una cortesia chi a s'abocadu li depimus, a pustis de cantu at fatu in su protzessu pro Mialeddu; in prus ca est un'opera de caridade, ca si tratat de sarbare sa bida de unu zobaneddu. Como andamus a cubile a dimandare de nobas, a pustis mi nche torras a Macumere, ca apo de girare a bidda. Apo a dimandare si poto bènner a ischire carchi cosa. Ponzo in pedes peri cussos tres de bidda chi sunt bandidande, chi iscant chi bi ses tue in mesu. L'ischis, in custos fatos bi sunt sèmper issos in mesu comente tentadores, cosa chi petzzi zente che a issos podet fàcher. Si lu fachet unu liberu biddaresu, non fachet unu passu chi nche lu cravant a intro. Sende custos tempos metzanos, ca nde zuchent nessi chimbe in manos, bidimus ite si podet fàcher.
- Azes naradu a sarbare sa bida a unu zovanu. No est chi ischedas chi su pitzinnu est in perìculu.
- Inte, betzu so betzu; medas cosas so bènnidu a ischire, ma non pretendas chi benza a ischire totu in antis chi mi porrant nobas.
Pascale Tidu la serrat in cue. Est unu pastore a s'antica. Si l'at colada in su mudìghine de su Pradu de Orune in sos istios, in sas campuras de Silanus e Birori a superare sos fritos de s'iberru.. In sas tancas sos arbores non mutint, sas rocas sunt surdas e mudas. Su mudìghine est cosa longa e Tidu su mudìghine si lu trazat a pala, sèmper cun issu l'at. Cussu manzanu at negossiadu a sa longa, peri tropu. Un òmine che a issu cando est a chistione non si li secat sa paràgula in buca. B'at petzi de l'ascurtare.
Mancu deche minutos e sunt in cubile. Su pastore non b'est. Nch'est afilende sas bèstias a su tretu zustu. Sos canes sunt fachende de coa a fùrriu de su mere.Su biancu, su prus mannu est ligadu a cadena longa a unu mutzu de ozastru, Est a tiratosta cun sa cadena pro s'acurtziare a su mere. Pascale andat a si lu carinnare, negossiandesilu che pessone. Sa bèstia si l'acoconat in pedes fachendeli festa e li sartiat a fùrriu linghendeli sas manos.
S'òmine si ponet sas manos in buca e ghetat unu frùschiu. Poc'ora e torrat Totore. Los fachet intrare a sa domedda e garigat su focu in mesu domo.
Si porrint sos saludos e si contant sas nobas. Deretu Totore preparat s'imurzu de pane carasau e frue. Dae sa cannita nche falat unu punzu de casu nobu e dae sa macherina nche bocat un'ampulla de binu locale.
Zuanne no aiat postu in contu de s'imurzare cussu manzanu, ma non si podet rifiutare e ca b'est sa frue e ca est costumàntzia a non rifiutare unu cantu de pane. Tziu Pascale s'informat de su bestiàmene e de su late. Chelleddu est in s'impostu isetande su càmiu chi nche picat su frutu de su manzanu a caseifitziu. In ibe non est solu, b'at àteros de sa matessi leba a si negossiare. Non at de istentare a chirriare cun su soru pro sos canes e pro sos mannales.
Pascale nche falat sa bertula dae sa màchina de Zuanne prena de recatu e de unu butillone de binu chi dae tempus in tempus un'ozastrinu nch'artziat a Orune. Sa bide non bi fachet in sas costas chi artziant a Orune e sos orunesos no ant tempus a marrare binza, si peri aeret fatu. No est manizu issoro.
- Bido chi su binu non bos mancat – narat Pascale – ma custu non bos at a fàcher male.
Si sunt tratesos ecante, ma Chelleddu non ghirat. A s'abitudine sua si tratenet cun sos cumpanzos a negossiare de bestiàmene e de pasturas e, mescamente, de fèminas. Sinzale est chi totu est protzedende bene.
- Tira ca amus de ghirare – narat Pascale a Zuanne – No amus tempus de pèrder in oche. Saludami a Chelleddu e nàrali chi so bènnidu, ma non mi poto tratènner. Bàdialu bene, ca est tropu zovanu e azocatzadu, non si m'iscaminet.

Sunt essinde dae sa tanca pro picare s'istradone.

- Fortzis fachimus in tempus a picare su trenu. Ghiro a Nùgoro e deretu a Bidda.

Zuane cumprendet s'antifona e li rispondet:

- Fintzas a Nùgoro bos poto acumpanzare deo.

A Pascale non l'essit paràgula e nudda si narant fintzas a sa tzitade. Lu dassat in s'uspidale, da ube picat su postale pro torrare a casile.

- Saludami s'abocadu e informami.

SA BISITA A RIORI DE ORGOSOLO

Zuane, cun sa màchina in motu si tucat deretu, ma non pro torrare a Macumere. Picat su caminu de Orgosolo. In Budurrai, coladu s'agruadorzu de Galanoli, lu superat sa gazzella a luches isparadas. Non li dat cara. Ischit chi in cussos caminos, mescamente in custos tempos, no est raru a zobiare politzia in andada e in torrada. In Orgosolo su cumissariadu de P.S. b'est annos e annos e sos carabos puru.

Cando nche lu sichint duas camionetas de carabos, carchi suspetu li benit. Non si firmant nen sos unos nen sos àteros. Ant presse. Fortzis sunt andande a preparare carchi bloco istradale.

Chichissu, imbolicadu in su gabanu, in ata de caminu, isetat chi colet su postale a ghirare a bidda. Mancu si tremet, cando bidet colande a Zuane, ma issu si firmat pacu a in antis e ingranat sa retromarza. Sa cara de sirbone de s'orgolesu non li colat in passada. Est dae meda chene lu bìder, ma lu conoschet tropu bene. Est istadu teracu pastore cun sos suos in annos colados, in antis de si cojubare. S'at picadu sa parte de su bestiàmene chi li perteniast sende chi l'aiat pesadu in terras issoro, a s'usantzia. Como at una sienda sua, mancarì minore e cun sa paca roba e sos porcos chi pesat, si campat sa famiglia.

Non ponet prus fatu a sa roba, comente si fachiat in antis. No abarrat prus imbaradu in palas de truncos e matas, a si reparare dae sos bentos. Rete pro cresura e vetura pro si mògher, ant cantzelladu dae sa panoria sarda cussa figura misteriosa de berbecarju. Chichissu, in purtzione, est de sa zenerassione noba chi s'est isvilupada in Orgosolo e biddas a fùrriu in custos ùrtimos deche, bindichi annos.

Issu no at sa betura e pacu li serbit. Locoe est meda trabicadu dae sos postales chi colant a cad'ora e no at mai pessadu de si picare sa patente de guida. Zuane si l'acatat gai, su trinta de nadale, in Locoe. Una bèrtula de furesi bianca e nighedda est prena cun duos bidoneddos, unu pro su late pro sa famiglia e unu pro su soru pro duos mannales. Cando Zuane si l'acùrtziat, si pesat ritzu. S'abizat chie est e l'istringhet sa manu.

- Bidos los as cussos dimònios? Non nos dassant in pasu. E tue comente a custas bandas? Bisonzu de bonu b'as?
- A ti la nàrrer zusta fipo benende a ti chircare. Pessabo chi fis in Orgosolo a cust'ora.
- E in Orgosolo depiat èsser, ma un'intopu m'at fatu pèrder su postale. Como fipo isetande s'àteru. Si ti poto serbire in carchi cosa, no as che de allegare.
- Cherjo zobiare a Riori e tue ischis in ube e comente l'acatare. M'est pretzisu de lu chistionare.
- Petzi custu? Ischis chi tue e totu sos tuos sunt sèmper bene bènnidos a in oche. In domo no b'at secretos pro bois. Pro su chi riguardat Riori, capitas in mamentu zustu, ca est ghiradu a bidda istanote. A sa prima iscuricada depet torra fughire. In pessu in bidda, mandamus a fiza mea a li nàrrer chi as de lu negossiare. Non l'at a pàrrer beru. Ti conoschet e non s'est ismenticadu chi at traballadu in domo bostra unos chimb'annos, a pustis chi mi fipo liberadu deo.

Arribant a bidda e la rucrant sichida, colande in su Cursu, pro bortare in su montricu e artziare a susu in Caspiri, pacu a manu destra de santu Nicola. In cue s'at fatu sa domo Chichissu, ube l'at dadu unu cantu de terra su socru.

A los addopare si presentat Babanna, chi deretu lu fachet intrare a s'aposentu de retzire. Conoschet peri a issa Zuane, dae cando fit amorande cun Chichissu. Si la bidet benende a passu misuradu, elegante e fiera, bestida in blusa e fardeta plissada, paret una dea. Sa blusa dat a bìder unu sinu bundante e galu zovanu e atraente; sa conca cuzicada dae su mucadore chi l'imbolicat sa cara tunda e ruja, un'incantu. Su mucadore est nigheddu, pro unu lutu de ses annos in antis, dae cando l'ant mortu unu frade. Paret pro chistiones de fura e de pastura. Sa tracuillidade in domo sua fit finida, sende chi non ant chircadu a nemos. Sa serenidade nche l'est fughida dae domo e dae

coro. Est cuminzada una disamistade maca, pro cosa de pacu balore, chi peroe los mantenet sèmpèr in pessamentu. In prus su frade Riori, sèmpèr bandidande pro àteras chistiones: sos ribale l'ant acusadu de sa morte de unu de issos e est in isetu de protzessu, cun s'ispera chi essant a campu sos testes zustos.

Bida de bandidu, bida de canes. Sèmpèr tentadu, da unu cubadorju a s'àteru, in rocas e, cando nono, in matas, cubadu che sirbone. No ischint mai ube si colat sa note e sas dies.

Non si firmat mai ne in domo ne in pinnetu. Una ispia lu podet traïcher cando mancu si l'isetat e no at de pònner in perìculu sos amicos, chi nessi su recatu non liu fachent mai mancare e li batint sas nobas de famiglia. Tentadu dae ribales e carabos, at pacu de si fidare, prus dae sos unos chi non dae sos àteros, chi non li conoschent nudda de malu, si no est pro carchi suspetu in totu custos ricatos de ocannu. Sas ghiradas a biddu ja sunt pacas e sèmpèr un arriscu sunt.

In cussu 1978, cun totu sos ricatos in ziru e sos delitos chi non mancant mai, non si podet isbariare unu mamentu; no at pasu mai. Campos e montes sunt sèmpèr trabicados dae carabos e politzia. Li tocat a ispiessu de si fughire a sos montes de s'Ozastza fintzas a Tertenia.

Est ghiradu a si cambiare, ca sa bestimenta la juchiat pudinde in sa carena. Si s'istentat, si li ghetat su merme. L'ant dadu unu pacu de pasu, ca sas fortzas de politzia e carabos sunt impinnadas in d una batuta in chirros de Benettutti e Nule, Orune e Bitti. A cussas alas chircant sas tratas de Bennardu. Ant postu in motu peri sos carabos de Orgosolo e sos politziotos de sa biddu. Cussos chi nche l'ant sichidu e codiadu in caminu in sos zassos de Budurrai, sunt ghirande pro dare su càmbiu a sos chi sunt abarrados in biddu e pro no isbodiare de su totu tenenza e cumissariadu.

Sa notissia est curta dae chima ini chima, dae montricu in montricu, dae cubile in cubile e est arribada peri a ulicras de Riori chi nd'at profitadu deretu. Depet mògher a sa lestra, a sa prima occasione o in pessu fachet note. In biddu faveddant peri sos muros, peri si sos carabos non nde cumprèndent su limbazu. Sos ribales non li dant aneu. In domo non si podent arriscare.

Pepedda, sa fiza manna de Chichissu, est aparizande sa mesa in s'apomentu. Sa muzere in cuchina est preparande casu e presutu e unu cropu de sartiza. Zuanne non cheret contare, li benit de obricu e gai contat de s'addòbiu cun Pascale Tidu su manzanu e de s'imurzu in su cubile. No at gana de picare àteru bucone, ma Chichissu li narat:

- Non mi facas cust'afrentu chi non ti picas una mura de casu o una fita de sartiza in domo?
- Mi so imurzadu in cubile de Pascale, ti naro.
- Cussu fit a manzaneddu. Como t'est intrada gana noba. As biazadu e ti serbit recatu nobu.
Zuanne non s'est pòtidu dobare. Babanna est afainada in cuchina. At dadu su soru a sos porcos e postu su late a còcher. Chichissu nche la mutit e deretu iscampiat in sa janna.
- Sediti
- Fipo cuberrande su mannale - narat comente a dare a ischire a ite s'est cambiada e non est prus elegante che a in antis.- In biddu no est cussentidu, ma inoche semus belle e foras de su populadu. Lu mantenzo sèmpèr pulidu, ca su fracu diat dare fastidiu peri a nois.
- Est bènnidu pro frade tuo. At de li dimandare cosa.
Babanna ghetat un'ocrada ispantada a su maridu, chene dare a bidet àteru. A Zuanne cussu tzinnu non nche li fughit, ma non nde podet fàcher a mancu de cussu addòbiu e non narat nudda.
- Liu apo naradu deo ch'est in biddu. Si conoschent bene peri cun issu e l'ischis.
- Mando a Pepedda a lu mutire. – E essit.
- Pica su presutu. L'at cundidu Babanna chi si nd'intendet.

Zuane assazat de totu, in su mentras chi Chichissu essit a batire una ampulla de binu, chi Babanna no at bocadu. Binu bonu, binu issoro, ca Chichissu at imparadu a si fàcher sa binza in Locoe, a chirros de su Calàbriche. Torrat Pepedda nande a sa mama chi Riori est contentu de jobiare s'amicu; antis l'isetat. Cun resone! Riori no aiat mai fatu a mancu de bisitare sos meres anticos, mescamente como. L'acasant bene e unu gustu e azicu de racatu pro cando est innedda non liu fachent mancare. Zuane puru l'at zobiadu medas bortas, cando andat a si computare sa sienda.

- L'est isetande.- li narat Babanna e issu si pesat deretu ritzu.

- Andamus non b'at de istentare.

Essint e si l'aviant in d unu guturedu istrintu bia a s'urtima domo de su bichinadu a parte de susu. Sa domo est de parentes custringtos. Intrans chene mancu tocheddare. Duos betzos sunt sètzidos pedes a focu.

- Chie est custu? – dimanda unu de sos betzos catzandesu su zigarru dae buca e gruspinde a sa chisina.

- Unu cumpanzu de Oleri. Bois conoschides su babu, tziu Micheli. – Su betzu si l'abirguat bene e li dimandat:

- Ello Micheli comente istat? Imbetzande b'est?

Zuane at in pessu su tempus de li dare una risposta chi deretu nche bidet a Riori falande dae su sostre. Sas miradas si badiant a pare e deretu Riori li fachet de tzinnu de andare.

- Perdonade - narat a sos duos sètzidos in su focu e in presse est in su liminare de s'iscala. Un'abratzada che frades e Riori nche l'ispinghet a una domo cun sa bentana a isportellos serrados.

- In oche semus securos. – Li narat – Sedi..- Est chene barba, l'isiu in cara e luchidu in sa beste de belludu castanzinu; sos gambales sèmper bestidos e sos iscarpones puru. Paret bestidu che isposu nobu, ma est in cue prontu a mògher, a fughire, sartiande a fora dae su curridore. In sa mesa sa tasca prena de recatu, chi non li podet mai mancare. Dae un'istuzu nche bocat una ampulla de binu e duas tassas.

Ghetande ghetande dimandat.

- Bisonzu mannu ti nch'at batidu a goi?

- Bisonzu mannu aberu. S'abocadu Perantoni Boi.

- Barracu! E comente istat?

- A istare, ja istat bene, ma no est a ti salutare e, a la nàrrer zusta, no ischit chi mancu so in oche. No est chi mi l'apet naradu issu, ma mi l'at fatu cumprènder.

- Mariane bonu est cussu! E tue non ses macu. - Faveddant a s'iscùsia e in purtzione in suspu, chi àtere no àeret cumpresu.

- S'abocadu est istadu postu in pedes pro su ricatu de cussu pitzinnu ...

- Cale pitzinnu?

- Ja l'ischis, ja l'ischis. Cussu chi nch'ant picadu sa note de nadale.

- A bellu puntu semus torrante chi non rispetant mancu sa festa cumandada!

Zuane non dat cara a cussu e sichit:

- B'est in totu sos zornales.

- Su zornale no est cada die chi lu lego. In sos rocarzos de Supramonte non nde bendent. Pare chi sas mugras no apent galu imparadu a lègher – concruit brulleri.

- Funtzionat galu Radio FANTE. M'ant contadu chi sas antennas in punta de monte bi siant galu. Nch'ant picadu a Bennardu Toniutti, unu zovanu de Macumele.

- Custu l'apo cumpresu.

- S'abocadu est istadu postu in pedes pro custu ricatu e at mutidu a mime pro imbassadore. No isco si li nàrrer chi eja o chi nono. Mi diat serbire carchi garantzia in prus.

- E chie cheres chi ti las diat custas garantzias?

- Mi las podent dare, mi las podent dare e tue ischis comente. S'arriscada est manna e deo non cherjo chi mi brusient. Est pretzisu chi iscant chie so. Non apo gana de mi colare brutos mamentos. Si mi diat sutzèder cosa, tue ischis ite bi diat sichire.

- L'isco, l'isco.
- Apo bidu a tziu Pascale Tidu custas dies.
- E comente istat?
- Est un'incantu. Est issu chi m'at cussizadu. De bi lu chircare. Ja ischis in ube e cando.
- Òmine sàpiu, cussu. – Dat cara de non dimandare in ube si sunt jobiados e in cale die. Dassat chi Zuanne s'icat a nàrrer e intantis si lu bàdiat bene. A fines chene s'iscumpònner meda, li rispondet:
- Apo cumpresu de cale ricatu ti ses interessande. Carchi boche l'apo intesa. Depet èsser peri in custos fùrrios. Istanote b'apo a colare peri acurtzu. Atzeta securu s'ingàrriga. A s'abocadu non si podet nàrrer chi nono. Fache peri su ziru chi t'ant indissiadu. Mi nde preocupo deo de abisare chie est de cumpetèntzia. Est zente de locos nostros, zente chi ti podes fidare. Est zente noba, ma ti podes fidare, sende pacu esperta. Est sa prima chi cumbinant. B'amus a pessare nois a los istruire. S'ant a dassare istruire, s'ant a dassare. Baebi trancuillu. A Pascale l'apo a bider istanote o manzanu. Zuanne ascurtat cun atenzione sos concruos de Riori. Paràgulas sèrias, trancuillas chi bestint trancuillidade e Zuanne si nd'abizat dae comente sunt naradas. Riori si pesat e li ghetat sa tassa de s'istafa. Bibent a sa ritza e Riori azunghet, imbarandeli una manu supra su coddu:
 - Bae trancuillu e non ti piches peruna preocupatzione. L'ischis chi cando capitat imbassadore una persona conota, unu ch'est òmine, fachel piachere peri a sa controparte. S'abrazant e deretu Zuanne est in bassu, in sa cuchina. Saludat sos duos betzos, unu tzinnu a Chichissu e deretu a foras. Si l'aviat in màchina pro falare a mesu bidda e Chichissu si l'afilat a domo sua. In cussu mamentu, Pepedda est currende a domo de s'amicu e Babanna fachel tzinnos a Chichissu chi si remonat in presse. A Zuanne fachel de manu de andare deretu. Zuanne non si lu fachel ripèter. Falande a su Montricu non bidet petzi zente chi si moghet in presse, intransende in sa prima janna aperta. B'at sutzedende cosa manna, peri si non resessit a crùmpènder ite. Ma colande a curtzu a Santu Nicola, bidente duas camionetas firmas, si lu pessat deretu: Riori, sunt chircande a issu. In prata de su Montricu una persona conota li fachel de manu a firmare e falare. Una vetura de sa politzia l'est colande a costazos. S'iscostat ecante a manca pro la dassare colare. Non est ora de brullare, ma non cheret mancu dare s'idea chi est de coladura e impressidu. Essit e s'acurtziat a su tzilleri. L'istringhet sa manu. Est unu collega chi traballat in su matessi setore. Intrat. Su tantu de si bufare unu cafe Torrat sa màchina de sa politzia a sirena alluta. Est artziande a Caspiri. Sos de su tzilleri si pesant ritzos e totu a pompiare a sa janna. In pessu un'ocrada e torrant a si sèder o a bufare a sa ritza.
- Est cada die goi, inoche. Non nos dassant unu mamentu in pasu. Carchi boche nche lis ant porridu. Non ti preocupes. Si non bi fit istadu radiofante, ja b'aiant pessadu sas sirenas issoro e totu. Non nd'ant mai tentu unu a goi. Peri Mesina nche lis fit fughidu, sende chi sa borta fit inghiriadu si non che a oje, in su 1968. Podes cumprènder si unu si fachel tzapare discansadu. Àteras veturas s'intendent in Santu Marcu. Riori a sa prima intesa est sartiadu dae su curridore e deretu cara a Santu Micheli. Curret che cane fughinde. No at che una pistola e nche la ghetat a una mata, chene mancu si firmare. At torrare a note manna a la recuperare. Non si dassat tènner a cropu o a latu. Controllat sas diretziones chi sunt sichinde sos carabos e cando s'abizat a cale banda sunt tirande si l'afilat a zosso a sas binzas de Sorasi. Ischit chi in cue non lu chircant. Andant a banda de susu, a sos padentes e rocarjos. Peri Riori at de torrare a cue, ma cando sas cosas si calmant, cando sos cassadores s'isporant e s'abizant chi sunt arribados tropu tardu. Issu at de jumpare a Gurinnaru e tucande a destra depet artziare a punta de monte da ube podet kontrollare mezus su moghimentu de sa zustìssia, pro torrare a falare a nche recuperare sa pistola..

S'at fatu bene sos contos. Li cumbenit a pustis de torrare a sa badde, jumpare su Ribu de s'Orgolesu, rucrare in su de Uliana e cròmper a su de Durgale. Caminande note note, at de nche cròmper a s'impoddile a su de Orune, ube podet acatare cubadorju in mesu de zente amica. Petzi s'incras a bortaedie, nche podet suprire a su Pradu de Orune e mandare s'imbassiada a Pascale Tidu ponendeli sa posta in terras conotas. Minore est minore de istatura, ma at una corporatura bene formada e forte. Sas ancas capassas de nche sartiare a brìnciu unu mureddu, pro artu chi siet. Conoschet sos locos e sa zente. Petzi a traitorinu lu podent cassare in su sonnu.

Zuanne in sa ghirada a Nùgoro s'abizat chi b'at tropu carabos in ziru. Sinzale chi sa batuta de s'impodile no at dadu frutu e sunt ghirande a sa Tenenza de Orgosolo. Li benint de fronte currende che macos, ma est securu chi Riori peri custa borta si l'iscampat.

Cando nch'est in Nùgoro, pessandebi, s'abizat chi l'at fata bella s'arriscada. Si lu sejant in domo de Riori, pro l'andare bene si nche podiat buscare un'acusa de àer dadu azudu a su cumpanzu. Unu bellu dannu a s'abocadu chi s'aiat dèpidu chircare àteru imbassiadore.

Unu mamentu ebia, ma su pessu chi li sient ponende fatu l'artziat a conca. Deretu s'amentat chi peri a manzanu chito, àteras camionetas l'aiant bestidu sa matessi duda. Impressione mala, ma de fughida. Cussiderat chi dae bator dies in sos zornales sunt iscrivende chi de Bennardu non s'at galu ischidu nudda. L'est craru chi galu non si sunt sapidos chi at àpidu s'ingarriga, chi non s'est bènnidu a ischire de sa prima litera a s'abocadu.

Colat da unu bloco a s'àteru in s'andare dae Orgosolo a Nùgoro e da in oche a Macumele. Non lu firmant mai. Non si ponet a cùrrer, ca no at nudda de cubare e, si peri bi l'at, sunt fatos suos. Est tracuillu e in antis de mesudie nch'est in domo sua. Sa muzere est preparande a prànder e su fizu est galu in iscola.

- Ube nche fis totu su manzanu? – Li dimandat sa muzere.
- In ziru in goi e in gai.
- A ufissiu, andadu bi ses? T'apo telefonadu duas bortas e m'ant rispostu chi non bi ses coladu. Peri paco'ora.
- Non bi so coladu ca so de turnu a sero. Fipo in ziru cun amicos bènnidos dae fora.
- M'ant telefonadu dae Roma. S'apuntamentu est fissadu a su bator de ghenarju in s'uspidale Gemelli. Ti cheria nàrrer de andare a fàcher sos billetes e prenotare su postu in nave.
- Bi podias andare tue, o nono?
- No ischia si as impinnos, si picare sa nave o s'aereo.
- L'ischis chi pro tene aio dassadu pèrder cale si siat àteru impinnu. Pro sa die, impinnos no nd'apo. Ischis chi pròpiu pro cussu no nd'apo picadu ca mi l'isetabo chi finidas sas festas aiant de nos mutire. Un'impinnu bi l'apo, ma est pro su duos. Su tres podimus mògher tranquillos. Su bator semus in Roma e pro Pasca de Sos Tres Rees, pesso chi siemas in torrada. Dipendet dae s'interventu. Si totu andat bene, pro sa befana amus a èsser torra in oche. Picamus sa nave si acatamus cabina libera.
- E fizu tuo?
- Non fimus de acordu chi andat a ube sos jajos?
- Sisse, ma cando nche lu juches?
- Bi faco un'iscampada a ùrtimu de annu. Gai los informamus e li damus sos augurios. A issu no at a pàrrer beru chi istat cun sos fradiles. Li piachet prus a istare in Fonne chi no in oche in Macumele.

A sa ghirada de su fizu si prandent a sa muda. A sas duas est in su traballu e a sero si la colant tranquillos in domo in sa zimineru. Ùrtima die de annu est dumìnica e, comente cuncordadu, andant a Fonne. A s'iscuricada cumintzat a nibare. Est tirande bentu forte e promittit male. S'incras a bortaedie est torra in ufissiu.

Sos ricatos sunt sèmp(er) in prima pazina. Sas notìssias interessant sa zente e sos zornalistas est cussu chi ch(er)ent. Nobidades peruna. Petzi suntos de dies coladas. Est coladu s'annu e contant de totu su chi b'at sutzessu.

Peter Rainer Besuch mancat da su decheoto de capidanne e ant pedidu unu miliardu pro lu liberare, ma sos bandidos ant secadu sas funes e non si nd'ischit prus nudda. Sa muzere Elisabeth e sa fiza sunt ligadas a s'ùrtimu filu de ispera, isetande nobas in Porto Taverna.

Pupo Troffa est ricatadu dae su tres de santandria. Ant pedidu tres miliardos pro liu torrare bibu. Sos familiare, a pustis de sa de duas imbassias, a banda de nadale, no ant retzidu nobas. Sa muzere est galu in isetu de risposta a s'imbassia publicada in sos zornales.

Su riscatu prus artu est cussu pedidu pro liberare su nobile Don Efisio Carta. Nche l'ant picadu da sa sienda sua su seichi de santandria. Sos familiares ant una preocupazione dopia. Ca in prus de èsser presoneri est peri malàdiu male e at cròmpidu sos 77 annos. Totu sunt cumbintos chi no est a grabu de superare custu iberru, in cussas cunditiones, chi prus fritu non si podet pessare.

S'inzenieri de sa Ferrari, Giancarlo Bussi, lu dant pro mortu a pustis chi ant pacadu 100 miliones a fronte de una richiesta de duos miliardos. Sa muzere Edda dat a ischire chi est pro dassare sa Sardinna: si nche girat a domo sua, a domo de sos fizos. O retzit notìssia chi su maridu est galu bibu o si nd'andat.

Pro Pasqualba Rosas, sas nobas sunt cuntrastantes. Narant ch'est in pitu a èsser liberada. Su primu de ghenarju de su 1979 cumintzat a sa muda, chi pejus non si podet. S'ischit chi ant pedidu dae 800 miza a unu miliardu.

A su ricatu de Bennardu sos zornale dedicant a mala pena duas rigas. Cun s'abocadu non si sunt prus intesos. Cussu bortaedie ghetat nibe e in pac'ora imbiancat campos e caminos. Macumele s'ischidat cuzicadu e su tempu chi marcat zero.

Zuanne su manzanu andat a su traballu a pede. Cun sa betura, petzi ponet sas cadenas a sas rodas, si nono, non est possibile de si mògher. Si la timiat e l'est sutzessa. Si intro de die non si sorbet, l'est impossibile a si mògher su sero de su duos. Su raju non trasmitit peruna noba bona. In Fonne su nibe est artu e su termometro marcat chimbe grados suta su zero.

Sos montes sunt totu biancos comente lentolos, mescamente su caminu chi dae Benettutti andat a Orune artziat a 800 metros. In cue in iberru su nibe non mancat mai. Candos a mesudie, s'est iscampiadu s'abocadu, sa situazione est ecante meorada. In Macumele torrat a si bider màchinas in ziru. Su de timer est su bortaedie e mescamente sa note, cando sos caminos diventant una lastra de astradu. S'abocadu s'acutziat a su bancu de retzire e dimandat de unu cliente de Casteddu. Retzit una risposta a rucadura e Zuanne, a pustis, sichit:

- Bidende est ite tempus b'amus? Ite nde li paret?

- Su tempus non lu cumandamus nois. A onzi modu, si mantenet goi, cun atenzione, si podet galu biazare. Sa A112 est una bona màchina e mantenet bene su caminu,.Cussa de s'amicu meu est istada revisionada dae pacu e custu est una garantia..Si si ponet in biazu custu bortaedie non l'est difitzile a nche cròmper a Macumele. Si benit nàrali chi la dasset acurtzu a domo, pro èsser prus segura. – A s'iscùsia b'azunghet. – Juchet su serbatoju prenu e at duos bidones de benzina in intro, si diant serbire.- Chi benzat a mi salutare, cando arribat. Nche diat colare peri dae Tatari, bastet de arrivare, ca s'afàriu est tropu urzente. Non diat colare de securu in su caminu chi andat a Marreri.Cussu est un tretu malu a beru.

- A ite ora l'isetat?

- A banda de sas chimbe. No in antis. Colet a su bancu chi nos picamus unu cafe.

- Non poto. Arguai a bìber in ora de servìtziu.

- A piachere. La saludo. M'informet si lu bidet.

- No apo a mancare. Adiosu.

SU PRIMU ADDOBÌU

Su sero Zanne non podet fàcher a mancu de dare a bìder a sa muzere chi s'est cartande comente a cando andat a campu. Si mandicat unu bucone e a sas chimbe essit.

Picat sa màchina sua fintzas a domo de s'abocadu. E gai cumintzat sa prima bentura.. Sa betura est aperta. Bidet deretu ch'est bona e comoda.

Cando est a curtzu a Silanus s'abizat ch'est zai iscuru. Su chelu est apalatadu e tirat unu bellu bentu. Caminat a su passu chi l'ant impostu de 30 km a s'ora. A cussa velotzidade b'ant a chèrrer nessi duas ora pro nche cròmper a su de Bitti e àteru e tantu pro arribare a Durgale. Su biazu, peroe, at a èsser prus securu. Si ripassat in mente sos caminos de fàcher: Macumele, Silanus, Bivio Iscra, Bono, Botidda, Nule, Benettutti, Bitti, Onanì. S'abizat chi ant esclusu Orune. Mancu tzinnu. Una isvista? Fortzis l'ant fatu a posta. Non est cosa fata pro isbàliu. Depet èsser un'isseperu ch'ant chèrfidu fàcher. Dae sos carculos suos, fintzas a Bono podet andare trancuillu, L'est bastadu de cussiderare a mente sos zassos. Totu biddas de bassura a longu a longu de su Tirsu. Padente lascos, cun pacos tretu a foresta. O a mata de arbores barios. Sa Sardinna, in tretos ube non b'at coladu fogu non manca de matas chi cuzicant unu terrinu, belle e nudu, ube peri sas rocas sunt iscarsas. In prus su terrinu est rucradu de caminos e guturos e gutureddos., sèmper trabicados. S'addòbiu non podet èsser che coladu Bono., intro de Benettutti o Nule, o , cando chi nono, in su de Bitti.

Su tretu Durgale – Lanusei, si non lu podet escludere, li paret pacu probabile.

Diat èsser custu su locu prus adatu, ma l'iscart: tropu innedda. In cue non s'at mai ischidu chi b'apet istadu bandidos. Su zassu depet èsser prus acurtzu a Nùgoro e fùrrios. Diat dèper agrucare totu sa badde de Isalle colande in d unu caminu cun trabicu sichidu.

Sa betura de su ricatu est istada acata in Barrantzellas, in d unu caminu intro de Benettutti e Orune. A nche trasferire su ricatadu a banda de Durgale fit istadu un'arriscu tropu mannu. No trascurat chi podet èsser istadu jutu a su Pranu, a cudd'ala de ribu, ube si podet acatare carchi cubadorju securu. Àteru e tantu podent èsser sos zassos de Ivana, Tomeu o sos crastos de Jacupiu, su monte chi s'imbarat a s'Ortobene. Custu podet rènder possibile su tretu de caminu Durgale-Lanusei, andande costa costa de su Supramonte, intro de Uliana, Orgosolo a un'ala, Nùgoro a s'àtera. In cue locos a si cubare e a cubare zente non mancant. Custos pessos li torrant a mente a Pascale e a Riori. S'amentat de su trinta de nadale e totu sas atopamentos li parent chi non fint debadas. PascaleTidu non l'est mai capitadu in dies notas gai e in tale situatzione, cando fit andande a cubile e non bi ses firmadu, ma aiat bìbidu su cafe paris. Est issu chi l'aiat cussizadu de cròmper a Orgosolo a chircae a Riori. Curiosu chi in cussa die, pròpiu in cussa die esseret in bidda. Fortzis cussa est sa atopada prus ocasionale, ca Pascale non podiat ischire in cale die b'esseret andadu, ca b'aiat una batuta de carabos in atu. Radio Campo fachet in presse a informare sa zente, mescamente si b'est sa zustissia in ziru., comente in cussa die e note de su 29 de nadale. Lu ponet a pessare chi Pascale aeret bidu, a nàrrer suo, a Riori pròpiu s'incras, sende chi lo separat una bella distànzia de 50 km.

Si cumbinchet chi non fit per casu chi a banda de mesudie, tanta politzia s'esseret acatas in Orgosolo a dare sa cassa pròpiu a Riori. A nche collire una notissia de Radio Campo non est difitzile mancu a sos carabos espertos. Chi l'apent postu fatu, a custu puntu, non lu podet prus iscartare, sende chi non l'ant mai firmadu, antis pròpiu pro cussu.

Sas imbenièntzia sunt tropu aberu pro non pessare chi in su biazu dae Orgosolo a Macumele non l'aerent postu fatu. B'at carchi cosa chi non torrat. Calicunu est afroddiande. Li paret chi lu siant impreende che brusca. Chi bi siat un'acordu intro de

òmines chi istant gai allargu s'unu dae s'àteru? Impossibile. A sa fine de sos contos, Pascale Tidu est ligadu a s'abocadu dae unu dèpidu de riconoschimentu per mesu de Mialeddu. Riori at prus de una resone de èsser ligadu a Perantoni Boi.. Sunt ambos clientes e in casos sìbiles, cando s'abocadu ghetta boche, non podent non rispònder.

Est s'abocadu ch'est tirande sos loros e li benit a per fortza pro s'arte chi fachtet: l'est cliente Pascale Tidu e cun resone, lu est peri Riori. Dae custu dependet s'amichèntzia issoro e su fatu chi a s'abocadu non si podet nàrrer chi nono e non podet non dare frutos bonos s'interessamentu suo cun su ricatu de Bennardu.

Zuane s'amentat sas essidas de s'abocadu." Est unu secuestro particolare, dràmaticu e de su cale est a petorru a pessare comente podet andare a finire". Mescamente custa: " Mai a colare dae Marreri andande a Nùgoro". Est unu nàrrer de persona informada, chi ischit. Ma li paret fora de norma chi non si fidet de issu At cumbenièntzia a sarbare sa bida de su zovanu presoneri. Ite diàulu l'est cubande? Peri custu at de iscòperru, ma comente?

Si moghet a 30 km a s'ora e istat pompiande a manu destra. Superadu Bono at sa tentassione de si firmare, medas bortas, ca su bentu de sas dies coladas nch'at ghetadu a supra su catramu de sos caminos unu muntone de sida frisca. Petzi s'esperientzia, chi li benit dae sos annos colados in campu, non lu traichet.e sichit acurtziandesi a Benettutti e Nule. In atas de caminu su nibe est galu biancu e in mesuia est peri astragadu..

Petzi sa peritzia e su camminare a bassa velotzidade, chene frenare mai lu sarbat da essire fora de caminu. In sas arturas de Benettutti e de Nule, ube su nibe est galu artu, surcadu in pessu dae sa pacas veturas coladas in artis, lu sarbant dae nche rùgher in carchi trocu o apizicadu a carchi parapetus. Nch'at superadu Benettutti e cumintzat a beru a pessare a Durgale. Est essidu dae Bitti, Onani est a duos passos. Sas sigaretas chi s'allughet de tretu in tretu cumintzant a èsser tropu e dant a bìder chi su pistichinzu chi si l'est atacadu a sa carena, l'est dande anneu, chi su fumu non resessit a li carmare, Si la sentit: s'addòbiu podet èsser intro de unu ziru de roda e s'àteru.

Est iscuru che in buca. Sas mantzas nigheddas de sos tuparjos b'azunghent a sa panoria, chi in pessu bidet acurtzu, un'azicu de ispramadura. L'est benende a tostu a controllare sa velotzidade de sa betura e su caminu. Ma sichit a bellu a bellu. Una cumplicassione li benit dae su faru chi ant cherfidu mortu. Est una cumbenièntzia pro sos bandidos. Sos rastos s'istampant in su nibe tropu craros e pretzisos.

S'addòbiu podet fallire. Totu cussu astragu lis podet cussizare de non si presentare. Si s'esserent presentados, s'addòbiu depet èsser calculadu a banda de su faru mortu. Como si nd'apizat e si nde cumbinchet. At de bìder petzi in cale tretu. Pessat chi li diat èsser comodu de èsser in Macumele intro de mesu note. Diat àer su tempu de si pasare, in artis de mògher a Roma. Depet mògher intro de sas tres de s'iscrasa bortaedie.

Si moghiet a bellu e peri custu, como, li dat anneu. Fintzas a ube s'ispinghet s'ocru de su faru, su caminu curret deretu. Buscos e trocos a manca, rocas supra su trèmene a destra.

Pacu a in artis, abirguat unu sinzale de aggrucadorju istampadu a corfos de balla. Duos passos in gai una manza nighedda de sida supra su nibe biancu, Rallentat; firmat: est su sinzale. Sunt tres ramos de èliche postos de rucradis. Chene peruna duda est issu. A s'ispessada li torrat sa calma e totu sa sicuresa sua. Acostiat, falat e colat a destra de sa cuneta. Pacu a largu una tupa manna. S'iscampiat sa pupa de un'òmine a cucutu in conca.chi li cuzicat peri sa cara.

- Morte Andreotti – narat e impessu s'intendet.
- Viva brigate rosse – est sa risposta, dada a su matessi modu e in fatu un'ordine:
- Sedi in màchina, pica su caminu a destra. Fatos ducentos metros, firma e mòrinche sa màchina. Lestru.
- Si mi paret – est pro nàrrer, ma s'istat mudu. Cuss'ordine non li piachet aberu.

A bellu a bellu, afungande sos pedes in su nibe, fachet tu ziru, intrat a intro, si l'afilat in su gurutu chi l'at inditadu. Dande un'ocrada a su contachilometro, pacu prus in gai si firmat.

Nche morit sas luches e est falande cando s'intendet sa cannas de unu fusile in palas. Una pessone essida da àtera ala, tocandelu cun sa cannas de su fusile li fachet de atu de camminare a in antis. Est pro si bortare ma s'abizat chi cussu li fachet atu nervosu de avanzzare. Si moghent supra sa predichina astragada de unu caminu de crapas, Caminant unu bellu tretu, cando, dae pala de sos truncos, nche bidet iscampiare àteros duos individuos carotados e armados..Nche l'ispinghet a s'ala de una barra de muru e li fachent de tzinnu a si sèder.in su tretu ube su muru est brus bassu. Nche lu brinchiat e isparint dae cara sua. Peri su de tres brinchiat su muru e si ponet in palas mantenendelu a tiru.

Intendet su fritu de su nibe suta sos pantalones, mescas in cambutzos chi sunt tiri tiri. Sa posizione est iscomoda, ma non si podet mògher. In palas s'abizat un'òmine istèrridu in terra o supra su nibe. Non li puntat prus su fusile supra sa carena e li narat:

- Risponde a sas dimandas chene ti bortare. Ite ti naras?

- Zuanne ...

- De ube e de sos cales?

- De Oleri e de sos ...

- Narali a sos suos chi cherimus, pro lu liberare, duos miliardos.

Sa "Boche" est firma e segura, de chie no atzetat risposta contrària. Allegat in italianu, comente est costumàntzia nota in sos secuestros. Dae su tratu non si podet abirguare de cale bidda siat su chi faveddat. Est unu sinnu craru chi imbiat a chie l'ascurtat.

Cun sa matessi calma, allegandeli cun intentu pretzisu in sardu, Zuanne li rispondet:

- Sezis pedinde tropu. – E sèmper cun boche calma, ma firma, sichit: - Duos miliardos non sunt bruscas. Mancu si si bendent cantu ant diant arribare a su mesu. L'ischides chi in custa occasione no est fàtzile a bènder e a nde tirare su tantu zustu.

- Pacu nos importat. Chi s'arranzent. Si los facant prestare!

- Chircade de cumprènder: contante no nd'ant e ricos non sunt, comente narat sa zente.

Bos lu naro che amicu. Deo so bènnidu, ma a pustis at a bènner àtere. Nche depo acumpanzare a muzere mea a Terramanna pro una bìsita medica urzente e zai prenotada, chi no nde poto fàcher a mancu. Inditaemi àtera pessone chi cherides chi sostituat a mime. A sa familia apo a riferire sas propostas bostras.

- A nois non servit àtera pessone. Nos andas bene tue. Anda, si as de andare, T'amus a isetare. Nos dassas su numeru tuo de telefono. T'amus a mutire noi. Non nos cumbines brulla. Amenta chi perit tue as familia.

Lis dat su numeru de sa domo in Macumele. Est sètzidu in posizione iscomoda. Sas predas de su muru si las intendet punghende in palas. S'umidade de su terrinu l'est dande anneu mannu. Si moghet pro si pònner prus comodu.

- Firmu! – E s'intendet sa cannas de su fusile in costazos. Non s'iscumponet. Abarrat tèteru, ma sichit a nàrrer cun calma e misurande sas paràgulas:

- Su chi pedides est fora de norma. No est in sas posibilidades de custa famiglia. A su postu bostru bi dia pessare bene. Mi dia acumentare de meda prus pacu. S'afàriu si diat concuire meda prus in presse.

- No amus presse. Da inoche a una dechina de minutos ti moghes, torras a sa màchina. Amus a èsser innedda. Mi racumando, non mandes àtere.

Falat su mudighine. Su nibe e s'iscuru chi los at bombidos, si los torrat a ingurtire. Cando s'abizat de èsser solu, si pesat chene fàcher istripizu e bàdiat a fùrriu. Non bidet àteru si non sunt nibe e tupas nigheddas. In su mutricore de cussa artura, perunu arrastu, peruna ispera de luna. Sos ocros abituados a cussu iscuricore resessint in pessu a distìngher sas pupas de su terrinu. A tastos torrat a sa màchina arriscande de si pèrder. A s'arribada, aperit s'isportellu e intrat. Comente si sedit intendet prus fritu s'umidu de sos pantalones infustos, chi lu fachent pesare ritzu de iscatu. Imbarat sas palas a su sedile. S'istirat prus pro su fritu che pro àteru. Est tiri tiri e mortu de fritu.

- E custa fata – narat a issu matessi.

Ponet in motu e su fracassu de su motore in cussu mudìghine, in cussu iscuricore lu rinfrancat. Allughet su riscaldamentu a su màssimu. Sa prima àghera chi intrat est astragada. Dat borta in mesu de cussas tupas e rocas. S'afilat in su gùturu. Torrat a domo, sa faina est fata. Ghetas sas manos fritas a sa buzaca chircande sigaretas e allumadore. Tando s'abizat ch'est istadu meda tempus chene pipare e li paret longu, tropu longu. S'iscuricore l'impedit de pompiare s'orolozu. At presse de si boliare dae cussu isperdissiu. Non podet atzelerare. Depet dare cara a no iscuder a sos mutzos de sos èliche e a sas predas de su mureddu.

Pipat a sa longa. Est cuntentu de ghirare a domo. Arribadu a s'istradone, sende chi at presse de remonire a bidde, detzidit de falare a Orune. Nde bidet, de tretu in tretu, sos lampiones. Fortzat s'andadura, ma cun atenzione, pro su chi li cunsentit su caminu cuzicadu de nibe.

SU BRIGADIERI PIRAS

In s'agrucadorju de Orune, cando est pro cambiare caminu, una palita tunda, chji non si podet cunfunder, peri si sa luce de sos faros est paca, l'imponet de firmare. Duos carabos, in pessu essidos dae sa camioneta, si li parant de fronte. Est comente a torrare a sos mamentos colados pacu in antis.

- Porc ... - nche l'essit – Como mi paco peri sa contraventione e cras totu ischint chi fipo in oche.

Firmat sa màchina , allughet sas luches de intro e isetat. Duos pitzocones si acurtziant mortos de fritu che a issu. S'arma chi juchent in manos lampizat assustrosa a sas luches de sos faros. Unu s'abarrat istresiadu, s'àteru s'asserentat, s'arma puntata in manos. A Zuanne si li ghelat su sambene in sas benas. Est prus in periculu in custu mamentu chi no in antis, cando su fusile si lu sentiat in costas. Unu nudda e diat mògher un'isbentulas de lampos de focu chi li podent arribare in d un' artziada de chizu.

Imbaradu sizigu, cun sas manos supra su cuscroto, isetat chi s'acurtziet.

Cando l'est a serente, intendet chi li narat:

- Mi diat sos documentos. Libreto e patente. Sa màchina est sua?

- No.

- Mi diat sos documentos. Comente mai s'est postu in biazu cun custu tempus e in prus cun d unu faru mortu?

- In antis funtzionabat. Si mi nch'est mortu pac'ora..

- A ub'est diretu?

- So ghirande a domo e apo presse.

- - Nos dispiachet de li facher pèrder tempus. Nos est dovere. Isetet ecante. – Cunsinnat sos documentos a su cumpanzu. Si nota ch'est s'espertu de sa patùllia.

Su faru de sa camioneta, postu supra sa capota, l'impedit de bider craru. S'abizat chi unu est iscrivende e s'àteru est trasmitinde sos datos a sa tzentrale. Su graduadu, chi non s'est istresiadu de nudda, juchet torra s'arma in manos puntata a terra. Iscrivent su nùmene suo in su libreto de sinzolamentu.

Pessat chi lighent sa presèntzia sua a sa faina fata, L'artziat a conca chi l'apent iscopertu e, duncas, l'apent brusiadu comente imbassadore. S'àteru sichit a faveddare per telefono. Non li paret unu negòssiu serenu. Li resessit petzi de cumprènder chi li sunt fachende unu muntone de dimandas. Non nd'ispizicat una tzafa, ma nessi una paràgula in sardu nche la buscat. Mantenende su microfono in manos fachet de tzinnu a su collega de s'acurtziare e li narat de iscriver. Si bortant a pompiare sa vetura. Zuanne no abirguat zestru. Probàbile si tratet de particulares: marca, forzis, e colore.

Deretu s'amentat de sa tenda posta supra sa A 112. Ponet sos papiros supra sa camioneta e, comente chi si siant cussizados, si moghent paris andandeli a in antis.. S'àteru fachet unu passu a secus e pesat s'arma, puntandola a sa àgheras.

- Ite suspetu lis a bènndu a conca e a ite? Si bortat e bidet in palas de sos sediles duos bidones de benzina. Podent èsser cussos, ca àteru non zuchet. In pessu s'acurtziant:

- Falet cun sas manos in artu.- S'ordine no amitit replica.

Aperit a bellu a bellu s'isportellu misurande cada zestru, cun carma chene dare a bider ne presse ne anneu, chi sa chistione est cumintzande a li dare ite pessare. Est in caminu a manos artziadas. Unu carabu lu computat sighidu. Non at in butzaca mancu una lepedda, chi non li mancat mai, cando andat a campu o a monte. At dassadu totu in domo pro cautela. Unu carabu pesat sos sediles, aperit s'isportellu de su cruscoto. Nudda.

- Aperjat su portabagàlliu – e li dat sas craes chi nch'at tiradu dae su motore. La picat e, cun sa solita carma, aperit. Est bòdiu.

- Tanchet e aperjat su chi cuzicat su motore.

Andat e aperit chene dare a bider chi nch'est perdende sa passèntzia.

- Isetet – Unu tzinnu e su collega s'acurtziat. Li fachet de atu cun sa manu e cussu dat borta a sa camioneta. Torrat a faveddare per telefono. Intendet nande petzi: - Nudda. Unu tzinnu a su collega e custu est torra a curtzu a issu; juchet sos documentos in manu e lios porrit:

- Podet andare. Totu a postu. Nos iscuset si l'amus fatu pèrder tempus e lu salutat. Peruna paràgula in prus. Dant a bider una carma chi li paret prus finta che reale. Los traichet sa mirada frecuente chi s'iscàmbiant e a Zuanne non nche lia fachent biber.

- Totu a postu! Si ripitit a mente in su mentras chi torrat a si sèder in sa A 112, prus afritoriu chi no in antis - a chie cherent picare in ziru?

Totu cussu bonu fàcher e cortesia non li parent normales. E sos bidones de sa benzina? E sa tenda supra sa màchina? Calicunu est imbroddiande. Sicuru ant retzidu ordines dae sa Tzentrale, da ube su coronello Zappi depet àer postu fatu a su furdicamentu.

Pessat de cambiare programma, de non colare in Orune, ma oramai sa màchina est in cussa filada e si diat cambiare los diat pònner prus e prus a pessare. Oramai l'est de òbricu de sichire a ube est andande. Chircat de s'amentare su lùmene de su mecànicu de sa bidda. In ibe si podet firmare e li serbit de iscusas pro isviare sos suspetos. Ischit chi si lu podet acontzare. Si tratat de una lampadina isvitada. Li bastat unu catziavite, chi in sa ferramenta non mancat mai e su jocu est fatu. àteru e tantu pro su fanale de secus. B'at un'àtera istrùssia: a si la fàcher acontzare dae sos carabos matessi, in sa caserma de Orune. Diat àer modu de controllare si li ponet fatu. Allughet su motore e si l'aviat cara a Cucurueteti. Falat a bellu a bellu pompiandesi sa bidda rilucente, chi abratzat sa china de s'ispuntone. Sa badde in fundu est nighedda che su trumentu. Sa notissia est arribada che lampu al su *Comando Gruppo Carabinieri* de Nùgoro Su colonello Zappi, informadu comen'est, mutit su brigadieri Piras e s'apuntadu Paleotti.

- Bi semus! Est issu.
- Issu chie, colonello?
- S'imbassadore, no? – Rispondet Piras.
- As su bloconotes? As sinzadu totu.?
- Amus sa rezistratzione.coronello.
- Oih chi nono. As iscritu tipu e colore de sa màchina? su lùmene de s'autista?
- Sisse, su colonello. Est una autobianchi A112 ruja. Su faru destru e su fanale de secus, ambos mortos. Est màchina usada, ma de fatura recente. At peri un'addobadura a in antis a manu manca. Est peroe bene mantesa. Su chi la guidat est Zuanne de Oleri. Semus bènnidos a ischire chi istat e traballat in Macumele.
- Su dialu lu brusiet! Issu est de Oleri comente est beru chi deo so de Londra – nche l'essit a su brigadieri Piras.
- Su nùmeru de sa targa?
- Non bi l'ant comunicada.
- Ispantu mannu. Muti cussu bentuleri de su collega tuo e ti la faches detare..
- Nde podimus fàcher a mancu, coronello.
- Nosse, cherjo ischire de chie est.
- Nos ant imbiadu su lùmene ch'est in su libreto.
- Non mi bastat. Cherjo ischire de chie est como e no a chi est intestada.
- No importat a chie siat intestata – narat su brigadieri – No est cussu chi nos dat a ischire a chie l'at imprestada e pro ite.
- S'ingarrigat issu de nde sichire sos moghimentos. Como nessi amus carchi cosa in manu. Sende chi sos de sa familia non contant su lùmene de s'imbassadore e sos addòbios cun sos bandidos, carchi cosa in prus podimus fàcher. Su pejus est s'abocadu chi b'est in mesu. Cussu no est fàtzile a tènner, cun totu sa conoschèntzia chi at. Nessi amus carchi cosa a ube nos imbarare. Cautela bi cheret e chi non benzat a l'ischire s'istampa. Mi racumando. Est un'ordine.
- Conosco cussu Zuanne. Pròpiu issu nos depiat capitare in mesu de pedes.
- Issu o un'àteru non cambiant nudda. Oje o cras, carchi indissiu nos l' at a dare.
- Cussu at prus istrùssias de unu mariane, coronello. Pedde mala est.

- At a èsser, ma unu dèbile non l'at a mancare. A ube est andande como?
- A Orune e non si podet dogare. Est su caminu chi li benit deretu pro torrare a Macumele, colande dae Nùgoro.
- Apo cumpresu, traballat in Macumele, ma no est de Macumele. Como bi so dande. Lu conosco peri deo. Ballas! Est de bona familia. Pessone chi contat. Mai perunu imputu, sende chi bi trabicat in campu e in monte. Traballat in su Motel e b'amus bufadu paris, sende chi non si nde amentet..
- Custu est s'arguai. Peri firmandelu non podimus ne mancu ...
- No! Peruna fortzdura. Non est òmine chi s'assustret gai. No at nudda de tìmer. Tratat cun zente de cadda ratza. Peri cun pestulèssia, ma est a bìder cun cale bonu grabu! Mai postu in mesu, mancu in d una briga, pro minore chi siat. S'ischit dobare a su mamentu zustu.
- Sa colada e, pesso, sa firmada chi fachet in Orune est zai unu indissiu bonu. No ismentichet: in territòriu de Orune ant acatadu s'alfasud arantzina pro nche prelevare su zovanu Toniutti. In cussa direzione s'est mòghida sa màchina chi nche l'at picadu. Colande dae Bono, Benettutti e Bitti, depet àer fatu su primu biazu.
- Li ponzo fatu deo, - narat Paleotti, chi in su fratemus est torradu e at intesu sos negòsios.
- Chie b'aiat in Orune?
- Duos mai conotos, coronnello.
- A su solitu.
- Tue non pones fatu a nemos. – Li narat su brigadieri Piras. – Peri chi ti bestas de istria, totu si diant abizare chi ses unu carabinieri. Issu, brigadiere, issu l'at a sichire passu passu Issu est de s'ambiente; est sardu che a issos, cherjo nàrrer e ischit comente los tratare. At a fàcher cada borta unu bellu raportu. A ube andat, cun chie tratat, cun chie allegat e s'est possibile, su chi narat. Totu cherjo ischire. S'isseperet un cumpanzu e chi siat bonu.
- Sisse, coronnello. A mime andat bene s'apuntadu Paleotti inoche presente.
- Li rendo grassias su brigadiè.
- E de ite?
- De sa fidùtzia chi m'est acordande.
- Sennores, a nos bìder a cras.

Essint e deretu su brigadieri dimandat a su cumpanzu:

- Chie b'amus de servitziu in Marreri?
- Non l'at a cherrer firmare torra?
- Pròpiu su contràriu. Muti su capupatùllia:li detas sas carateristicas de sa màchina. Chi non lu firment

Paleotti curret a sa sala radio e detat s'ordine.

- Controlla ite màchina b'at libera e cale autista.
- Brigadiè, est cosa fata: sos collegas sunt pronti a essire..
- - Fachet pònner in motu ca essimus.
- A intro de bidda?
- A intro de bidda.

Sa betura est pronta in sa corte de sa caserma.

- A ube andamus?
- A sa Sulidai. A s'essida dae Nùgoro pro falare a Marreri.

B'arribant in tres minutos. Su brigadieri ordonat de preparare su bloco. Duos carabos depent abarrare cubados dae sas màchinas; issu e s'apuntadu cun sa palita in manu bene in vista.

- Su brigadie', ma no aiat naradu ...
- L'αιο naradu, l'αιο. Nemos lu depet firmare, mancu nois. Issu at medas trassas e nois depimus èsser prus abistos de issu. Sicomente no est tontu, si depet èsser abizadu chi lu semus sichinde. Nois chircamus de li fàcher crèder chi no est gai. As cumpresu Paleotti?
- Zustu, su brigadiè.

- Bene. Nois semus in oche bene in vista, cun sa palita in manos. Cando arribat li fachimus de manu chi colet. E issu ite pessat? Cumpresu as?
- Nosse su brigadieri.
- Mi paret sempritze. At a pessare chi cando l'ant firmadu in s'agrucadorju de Orune no amus acatadu nudda de fora de ordinàriu. Chi s'est tratatu de unu controllu normale, comente fachimus belle e sèmper. Si trancuillizat e caminat prus liberu.
- Issu est abistu! Deo ite faco?
- Tue li pones fatu fintzas a Macumele. Dae innedda sèmper, chi non si nde abizet.chi non li benzant dudas a conca. Non depes fàcher àteru. Sos addòbios cun issu depent pàrrer sèmper pro cumbinazione. Non l'as a firmare mai e as a evitare de l'istare acurtzu.
- Apo cumpresu; apo a fàcher de esca! In su fratempus, nois nos trasferimus a Macumele. Sas indazines la fachet issu chene lu dare a bider.
- Bene, Paleotti. Si ti tratenes un'annu in Sardinna, ti faco imparare sa psicologia de sos sardos. Iscas chi noi a minores jocabamus a bandidos e carabos, a guardie e ladri, comente nazes bois in Italia.
- Ello, sa Sardinna no est Italia?
- Sa Sardinna est peri Italia, ma ecante diferente.Tue de ube ses?
- De Treviso.
- Bidu as? As mai bidu unu sardu in Italia? Dimandali de ube est. Pessas chi ti rispondet de Nùgoro o de Orgosolo? Sardo sono, est sa risposta. Ca nois semus sardos.
- Ma issu, a minore, preferia su bandidu o su carabinieri?
- Su bandidu, naturale! Totu sos pitzinnos cherent fàcher su bandidu.Ti fipo narande: in cussu jocu s'unu tentat de fricare s'àteru. Tue faches una mossa e deo nde faco un'atera, Est comente in sa bida: Binchet chie at prus istrùssias
- Pro custu si nch'est intradu in s'arma?
- A la nàrrer zusta, est andada pròpiu gai. A d onzi modu, si l'imbrocamus zustas, no nche juchet deretu a ube sunt sos bandidos.
- E nois l'arrestamus.
- Si nos andat bene. Si nono nch'essit una isparatòria e chie la buscat la buscat. De securu in cussa occasione non mi fughit. Cussu fizu de bona mama, est meda trassosu. At unu traballu in Macumele, chi li serbit a li parare sas palas, peroe est prus in campu che in bidda. Fachet su seniore e conoschet prus bandidos issu che totu sa politzia posta paris.
- Coment'est chi non l'amus mai arrestadu?
- T'apo naradu chi at medas trassas. Sardu est, cussu. Bene imbaradu, puru. Chie at medas imbaradòrjos, ischit peri a los cambiare Favore pro favore si torrat in sos campos nostros. Custu l'est unu azudu mannu, ca azudos nde dat aberu e lios torrant.. Non credo chi siet mai intradu in mesu de delitos. Non li serbit e non nd'at bisonzu.

SA BISITA A PASCALE TIDU

Zuane arribat a Orune.

Est una bidde chi s'est rennovande in sos abitos; est cambiande aspetu Chie bi ponet pedes sa prima borta at s'impressione chi s'est imanniande in domos, palatos e zente. A su contràriu, dae annos a goi, est perdende abitates. Como sunt deche annos, contabat a banda de chimbe miza pessones e si la fachiat a binchida de pare cun Bitti. Dae tando, si non dae meda in antis, at cumintzadu a calare. No est chi non bi nascant prus pitzinnos, chi est unu problema comunu a totu s'Isola, sa causa mazore est l'emigratzione. Familias intregas si sunt tramudande a Nùgoro Predadeistrada, chi pompiat a Orune comente frontalera. Àtere, medas àteros andant a innedda. Sunt tramudande a Terramanna cun bestiàmene e zente: a su Làtziu. Nche juchent sa roba a su de Viterbo e de Latina, a sas terras abandonadas dae sa zente de su locu. Nche juchent sa roba e a pustis ponet fatu sa zente. Sos de custas biddas puru sunt in tramuda. Fughint a sa capitale

Sos mezos de Orune, sos laureados, de sos cales nde fit bresada totu sa bidde e si nde bantabat, sunt istados sos primos a si nch'andare. Su tzentru abitadu est in rinnovamentu, ma sa zente a si godere sas nobidades est sèmpre minguande, chene ispera de torrare a s'antica belleza e richesa.

Sa luce de sos lantiones fachet brillare su nibe galu innidu in atas de caminu. Como ch'est in intro, Zuane bidet una bidde morta. Non zobiat peruna anima biba, in su Cursu ube est falande. Totu est iscuricosu prus de sas pupas de su nigheddore de sos eliches in monte. Jannas e bentanas serradas, da ube in pessu luchet carchi ispera de lampadina o frama de focu, ùnicu sinzale a nàrrer chi b'at galu bida.. Petzi in prata de su Mercadu, in intro de sos tzilleris, bidet zente e intendet boches e negòssios animados. Su fritu polare de sa note custringhet totus a s'isserrare in intro. Sos caminos sunt desertos comente mai unu si los podet imazinare.

Custu li risparmiat addòbios chi non at gana de àer mescamente de pessone conota.

Sichit a falare fintzas a pratichedda de su Munitzipiu, ch'est in fundu. Dassat sa màchina intro de duos ùlomos, a in antis de su parapetus. A zosso s'isterret sa bidde betza, muda che unu campusantu. In su falare dae sa betura dat un'ocrada, disabuda, pompiande a susu da ube est faladu e a pustis a s'àtera banda, a zosso de sa prata, pacu illughinada dae unu lantione mesu cubadu dae un'ùlumu. Nemos. Chene presse, a passos lentos, contados, s'afilas in s'iscala de contones traballados de granitu, incassada intro de su murallone chi mantenet sa prata..No intendet nen boche ne istripizu. Petzi s'aba currende de sa funtana de su Cantaru, sa bena antica de sa bidde, l'arribat a olicras. Si l'aviat in sos gurutos bòdios de sa bidde, dande cara a non lassinare. Sos passos pesantes de iscarpones l'allertant. Ghetat sa manu a buzaca e nche bocat una sigaretta. Si firmat a si l'allùgher. Un'iscusia pro si pompiare a fùrriu.. Da un'istrintorju nch'essit un'òmine. Unu pastore, dae su chi podet cumprènder a sa beste, Bestidu de belludu, juchiat una tasca prena a palas.

- Salude, - li narat falande.

- Salude – rispondet Zuane e cadaunu sichit su caminu suo.

Abandonat cada duda. Nemos l'est ponende fatu.S'isetaiat de si bìder sos carabos in secus. Non nd'at bidu in su Cursu, prus pacos nde jobiat in cussos gurutos a impreddadu. Li fit pàssidu normale a lo jobiare; ma nudda e nemos.

Sos ses ricatados in manos de bandidos los mantenent allargu peri in cussu tempus de dimonios.. Sichit, a tretos falande a tretos artziande in su labirintu de guturinos de sa bidde antica. Nche cròmpet a domo de s'amicu. Su caminu s'allarga fachendesu prata e artziat a destra fintzas a sa cresia, ch'est acurtzu. Un'àtera ocrada a fùrriu a fùrriu.

Sa domo de Pascale est intro de una corte, in fundu comente dechet a una domo de pastore o de massaju, chi a s'occasione bi ponet in intro carru e bèstias, como bi ponet sa màchina, cando ghirat su fizu dae su de Birori.

Como podet tocheddare a forte in su portale mannu de sa corte. Una boche li rispondet dae s'internu.

- Chie est?

- Amicos – e deretu una fèmina l'aperit sa jannita a costazos de su portale mannu.

- Ah, tue ses? Intra, Pascale ja b'est. – e tancat in presse sa janna. Si li ponet a in antis comente a l'indissiare su caminu fintzas a s'intrada de s'apontu. Si saludant cun d una istrinta de manu.

- Bonaera, prepara un'azicu de chena.

Sa muzere no at isetadu a liu nàrrer issu. Bocat a campus sa tibaza bella pro sos ospites e l'isterret supra sa mesa in mesu de s'apontu. Non nde podet fàcher a mancu de tzertu. Est una costumàntzia e Zuanne non si podet dobare dae cussu ritu anticu de acasazamentu de sos istranzos, mescas si amicos. Dassat chi Bonaera ponzet pane, prossutu e cada bene de deus. Su binu tocat a Pascale a lu bocare e bocat binu ozastrinu, de su mezus chi si podet àer e una ampulla de abardente.. Li ghetat unu tzichete e liu porrit:

- Cumintzat cun custu chi ti caentat. As picadu tropu fritu e bi cheret cosa forte pro ti recreare.

Si lu bufat totu a una borta e si l'intendet brusiane in su guturu e in corpus. Bi cheriat!

- Comente est andata? Contat – narat e Pascale ghetat un'ocrada a sa muzere, chi picat sos pedes e essit. Paret persona curiosa de ischire coment est andata una faina de sa cale nd'est bene informadu, sende chi cun Zuanne non si fit intesu in antis. A Zuanne non che li fughit totu cussa presse.. Non rispondet deretu, in antis si secat una fita de prossutu.

- As a èsser afritòriu, istracu e mortu de gana.- Narat Pascale chircande de isviare su suspetu.

- So abituadu a su fàdicu, deo ...

- Conta ...

- M'ant firmadu meda in antis de arribare a Cucumache. In d unu gurutu chi andat a banda de sa lacana de Bitti.

- Chie, sa polizia?

- Nono; issos. Fint nessi tres, ca àteros non nd'apo bidu e fint carotados. At chistionadu petzi unu e in italianu. Balla ca lu chistionat bene! M'est passidu no òmine de monte, ma òmine de pinna.

- Sicuru chi non si fidant. Non ti conoschent. Est zente ischida. Tue peroe non perdas tempus a los abirguare. Non ti serbit a ischire chie sunt e non serbit a su ricatadu. Non ti nche fiches in cussu rubarju. Dassa chi chistionent in italianu. In oche, e tue l'ischis, lu chistionant totus e peri bene.

Su suspetu chi Pascale b'apet allegadu cun issos li benit prus forte e craru.

- A la nàrrer zusta m'est pàssidu chi mi conoscant e peri bene.

- De tzertu, in pessu ant intesu sa boche tua, non b'at de s'ispantare. Si sunt sintzerados cun chie ant ite fàcher.

- Podiant chistionare in sardu. Lu cumprendo peri deo.

- E su tratu? Ube nche lu pones su tratu? Los aiat pòtidos traìcher. Non la credas zente tonta. Ant àer chircadu informatziones. Tue no insistas in s'indagonzu. No est custu chi t'interessat: as àteru de fàcher.

- Si sunt informados?

- Mi paret zustu. In antis de si presentare, unu si informat.

- E bois nde fisis a conoscentzia?

Tziu Pascale non si podet prus negare:

- Credias chi t'αιο dassadu andare a s'ispessada? Un'amicu non s'abandonat in su bisonzu. L'ischias, no, chi cheria pedire notissias? Apo postu in pedes persones de fidùtzia. Peri issos depiant ischire. Unu non si fidat de totus, mescamente in custos tempos. S'afàriu est dilicu.

Zuane at pessadu bene e Pascale at contadu. Issu puru no at nudda de cubare e pro s'amicu ...

- Duos miliardos! Nàrali nudda! Cosa de non crèder! Una summa impossibile pro cussu zovanu.

- Est sa prima richiesta, non ti preòcupes. Ant a abassiare sas pretesas. Issu puru bi l'ant una cussentzia. No est chi t'apent dadu anneu?

- No, custu nono. Mi nche su passidos ecante ufrados.

- Est sa prima borta, no ischiant ... peroe non t'ant tratadu male, bidu as? Issos puru azigu de umanidade bi l'ant.

- Ant chèfidu su nùmeru meu de telefono.

- Custu est malu. Isbàlliu mannu ant fatu. O como o tando, su tuo lu ponent suta controllu e li podet andare male, ca sunt suzeto a èsser abirguados dae sa politzia.

- Ant a mutire dae un'aparèchiu pùbricu, no ant a èsser macos.

- Sa boche, sa boche!

- Cussa lia diant rezistrare. Fatos issoro sunt. Ant a ischire su chi sunt fachende!

- A bìder istamus.

- In custas dies, fortzis cras e totu, depo andare in Terramanna pro acumpanzare a muzere mea pro una bìsita. Est urzente e l'ischides.

- Ja l'isco e naradu li l'as?

- Mi beniat de òbricu.

- E ite t'ant rispostu?

- De andare. Nos bidimus a sa ghirada.

- Bides chi issos puru sunt òmines de cussentzia. Dispiachet pro cussu disgrassiadu chi ant in manos. At a sufrire ecante, ma a pustis totu s'acontzat. Est sa sorte chi at chèfidu goi. Male assortadu est naschidu. Sa richesa a bortas costat. Passentzia. Tue anda a Roma tranquillu. Nde faveddamus a sa ghirada.

- Si bi diat sutzèder carchi cosa de malu ... unu cunflitu?

- Sa zente non est maca. S'ant a abarrare firmos pro totu su tempus. T'ant a isetare.

- Custu mi l'ant naradu. Ma pacu ite rider b'at.

- Ti l'as a iscampare, ti l'as a iscampare.

- Poto telefonare a s'abocadu?

- Su telefono est in cue. Si nd'as bisonzu.

Zuane telefonat e informat s'abocadu ch'est ghirande. Chi l'isetet.

- S'ora est tarda. Deo mogo.

- Firma ecante pro ti chenare. Ses istracu e as bisonzu de pasu. At a isetare, chi no est istracu che a nois. Timo chi apes fatu un'isbàlliu.

- Zustu, su telefono! Non b'apo pessadu, ma non credo chi istent controllande a bois.

- Custu ca ses istracu. A mime nono, ma su telefono de s'abocadu podet èsser suta controllu. E si l'abirguant podet èsser periculosu.

- Oih chi nono. Su telefono de un'abocadu non podet èsser cuntrolladu. Cun totu sos chi lu mutint e ite li podent cuntestare?

- E si t'ant postu fatu?

- Non credo. Non m'at bidu nemos. – ma non li contat de su bloco chi l'at firmadu.

- Sa màchina tua no est de cuddas chi colant chene èsser bidas.

- Non timezas. L'apo dassada in prata de Munitzipiu.

- Prudèntzia bi cheret. Peri sos muros bident e intendent

Zuane sichit a si chenare a pane, casu, prossutu e carchi tassa de binu in mesu in mesu.

- Cumprendo chi tue ses abituadu a àteru binu. Nois cussumamus custu, chi malu no est

- Antzis est meda bonu..

Finit e pesat pro tucare. Si pesat peri Pascale e Zuane s'abizat chi juchet galu sos gambale e sos iscarpone infustos. Pascale los juchet sèmpet, ma no in domo, ca in

domo dant peri aneu. Salutad a Bonaera e dassat chi Pascale l'acumpanzet a su portale. Si saludant e issu si tufat in cussos guturinos bentosos de Orune, ecante illuminados dae sos lantiones, cando bi sunt. Sa funtana suta sa prata sichit a cùrrer e sos sonos si perdent in s'iscuricore de sa bidida.

In sa Sulidai s'est fata note manna. B'at coladu unu muntone de màchinas. S'abra s'intendet forte.

- Bigradiere, pesso chi nos lasset in biancu. Unu a zero e "palla al centro".
- Malaitu, cussu no est coladu in Marreri. Depet àer picadu su caminu de Pradu de Orune.

- Abistu est cussu, brigadiè.

Piras s'atacat a su telefono. Resessiti a comunicare cun sa patùllia de servitziu in cussu zassu de s'agrucardju Bitti-Orune. Resessit a ischire chi coladu est coladu e chi juchiat ambos sos faros allutos.

- Malaitu! Colande a cuss'ala at evitadu de colare in Nùgoro. Sedi in màchina torramus a sa Tzentrale.

- Lu narat, e cun resone, su brigadieri, chi cussu istrussias nd'at medas.

- De malas trassas unu corru! Un'isbàlliu l'at fatu:at acontzadu sos faros. A l'ischis ite cheret nàrrer?

- Nono, brigadieri.

- Chi s'addòbiu l'at àpidu. In antis chi l'aerent firmadu intro de Orune e Bitti. Est faladu a Orune a pustis, pro ite?

- Su faru, brigadiè, su faru guastu.

- L'at acontzu pro nos trabiare. Est torradu a colare in su matessi puntu pro lu fàcher bìder.e nos dare a crèder chi est faladu pro cussu. A chie cheret imbolicare: l'at acontzu ca non li serbiat prus che a in antis. Su fatu est custu e si pessat de mi fricare, s'at fatu male sos contos. Est issu s'imbassadore; issu chi at zobiadu sos bandidos.

- Podet organizzare una batuta cun sos carabinieri in su de Bitti, Orune, Onani.

- Oih chi nono, Paleotti. A cust'ora sos bandidos sunt dormidos tranquillos in domo issoro. Ischis cantu bi cheret a torrare a sa bidida? Pro èsser meda una mesora. Ant un'iscusia chi su boja los potat curare.

- Liu so nande chi nos at fatu goal!

- Tue bides tropu partidas de fubalu. – Li rispondet Piras ridendesinde cun sos àteros cumpanzos de sa patùllia, chi sunt galu acurtzu a sa vetura.

- Beru su brigadieri; prus beru no est possibile. Est diventande unu tifosu de su Nùgoro.

- Beh, mi mandades sèmper a su Cuadriviu de servitziu sa dumìnica.

In Tzentrale non b'at arribadu peruna telefonada.

Su telefono de s'abocadu non podet èsser postu suta controllu. Non si podet kontrollare unu telefono petzi ca ischint chi unu est ingarrigadu de fàcher su curadore de unu ricatu. Cussu de Zuanne prus pacu, ca finas a cussu mamentu non si podet ischire chi est issu s'imbassadore. Non l'ischiant sos de Nùgoro, nessi.

- Bella zente amus in servitziu. Non sunt istados capassos de si rènder contu chi podiat èsser unu missu.

- Brigadiere, - li fachet osservare unu prus artu in gradu cun su cale est a negòssiu – no ismentichet chi b'at 6 ricatos in atu. Su personale at peri tropu traballu a palas. At resone de èsser istracu. Sunt sèmper in campu chircande e amus galu una batuta in totu da Barbaza e s'Ozastra intro de chida.

- E deo bos naro chi mi joco sa mesada chi est issu.

- Tando cambiamus programma. – Azardat Paleotti, istracu e mortu.

- Mai, si non cherimus pèrder peri custu riferimentu.

- Andat bene, brigadiere, ma como mi dasset andare a mi corcare.

- A nos pasare andamus totus, si non cherimus mòrrer dae su sonnu e s'istrachitùdine. A d onzi modu tue cras moghes a Macumele. Colas a su Motel e dimandas de unu cliente.

- Cale cliente?
- A frade tuo, no? Si nono ti l'imbentas. No est issu chi nos interessat, ma de ischire s'est in su traballu. Ti picas unu caffè e ti tratenes ecante annotande cun chie faveddat e s'est possibile su chi contat. Beh, s'arte non ti l'imparo deo; est importante chi mi informes de su chi bi sutzedid.
- Sisse su brigadieri, ma como bona note.
In Macumele, Zuanne depet sonare nessi chimbe bortas, in antis chi s'abocadu l'aperjat.
Si nch'est dormidu isterricojadu in s'otomana.
- Bella dormida s'at fatu!
- Sisse, ma como intret deretu. E sa màchina?
- In cussu guturu a s'iscuru, in sa de duas travessas. Non pisset chi lia ponìa suta de domo? Bi' sas craes.
- Carchi pessu m'est bènnidu. Mezus chi non biant a issu e sa vetura in oche a curtzu. Non est chi b'iat calicunu chi lu podiat bìder?
- Non credo, peri sa gazzella m'at superadu colande in su Cursu, ecante in antis de su semaforo. Pariant tranquillos in ziru normale de abirguamentu.
- S'est gai, dassamus pèrder. Si l'ant bida l'apo a ischire prus in gai. Sedat e mi naret ite li ghetu. Diat nàrrer unu tzichete. Cun su fritu chi est fachende diat andare mezus.
- A piachere suo.
- Peri una tassa de cannonau, si la preferit.
- A cust'ora m'andat bene totu.
- La bidet cussa otomana? Nessi duas o tres ora o fortzis prus, m'at fatu isetare. Mi nch'apo pipadu unas cantas sigaretas. E fipo leghende una rivista, cando mi nde so dormidu. Ube nche fit?
- In su de Nùgoro ...
- At istentadu meda a ghirare, Ube nche fit de pretzisu?
- In su de Nùgoro. – E in su de Nùgoro cheriat nàrrer peri intro de Orune e Bitti. comente intro Durgale e Isalle. S'abocadu cumprendet s'antifona e no insistit. Zuanne no at intenzione de li contare cada pistulèssia.
- Cantos fint?
- Tres?
- De ube sunt? At conotu calicunu dae sa boche?
- Fit iscuru che in buca. Faveddabat in italianu e peri curretu. Unu ebia at faveddadu, sos àteros si sunt cubados deretu. Ant cherfidu ischire chie so. A intender su lùmene, si sunt calmados. Li garanto chi no est una cosa bella a s'intènder sas cannas de fusile in cherbeddos de secus.
- Ischis chi cada particolare est importante in custas cosas? Ti sunt pàssidos printzipiantes?
- No.
- In sa mala ventura, custu nessi est zai carchi cosa de bonu. B'at in mesu sa bida de Bennardu. Cando trataas cun diletantes no ischis mai comente andat a finire.
- Ischint su chi sunt fachende e no ant presse. Gai m'est passidu.
- Cunfirmant sa richiesta?
- L'ant addopiada. Cherent duos miliardos.
- Ant letu sos zornale e picadu pro beras s'ammontu pedidu pro àteros ricatos.
Si custos zornalistas si fint abarrados cun sa buca cusia e sa pinna, a su postu de l'impreare pro sas fesserias chi contant, si l'aerent mandicada, aiant fatu mezus. Dant a creder cosa chi no istant ne in chelu ne in terra. Sos balentes nostros non cherent abarrare a mancu de sos àteros, a cantu paret.
- Lis apo ispiegadu chi sunt andande fora de misura. Chi no ant totu cussu dinare, Chi sa richesa issoro est petzi aparèntzia; chi sustàntzia non bi nd'at.
- E issos?

- Chi si bendant sos bene o chi si prestant su dinare.
- Sicunde tene, si podet trattare?
- Dae su chi m'est pàssidu, pro como nono. Pariant tropu sicuros de su chi fint narande.
- E pro su pacamentu?
- Non nd'amus negossiadu.
- Ant tempus de pèrder. Ant imparadu s'arte, in àteras paràgulas.
- Gai dant a bìder. Lis apo peri naradu chi custas dies depo andare a Roma pro muzere mea. Sa cosa lis andat peri bene. M'ant fatu sos augùrios pro sa fèmina.. Nd'amus a faveddare a sa torrada.
- Est una favula, beru? No at a mògher a beru?
- Depo andare e comente. Issu l'ischit. Si tratat de interventu d'ìlicu. No est cosa manna, ma d'ìlica sisse. Si podet chircare àtere.
- Est tropu arriscosu. Diat èsser un'imperò in prus.
- Peri issos ch'erent chi sie deo a torrare
- A cando s'àteru addobiu?
- Cando torro, de pretzisu no isco. Ant a telefonare.
- Bi credo pacu. Sa litera est prus sicura. Como amus medas elementos in manos. Ischimus chi sunt nessi tres, si no àteru cussos chi ant a trattare cun tecus. Custu est su lezu. Cheret nàrrer chi sunt in medas. Nessi chimbe o ses pessones. E custu cheret narrer chi bi cheret meda prus dinare pro los acumentare totus. No ant presse e custu nos andat bene: dat a bìder sicuresa. Est zente chi ischit sos fatos suos. Negossiant petzi in italianu. O est s'antzianu de sa banda o no at mai àpidu ite fàcher cun sa zustìssia o si nono est unu mai conotu. L'ant pedidu su nùmeru de telefono: ch'erent faveddare diretos cun isse. Est un atu de fidùtzia e custu m'imponet de li mantèner s'ingàrriga. Cheret nàrrer chi s'italianu est una "Boche noba", unu mai connotu malu a conòscher. Fortzis unu furisteri, unu chi no at ite pèrder? Bandidu zai cundennadu chi si nd'afutit de un'àtera imputazione, li dant fidùtzia, cheret nàrrer chi conoschent sa familia sua.
- Mi paret craru.
- Custu est una garàntzia e un'arriscu. Una mossa, una paràgula chi los ponzat in suspetu de los àer iscopertos e bi sutzedit unu disastru.. Bennardu podet nàrrer sas ùrtimas preghieras.
- M'at picadu pro pitzinnu minore?
- Un'isbàlliu, peri chene lu chèrrer, est sèmpèr possibile. Custu peroe nos cunsentit de giocare una carta meda importante. Pèrder tempus. Bisonzat de pèrder tempus. Issos no ant presse e nois non nde li depimus pònner e non nde depimus àer mancu nois. Issos sunt securos de sesi? Nois puru. Antzis lis depet mustrare su canterju; depet èsser firmu. Ant a amoddicare. Non nos restat che isetare. Sos de Bennardu ant àer passèntzia. E si ant àer passèntzia si nch'ant a essire cun prus pacu dannu. A custu puntu chie est arriscande sunt issos. Goi nos depimus cumportare. Si a Roma at de andare, andet trancuillu, ma non si tratenzat prus de cantu est netzessàriu. B'est sa bida de cussu zovanu in zocu. Ischit chi, conoschende sa familia sua, ischint chie est issu. Est una garanzia, ma sèmpèr pacu de si fidare b'at. Non si tratat de èsser unu pitzinnu. Su fatu est chi, essende goi sa chistione, est fàtzile chi issu indissiet chie sunt e chi issos si nd'abizent. In custu depet dare cara, ca arriscat peri de persona. Si issu no ischit chie sunt, si moghet prus cun àsiu e trancuillidade.
- Totu custu andat bene, ma bi sunt in mesu sos de sa zustìssia. Essende bi tantos ricatos in atu in su matesi mamentu, totu sos caminos sunt tentados. S'arriscu est de nche dare in una patùllia malaita fata de zovanos cun paca esperièntzia e no ischis mai comente impreant sas armas. Ti mantenenet a fusile puntadu, che s'esseras unu dimòniu. Chene contare chi ti podent zùchere a carchi cumissariadu e tando pòrrogos, totu tempus pèrdidu e un'addòbiu chi andat in fumu.
- Ube l'at imbenta?

- In s'agruadorju de Orune. – S'abocadu malinnu liu at torradu a dimandare e Zuanne chene bi pessare bene l'at dadu sa risposta chi issu cheriat
- Dificultades?
- Custa borta nudda, peri chi m'apent computadu totu.
- Custu fit postu in contu, petzi ca non pessabo chi l'esseret capitadu a sa prima essida. L'ant firmada in antis o a pustis?
- A sa ghirada.
- E m'at telefonadu in pessu a pustis? Custa est un'imprudèntzia. No isco si su telefono meu est tentadu. Ischint zai chi so curande sos interessos de sa famiglia. Peri chi b'apemas acordos, no est naradu chi non mi controllent sas telefonadas.
- Si controllant peri sos telofonos de sos abocados, istamus friscos. In carchi modu lu depia chircare.
- S'arcordu fit de nos bìder a sa ghirada. Est mezus chi non mi torret a mutire. Dae como in susu s'addòbiu est in su motel. At a pàrrer un'addòbiu per casu. Bufande unu tzichete, a s'abitudine nostra, non dat sospetos a nemos. Nos ant bidu medas bortas paris in su Motel e como nos est comodù. Ischint su chi faco, ma non benint a su motel a fàcher unu bloco. A d onzi modu, si la torrante a firmare, no atrogheet nudda. Si neghet sèmper. Est chircande sos boes de s'amicu, si non sos suos. Si nche la picant in caserma, tando sas cosas cambiant. Telefonet a su numeru chi l'apo dadu. Bastat chi naret su lùmene suo e sas cosas s'acontzant.
- Andat bene. Como la saludo, ca so morinde de su sonnu.
- Bene. Nos bidimus a sa torrada dae Roma.

Zuanne est de paràgula. Si prandent tranquillos cun sa muzere e a sas oto de sero est zai in Terranova. Moghet sa nave e issu dae su ponte si pompiat sa costa sarda chi istresiat a bellu a bellu fintzas a s'imbèrgher in s'iscuricore de sa note cun sos bandidos suos, sos ricatos, sos carabos de patùllia in sos caminos. Est sa prima borta chi li paret de fughire da una terra contumosa e iscomoda, de bolare a locos, a chelos prus limpios e liberos

Su tempus malu non s'innat de chèrrer torrare in bonu.

Su tres de ghennerju Nùgoro s'est ischidada cuzicada dae una manta bianca de nibe frisca frisca. Chi est falada muda muda, note note. Fonne no est a mancu cun in prus unu fritu suta sos 4 grados. Sa bentulada de fritu astringhet sa Sardinna in d una morsa de àstradu e ghiddighia. In Macumele su nibe nobu de sa note est istadu deretu trasformadu in astragore da su bentu fritu chi falat dae setentrione. Su caminu chi andat a Bosa, a s'artària de Bara, at postu sos automobilistas in dificultade manna. Sa polizia est dèpida intevènner pro liberare sos malefadados, liberande s'istradone dae s'astragu chi cuzicat su terrinu. Medas veturas sunt de travessu e non b'at modu de las mògher si no est cun s'autogrù de sos pompieris chi nche sunt dèpidos cròmper.

Zuanne s'est postu in caminu dassande un'isula turmentada dae su fritu polare, dae temporadas de bentu malu, traschia e su mare a mùghida cun undas artas unu pore, dae sos bandidos e sos ricatados presoneri chie ischit in ube. Como ch'est arribande a Roma pacu nde l'importat. Sos secuestros los at irbentulados a s'ismènticu..

SU ZIRU IN BODIU

Ma sa sennora Angela Maria Gallisai est in pena cun sos duos fizos minores e cun totu sos parentes. Nudda podet fàcher pro su maridu, cubadu in carchi coloncone malu e fritu in sos montes de su de Nùgoro. Isetat e basta. Isetat una mutida, unu tzinnu chi l'aeret naradu chi su maridu est bibu e sanu.

Su currispondente de sa Nuova Sardegna, contipizosu, andat a l'interpellare. Su mudìghine durat dae meda. Non s'aiant nobas dae dies e non nde li dat sa sennora, chi a su postu de sas nobas li detat una boche de azutòriu pro su maridu mancante. Salvatore Secchi, aganidu comente est de àer carchi cosa de iscriver, fachet pubblicare paràgula pro paràgula sa dimanda de azudu:

“Bennardu – narat s'imbassada – iseta carmu. Ti sentimus acurtzu a nois, intro su coro. Semus bibos in s'isetu mannu de ti pòder torrare a abratzare. Sos pitzinnos istant bene. Ugo pedit frecuente de tene e ti mutit e ti chircat. Suplicamus sos chi ti sunt acurtzu de pessare a sas creaturas tuas minores. Chi Deus azudet a tibe e a nois. Ti cherimus meda bene e isetamus cun pelea manna nobas tuas. Angela Maria e mama”

De sa litera a s'abocadu mancu piliu Sa notissia non est essida a campu. Secchi si limitat a contare chi a pustis de sete dies, sos bandidos sunt serrados in su mudìghine prus grave. Dae su fozolu de sos carabos o, fortzis, dae mente sua, o dae unu pessamentu lozicu suo, est bènnidu a ischire chi sas chircas de carabos e politzia s'ant dadu una calmada pro cunsentire a sos familiares de sos ricatados e a sos bandidos de pòder cuncordare carchi agantzù. Est sutzessu sèmper in custas imbenièntzias e non bi cheret meda a lu cumprènder e a l'iscriver chene arriscare sa carriera o de nàrrer favulas. In prus, cun su tempus chi est fachende, chie si podet mògher? Nen carabos, nen politzia ant ferramenta adata e cando non cando, mancu sos bandidos e sos imbassadores. Su nibet at impostu in sas campannas sardas un'ispètzie de armistìtziu in cussa gherra fata die pro die, ma sèmper a sa cuba..

Carchi noba est bènnida dae su ricatu de don Efiu Carta. Sa muzere, Sara Marongiu, in sos zornale de su bator de ghennarju, pedit a sos bandidos unu sinzale chi su maridu esseret galu bibu e unu tretu de tempus pro remonire su dinare pro pacare su riscatu, chi est su prus artus chi aerent mai pedidu finas a tando: bator miliardos. S'imbassadore, unu reliziosu, at cunfirmadu s'amontu de sa pedidura, peri a pustis nemos at ischire cantu de tzertu benit pacadu.

Politzia e carabos sichint a non dare a bìder unu ligonzu de sos bandidos sardos, de sos ricatos cun su terrorismu. Suta suta peroe s'ischit chi sa DIGOS, a contu suos, est mandande a in antis sas indàzines secretas secretas. Sa cumpetèntzia manna, meda de prus de annos colados, si podet ispiegare petzi cun sas letziones imparadas in sa presone de Badu De Carros. Atentados fatos in su 1978 sunt prus de binti e ses peri fallidos contra a sos carabos amministradores publicos.

S'abocadu andat a domo de Bennardu sa bizilia de sa Befana. Acatat una famiglia derruta, dae sas peleas de un'isetu, finas a tando, de badas, de àer un tzinnu de su familiare mancante. Petzi sa sennora Solinas est a tretu de pòder assentire. Mustrat sa litera a issa. A sa cuntentesa de sas primas nobas, ponet fatu s'isconortu a su pessu da ube bocare totu cussu dinare.

- Est sa prima dimanda. Amus a trattare. S'ant a acuntentare de prus pacu. – Non contat de sa de duas imbassadas chi l'at torradu Zuanne.

- Non b'amus a arribare mai.- E sa sennora Angela Maria pranghet e bastat, S'abocadu est bonu a fàcher arringas in tribunale, ma a acunortare zente disisperada non è pròpiu arte sua. Petzi est capassu de li nàrrer:

- Si diet ite fàcher, sennora. Ponzat a pare cantu prus podet. A pustis amus a bìder. Sa tratativa at a èsser longa. Ma totu at a finire bene, Apo buscadu unu imbassadore bonu. Un'òmine de fidùtzia. Si trancuillizet. Totu at a andare bene.

- Chie est cuss'anima dinna?

- No est unu pride, ma una pessone chi ischit sos fatos suos, capassu de fàcher su dovere.

- At fatu su primu ziru? Ite contat de Bennardu nostru? Ite l'ant naradu cussos?

- L'at fatu e totu est andadu bene. Issa non si nde bochet cun nemos. Est importante.

Sa bisita a domo de sos Solinas, in carrera de Roma 26, non fughit a sos zornalistas e at dadu a pessare chi su primu agantzu intro de sos familiare e de sos bandidos b'est istadu. Paret normale chi sa firmada de sas fortzas de s'ordine apert dadu cussu frutu.

Intantis dae su fronte de sos ricatos sas nobas essint a gùtia a gùtia. In pessu bastant a suponnèr chi sos Rosas sient zirende a pònner a pare su dirare pro su riscatu, peri si sos familiare negant totu. Sa batuta in sos montes de Orgosolo, peri cun s'impreu de so sos canes, no at dadu frutu.

Sa sennora Anna Gabella non est in mezus cunditziones, a pustis de sa litera de su 28 de nadale; isetat de badas sa de tres. Per intantis s'est dande ite fàcher a collire dinare pro riscatare su maridu Pupo. Meda prus disisperada est sa sennora Besuch e sa fiza Ulrike. Trista che morte, oramai est pessande de si nche ghirare a Zemània. Provant a imbiare un'àteru apellu per mesu de sos zornales. A pustis de unu mese dae s'urtima imbassiada e 110 dies de mancamentu non ischint galu nudda de Peter Rainer Besuch. Chi nessi li narent si est galu bibu, ca si nono si bident custringas a pessare chi est mortu. Sa fiza est isporada dae custu mudighine e pessat zai de si nche torrare a domo sua in Zermània. Sa mama non ressessit prus a nàrrer nudda e si peri aeret chèrfidu, non b'at chie la cumprèndat, ca conoschet petzi su tedescu. Sa Gaddura in cussa costa chi mutint, oramai totus, Ismeralda, est deserta e su mare, cando no est turmentadu dae sos bentos, petzi ispricat nues nigheddas, che i sas penas chi at in coro.

Cun s'animu chi galu li restat in corpus, sa sennora Solinas at in mente de tentare s'urtima carta chi li restat de ghetare. A superare sa mudesa de sos bandidos, a fàcher fronte a su pacu soddu chi tenent. Non l'abarrat àteru che de imbiare una imbassiada, per mesu de sos zornales, a sos chi ant fatu su ricatu.

Mutit s'abocadu pro si cussizare. No est chi Perantoni Boi bi credat meda, si rendet contu peroe chi sa disperazione fachet cussu e àteru, si non pejus. Gai su nobe de ghenarju essit in s'istampa custa imbassiada:

"A su contra de totu su chi s'intendet in ziru, deo non so una fèmina rica. Su patrimòniu si nch'est boladu cun sa benda de continu e totus ischint chi mi sunt istada de òbricu pro nos campare. Su pacu chi b'at abarradu non lu poto tocare ca mi lu proibit sa leze, siat in presèntzia de custu ricatu, siat ca est ligadu e impinnadu a pacare sos bufos fatos in custu coladu pro sos acontzos e meorias chi apo dèpidu fàcher. Cumprendo chi paca fidùtzia m'ant a dare sos chi leghent custa imbassiada; pro custu so pronta a bocare a campu totu sos papiros ch'apo, bastet de arribare cantu in antis a liberare a fizu meu. Acatent issos sos modos e maneras de nos jobiare in locu secretu cando e comente cherent."

Est sa fortza de su disisperu a detare custas paràgulas, Cosa mai sutzessa in àteros ricatos una declarazione de custa ispètzia. Sa sennora Solinas ponet totu in arriscu. S'abocadu l'at abèrtida. Podiat cumprèrrer una bona istrùssia ghetada in olicras dae un'abocadu e totu, e nemos assicurat chi l'aerent picada a sa sèria. Sa sennora no at àteras armas e at detzisu de arriscare.

At cumintzadu a regòller su dinare e at cumpresu canta malinnidade b'at in sa zente, peri in sos amicos corales. Paritzas amichèntzia, paritzos imbaradorjos sunt prus aparèntzia che sustàntzia. Dinare, narant sos amicos, non bi nd'at, non nd'at nemos, ma cando at cumintzadu a chistionare de interessos, tando essiant a campu. Gai su ricatu de su fizu diventat un'afàriu, arriscosu pro sos bandidos, ma peri unu bellu afàriu cumbeniente pro chie li dimadat intessos chi arribant a su 25%. E cantas bortas at dèpidu rifiutare cussu dinare ca sunt sa rughina non pro su fizu ebia, ma pro totu sos familiares, cun interessos chi non si podent contare. Àtere la cummiserat e basta. Ma

retzit dinare peri dae chie mancu si l'isetat. Tando cumprendet chi a bortas una paragùla bona, un'atzione bona, fata chene perunu iscopu de bi balanzare, a bortas dat frutos prus mannos e in su mamentu chi mancu si bi pessat. Sunt paca roba, ma dada cun su coro, peri si cussos pacos mliones sunt unu nudda pro sarbare su fizu, a fronte de s'amontare fora de misura chi l'ant pedidu.

Sara Marongiu non retzit risposta; petzi su mudìghine de sos bandidos e sa boche chi s'isparghet in totu sa Sardinna, chi ant atzapadu un'òmine mortu. L'iscrivent sos zornales e contant chi cussu mortu est Don Efisio. Nara chi sa politzia pessat deretu a la trancuillizare ca sa pessone acatada non est cussa chi sa zente contat. Su disisperu, chi l'at furadu s'animu, non li passat e non l'abassiat de meda. Sos malannos chi sufrut s'òmine antzianu rendet difficultosu su manizu de su ricatu. Don Efisio non si nch' est dassadu. picare chene si difènder. Lis at peri puntadu su fusile chi juchiat sèmper a pramucoddu. Sos bandidos sunt istados prus lestros de issu e l'ant fertu cun sa culàrtzica de su fusile issoro e nche l'ant picadu a fortza, fertu e issambentadu. B'at de pessare, conoschende s'òmine, chi in presonia apet tentadu medas bortas de si l'afilare. Sos bandidos lu podent àer peri mortu pròpiu pro chi non si lis fugat.

Cosa simile podet èsser sutzessa a s'abocadu Riccio, chi pustis de l'àer mortu no ant fatu acatare mancu su corpus a l'interrare. Totu fachtet parte de sos modos nobos de tratare sos ricatados. Bidendesì in perìculu de èsser iscopertos o pro àteru, chi issos ebia ischint, sunt capassos de ochìder sa pessone chi ant in manos, a bortas a pustis de àer incassadu parte de su riscatu.

Su tempus s'est assestande e s'àstragu, chi in sas dies coladas, fit istringente in d unu abratzu malu biddas a campos s'est isorbende. Su colonnello Zappi, cun su cuestore de Nùgoro, cun totu sos cumandantes de cumpannia, de tenèntzias e istatziones de carabos cun totu sos cumissariados de politzia cuncordant una batuta colossale, noba, a pònner in assèdiu totu sa Barbaza de Ollolai e s'Ozastra. S'aunit a issos peri sa Criminalpol, a pustis chi in Mamujada ant arrestadu Angela Flumini, nota pro èsser sa muzere de Mario Sale. Custu, narant, ch'est su capu de una banda chi operat in Terramanna, mescamente in Toscana e in su Lazio de susu ube ant fatu unos cantos ricatos.

L'intellighèntzia, sas abidades de sos sardos no est prus mancu mentovada, antis isparit a fronte de tantos disatinos, ricatos e furas. Sas nobas de sos ricatos fatos in Sardinna s'azunghent, in sos zornales, a cussos cumbinados in Terramanna, a sos protzessos in atu in ibe. Amerant pessima fama a su malufàcher de sos pacos sardos chi si sunt dados a cussa bida.

Zuane torrat a Macumele e sichit a si mantènner informadu de totu sos fatos de cronaca nighedda chi serbint petzi a fàcher bènder prus copias de zornales, Foras de sas malefatas de bandidos e delincuentes, pacu de iscriver ant sos zornalistas de sas bidditzolas isulanas. Sas nobas de politica italiana e istranza sunt pacas aberu.

Zuane s'est belle e ismenticadu de s'impinnu suo in mesu de totu cussos disatinos. Bi pessas cada borta s'abocadu chi liu amentat, cando si jobiant in su motel a si bufare sa solita tassa de cannonau.

Unu manzanu li dimandat:

- A m'ischit nàrrer chi at dadu sa notitzia de s'amontu pedidu pro su riscatu?

- At a èsser sa sennora Angela o sa socra. A issas apo dadu a lègher sa lìtera, ca non nde podia fàcher a mancu. Depet cussiderare chi chene cussa notissia, s'apellu no aiat fundamentu.

- In custu apellu, ite b'at de beru?

- A dolu mannu, totu. Sos papiros dados in bisione a sos currispudentes de s'istampa locale sunt autenticos.

- Custu nos cumplicat sas cosas. S'arriscu pro su zovanu aumentat. Peri sos bandidos leghent sos zornales e s'ant a rènder contu chi ant in manos unu punzu de bentu. Custu mudìghine, ch'est durande dae unu bellu tretu de tempus, cuminzat a mi bestire pistichinzu.

- Ispero chi non siat gai..

- Si a lu mantèner in bida fit s'ispera de unu bonu riscatu, sas isperas issoro podent èsser pèrdidas. Bi pòder sutzèder de totu.

- Tenes resone aberu. Nos restat petzi s'isetu chi non ponzant in atu una tale faina. A tempus suo apo informadu sa sennora chi cussu apellu est un'arriscu mannu, ma su disisperu fachtet cussu e àteru. Notissias tue non nd'as àpidu àteras?

- Nudda. Apo s'impressione chi cussu primu addòbiu siat istada petzi una mala visione.

- Est lezu peri a lu pessare, ma podet èsser gai.

Su tretu de tempus coladu intro de su primu addòbiu e s'isetu de un'àtera jobiada est cumintzande a diventare tropu longu.

Su biazu de Zuanne a Roma no at peruna ispiegatzione pro su brigadieri Piras, chi cumintzat a pònner in duda sas capassidades suas de aberguadore. Li paret una pessada tropu manna chi su biazu a Roma serbiret pro isviare indazines e suspetos. Non l'est istadu difitzile ne mancu a ischire chi motivu b'aiat e sèriu. Paleotti no est dèpidu andare a Macumele a lu punterare. Piras si dimandat si nde balet sa pena a lu torrare a imbiare. S'abocadu curat sos interessos de sa famiglia de Bennardu. Ma sas addobiadas de Zuanne cun issu no dant apizicadorju a peru suspetu. Non cumprovant nudda. Si conoschent dae tempos chi non b'aiat nudda de suspetare. In prus fint sèmper a sa crara e sèmper in su matessi motel. In cue issu traballat dae meda. Sunt de abitudine pro ambos e totus l'ischint. Chi Zuanne esseret un'istrùssia a deviare sos suspetos o chi esseret aberu foras de cussu afàriu, cumintzat a li berrinare in conca a su brigadieri.

Andande a fine a fine, peroe, ite pessare liu dat galu, antis l'ispinghet a crèder chi pròpiu a motivu de cussu, Zuanne nch'est in mesu prus de cantu dat a bìder. Cussa amichèntzia e totu su modu de fàcher issoro li paret chi cunfirmet sa tesi chi Zuanne esseret, e non podet èsser diferente, s'imbassiadore de s'abocadu pro contu de sa famiglia de Bennardu. A la pessare bene, cale occasione mezus, pro iscambiare parreres e nobas o istabilire addòbios, de un'addòbiu craru craru, a in antis de totu su mundu?

Si negòssiat goi in mente sua e si cumbinchet chi cussu Zuanne nche lu juchet deretu deretu a in antis de sos bandidos. No ischi nen comente nen cando, ma s'ispera l'abarrat. B'at petzi de isetare su mamentu zustu. Cando, su deche de ghennarju, politzia e carabos, Piras cun sa Criminalpol sunt impinnados in sa batuta prus manna chi s'esseret bida in Barbaza e Ozastra, Paleotti est in Macumele a punterare siat a Zuanne siat a s'abocadu. A s'impoddile mòghent totus sas fortzas de sa zustìssia. Totu sos mezos sunt pronti e sos òmines parados a suprire a sos montes de Arzana, Tertenia, Biddamanna e Biddanoa in Ozastra; dae Sorgono, Meana, Tiana e Ovolla cara a su de Desulo e Fonne; dae Baronia e Durgale a su Supramonte de Orgosolo e Urtzullè, agrucande su de Mamujada e Sarule. Totu sos essidorjos dae sa Barbaza de Ollolai e a s'Ozastra sunt tentados. Su locu est prenu de poliziotos e carabos a puntu tale chi mancu un'acu podet colare chene èsser bida. A s'artziada de su primu sole si moghent peri sas patùllias cun sos canes, cun sos elicotos a computare rocarjos e padentes.

Una batuta de cussa ispètzia, sos sardos, non l'ant mai bida. mancu in su tempus coladu, in s'otichentos.

Sos carabos non perdent sos canes petzi ca los mantenen òmines espertos in cussos tupales e cubadorjos, in sos roccarjos. Ma non bocant a campus perunu bandidu, perunu presoneri, sende chi a calicunu li sunt colados acurtzu. Pasqualba Rosas est cubada in cussos zassos agrucados, acurtzu a cussos padentes in mesu de duos montricos. Bennardu est cubadu in aterube e gai sos bandidos in campu e in montes non sunt bocados a pizu.

Su sero de su deche de ghennarju Zuanne s'est leghende su zornale, cando a s'ispessada l'arribat una telefonada; sunt sas baror de bortaedie. A su pruntu s'intenet rispònder:

- Bene torrada – e sa boche, chene mancu si firmare sichit – Moghes cras a sas sete dae Nùgoro picande custu caminu: Oliana - Orgosolo- Mamujada – Fonne – Biddanoa. Picas sa matessi màchina; su sinzale est su matessi e gai peri sas paràgulas in suspu. A nos bìder a cras - e serrat su telefono.

Peruna paràgula in prus. Petzi cussas netzessàrias e peruna rèplica: sèmper in italianu, sa solita Boche chene tratu de si pòder reconòscher.

Chi esseret issos, non b'at de isballiare. S'unica cosa chi l'est pàssidu de abirguare est chi est sa matessi persona chi aiat chistionadu su duos in su Pradu de Orune. Petzi una intertzezzione podet dessinare da ube benit. E chi su telefono suo esseret controlladu est possibile, peri chi su suspetu de unu carabinieri siet tropu pacu pro nd'àer unu motivu zustu.

Si frigurat chi su Brigadieri Piras, chi podet èsser ingarrigadu de lu kontrollare non est persone de bi brullare meda, ca lu conoschet pro èsser abistu e preparadu. Cussiderat peri chi su biazu a Roma, pro carchi duda chi l'aeret postu, no est a tretu de l'isviare.o cambiare idea. Chi non l'aeret abirguadu comente imbassadore, a pustis de l'àer firmadu in su de Orune est difitzile a non bi pessare. Est persone chi conoschet sa zente, mescamente sa zente sua, ca sardu est e de cuddos malinnos. Est un'espertu in cussu setore, conoschidore de campos e montes e sa cosa est ischia.

Li bastat unu indissiu, pro cantu minore, pro s'aperru unu caminu. Una borta indissiadu, conchi tostù coment'est , no lu dassat fàtzile. Ischit chircare e furdichinare fintzas a nch'arribare a fines.

Zuane, cando prus pacu si l'isetat, nche benit torra tiradu a mesu de cussu afàriu. Non si nde est ismenticadu; s'isetaiat petzi chi esseret sutzessu carchi fatu chi l'aeret tiradu a fora.

A su contra depet cumintzare dae printzìpiu e andare a in antis. Non si retirat.. Paca ora a pustis, cun s'iscùsia de andare a si fàcher una partida a cartas, est fora de domo.

In su motel acatat s'abocadu ch a sa sola si bufat una tassa de binu. Lis est bastada un'ocrada, unu tzinnu chi petzi issos podent sapire e cumprènder. S'abocadu ordinat un'àtera tassa

- Su solitu?
- Su solitu, su solitu – est sa risposta.
- Ghetande duos e batinonchelos a sa saleta, ordinat s'abocadu e sichit: - A sa sètida si gustat de prus. – Gai si dogant dae olicras chi non depent intènder e ocros chi non depent bìder.
- Cras sero a sas sete moghende dae Nùgoro. Sos coladorjos sunt cambiados - e lio narat a s'iscùsia.

Intrat su camerieri cun sa safata e sos duos binos. Ponet totu in sa mesa e discretu che a sèmper, essit, ghirande sa janna.

- Tando, allega de custu mancamentu. - S'abocadu impreat, pro sa de duas borta su tue a su postu de su bois, chi sèmper l'aiat costumadu. A Zuane no nche li rughet e mandat a mente. Non sunt mamentos de cromptidos.
- Si tratat de sos bubulos chi apo in su de Nùgoro,- Li rispondet Zuane, abituadu comente est a faveddare in suspu a sa moda sarda.- Mi serbit una màchina adada pro caminos de montes.
- Non b'at problema. Ti la busco deretu. Apo unu compare in Nùgoro chi mi la podet prestare. Pro it'ora ti serbit e in cale tretu?
- Andar bene in su motel de Nùgoro, mancarì a tardonzu. Controllet chi jucat benzina.- Zuane no aprofitat de sa cufiantzia chi li cheret dare s'abocadu.
- L'as a àer. Cando t'ant informadu?
- M'ant mutidu amicos como est pacu ora.
- Sicuru chi su bèstiàmene est tuo?
- Peruna duda!
- Comente det àer fatu? Pròpiu oje in su *Gazzettino Sardo* ant dadu sa notissia de una batuta manna chi non s'est mai bida s'uguale. L'as ischidu?

- Dae su radio coladu mesudie.
- Corazosos , peroe.?
- Comente dialu ant fatu. Cun totu sa zustissia in ziru eris! Bi depet àer unu muntone de zustissia in ziru. Totu sos caminos depent èsser controllados.
- Non credas. Sa temporada passat e torrat su tempus bonu. Ant traballadu totu die e petzi issos ischint cantu fàdicu ant acumuladu. Issos puru ant de pasare. Ma nara su discu ti funtzionat bene? – E s’abocadu fachtet su gestu de telefonare. - So timente chi su meu siet difetosu.
- Non mi so abizadu de nudda. E non dia ischire ub’est su guastu,
- Mira si intendes carchi sonada mala, carchi iscartu chi sa musica non s’intendet bene.
- Non mi nde so abizadu. Apo a controllare mezus.

Si pesant sichinde a negossiare in suspu e in su bancu bi ponent s’istafa e essint.

Zuane andat a si fàcher sa partida a carta a su locale de sos ferrovieris. Non nd’at bintu una e cussu sero est ghiradu chito a domo sua..

S’incras est essidu a primu bortaedie. Sa muzere s’abizat chi s’est bestidu pesante e at cartadu sos iscarpone de campanna. Dae meda non liu dimandat prus. Zuane peroe l’abertit de non s’ispantare si ghirat a tardu. Moghet a Nùgoro. Pacu in antis de sas sete firmat sa màchina a de fronte a su motel. Si pompiat a fùrriu a s’abitudine. Nemos. Sa A112 ruia est in cue. S’acurtziat. Est aperta cun sas craes in su cruscoto. La computat bene. In intro bi sunt, a su solitu, duos bidoneddos de benzina. Nche bidet peri un’ampulla de binu: s’abocadu l’at pessada zusta. Li podet èsser de azudu a superare su fritu de cussa note, chi podet èsser longa. Intrat e ponet in motu. Su faru destru de in antis e su fanale de secus mortos pro respetare sos acordos.. Cando cumintzat a si mògher l’arziat a conca una duda: da ube colare: dae Montelengu o dae Mughina.. Deretu si pessat chi no est dae Caparedda chi depet colare, ca in costazos de su monte Ortobene est difitzile chi lu potant firmare. Picat dae Mughina e deretu a Uliana a sa velozidade chi l’ant impostu. Superat sa bidda afillandesila a destra a Orgosolo, in su caminu betzu cun su pamentu chi galu no at bidu cratamu. Colat costa costa de su Corراسi intrande cun curvas e controcurvas in d una panoria turmentada de baddes e baddicros, dae montricu in montricu. Unu filu de luna dassat bìder, de tretu in tretu, cussas terras nigheddas de tupales e padentes, chi deretu s’iscuricore s’ingurtit, in pessu una nue nighedda cuzicat cuss’ istiza de luna. Colada sa contonera s’isterret sa badde de Bardinu e sos zassos de Sorasi. Innedda cumintzant a lampizare sas luches de Orgosolo. Cue cumintzat sa falada fintzas a su ribu de Gorinnaro, da ube printzipiat s’artziada chi nche la juchet a s’intrada de sa bidda. A destra, a palas de monte Goddorè, s’iscampiat indifferente sa bidda de Nùgoro.

Caminat a velozidade sèmper uguale. In cue, in cada tretu los podet jobiare. Su locu est adatu, cravadu intro de duos montes. A manu manca su Corراسi chi si pesat fintzas a 1400 metros de artària, cun sas palas cuzicada dae mesu costa in susu de eliche artos e prus a susu sas rocas de carchina. In bassu sas tupas de rubu e de chessa. A manu destra Goddorè cuzicadu de tupales e in pedes carchi ulibàriu. Sunt locos apertos fatos a posta pro chie si cheret cubare cun milli coladorjos pro si fuggire a un’ala a sas arturas de Mamujada, a s’àtera a su Supramonte de Orgosolo. Badiat a ocros bene apertos sas atas de caminu non bidat su sinnale. Nudda. Intendet petzi su tziulu lamentosu de sa tonca e jobiat carchi cunillu fughinde ispramadu a su sonu de su motore o firmu allampanadu a sa luce de sos faros. Carchi borta depet frenare pro no investire carchi mariane ch’est rucrande su caminu, ponende fatu a sos cunillos in su jocu chi paret che i cussu de sos pitzinnos a guardias e ladros, ma in cussu jocu in sa note b’at in perìculu sa bida de sos chi fughint. Sichit a andare sèmper a bellu. Conoschet bene cussa badde. No est sa prima borta chi bi colat. Àteras bortas at postu fatu a sas tratat de su bèstiàmene furadu a carchi amicu e nche colabat in cussos isperdissios cara a Uliana e cando non cando a Orune. Nch’at superadu a Gorinnaro e est a s’artària de su mulinu betzu. Cumintzant sas curvas de Tumba

Tumba. Li mancat pacu a èsser in intro de Orgosolo. Su locu pro un'addòbiu est benende mancu. Pessat chi li tocat de superare sa bidda e de sichire cara a Mamujada e da ibe a Fonne. S'addòbiu podet èsser coladu Orgosolo, in antis de Mamujada o a pustis tocande a Fonne.

Goi pessat ma no at fatu sos contos cun sa zustissia. No est mòghidu dae Macumele chene èsser bidu. S'apuntadu Paleotti non fit in ibe debadas. Mancu bene essidu dae sa bidda e su brigadieri Piras est informadu. Peri Paleotti nche cromptet a Nùgoro cun sa gazzella e lu superat a banda de Pradu, chene dare a ischire a Zuanne chie l'at postu fatu, chene li bestire in conca carchi suspetu. Nd'at sichidu s'afilada fintzas a su motel, istande sèmper in cuntatu cun su brigadieri Piras. Parizas gazzella sunt istadas allertadas. Cando su brigadieri ischit chi at isbortadu, a zosso de Nùgoro, in Badu de Mertzeeoro pro andare a Uliana, non l'abarrat peruna duda. Da Uliana non li restat che colare in Orgosolo.

- Brigadiere, dae Uliana, colande in su Gologone pro Durgale, a pustis podet torrare a Orune.

- Istimadu Paleotti, ses in isbàlliu mannu. Cussa zente non ripitit mai sos caminos. Peri si colat in Durgale, sos collegas lu diant firmare a s'essia, ma non bi credo. Pro como colat in Orgosolo.

Deretu sa patùllia si l'afilat a ibe, a pònner su bloco in su de Tumba Tumba. Prus a susu bi nd'at zai una de poliziotos. In cue Zuanne acatat su sinzale, postu in terra in sa cunetta, ma iscritu, non de sida: ALT POLIZIA e pacu prus a susu b'est sa camioneta. A un'ala e àtera sos òmines armados. Non b'at modu de si fughire.

A Zuanne nche l'essit un'irroco. Sunt apostados: isetant a issu. Pessat a su telefono. Fortzis su telefono est guastu: su discu est secadu aberu. Acostat a destra e morit su motore. Non est mancu bene faladu e si bidet afurriadu dae sos carabos totu armados e unu faru puntadu contra a issu. Nche conoschet su brigadieri Piras de su grùstiu de sos carabos de Nùgoro. Issu! Si la depiat pessare, non podiat mancare. Sa fama chi zirat in Sardinna non est debadas e como nde li dat una prova.

Falat a manos in artu.

- Si ziret e ponzas sas manos supra sa màchina. – Unu carabu lu furdichinat totu. Un'àteru li computat sa betura. Non li pedint nen patente nen libreto. Est su chi si pessabat. Isetabant a issu e no est pro li pedire docummentos. Su brigadieri Piras, cun tratu de boche chi non lassat cumprèder s'est unu saludu o unu pòrrogu:

- Ello a custas bandas, sennor Zuanne? Ite est zirande?

- Bonas dies su brigadieri – e abassiat sas manos - Non lu bidet chi so andande a Orgosolo. - Sos àteros si sunt ecante istresiados.

- Custu est craru, ma comente mai a cust'ora? Non nche li paret tardu?

- A si colare unu sero cun amicos, no est mai tardu.

- Comente mai benit da Uliana?

- Peri in inibe b'apo conoscèntzias.. Lo scherzo interessare pro una fura. In sas notes coladas mi sunt mancados duos bricos. Sas trataas mi nch'ant batidu a in oche. Issu chi est espertu de custas terras ischit coment'andant custas cosas.

- L'ant furadu bestiàmene e non l'at denuntziadu?

- Galu nono. Issu ischit comente andant custos afàrios.

- No est unu boe a duas ancas su chi est chircande?

- Non cumprendo ite mi cherjat nàrrer, su brigadieri. – Si l'abarrat carchi duda, cussa frase nche lia bocat dae conca de su totu.

- L'apo naradu chi so chircande duos bricos.

- Cheret fàcher finta de non cumprèder. Cheret brullare?

- Ripito su naradu.

- Tando aberu non cheret cumprèder o mi cheret picare pro macu? – Non li dat tempus de rispònder e deretu azunghet:- Issu est chircande un'òmine, no unu boe, peri si pro zente che a issu intro sos òmines e su bèstiàmene diferètzia non bi nd'at.

- Brigadieri, issu est picande pira pro pirastru, m'iscust sa frase.

- Gai li paret? Sedat in màchina e benzat cun mecus a su cumissariadu. Paleotti si li sedit a costazos.

Zuane artziat a sa sua. Su carabu partit a totu fuga, Sa A112 li ponet fatu e in palas una gazzella. Depent traversare totu sa bidda; su cumissariadu est a s'àteru capu, ube cumintzat su caminu chi andat a Nùgoro. Lu fachtet intrare a s'aposentu chi fachtet de ufissiu. In sa pinna de muru chi dat cara a sa janna b'at una ziminerà mai alluta. Impiccadadas in su muru sas fotografias de so bandidos cubados in monte e percas. S'iscrivania est a in antis de sa ziminerà e a manu destra sa mesichedda cun sa màchina de iscriver. Su carabu chi depet verbalizzare est pruntu.

Su brigadieri cumintzat su pòrrogu chene biabòlicas, cumintzande dae su chi l'interessat de prus in cussu mamentu. Su berbalizadore li ponet fatu iscrivende manu manu.

- Issu est s'ingarrigadu dae sos Toniutti, beru?

- L'apo naradu chi deo so chircande bestiàmene.

- Ma cale bestiàmene, sennor Zuane? Credet a beru chi siemas totu tontos? Non so naschidu eris. Li cumbenit de rispònder a su pòrrogu. S'abizat chi su chi est fachende est contra a leze? L'ischit chi sa zùstissia at blocadu totu sos bene de sos Toniutti?

- Deo, custu chi est narande issu, est zente chi non conosco. Li ripito chi so indagande pro recuperare bestiàmene. Duos bricos de ratza.

- Li cumbenit de rispònder a sas dimandas.o cheret fàcher su tostorrudu? S'est isballiande de meda. Issu at unu traballu, muzere e fizu ... miret chi inoche non si brullat. Miret custas fotografias, nde conoschet calicunu? – Sunt sas fotografias de sos ricatados, ma b'est peri cussa de Riori. Li dat un'ocrada.

Zuane non s'iscumponet, non dat a bìder perunu aneu, ma l'artziat a conca:

- “Peri custu est bènnidu a ischire custu cane de cassa!”

- Est istadu teracu cun bois parizos annos, no? – Ma Zuane non rispondet – It'at pèrdidu sa memoria?

- Li ripito su chi l'apo naradu. Deo cun sos Toniutti ...

- E deo nche l'iscudo a intro ca si rifiutat de rispònder.

- Non apo àteru de azùngher.

- E deo...

- Mi cunsentit de fàcher una telefonada dae custu aposentu?

- A ube depet telefonare?

- Liu faco ischire si acato sa pessone..

- Chie est?

- Liu naro a pustis, antis la faco chistionare cun issu.

- Mi diat su numeru.

- L'isco fàcher peri deo. Mi cheret fàcher telefonare o nono.

- Tenzat su telefono, ma li naro chi s'est isballiande.

- Isetet e amus a bìder. – Zuane fachtet su nùmeru.

- So Zuane e telefono dae su cumissariadu de Orgosolo. M'ant firmadu a s'intrada de sa bidda e su brigadieri Piras m'est porrogande. Ite poto fàcher?

- Mi lu colet a su telefono.

- Su brigadieri, a issu, cheret faveddare cun issu.

- Chie est?

- Facat su favore, pichet su telefono e liu dimandet.

Su brigadieri picat su telefono de malu grabu. Deretu s'abizat de àer postu unu pede in bòdiu.

- Chie est? So su brigadieri Piras de su Grùstiu Operativu de Nùgoro.

A sa prima risposta su brigadieri si pesat ritzu.

- Sisse ... sisse ... andat bene... sisse ... sisse. Cumandet - B'at mancadu pacu chi no salutat a sa militare. Ponet a postu ca corredda e si bidet ch'est arrennegadu

- Andat bene, sennor Zuane at bintu issu. Ma s'amentet semus galu a sas primas.

Fachet unu tzinnu cun sa conca e sos àteros carabos essint dae s'apostu. Su cumissàriu est ridende suta sos bafos. Craru chi ischit, antis chi si l'isetaiat: a d onzi modu picat sos pedes e essit.

- Issu est liberu, sennor Zuanne, peroe s'amentet: a su primu isbàlliu las pacat totu.
- Fatos meos sunt. Non si preocupet. No apo a èsser deo a fàcher su primu passu in bòdiu.

Zuanne ritirat sos papiros dae sa mesa, peri su fozu cun su caminu chi depet fàcher e chi l'ant secuestradu. Si nche picat peri su fozolu ube su brigadieri fit iscrivende.

- A nos bìder in mezus occasione.
- Nos amus a torrare a bìder, securu.

Essit a foras e petzi cando est artziande a sa màchina s'abizat chi l'ant tratesu meda. Pro su tempus pèrdidu e cumbintu chi li ponent fatu si cumbinchet a cambiare caminu. A sichire su programma chi aiat podet èsser periculosu pro issu, pro sos bandidos, pro su presoneri.

Falat a mesu biddu. Su tzilleri est apertu e li benit sa tentassione de falare e intrare. Controllat dae s'isprichitu supra su volante e s'abizat chi una vetura de politziotos in burghesu l'ant postu fatu. La dassat colare. Artziat a Prata de su Ponte e dat borta. Issu s'est firmadu. Cheriat una cunfirma e li benit deretu e puntuale. In su mentras chi est firmu, unu cumpanzu lu bidet e s'acurtziat a lu salutare invitandelu a falare a si picare carchi cosa. L'est bastadu unu tzinnu cun sa conca e un'amiada a sa vetura chi s'est acurtziande pro cumbincher s'amicu a s'istresiare.

Sos politziotos colant e si nch'andant. Totonni s'acurtziat a sa màchina. Zuanne li narat in pacas paràgulas chi sa zustissia l'est supra e su cumpanzu, chene azungher àteru, nche sichit sos amicos in intro de su tzilleri. Chi lu biant cun issu in cussu mamentu podet èsser periculosu. Zuanne non cheret pònner in trampas a nemos e su cumpanzu l'at cumpresu deretu. Ponet in motu e in Prata de su Ponte zirat pro dare borta.

Traversat sa biddu colande in su Cursu. Iscassiat de fronte a su cumissariadu e si l'afilat in carrera de Nùgoro, ube cumintzat s'istradone pro ghirare a sa tzitade e da ibe a Macumele. Una vetura si li ponet in fatu e si aiat dudas, cussa nche lias catzat de su totu.

L'est ponende fatu su brigadieri Piras, chi de ghirare a Nùgoro at issu puru. Paleotti, mancu naradu est cun issu.

- E tando ghiramus a manos iscuta, eh brigadiere?
- Gai est, istimadu Paleotti. Risponde su brigadieri chene cubare s'arrènnegu chi l'est rodende su ficadu.
- Sennor Zuanne est a in antis de nois e pessat peri chi li semus ponende fatu.
- Dassa chi lu pisset. Antis, Paleotti, a l'ischit ite ti naro? Carchi borta, carchi cosa de importante la naras tue puru. Rallenta, dassa chi si nch'istresiet, ma non meda. O como o tando carchi passu in bòdiu l'at pònner issu puru.
- Mi naret, nois in d ite amus isballiadu?
- Amus isballiadu sos Superiores, Paleotti, sos Superiores. Cherent chi lu dassemas chietu. Si credent de mi ligare cun custu, in tretu malu ant fatu su nidu.
- E peroe si nch'andat. At bintu torra issu. Semus perdende duos a zero.
- Cando sa difesa est che a tibe! - E Piras si nde ridet issu matessi de s'essiat chi at fatu e de sa cara ruja e isfadada de su collega chi artziande sa boche li rispondet:
- Sennor brigadiere, ma deo ite b'intro?
- Ses tue su chi s'intedent de fubalu, no? E tando? O ses unu malu atacante o ses unu pessimu difensore – e azunghet, a pustis de una firmada in su negòssiu: - cherjo nàrrer un defesa che i sa sua, Paleotti, che i sa sua, che i cussa chi at bocadu a campu custu sero! E chie lu tocat?
- Francu de cussu, francu de calesiat malefatta est pessone istimada.
- L'isco, l'isco, ma non cheret nàrrer chi su chi est fachende como non siet in pisiliche de leze e sa leze balet peri pro issu!

Tzarra ca ti tzarro, arribant a caserma e su colonnello Zappi los retzit in s'ufissiu suo pro unu primu raportu. Sos sardos sunt de pacas paràgulas e comente sardu si l'isbriga in duas paràgulas. Non resessit peroe a si mantèner in corpus s'afrentu rètzidu pac'ora in antis.

- Mi naret pro ite custu privileziu a Toniutti?
- Motivu b'at.
- Chi deo non recesso a cumprènder.
- Deo pesso de l'àer abirguadu. M'apo letu cun atenzione su verbale de Scotto e m'est passidu chi mancu issu si nde siat abizadu e non l'apet bidu bene. Controllati sa relata de Vittorio Russo e t'at a fàcher pessare a tibe puru. Issu contat chi in sos primos mamentos, a pustis de àer fatu sèder su presoneri in màchina, pro non dare a bider su chi fint fachende, si sunt iscarotados.
- Non diat èsser sa prima borta. Dent àer bendadu su presoneri!
- Gai pessamus e pòdet èsser gai. Si peroe si sunt istentados o non ant fatu bene custa operazione?
- In àteras paràgulas m'est narande chi los at bidos in cara?
- Custu est su chi timo chi siet sutzessu, dae su chi relatat Vittorio Russo e podet èsser prus goi chi non gai. E si goi est, t'abizas chi cussu Toniutti si podet cussiderare mortu. M'auguro chi goi non siat, ma s'arriscu b'est e peri mannu .
- Si sas cosas sunt andadas goi, tando cumbenit de chircare de li pònner cantu prima sa manos supra a cussos bandidos.
- E chie si la picat cussa responsabilidade? Nos tocat de fàcher su possibile pro li sarbare sa bida, peri chi parjemas tontos.
- A ite l'ant blocadu sos benes?
- Misterios de zustissia!

A Zuanne non l'est colada in passada sa vetura de su brigadieri. Un'òmine chi non li fughit nudda, dat cara a totu su chi li capitat a fùrriu, Sa duda chi li zirat in conca est sa telefonada de chie l'at mutidu. Chi esseret gai disabudu? O chi esseret una brulla o chi siet unu zuze gai potente o meda, ma meda in artu in sa zerarchia de sos carabos! Issu no at cumpresu bene, ma l'at cumpresu su brigadieri, chi si fit pesadu ritzu pro l'àer intesu ebia. Pessone bene conota e superiore a issu est de securu. Si b'at in palas una pessone de cussa potèntzia, a ite l'ant firmadu? E si gai est, Zuanne di dimandat, che i su brigadieri: a ite ant blocadu sos bene de sos Toniutti e cunsentire chi sos aganzos cun sos bandidos si facant chene perunu impedimentu?

Sa zustissia s'at impostu unu cumportamentu firmu in sos ricatos. Cun s'intentu de custringher sos familiares a operare de acordu cun issa, firmat sos benen pro rènder dificoltosu su pacamentu de sos riscatos. Est difitzile peroe a cumprènder sa ligadura intro de custu fàcher e custu riguardu pro su ricatu de Toniutti.

A custu puntu una tessera no incanstrat zusta, antis est mancante in totu. Mancat a Zuanne, chi podet pessare ebia chi carchi cosa de grave l'est fughinde. S'abocadu l'est cubande carchi cosa. Dae sas paràgulas ebia podet arguire chi siat Perantoni Boi, siet sa zustissia, amitinde chi a su telefono l'apet rispostu unu mazistradu, ischint o suspetant chi su ricatadu est in periculu mannu aberu. S'abocadu l'at abèrtidu medas bortat de non s'ostinare a indagare e tentare de ischire chie sunt sos bandidos de cussu ricatu e, si per casu esseret bènnidu a l'ischire, de non lu dare a bider, ca nde podet pacare su trasinzu Bennardu. Li benit peri de pessare chi esserent cuncordes zustissia, abocadu e bandidos. Deretu s'abizat chi sa pessada est tropu forte e de iscartare. A sa fine arribat a picare in cunsideru sa possibilitade chi Bennardu apet bidu in cara sos bandidos e duncas chi esseret navighande in abas metzanas. Petzi custas concusiones podent, cun bona resone, dare unu motivu forte a su manizu de s'abocadu e a s'intrada in mesu, per telefono, de unu zuze. Como cumprendet a ite s'abocadu l'at mutidu comente imbassiadore e totu sa tunicadura chi l'at fatu a su mamentu de s'ingàrriga a su postu de mutire unu pride o una pessone de familia.

Zuane at una parentela manna, chi li cuzicat sas palas e lu diat difènder. In prus at una trama manna de amichèntzias, chi s'abocadu, peri non conoschende si podet frigare. Ischit, dae su traballu suo, comente andant custas cosas e cun chie s'at de trattare, cun zente de monte e de bassura, cun pastores e massajos, chi possedint bestiàmene e terras. Est pro custu chi issu est una garanzia, comente narat s'abocadu. Si esseret bera sa prima pessada de s'abocadu, a Zuane non li podent cumbinare un'isgarbu a pustis de su primu addòbiu, a pustis de àer ischidu cun chie sunt tratande. Peri chi Bennardu apert bidu in cara sos bandidos, custos cun Zuane podent acatare unu mediu pro nch'essire francos e cun dinare in manu. Petzi issu podet èsser distimonzu de su fatu e podet garantire de mantènner sa cosa secreta e fàcher istare a sa muda s'interessadu.

Molinande custos pessamentos arribat a Nùgoro. In mesu biddu s'abizat chi su brigadieri non l'est prus ponende fatu, ma mantenet s'idea chi chene controlladu non l'ant a dassare. Non si nde preocupat e, a d onzi modu, capitande, ischit comente si nch'essire.

Deretu andat a su motel e firmat sa betura in su matessi tretu ube l'aiat acatada. Cubat sas craes in su cruscoto e intrat a su tzilleri. Est morinde de fritu e non si lu podet catzare bibende su cannodu dae un'ampulla chi chene istapadore non si podet apèrrer. Nche la cambiat a sa màchina sua. In su tzilleri non si dat a su binu, ma pedit unu tzichete de filiferru. Nde bufat unu e s'àteru infatu. Petzi tando torrat a sa bida tzivile. S'amentat de su collega chi est in s'astanteria e andat a lu salutare. Est istadas un'iscusia. Cun su cumpanzu torrant a su bancu pro bibere àteru e si bufat unu cafe.

Totu a sa lestra e moghet a Macumele currende cun sa beturedda sua a cantu l'est cunsentidu. S'addòbiu est andadu in bòdiu. Non at nudda de pèrder.

Torrat a mulinare sos pessamentos de in antis. Carchi cosa non funtzionat a dovere. Cheret ischire si l'est pessande bene. S'est gai li tocat de adattare su manizu cun sos bandidos. Si esseret beru su chi at pessadu, depet istudiare modu e manera de sarbare sa bida de cuddu poveru disgrassiadu, chi mancu conoschet e non podet conòscher si non lu jobiat. Como est in zocu e sa partida andat zocada fintzas a sa fine. No ischit comente si mògher e pro cantos isfortzos facat, non resessit a nde bocare a pizu unu bonu.

Est istracu ma cheret andare a jobiare s'abocadu. Oramai iscopertu l'ant e li paret de lègher su nùmene suo in sos zornales de s'incras. Sa zustissia aiat àpidu coladu sa notìssia a sos zornalistas contande de l'àer firmadu in su de Orgosolo.

Cun s'abocadu fachent su suntu de su capitadu e si cumbìncient chi sa telefonada de sos bandidos àtere l'at intesa e su telefono depet èsser suta controllu. In àteras paràgulas, Paleotti at fatu bene sa parte sua.

- A chie m'at fatu telefonare? – Dimandat a s'abocadu.

- Secretu chi non poto iscopiare.. At telefonadu in pessu arribadu a su cumissariadu?

- No, Petzi cando sas cosas si fint imbrutande e su brigadieri Piras m'at sequestradu su fozu de su biazu de fàcher.

- Bella conca de sindacu! Unu fozolu de cussa casta non si mantenent in butzaca. Depiat mandare a mente totu, no est difitzile.

- Chie mancu b'at pessadu. Mi l'apo postu in butzaca custu manzanu – favula, ca si fit cambiadu in antis de essire e b'est abarradu. - Cussu brigadieri si la fit picande cun mecus; mi cheriat peri incriminare ca non rispondiva a su chi cheriat issu.

- Cussu no est de pertinenzia sua. Peroe at zocadu supra su fatu chi issu non conoschet custas lezes. At zocadu de abistesa. At fatu bene a telefonare. Su chi non cumprando est a ite est bennidu a in oche. Non bi l'isetabo.

- Cun calicunu nde depiat chistionare, peri pro ischire comente mi comportare. Non credo chi apent telefonadu pro ischire si su telefono meu est controlladu.

- Custu pacu .infruit. Una mancadura a s'addòbiu, pesso, l'apent posta in contu. Cras l'amus a lègher in zornale. Credet chi sos currispondentes de Orgosolo si perdant sa notissia? Issos ant a èsser informados goi de s'addòbiu sartiadu.
 - In àteras paràgulas totus ant a bènner a ischire chi so deo s'ingarrigadu e m'at a èsser difitzile a essire chene èsser punteradu.
 - Trancuillu chi sa zustissia non est gai male fraganada. At abarrare secretu su nùmene tuo. Peri in custu b'at totu una tatica. A sos bandidos dant a ischire chi ant firmadu un'imbassiadore, chi l'ant secuestradu dinare. Torrant a nàrrer chi sos bene de sos Toniutti sunt blocados e torrant a ripèter notissias chi zai si conoschent supra sos pacos bene de sa famiglia. Totu istrùssias.
 - E issu puru, como est zochende, ca apo fatu duos ziros, ma de dinare mancu s'umbra.
 - Non nd'at a picare mancu sa borta imbeniente. No ischimus galu si semus tratande cun sas pessones zustas. Canes e corbos in ziru non bi nde mancat.
 - Duncas, sos chi m'ant firmadu sa prima borta podent èsser ...
 - Securu non soe, ma securu cherjo èsser: chi siant issos e basta.
 - Non m'est mancu artziadu a conca. Fint tropu securus de sesi.
 - Podet èsser. Issu no at dadu cara a sa diferèntzia de s'amontu pedidu per litera e s'àteru a boche. Su de s'addòbiu est a duas bortas de cussu de sa litera. Un'isbàlliu gai non si cumittit in custos afàrios. Non ant dadu perunu motivu de custa diferèntzia e perunu tzinnu a s'oferta de sa litera. Nos depimus securare de àer tratadu sèmper cun sas matessi pessones.
 - Atzidente! Non b'aido dadu cara. Como cumprendo a ite fàchet s'abocadu ...
 - Nudda de ispantosu; est pane de cada die pro nois.
 - E cun custa abistesa bois ispulicades peri unu muschineddu!
 - Su problema est àteru. Issu est chistionande de tratativas, ma si sa notissia de sa sennora Solinas est bera e non tenent contante: cale tratativas podimus cumintzare? A cantu podent arribare?
 - No isco e non semus nois a l'istabilire. Ant a èsser issos a nos nàrrer cale sunt sas pretesas issoro. Cheret nàrrer chi depet cuncordare peri s'amontu. In prus depet abirguare si Bennardu est aberu galu bibu.
- Est s'occasione chi Zuanne isetabat, ma in cussu mamentu no est in gradu de li pònner una dimanda a lu tènner a cropu e a nche li fàcer isbodiare su sacu. Si limitat ebia a li dimandare:
- Cales elementos at chi li facant pessare chi Bennardu siat mortu?
 - Petzi dudas, dudas lezìtimas, in custu mamentu. Ischimus ebia chi podet sutzèder.
 - S'est gai, sa borta imbeniente pedo de mi lu fàcher bìder, peri si non m'amento bene sa fisionomia.
 - Non b'est su bisonzu. Ant a èsser issos interessados a li dare sas provas. Non lis naret nen cale nen comente. A su mamentu zustu si nd'at abizare si b'at imbròddiu. Una cosa de tzertu l'amus in manos: issu conoschet sa Boche chi at faveddadu sa prima borta. Non nos abarrat che isetare s'imbeniente. Non l'ant a telefonare. Ant a impreare una litera. Possibile chi non si siant abizados chi est periculosu a li telefonare?
- S'abocadu bocat a campus un'ampulla de binu e nde prenat dua tassas.
- L'assazet e mi naret si custa no est grassia de deus! Est unu presente de un'amicu de Uliana.
 - Unu cliente suo?
 - Apo naradu un'amicu de Uliana. Issu est tropu difidente. Peri deo apo amicos in ibe.
 - E in totu sa Barbaza. Bi credo!
 - La ponzat comente cheret.

- A propositu li rendo grassias pro cudda ampulla. Mi l'apo a biber a sa salute sua e de Bennardu, ma in domo, cando l'apo a apèrrer; finas a como no apo imparadu a biber dae sas ampullas tapadas.
- Ite isbariadu! Deo, ma peri s'amicu. Podiat pessare de lia dassare mesu istapada. No at a torrare a sutzèder.

S'ADDOBIU IN SANTU MARCU

Zuane torrat a domo sua, ma non podet fàcher a mancu de reconòscher chi, comente esseret chi l'aeret zirada, totu su secuestro no essit dae sos zassos de Orune, Nùgroro e Orgosolo. Totu si jocat in pacu tretu. E non lu diat ispantare si su ziru imbeniente diat èsser istadu che i su primu o che i su de duos. Dae cue non si podet fughire. Est beru chi como s'azunghet su fatu de l'aer firmadu e su de si lègher s'incras in totu sos zornales. Su chi li dat prus fastidiu, non est cussu, ma sa curiosidade de sos collegas de traballu e de sa zente chi bi colat e, prus e prus, sos pessamentos chi si diat picare sa muzere, chi fintzas a cussu mamentu nch'est abarrada foras. Pacu l'importat si, sa difficultade de si mogher tranchillu aumentat; propiu custu non l'ispantat.

Ma siet issu, siet s'abocadu in custu si sunt isballiados e de meda. Di fatis, s'in cras in su zornale non si nde chistionat pro nudda nen de issu nen de su fatu chi l'apent firmadu. Cheret narrer chi sa telefonat at fatu un efetu prus mannu de su chi si pessabant. Nen carabos nen pulitzia ant dadu da notìssia a sos zornalistas.

E gai Zuane torrat a traballare prus serenu e rinfrancadu. Petzi contant de sos corbos chi si sunt ghetante a domo de sos Rosas. Ja s'ischit chi a s'arbore rutu totus bi crompent, ma su chi est sutzedende in custa occasione est a beru indetzente.

Telefonadas, literas anonimas, una chedda de muntonarjos cherent profitare de su disisperu de sa famiglia de Pascualba.

S'est ischidu chi sos emissarios de sos Rosas sichint a zirare in bòdiu in cherta de istabilire un'addobiu cun sos bandidos e de cuncordare sa s'amentu de su riscatu. Ma fintzas in custu secuestro non s'ischit chie est o sunt sos emissarios. Fintzas sos Rosas sunt resessidos a mantèner su secretu. In tantis sa buteca de prendas ch'ant in su cursu de Nùgoro est serrada e serrada est sa buteca de bestes pro pitzinno minores chi ant apertu dae pacu tempus suta domo issoro. Sos frades non sunt a tretu de poder traballare comente a su solitu. Semper isserrados in domo, o nessi gai paret, non si bident prus in ziru. Isetant, che i sos àteros parentes de sos presoneris, notissias dae su fronte de sos bandidos.

Sa zustissia nche l'at acabada cun sos rastrellamentos chi perunu resultadu ant dadu. Paret chi apent abandonadu su fronte de campos e montes e non s'intendent prus in ziru. Su fatu est chi dae su cumandu de Nùgoro est moghidu un'ateru ordine, cussu de cambiare tatica e de indagare a sa muda, discretos, punterande sas pessones suspetas chene lu dare a bider. Est unu traballu prus passentziosu, prus istentosu, ma podet dare frutos prus bundantes. Ispertuddant cada atu e cada moghimentu de zente chi ischint podet èsser in mesu a secuestros e bardanas; zente conota pro sas malafatas de tempos colados, chi est possibile non nch'apent pèrdidu sas trassas che i su mariane.

E gai unu bortaedie ponent sas manetas a tres durgalesos, innossentes che i sa Maria, pro caridade, ma in tantis a Thilipu e Grabielle Pastis, paris cun un'àteru, Malcu de Tzori, nche los cravant a galera, a Badu de Carros. Dae sos zornales non s'est mai cumpresu ite b'intrant in su secuestro de Pascualba. Pro como sunt petzi sospetados. Fintzas su tempus cumplotat contra sos presoneris. Est fritu e non paret chi su tempus diet cambiare in breve. Sos montes sunt cuzicados de nibe e àteru nibe s'intendet in sa àgheras. Sos addobios cun sos bandidos diventant prus difitziles e su disisperu de sos familiares in isetu non fachtet che aumentare. Sos de Rosas s'iscambiant sa imbassias cun sos chi ant in manos sa pitzinna per mesu de sos zornales, declarande craru e tundu chi sunt dispostos e prontos a pacare su riscatu a cundizione chi su pacamentu e sa liberassione si facant in su matessi mamentu, ca sunt a tretu de non si fidare prus de nemos, a pustis chi unas cantas telefonadas, de pessones diferentes; non lis garantint prus cun chie sunt tratande. Su dinare l'ant buscadu, sende chi a issos puru, su zuze lis at blocadu sos benes.

Sos àteros familiares de sos presoneris suint a lamenta e disisperu, e a sas lamentas e a su disisperu lis rispundet su mutricore biancu de su nibe chi suzicat sas chimas de su Montiferru, de sa Marghine e de su Zennarzentu. A cussu s'azunghet su mudighine de sos bandidos chi parent isparidos in su nudda.

Zuane est una chida traballande tranchillu e serenu. Sa cosa nche li paret ismenthada e no li secat su bonumore mancu sas dimandas de s'abocadu chi lu bisitat belle e cada sero in su motel, cando paris si bufant una tassa de su solitu cannonau.

Nch'est colada una chida e non b'est prus pessande, cando unu manzanu, su 19 de ghenarju, sende in domo, intendet su telefono sonande. Lu lassat unu bellu tretu e a pustis pesat sa corredda. A su prontu nche l'essit:

- Atzidente! - e la finit in cue.

Sunt issos. Ma sa dimanda: chi est? Non la podet trattenner.

Sa muzere, chi est a serente li dimandat:

- Chi est?

Zuane tapat sa corredda e li rispundet.

- Un amicu chi non m'isetabo. - E in cussu mamentu s'abizat de su perìculu chi l'est rughende. Si rispundet issa, fint istados arguais. Narat chi est presente!

Sa solita boche, sa solita pessone e li fissat un'àteru adòbiu.

Su sero matessi depet mogher a sas chimbe e dae Fonne, sa bidida de sa muzere. Sa bia non est meda diferente dae sas de in artis, petzi chi est uguale a sa de su secundu ziru ma a s'imbesse: Fonne, Su passu de Caravai, su pradu de Orgosolo, Uliana e Nùgoro.

Totu su restu est uguale: sa màchina, sas paràgulas in suspu e su sinzale de firmada. Depiant esser bene informados pro ischire chi sa die li tocabat de reposu e no at de andare a ufissiu.

Si sichit a lègher su zornale e tante si pessat chi s'adòbiu, sende chi podet èsser in cada tretu dae Fonne a Orgosolo, depet capitarr a curtzu a custa bidida. Su fatu chi una borta l'ant firmadu cara a cara de Orune lu cumbinchet chi, custa borta, non podet èsser che cara a Orgosolo, in modu chi, in pessu lu lassant, potant torrare a bidida tranchillos che papa. Custu cheeat nàrrer chi est zente, chi si puru esseret ischidu su chi est fachende, est zente noba in s'arte; comente l'at naradu Riori, noba peroe chi at cussideradu totu. Una borta in bidida nemos los podet controllare e si est zente chi conoschet e los imbenit in tzilleri sunt capassos chi lu cumbidant chene perunu fastizu.

Pacu in artis de mesudie mutit s'abocadu a s'istùdiu. Lu buscat ca est in pessu ghirande da una udièntzia

- Mi facat acatare sa màchina in Fonne, in su caminu ube current su palu e a sa matessi ora.

- Ite nobas b'at?

- Nudda. Si preocupet de mi fàcher aer sa betura ube l'apo naradu.

- Miret non facat brullas. Est periculosu.

- Isco su chi so fachende. Isse s'incuret de sa betura. Pro su restu nos bidimus cras.

- S'est gai, andat bene. Diet cara ...

Cando si sunt prandende, Zuane proponet a sa muzere de andare a bisitare sos socros in Fonne. Ischit chi issa a tale invitu non narat mai chi no. Peroe li dimandat:

- Ite bisonzu b'as?

- Perunu bisonzu, petzi sa gana de bider sos amicos e a compare.

- S'est gai. Ma no at a esser periculosu cun custos caminos astragados?

- Non credo; bi so abituadu; at a bastare un'azicu de prudèntzia.

- E meda nos tratenimus?

- Totu su sero e ghiramus a pustis chena.

- S'est gai andat bene.

A s'arribada a Fonne a s'ispessada, su socru li fachet festa. Como at cun chie faveddare de sos secuestros de cussas dies coladas. Non si podet prus essire a monte o

a badde ca in totube b'at zustissia e como in burghesu puru, bestidos de pastores, de piscadores, de massajos. E faveddant in sardu, ca in ambas armas b'at sardos chi faveddant che cristianos. Unu non si podet mògher ca los bidet ispuntare dae cada locu, dae sas matas, dae palas de sos chercos, dae sas rocas. Zuanne cun asiu l'ispiegat chi cussu estit su traballu issoro e chi nessi como si fachent cumprènder faveddande ladinu.

- Corfos de balla! Semper zustissia est - contat su betzu - e non ti podes fidare prus de nudda e de nemos.

Su socru at gana de sichire su negòssiu, ma Zuanne at presse de essire e pro l'isviare li dimandat nobas de sos amicos, chi issu puru conoschet e chi in carchi tzillari cravados nche dent esser. Li narat chi cheret andare a lo bider, ca est dae meda chene colare in Fonne. Chi non s'esserent ispantados si ghirabat a tardu.

Saludat e essit. Ponet in motu e a bellu a bellu nch'essit dae biddu e firmat ube est securu de acatare sa A112. E l'acatat. Chie nche l'at zuta non l'ischit e mai l'at a ischire. Mistèriu de s'abocadu. Non b'at pessadu in antis, ma in cussu mamentu si rendet contu chi nessi un'àteru est a su corrente de su chi issu est fachende, chi est s'emissàriu de sos Toniutti. Petzi s'abocadu ischit chie est custa pessone, ma diat èsser inutile a li ponner dimandas, sa risposta diat èsser una ebia: amicos e dae cue non lu diat bocareu. E sos amicos de un'abocadu sunt tantos, cussos beros e cussos chi ant òbricos cun isse. Est normale o gai li paeat in cussu mamentu.

Firmat sa sua in palas de sa A112. Custa est aperta e su motore galu caente. Si badiat a fùrriu suspetosu. Nemos. Non s'intendet anima, petzi un'ala de bentu a frùschios intro sas chimas nigheddas de sos chercos. In artu si bidet su biancore de sas puntas de Correboe.

Si controllat sa betura: totu a postu: bi su sas lamias prenas de benzina e s'ampulla de su cannonau, ma custa borta mesu istapada. Ponet in motu e cumintzat a s'istresiare dae Fonne. Est note e iscuru. Su chelu apalatu cuzicat sos isteddos e unu bentu malinnu ispinghet sèmper a da in antis sas nues nigheddas.

A tretos sas nues s'aperint e lassant bier unu chelu garrigu de isteddos. Caminat a sa velozidade istabilida e in caminu non s'adobiat anima biba. Nemos si la sentit, si non est pro dovere, a si ponner in biazu cun cussu tempus. Mantende su volante cun una manu, cun s'atera chiricat s'ampulla. Aganzat cussu cannonau e non s'est firmadu a si securare si eat dry o rujonzu. Cun sas dentes istapat s'ampulla, mantenet su tapu cun una manu e a bruncu li dat una paja de sutzadas. Bi li cheriat a li caentare su corpus preservandelu dae su fritu de sa note.

Chene perunu intopu nche superat su passu de Caravai e imbucatu in su pradu de Orgosolo, in su caminu chi lu podet zucher a Intremontes o a biddu. Rucrat totu Pratobello e si nch'acatat a curtzu a nuraghe Gurthu. Dae cue non li restat che de falare a biddu. Isterret su bratzu e torrat a s'atacare a s'ampulla e via un'atera paja de sutzadas, ca su fritu l'est intrande in costas.

Cumintzat a nche bier a Nùgoro lampizande mudu e fritu. Orgosolo est a cudd'ala de sa costa, in pessu si bident, galu innedda, sas urtimas domos costruidas in cu caminu chi andat a Mamujada.

Est oramai a curtzu de sa cresiedda de santu Marcu. Pacas bortadas prus in gai diat èsser in intro de biddu.

Cando nch'est zai in palas de sa crèsia, a s'ispessada su sinzale, a manu destra, tres chimas de eliche firmadas cun predas. No at de s'isballiare. Depet firmare e firmat. Falat, si pompia a fùrriu. Nemos. Si l'isetabat in cussos tretos s'adobiu e dae cue non s'est fughidu. Torrat a sedere in machina e abbassiat si bridu. S'iscampiat dae sa bentanedda e belle a s'iscusiat nche narat: Viva Brigate Rosse.

- Morte Andreotti - li rispondet deretu una boche essinde dae s'iscuricore de sa note. Una pessone a cucutu faladu, cun unu impermeabile craru, longu, armadu de fusile li fachet atu de achirrare. Zuanne essit dae sa betura e deretu s'omine lu computat

sichidu. Abarrat ispantadu de custu atu de isfidùtzia, chi non promittit nudda de bonu. Ma non narat nudda.

A tzinnos e puntandeli su fusile in palas e in costas l'inditat s'iscala chi artziat a secus de sa cresiedda e galu prus a susu, fintzas a un'ispuntone de roca, in linea cun s'ischina de sos montes chi falande dae Orecarba partint su zassu in una badde e unu baddicru. A custa ala, belle in punta b'est santu Marcu. Cando nch'est in supra, galu ritzu, nche biet, de improntu, totu sa badde chi falat a Locoe, e abarrat ispantadu de bider a pacos passos sa bidda luchente, chi belle e belle si podet tocare cun sas manos. In pacos minutos podet arribare a sa domo de Riori e de Chichissu. Est cue suta, pacu prus in bassu de sas tupas de mudrecu, de eliche basos e de melaidone. Unu anticu caminu de carru falat dae sa crèsia imberghendesi in sas matas de sa flora agreste chi at picadu su postu de terrinos àteras bortas traballados cun aradu e cun marrone pro bi ghetare labore e fava.

Ma non li dat tempus de si godere sa panoria, ca su bandidu cucutadu, tocandelu cun su fusile l'òbricat a si sèder in una conca in mesu de sas rocas, chi reparat dae su bentu e dae su fritu.

- E tando azes detzisu de pacare o lassades chi l'ochidemas? - Sa solita boche, in italianu, sica e fritta che su marmaru. Non b'at de s'isballiare. Sunt issos; est cun issos chi depet trattare, non b'at periculu chi si ponzant in mesu corbos aganidos.

Non li dat risposta, comente chi si l'esseret pessande e issu puru rispondet chene dare a bider ite sentidos li zirant in conca e in coro. A sa fine nche li narat:

- Ello ite est totu custa presse, totu a una borta? Non bos sezis fatos intender in antis. Bos azes picadu fune longa e como, totu in unu, cherides currer? Tzertu chi sa famiglia cheret pacare, ma totu cussu dinare non bi l'at. Sos zornales los azes letos bois puru. Ischides in cale situassione s'acatant. - E torra un'atera pasada. Isetat una risposta chi nemos li dat. Chere negossiare, apèrrer un'àghidu a sa tratativa. Nudda. Peruna risposta. E tando sichit:

- Bois cheriet mùrghèr una baca assuta. Bos podet bastare medas prus pacu ... - Ma s'ateru ascurtat, serradu in un mutricore chene iscampu.

A Zuanne li benit una pessada: fortzis cherent chi siet issu a ispingher paràgula. Sichit su negossiu a sa sola, che s'esseret faveddande cun unu surdu.

- Sa familia est pronta a pacare deretu si bos acuntetades de batorchentos miliones. Non bos podet dare de prus.

- Abertelos chi si non pacant lu bocamus fora.

Sa mineta est tropu manna e Zuanne si nd'abizat. Sunt paragulas ispintas dae chie no ischit ite rispònder. Su mutricore de in antis li resurtat craru. No ischint mancu issos su chi cherwnt; sinzale malu. Cheret nàrrer chi non si sn postos de acordu in antis e sunt gai chene ischire su de fàcher. A Zuanne, omine de campu e de tzitade, non lia contant zusta e non lia podent cubare. Tropu espertu pro non s'abizare de s'imbarrazzu de su chi at de fronte.

Sinzale malu una mineta manna, ma puru sinzale de debilesa. No ant argumentos. Cherent fàcher sos fortes. A sa fortza s'oponet sa fortza. Si issos si fachent fortes, Zuanne non est a mancu e a cussu puntu si nde rendet contu. Bisonzat de lis risponder in taca e in taca li rispondet:

- Pro contu meu fachide comente cherides. Bos lu podides cocher fintzas a buddidu cun patata. No est cosa chi mi riguardat. Ischides chi non est de sa parentela mea. Ma pessade bene a su chi fachides ...

- Referi a sos familiare su negòssiu de ista note e pro deche minutos non ti mogas dae inoche, ca nois nos nch'istresiamus.

Non li narat ateru, ma chene lu cherret li dat a ischire chi non est a sa sola.

Zuanne s'abarrat firmu unu bellu tretu a oricras paradadas. E gai nch'intendet sa moghida de sa frasca in sas matas a cudd'ala de monte e si rendet contu chi sas pessones depent èsser nessi tres.

Cando s'abizat chi est solu, si pesat ritzu e s'istiriolat sos mermos de sas carena, chi si li sunt dorminde dae su fritu e dae s'istare firmu.

Falat a sa màchina e imbucatu su caminu in sensu contràriu a s'arribada. Si moghet a sa velozidade chi su caminu li cunsentit.

Como ischit cun chie at ite facher aberu: ricatadores nobadiles. Zente noba in cuss'arte e sunt de Orune e de Orgosolo. Una cumpannia istramba, difitzile de pònner a pare, ma no impossibile. Podent èsser pastores lacanarjos in Isalle o in Sa Serra de Nùgoro.

Li torrat a conca Riori e Pascale. Cussos nd'ischint duas prus de su diaulu. Ma ne unu ne àteru at sa corporatura de su chi l'istat de fronte e ne unu ne àteru est capassu de faveddare s'italianu gai bene. Si pesat chi fortzis b'at zente biddaresa. Ma non podent èsser sos amicos suos. Ant àteru tratu.

In pac'ora est in Fonne e in domo de sos socros. Sa mesa est zai aparizada e chenant totus in allegria. Nemos li dimandat a ube est andadau e a nemos at de rènder contos.

A pustis chena si preparant e moghent ca non b'at de s'istentare meda cun cussu àstragu chi est ghetande sa note.

Ghirant a Macumele e cun l'iscùsia de nche ponner sa machina in su garazu, nche mandat mama e fizu a susu e issu iserghet.

Cun s'abocadu fint restados de si bider s'in cras, ma arribadu a domo sua s'abizat chi l'est isetande. Mancu s'abocadu credet chi issu no esseret andadu a lu chircare a sa ghirada. No at apidu bisonzu mancu de sonare, ca, in pessu in da in antis de sa domo, sa janna s'est aperta.

- E tando comente est andada?
- E ite cheret, un'àteru addòbiu...
- Che su de s'àtera borta?
- Belle e gai.
- A ite no est coladu a domo in antis de mògher?
- A fàcher ite? Dinare non mi nde podiat dare. A mi nàrrer comente mi cumportare? Cussu l'isco chene mi lu nàrrer.

- Podiat cumìter un'impridèntzia.
- Non m'at chèrfidu coment emissàriu? E tando mi lasset fàcher.
- Non m'at galu naradu comente est andada. Itè cheriant?
- Dinare. Dinare, no; zustu!
- E cantos?
- Su pedidu.
- Totu?
- No ant naradu cantu. Dinare cherent o ochident su pitzocu.
- E isse ite at rispostu?
- Apo chircadu de tratare, ma non chistionabat.
- Chie?
- Sa boche. S'unicu chi at sèmpèr allegadu.
- E non l'at naradu cantu?
- No.

- E isse non nche podiat ghetare un'oferta? O non credet chi un'orfeta fata da isse non pesat? Bastat de nàrrer unu numeru; no una summa fora de resone, ma una summa possibile. Si l'aiant isminujada; los aiat postos a pessare. Chi non podent brullare meda cun isse. Sa paràgula sua contat cantu s'issoro.

- E ego s'oferta l'apo fata.
- E de cantu?
- De batorchentos miliones?
- Tando non mi so isballiadu. Ischia chi est capassu de tratare e persona capassa bi cheret, chi non apet e non mustret peruna timoria. E non ant rispostu nudda?

- Nudda. M'apo pessadu chi cussa summa si podiat ispingher e los cheriat pònner a sa prova. Como a bìder istamus. S'impressione mea est chi cherjant dinare, bastet chi siat. Si torrant a mutire non poto fàcher su ziru chenet lis zùcher carchi soddu. Nessi pro lu tastare.

- S'idea no est metzana e nos serbit pro balanzare tempus e cumintzare una tratativa seria. In antis de mògher a s'ateru ziru colet a inoche e su dinare b'at a èsser.

Dae su fronte de sos secuestros sas notissias sunt iscargas e de sos presoneris pacu si benit a ischire. Zos zornales contant de un'àteru secuestro andadu in bòdiu ca su presoneris s'est fughidu: est de unu pastore mortu, ca fortzis ischiat tropu de unu secuestro. Zuanne non si perdiat una puntata de cuss'istoria de bandidos e zustissia e de totu cheriat esser informadu.

Sos frades de Pascualba Rosas, sèmpar in zornale, imbiat un'àtera imbassiada a sos chi ant in manos sa pitzinna. No ant isetadu meda sa risposta. S'incras si benit a ischire chi che lis ant mantesu unu emissàriu; unu chi oramai si contat nugoresu ca in Nùgoro b'est dae medas annos e in Nùgoro at famiglia e traballu. Est Massiminu Amadori. At atzetadu de fàcher s'emissàriu pro s'amichèntzia chi lu ligat a sos de Rosas. E dae sa die de su secuestro non fachet che biizare, belle sèmpar in bòdiu o chene risultadu si non sunt sas imbassiada chi zuchet e batit.

Cando Zuanne benit a ischire in ube l'ant tentu, pacu prus o mancu a curtu a su puntu de s'adobiu suo cun sos bandidos suos, li benit a conca chi podet èsser possibile chi sos matessi sient sos autores de ambos secuestros.

Non est mai capitadu chi una banda aèret apidu in su matessi mamentu duos presoneris, ma cun sos tempos chi sunt currende, totu podt sùtzeder.

Petzi sos carabinieri, sende chi non cumparet, prus espertos de Zanne, escludent unu fatu simile.

Sos Rosas suint resessidos fintzas a cussu mamentu a mantèner secretu su numene de s'emissàriu issoro, ma cando pedint unu messazu a duas firmas, esit craru a totus chi sos emissàrios suint duos e chi unu l'ant mantesu. E sos zornalistas non b'ant postu meda a ispiegare su pro ite. Àteras borta est sutzessu. Sos bandidos cherent, ejas, liberare sa pitzinna in su mamentu chi incassant su riscatu, ma cherent puru èsser securos de non che rùgher in una pèrdica. Lassant sa pitzinna e si mantent a Massiminu pro lu liberare a comodu issoro, cando sunt securos chi sa zustissia non los podet pissichire. E sa muzere de Màssiminu, porrogada dae sos zornalistas non est capassa de mantèner su secretu. At bisonzu de s'isfogare e de chistionare, nessi per mesu de su zornale, cun su maridu.

Su fatu cheret nàrrer puru chi, sende chi ant arrestadu sos tres durgalesos, sas tratativas sunt sichidas e sut sichidas, puru, sende chi sos benes de sa familia sient blocados. Sos bandidos depent aer postu in contu chi calicunu podet èsser tentu, ma su dinare lis depet arribare de calesiat manera. Non s'ispantant pro cosas gai, antis, su dinare lu cherent prus che mai.

E sa gherra non de finire, sichit. Sete sunt sos presoneris in manos de bandidos, ca duos si l'ant in pessu iscampada: Eletrio Corda ca est resessidu a si difènder, Zoseppe Porcheddu ca, contat, s'est fughidu in pessu l'ant fidadu ecante a sa sola o male tentadu.

Prima die de frevarju tocat a un'àteru nugoresu, Prededdu Rujù. Lu cassant in palas de Sas Grassias, a ube est andadu a nche ghirare su fizu dae sa palestra. E custu puru est sutzessu sero sero.

Est in pessu essinde sae sa veturona sua, cando tres persones l'agantzant e nche lu cravant a fortza a intro de una 127. Non li sunt serbiat nen sas fortzas chi b'at postu pro si liberare nen sas boches. A intro nche l'ant cravadu e basta e sa 127 essit dae sa corte de Sas Grassias, picande a manu de susu, a intro de biddu.

Prus a tardu l'acatanta in Cumbentu, in su caminu betzu de Mughina. A sas boches, dae sa palestra nche sunt essidos sos atletas e deretu su fizu s'abizat de sa machina bodiat e de su babu chi est mancande. Curret a su telefono e informat sa

mama. E dae cussu mamentu un'atera famiglia est in pena. De Prededdu Ruju mancu s'umbra. Isparidu che i sos àteros e fortzis cubadu in Supramonte. Como sos presoneris sunt oto; oto familias in dolu e disisperu.

Sa gherriza de sa zustissia contra sos bandidos no at pasu; ma sa zustissia est cumbatende contra un'esertzitu de pupas, de umbras, contra un'inimicu invisibile, chi est in totube e in neddube.

SA LIBERASSIONE DE ROSAS - SU PRIMU ACONTU

Su vitzecapu de sa politzia, Ugo Macera, fachet una riunione a pustis s'àtera in cherta de pònner a pare unu pianu operativu chi benit renovadu de tretu in tretu e mezoradu sicunde sas nobas chi l'arribant.

Sa Criminalpol cun su maressallu Giovanni Pazzi non si nch'istat firma e sichit a indagare a sa muda, cumbinta coment'est chi a secus de sos ricatatores bi sient sos brigatistas. E sos carabos aumentant sa presèntzia issoro cun chentu òmines bènnidos dae Terramanna.

Non mancat chie narat chi no est su nùmeru chi importat. Mezus a àer zente prus preparada; si diant otènner bonos resultados, dae chie conoschet su territòriu e sa zente.

Sa zustissia non dormit e no abrandat sa chirca de sos oto presoneris de sos bandidos, mescamente in su de Uliana e de Orgòsolo pro acatare a Pietrinu Cicalò; in su de Mamujada pro Pasqualba Rosas, non trascurant nemancu sa piana de Santu Cosomo e su triangulu Mamujada Fonne Sarule.

Su sutacapu de sa pulitzia de Nùgoro, Ugo Macera, reunit in bidda totu sos ufiziales de s'Arma sua pro fàcher su suntu de su chi b'at sutzedende in sa provìntzia Nugoresa e in totu su territòriu isolanu.

Paret unu cussizu de gherra, de sa gherra chi sunt cumbatende contra s'inimicu invisibile, chi est resessidu a cumbinare, si poder narrer suta sos ocros issoro, s'urtime ricatu. Comente si siat chi l'aerent posta, belle e totu sas bias andant a Supramonte. Gai est pro su secuestro de Pascualba, gai pro cussu de Prededdu.

- Depimus afurriare totu custos zassos e punterare totu custos caminos chi moghent dae Nùgoro, dae Orgòsolo, dae Mamujada, Sarule, Gaboi e Fonne. Intro de custa zona bi depent esser nessi duos presoneris: cussos Nugoresos.

- Totu custos ricatos - li narat Zuanne Pazzi, su capu de sa Criminalpol - ant pro mene petzi unu iscopu: buscare dinare pro armas. Non m'apo a isballiare de meda, si mi pesso chi custos bandidos facant capu a unu moghimentu de brigatistas sardos, chi cherent bortulare s'ordine publicu e dìstruer s'Istadu.

- At a èsser. Non poto nàrrer chi nono, ma s'esperietàzia nos narat chi semus de fronte a bandas chi si moghent cadauna pro contu suo. Si si fit tratatu de brigatistas, de una organizzazione rivoluzionària, a su nàrrer tuo, carchi cosa de tzertu fimus bènnidos a l'ischire., Carchi màllia si fit aperta. Imbesses nudda. S'una operat chene s'incurare de s'àtera. Est zente chi cheret dinare, dinare e basta.

- E tando su fatu de Orune comente lu pones?

- Fint tentande e lis est andada male. Ego so de su parrere chi nessi duos presoneris sunt in custu triàngulu chi andat dae Gaboi a Sarule e serrat in Orgosolo. Custos caminos depimus tentare. Inoche depent colare. Issos puru ant bisonzu de mandicare e a bidda depent torrare a buscare provenda.

In sa carta inditat sas bias prus suspetas, ube andant postos sos blocos. In prus si depent collire totu sas notissias, sos murmutos de sa zente, nudda depeat èsser trascuradu e totu depet èsser esaminadu cun atensione. In antis o a pustis, carchi cosa nde depent tirare.

- Ego sico in s'andata mea - insistit Pazzi.

- Sichi, ma cussos rivoluzionarios tuos, nugoresos chi siant o de sas biddas a fùrriu, sunt canes chi apeddant e non mossent. Lo conoschimus bene. Nois serramus su chircu a fùrriu de sas biddas chi apo naradu.

E prus de custu non si podent narrer. S'arrestu de sos durgalesos paret chi no apet azudadu sa zustissia; mancun chi apent arrestadu zente surda e muda.

Sos carabos, pro parte issoro, nch'ant fatu bènner dae Terramanna una chentina de òmines pro si rafortzare, sende chi políticos, sindacalistas e sotziologos esserent

contràrios. Cando sa fortza pùblica est tropu in ziru, sa zente si sentit cuntrollada e totu imputada e non de collaborare, serrat sa buca pejus che mai. Zente paca, ma capassa bi cheret; zente chi conoscat sos loco e chi iscat fàcher su dovere suo. Cadaunu la pessat a modu suo.

In tantis non si podet intrare o essire dae sas biddas a ziru de su Zennarzentu. Non b'at caminu chi no apat su bloco de sos carabos o pulitziotos suos. In sos puntos prus ispessados s'acatant duas gazellas o duas camionetas e zente armada a un'ala e àtera de caminu. Sa zustissia s'est mezorada in sas trassas suas. Non l'acatas mai in su matessi puntu. S'ispostant. Isparint unu tempus e a pustis ti la torras a acatare in mesu caminu a s'ispessada. Cando non est firma, est zirande a pede o in betura in andatas e camineras, in guturos e in campos.

A sas oto paret isparia e est petzi pro si dare su càmbiu. In cussos mamentos est s'ora de colare chene èsser bidos.

Sapadu note, a banda de sas deche, una fiat 600 benit firmada da una patùllia arressa a s'intrada de Orgòsolo. Su carabu artziat sa palita, ma sa màchina non si firma dereta a s'alt e sichit a caminare fintzas a ube est sa vetura de sos àteros carabos e de improvisu atzelerat e si fughit. Unu de sa zustissia isparat parizos lampos de focu cun su mitra, ma sos de sa 600 non nde cherent s'intesa e sichint a cùrrer fughindesi. Sos carabos sedint in màchina e li ponent fatu. Mancu unu chilometro prus a susu, acatant sa 600 abandonada in cunetta, in palas de una curba. De sos chi fint in intro mancu trata. Ingurtidos dae s'iscuricore. Est inùtile de tentare de essire a los chircare. Detzidint de furdichinare in intro sa vetura. Nudda de ispetziale. B'at petzi su recatu chi cada pastore si picat in fatu cando tucat a cubile e si depet tratènner: pane, casu e sartiza.

Sa notissia serbit a azùngher pazinas a unu verbale miseru, chi si nono restat bòdiu de su totu, che i sos medas collidos in sa caserma de Nùgoro. Sa notissia arribat peri a Via Salaris, a sa sede de su cumissariadu. Est inibe chi unu notat comente cosa istramba totu cussu recatu in d una màchina, mescamente in cussos tempos chi perunu pastore s'istentat gai a longu in sos cubiles ispartinados in campos e montes, prus abandonados che mai. A sos indagadores de sa politzia, su fatu non lis sonat meda bene.

Detzidint de aumentare su controllu de cussos tretos chi calicunu conoschet peri bene. Janna de Ferru in tempos colados fit nota comente coladòrju de bestiàmene furadu. Est su passazu obricadu pro nche jumpare a sos cubadorjos de Supramonte.

Su lunis a pustis, a banda de sa una bi sutzedidit una isparatoria de bator bandidos contra a sos carabos de patùllia chi lis ponent s'alt. Rispondent isparande a bentallu cun sos mitras in s'iscuricore de su pianu; sos lampos de focu illughinant assustrosicos pro unu mamentu cussu zassu. Sos carotados isparint in su nigheddore de sa note, dassande in terra unu fusile Browing e unu pacu de cartuzas. S'iscuru lis favorit sa fuga. Sos carabos no ant modu de ischire si ant dassadu sinzas de sàmbene a indissiare. chi calicunu est fertu, Su fatu chi nch'aeret dassadu su fusile fachtet pessare chi esseret gai, ca si nono non si fit liberadu de unu fusile chi podet zùcher indissios de improntas de carchi manu, chi unu cras lu podent incriminare de àer isparadu in cussu conflitu,

Peri custa notissia arribat dae su Cumandu de sos Carabos a sa Questura de Nùgoro e Macera, ponende a banda su tipu de fusile automàticu e s'isparatòria de su lunis note, si rifiutat de crèder chi si tratet de bandas armadas de terroristas. Cun issu est de acordu peri su maressallu Salvatore Pilia chi conoschet bene custa zonas e sa mentalidade sarda. Cun Macera e totu sos aiutantes analizant fintzas a s'istrachitùdine chi los est derruende, su chi b'at sutzessu su sapadu e su lunis. Si cumbinchent chi ant carchi cosa in cumone. Ponent a pare sa simizàntzia intro de sos duos fatos. S'istudiant su zassu in totu sos aspetos de su terrinu, dae sas rocas a sos arbores, a sos tupales. S'esser su locu acurtzu a Orgòsolo e Mamujada, tropu acurtzu, diat fàcher pessare chi non bi potant èsser cubadorjos de bandidos. Custu pessu at cunsentidu chi Monte Lenardeddu non siat istadu galu furdichinadu.

Sos fatos relatados s'unu a pustis s'àteru in gai pacu tretu e tempus cumintzat a pònner sa zustissia in pessamentu malu. Las istudiant totu e detzidint de l'agruicare cun meda atenzione, ma cun pacos òmines, bene istruidos de sa zona, espertos de ricatos e mancamentos. In sa Questura sa note l'ant colada belle e in biancu. Badiande sas cartas preparant unu pianu pretzisu in cada minutalla pro rastrellare totu su locu dae Orgòsolo a Mamujada. Monte Lenardeddu artziat dae 500 metros, a paris cun sa bidde de Orgòsolo, fintzas a sos 700 de sas chimas prus artas, pro nche falare a Muzanau cara a s'àtera bidde. Non b'at mai coladu focos e su terrinu est abuscadu a istrintu istrintu dae arbores artos e tupales de cada casta; su terrinu est tortu e a pettorru, cun baddicros e rocas de granitu. Pezzi unu caminu betzu de carru oramai abandonadu dae meda tempus, li colat costa costa, artziande e falande cunforma a su terrinu.

A s'àtera ala, sa costa falat a Muzzanu ube s'isterrent sas binzas, chi ant picadu su postu de su padente.

Su martis a manzaneddu partint dae Nùgoro, Piras cun su CAIP de Abasanta. Una bintina de pessones in totu, ma totu bene espertos, capassos de afrontare fàdicu, gana e sìdiu.

Medas sos graduados, totu sunt sardos, ca de una batalla intro de sos sardos depent cumbàter. Dae Abasanta sunt arribados in oto a cumandu de su Brigadieri Cocco. Oto sardos de esperièntzia manna. Petzi sos capos ischint chi si moghent cun pacos e nudda indissios chi b'apat zente. Su ch'ischint est sùtile sùtile e trasparente che cartina de sigaretas.. Ant si e no s'unu pro chentu de probabilitides chi in cue esserent cubados bandidos e presoneris e, custu. petzi ca nemos podet pessare chi goi acurtzu a una bidde b'apat cubadorjos seguros. Oramai sa batuta est detzidida e bisonzat de operare bene. Sos politziotos depent perlustrare cada angrone, cada tupa. Non ant perunu puntu pretzisu de aberguare. Sos cumandantes detzint de furdichinare sa costa a susu de s'istradone cara a Orgosolo, punnande a sas chimas.

Sunt moghidas bator camionetas dae Nùgoro, a ses e mesa, diretas a Orgòsolo. Sa zente de sa bidde, oramai abesa a totu cussa forza, non s'ispantat prus, cando la bident colande oru oru de sa bidde e afilandesi a su de Mamujada. In sa curba de su Tataresu fachent sa firmada. Dassant sos mezos oru oru de su caminu e cumintzant su furdichinamentu aperindesi a bentallu in sa costa de su monte. Caminant a bellu e a ocros bene apertos. S'andadura beni rallentada dae sas tupas de buscalla. Sichint sa costas sèmper artziande a manu manca pro arribare a sa prima chima. Cando nche la bident acurtzu, sa mirada esperta de su maresallu Pilia nch'abirguat arrastos friscos de pessone in colada. Su Maressallu Serra, chi est andande prus a zosso, li fachet tzinnu de nd'àer bidu issu puru. Si negòssiant a zestros e si cumprudent deretu. Disponent sos òmine a modu chi in pac'ora siant a sa matessi artària, in sa matessi linia. Colande s'ordine dae òmine a òmine los abertint de bi pònner prus cautela manna e a sa muda. Su bentallu de sos òmines est dispostu a modu chi avantzande s'unu siat a craru a s'àteru. A manu a manu s'acurtziant a sa chima. In cussu tretu sos tupale sunt prus abuscados che in aterube.

Avantzant fricandesi a cussas tupas, in mesu de sa frasca umida. Su Masesallu Pilia nch'abirguat, pacu in gai, un'òmine chi l'est puntande su fusile.

- A terra! - Bochinat ispramadu.

Sos òmines non si fachent ripiter s'ordine. S'intendet una moghida; nche bient un'òmine prontu a isparare. Da unu mitra moghet unu bentallu de lampos de focu. Li rispondet un'òrulu de dolore, e s'arrastu de duos òmines in fuga.

Serra e Pilia s'acurtziant a mitra in manos a s'òmine rutu, chi deretu bochinat:

- No isparezas ... no isparezas .. non m'ochidezas! Oih chi so mortu!

- Tando ses tue su balente! – Li bochinat Pilia e fachet comente a l'iscùder sa culàrtzica de s'arma chi juchet in manos.

- No isparezas ... mortu so!.

Pilia reconoschet su bandidu Frantziscu Maria Serra de Bottida. Conoschèntzia antica de sa zustissia nugoresa. Est taglionadu galu como dae su 1966 e sa fotografia sua est sèmper in mustra in totu sos cumissariados de politzia e in totu sas istazione e cumandos de carabos de Sardinna. Intro su '52 e sos ùrtimos annos de su 70, est istadu imputadu, de fura, rapina e ricatos e sèmper l'at fata franca ca sas provas non fint mai bastantes. Acurtzu juchet su fusile e una pistola in sa tzinta. Non li cumbenit prus a los impreare.

Unos cantos poliziotos chircant de pònner fatu a sos chi si sunt fughidos, ma deretu s'abizant chi non nde balet sa penas, chi non los podent prus cassare. Cussos tupales lis fachent de alleados e issos current che lepore in mesu sa frasca e sartiande dae roca in roca cando nde benint obricados.

Sos àteros carabos ant sichidu a agrucare su locu, cando nche bident una tenda ruja e aranzu mesu aperta. Totu fachet pesare chi siet bòdia. Acurtziant e Pietrino Poma nche ghetat un'ocrada a intro. Pasqualba est inibe, ligada in manos e in pedes cun cordiolos, una benda nighedda li tapat sa buca. Sos ocros cuzicados dae tzerotos. Est tremendesi che canna.

- Semus de sa politzia; istet tranquilla sennorina – e ghetat boche chi nde siant informados sos cumandantes.

Current deretu sos maressallos Pilia, Serra e sos brigadieris Corongiu, Farris, Marongiu e Cocco. Liberant sa zovana e nche la bocant deretu a fora de sa tenda. In su mentras sos àteros nch'ant aberguadu un òmine, ligadu cun cadenas in manos e in pedes, unu cucutu in conca e in cara e cun sa buca tapada. Current a lu liberare. Est Massiminu. Est doichi dies ch'est in cue. Doichi dies a curtzu a sa tenda de Rosalba e s'unu non ischiat de s'àteru. Ambos sunt mortos de fritu e tremendesi che canna. Ant intesu sos lampos de focu, ma no ischint ite b'at sutzedende. Petzi su timinzu los mantent sizigos. Como non sunt capassos mancu de rider de cuntentesa de èsser liberos.

Dae sos radios portàtiles moghet deretu s'abisu a su Questore de Nùgoro, chi si ponet in presse in motu a nche jumpare a su locu de su cunflitu e de s'imbènnia in Lenardeddu.

Cun d una Alfaromeo Giulia mochet peri Giacomo Deiana, su capu de sa Mobile..Nche sunt belle e sa undichi. Unu agrucamentu impressidu totu a fùrriu lis cunsenti de imbènnar binocolos, "sacchi a pelo", carotas, cadenas, armas e munizioni: unu armamentàriu bundante, dinnu de bandidos dispostos a totu.

Nche picant a palas a Pasqualba e Massiminu fintzas a su caminu. Su fritu e s'istare tantu tempus firmos non lis permitit de si mògher cun sas ancas issoro, ca las juchent aborticadas e non ant peruna forza de camminare in pedes issoro. Informadu de sa liberazione de sa sorre, Bastiano Rosas, su frade, deretu si ponet in motu e l'acatat chi nche la sunt sedende in sa Giulia de su Questore Conigliaro a nche la ghirare a Nùgoro. Massiminu lu sedint in sa vettura de Giacomo Deiana.

Unu lampu, unu fulmine, unu focu e sa notissia s'isparghet in Nùgoro. Gianni Pititu, de sa redazione nugoresa de S'Unione Sarda, curret a informare sennor Antoni, su babu de Pasqualba, chi 56 dies est in isetu de torrare a abratzare sa fiza.

A caserma, in antis de sos presoneris, nche cromptet s'àteru frade e sa sorre de sa zovana, Grassiedda e Fabio e sos de Massimino, Frantziscu e Ottaviu. Nche sichit peri Don Fiorenzo, su retore de sas Gràssias chi paris cun Massimino at fatu de missu e lu cheriant mantènner a su postu de su cumpanzu. Su rispetu e s'istima chi l'at Massiminu l'ant permitidu e risparmiadu doichi dies de fritu e de pelea.

Sos istudentes de sas Mazistrales, a sas unichi, non sunt cherfidos torrare a intro de s'iscola, ma falant pinnicos a Via Salaris pro festare sa torrada de sa zovana.e nche suprit peri unu muntone de zente.

La fachent intrare a sos ufissios dae sa corte, ma si depet iscampiare a sa bentana a salutare e rènder grassias a su populadu chi at dadu cara a totu s'odissea sua e como l'acramat cuntenta ca est finidu totu su peleonzu.

A pustis de su pòrrogu rituale, in questura si fachtet festa a base de binu bonu chi nemos ischit chi l'at batidu. Pro sa die s'ismenticant de sos àteros ricatados, de sos cales non si nde conoschet galu sa sorte e non s'ischit si e cando ant a èsser libarados. Sos maressallos Pilia e Serra ant galu in mente sa de bator annos in antis in Locoe, in terras de Orgòsolo e galu si l'amentant sos azentes, comente non l'ant ismenticada sos orgolesos. Nch'aiant picadu s'inzenieri Carlo Tramaglino cando fit essinde dae su ristoru de Vanni Ruggiu in Montes. Fit s'iberru de su 75. Fama mala aiat dassu in cussu ristoru, pesadu a s'intrada de su Supramonte. Su Tèmpiu de Bacco lu mutiat su mere, ca l'aiant costruidu a forma de crèsia manna. Su bancu fit collocadu a su postu de s'altare. Pariat una crèsia cun d'una navada ebia. In su tzentru si pesabat sa ziminera cun su fumaiolu artu cantu su locale e cun bator bucas caentabat totu s'ambiente. A s'intrada, in sa bussola, fint impicados presutos e sartiza. Su ministru de su ritu juchiat barba e pilos longos, chi pariat un'anticu profeta e una fèmina fachiat de pitonessa chi pariat iscampada a s'isparida de sas ministras de sos tèmpios grecos. Cussu ricatu aiat custringu s'unu e s'àtera a si chircare mezus locu e prus tranquillu.

Sa chirca de s'inzenieri l'aiant afidada a Serra e Pilia chi in mancu una chida nde benint a capu. Sichinde sas trassas e sa mentalidade de sos orgolesos, imbrocant deretu una bona afilada. Perunu pastore, perunu bandidu o àtere si podiat permìter nen fura nen ricatu in terra orgolesa, chi no esseret zende de Orgòsolo matessi. In cue andaiat fata sa chirca e fata l'ant.. In sa bidida, in cussos tempos non b'aiat bandidos e, duncas, si depiat trattare de zente noba e, pro azunta, zovanos puru. Operaiant a sa muda, chene pònner in pede perunu agrucamentu cun d'unu trabellu de azentes.

A pustis de àer istudiadu su fàcher de medas pessones, mescamente de zovanos, su trabicu in monte e in bassura, puntant sos ocros supra unu grùstiu de pitzocos e supra sos zassos de Locoe e Goddorè. A custu puntu si chi l'ant posta in pedes una batuta. Da Via Salaris imbianc unas cantas patùllias. Non sichint totus su matessi caminu. Ca una fit iscassada in Badu de Mertzoro cara a Uliana e da inoche ant afurriadu dae levante a ponente totu su monte, artziandenche a Gorinnaru e Tumba Tumba. Sos àteros aiant picadu su caminu de Locoe, cara a Orgòsolo.

Cando fit cumintzadu s'agrucamentu, sos pastores, sos chi galu in cussos tretos aiant su cubile, sunt isbotados a bidida, pustis de àer murtu sa roba. Cun issos fit arribada sa nobidade de cussa operazione.

A sas undichi los aiant bocados a campu e deretu moghent sos lampos de focu dae sos mitras de bandidos e zustìssia. Unu nch est restadu fertu e unu fatu presoneri. Sos àteros sunt resesidos a si fughire, parande fronte a fusiladas. Sunt resessidos a s'imbergher in sos rocarjos e tupale de Monte Goddorè. Sende chi aiat unu territoriu mannu cantu mai, non si sunt azardados a essire in campu apertu.

Dae Nùgoro fit bènnida una ambulanza a nche picare a s'uspidale su fertu e s'àteru presoneri nche l'ant zutu a presone cun sa vetura de sa zustìssia chi fit mòghida a coa e sirenas allutas.

Nch'ant bocadu a campu s'inzenieri chi fit cubadu suta una tupa. Sos bandidos imbertos in cussas costas de monte non ant dadu perunu sinnale, ma non podiant fughire, ca totu sos caminos a fùrriu de Goddorè fint tentados dae patùllias de zustìssia chi lis fachiant sa posta. Isetabant su denote pro pòder essire dae cussu afurriamentu, Sa badde si fit caentada die die in su sole. A s'intrighinada falat sa neula e cuzicat totu su monte. Sas patùllias diventant inutilis e impotentes. Sos bandidos ant rucradu caminos e baddes aviandesila a su Supramonte, pro torrare a bidida carchi die a pustis, tranquillos che papa.

S'abocadu si jobiat cun Zuanne su jobia note de s'oto de refarju e acatat s'amicu arrennegagu che dimoni.

- Est istadu issu a informare sos zornalea chi su riscatu de Bennardu est de 400 chentos millones. Custa non mi la depiat cumbinare!
- No apo dadu peruna notìssia deo. Non so ribàmbiu a custu puntu.

- Tando est istada sa sennora Solinas e non si rendet contu de cale dannu causat a su fizu.

- Non credo. Mancu issa est gai tonta e non nd'est informada.

- No ischiat de sa proposta chi apo fatu a sos bandidos? Non s'abizat de s'isbàlliu chi at fatu?. Cussos s'ant a crèder picados in ziru. No est prus una proposta fata dae mene, non est una proposta bene pesada e calibrada secunde sas possibilidades de sa familia. Pro chi andet male, s'ant firmare a sa prima proposta. Sas tratativas s'ant a fàcher prus difitziles e peri deo no apo a èsser prus crètidu. Ant a pònner in duda cada cosa chi nare.

- Sennor Zuanne, sa cosa s'est ponende male, ma non la depimus bìder pejus de sa ch'est. Si si leghet bene su zornale si comprendet chi si tratat de una pessada de su zornalista locale chi pacu de nàrrer aiat.. Sa sennora Solinas pacu interessu at de fàcher ischire cale amontu ant pedidu o siat postu.

- Sa sennora ischiat e at contadu.

- L'ischiat eja, ma non de pretzisu. So istadu deo a li nàrrer de si preparare unos batorchentos millones. E peroe, dae custu a iscopiare totu a s'istampa bi nde cheret.. Si cussos non sunt tontos, ant a cumprènder chi si tratat de una isparada zornalistica. L'ant a pesare bene. Non ponzo a banda su chi est narande issu, non cheret nàrrer chi arribent a sas matessis concusiones.

Zuanne agantzat sa tassa sua e si nde bibet una bona ingurtia.

- Liu auguro, ma mi resessit a petorru a crèder siet gai. In antis sa notissia de su miliardu pedidu, como de s'amontu postu! In àteras paràgulas non poto crèder chi unu zornalista siat capassu de bìder s'imbeniente.

- Est difitzile a mime puru a lu crèder, ma ischit comente est: s'arte issoro: los ispinghet a fàcher custas isparadas, chi sunt comente sas previsiones de su tempus Letu at chi peri sa sennora lamentat de no acatare missos, a pustis de sa disaura de cussu mecànicu de Nùgoro? M'ispantat de prus sa mudesa issoro a pustis de 15 dies.

- Peri custu si leghet in sos zornales Si contant tropu cosas e si no est sa sennora Solinas, calicun'àtere contat.

- Mancu custu m'est artziadu a conca. Sunt petzi imbentos.. Sa sennora Solinas non ischit mancu chie est su missu.

- Su Cumisariadu ...

- Podet èsser ...

- Custu cheret nàrrer chi soe punteradu!

- Custu non lu poto trascurare. In cumissariadu ischint chi ses tue su missu e chi dae bindichi dies non ses essidu dae Macumele, mancu pro andare a Fonne.

A fines Zuanne si carmat e ordinat àteros duos cannonau. Su retardu de sos bandidos non lu ponet a pessare prus de su netzessàriu. B'at tropu zustissia allertada in bidde e in campu. Est periculosu a si mògher. Chi potat sutzeder a issu su ch'est imbentu a Massiminu, mancu lu ponet in contu.

Saludat s'abocadu e ghirat a domo sua ch'est proghende a ira.

In dies che i cussa, b'at de pessare chi non si mogat foza si sa zustissia non cheret. Bi nd'at in totube, sinzale chi in peruna cuestura sarda e in peruna caserma nemos est dormidu. Cada bidde, cada zassu est punteradu.

Su corfu chi ant dadu a sos bandidos aperit s'animu a s'ispera chi resessant a nch'essire bene dae totu custos ricatos.

Sende gai, in sas màllias tropu largas de custa rete chi at ghetadu sa zustissia, sos bandidos sichint a tèsser sas tramas issoro, remuninde dae sas butzacas de sos ricos nobales su dinare a sas butzacas issoro.

Zuanne ponet fatu, per mesu de sos zornales, a totu sos grimines chi bi sutzedint in Sardinna. Si fachtet gai una cultura in matèria e est curiosu de ischire comente andat a finire cussa istoria ube nch'ant bestidu a issu puru.

Elisabeth Besuch in su disisperu nigheddu, isetat nobas, ma sa fiza nch'est zai in Zermània. Nch'at pèrdidu cada ispera.

Jubanne Mossa, su missu de su primu tempus, at cunsinnadu sa prima rata de su riscatu. A pustis chi s'est bènnidu a ischire, ca est in totu sos zornale dae doichi die, su ch'ant cumbinadu a Massimino e sas minetas contra àteros missos., chi sunt istados peri iscutos, si negat de andare a torrare a jobiare sos bandidos, chi paret si nche siant bolados. Elisabeth, fachendela colare in mesu de sas màllias de sa zustissia, resessit a nche fàcher cròmper una litera a cussos bandidos diventados pantumas, ma non retzit risposta. Antis, pro risposta l'arribat sa boche chi su maridu l'ant mortu.

In custa andata, dies e dies, si sunt moghende sos carabos de Oviddè e de Siniscola. Los guidant òmines de esperièntzia, sos maressallos Pacini e Taziali. Sunt indissiadados òmines chi fintzas a tando pariant fora dae cada suspetu. Los sunt punterande dae meda tempus chene bocare a campu peruna prova.

Su deche de frevarju, a su solitu, Zuanne est in ufissiu leghendesu su zornale. B'at petzi notas de redatzione, in mancàntzia de àteras nobidades. Suntos contados de dies in antis, indissios imbentados in sas redatziones nugoresas.

Su manzanu, su missu de su motel, nche li batit una litera chi est pro issu, Sa curiosidade est manna e s'ispantu no est a mancu. Litera a ibe non nde l'arribat mai. Petzi carchi telefonada.

S'indissiu est iscritu cun lèteras de istampa e dae manu chi paret pacu esperta. L'aperit e controllat chi non b'apet àteru in intro. Aperit su fozu e leghet:

- Amicu istimadu

Peri chi non ti conosca, t'iscrivo pro ti rènder gràssias, ca isco chi ti ses interessande de sa sorte mea pro ti fàcher ischire su chi ti naro

1° Non mi nch'ant picadu pro mi còcher a buddiu, ma ca cheren dinare

2° Versade su dinare de su riscatu cuminzande su zi ru su 12 de custu mese e colande in custos caminos

Sa mòghida dae Bitti a sas sete in puntu colande in Nùgoro – Mamujada – Fonne – Lanusei; sa màchina chi siet una 126 bianca e apert s'imperiale e supra una tenda ruja. Mi racumando non bos presentezas chene dinare, si nono nde pacat sas curpas isse. Restant tales e cuales su sinzale e sas paraguas in suspu.

Ateru nudda. La torrat a lègher e pompiat su calendàriu.

- Bi semus! – Narat a issu matessi e si la ghetat a butzaca; petzi sa busta nch'imbolat a su pisheddu de su papiru. Si badiat a fùrriu suspetosu chi calicunu s'iat in cue a lu punterare. Peruna pessone in sa sala.

Picat su telefono e mutit s'abocadu. Est in s'Ufissiu suo pro mògher a Aristanis, ube at udièntzia a sas undichi.

- Preparat sa tasca, sos caddos sunt isseddados.

- In ube?

- In Bitti. A mògher a pusticras. Su puddericu est in s'istalla e istat bene.

- Nos bidimus custu sero.

A bortaedie, a tardu, si jobiant in su motel. S'abocadu leghet sa litera e la zirat e torrat a zirare in manos.

- E sa busta?-

- L'apo imbolada.

- *E bravo merlo!* Iscuset sa frase. E zuro chi no at mancu pompiadu da ube benit.

- Ite importu b'at?

- Podiat serbire. Serbit peri si non b'est. Cussos sunt cumbintos chi l'at mantesa.

- Deo l'apo imbolada.

- Issu l'at collida, Si lu diat contare, non lu diat crèder mancu su zuze. A d onzi modu s'iscritura est sa sua, est cussa de Bennardu. Su suntu est craru: liu ant detadu.

L'ant in locu assutu, dae su chi si nde tirat badiende su fozu, chi non presentat manzas de umidu; s'iscritura est in linia, chene peruna indetzisione. Est istada iscrita supra una mesa o, semper a cando, supra unu pianu tostu e deretu.

- Non m'at a nàrrer como ch'est in bidda?

- Ma non lu poto esclùder. Custu non provat ch'est galu bibu.

- Lu provat, lu provat. Si ponzat s'animu in pasu.
 - Podet èsser iscrita meda in antis de una possibile morte de su presoneri.
 - Nessi no in antis de s'urtimu addòbiu. Si l'ant iscrita a pustis, cheret nàrrer chi est galu bibu.
 - Comente fachtet a nd'èsser gai sicuru?
 - Pro su motivu chi sas paràgulas chi Bennardu iscrivet in su primu puntu, ne issu nen sos bandidos non si las ant imbentadas. Lias apo naradas deo in s'urtimu addòbiu.
 - Est a nàrrer ?
 - Chi liu apo naradu deo de si còcher a buddiu su ricatadu.e peri cun patata e custu ant riferidu a Bennardu e pro custu las ant contadas a Bennardu. Duncas, si cheriat una prova chi su zovanu est bibu, como l'at crara e lampizante.
 - Non mi nd'aiat faveddadu!
 - Non soe abituadu a contare cada tròddia.
 - Cumpresu. Custu mi ponet su coro in pasu e l'at a pònner a sennora Angela e sa socra. Per intantu sa litera narat àteras cosas. Custu pedidonzu de dinare chene nàrrer cantu, est comente a nàrrer chi isetant ebia de si bìder cosa in manos. Non tratant. Non ripitint sa primas propositas. Cherent soddu e basta. Custu nos cunsentit de giocare liberos, dassant fàcher a discretzione nostra. Semus nois chi istabilimus su tantu. In su matessi tempus mi preocupat: cherent dinare e non narant s'amontu. Cheret nàrrer chi dae s'àfariu nde cherent tirare totu su chi podent; no at importu cantu, bastet chi incassent carchi cosa e a pustis ... si Bennardu est galu bibu, como est in pericùlu prus che in antis. Custa duda issoro est fora de cada lozica.
 - Da ube los bocat totu custos indissios? O m'est cubande carchi cosa?
 - Dassa pèrder! S'arte ube nche la pones? B'at una cosa segura: ant gana de dinare e deretu. Custa borta non los podes jobiare a manos iscutas. Arriskas meda tue. Est una mineta sèria.
 - Non m'impressionant gai! Non si podent permìter de mi ghetare sas manos.
 - Deo dia èsser prus abistu. No est paràgula imbolada a su bentu, custu. Bennardu no iscrivet chi si la picant cun issu e totu, su chi mi dia isetare. Lu narat craru craru chi si la picant cun issu. Sa banza s'est bortulande. Est comente chi cherjant su dinare dae issu, chi siat issu a pacare, comente a nàrrer chi dae sa conoschèntzia chi at de sa familia dipendet su pacamentu.
 - Issu est tortu e tostorrudu. S'arte l'est fachende brulla mala.
 - Est s'esperientzia!
 - Brullande est? Pessat chi non iscant chi sos bene imbaradu? E dae zente chi contat e chi non diat isetare unu mamentu a li torrare su càmbiu.
 - E tando custas minetas?
 - Paràgulas, petzi paràgulas fughidas dae buca.
 - Paragùlas pesadas, istimadu Zuanne. Non ismentichet chi est zente bandidande, pronta a totu, capassa de cussu e àteru. Non si fidet. Deo non cherjo pònner in arriscu ne a issu ne a Bennardu.
 - Mancu deo mi cherjo pònner in arriscu. Restamus a s'acordu fatu? Cantu lis cheret dare?
 - Si l'ant picada cun comodù. Non cumprendo a ite depimus èsser impressidos nois. Una barantina bastant. S'ant a apachiare: su fracu de su dinare podet serbire a los torrare in taca. Issos perdent tempus? E nois puru. Non nos ponzemas presse. Firmos depimus èsser, ponende bi zudissiu. Mi dispiachet pro sas peleas de Bennardu. Si nos arrendimus deretos est unu arriscu peri pro issu.
 - Pro sa màchina comente fachimus?
 - No est fàtzile, ma lia faco acatare in Bitti a s'essida pro Lugula, aperta e cun sas craes in su cruscoto. A ite ora at a mògher?
 - A pustis prasu.
- Si saludant a su solitu e Zuanne ghirat a domo sua.

In su fronte carchi cosa est sutzessa. Palcino e Taziali resessint a pònner a pare sas provas netzessàrias pro incriminare duos frades se Buddusò. Mai incriminados in antis, istant in Oviddè belle e trinta annos. Totus lo conoschent pro su traballu onestu chi fachent.. Sunt pastores falados dae monte a sas pasturas in atas de mare e colant pro èsser Gadduresos. In cue su controllu non lu fachet sa zustissia, ma in antis bi pessant sos de su locu, capassos de s'azudare a pare, ma non atzetant chi nemos facat furas. Pro cussu in custos zassos non bi sutzedint malafatas.

Est sa dùmica de s'undichi de frevarju. Candos'isparghet sa boche chi los ant arrestados. Est che s'iscòpiu de una bomba. Los conoschiant pro èsser ospitales. Oramai los cussiderabant de su locu, de Oviddè. A pustis de tantos annos chi los aiant dassados de sesi, li dabant fidùtzia. Como s'arrestu ponet in subuzu totu sa comunidade; torrante a essire a campu sospetos e timorias.

S'operazione de sa zustissia est cumintzda dae cando s'est isparta sa boche de sa morte de Peter Rainer Besuch. Sa boche de sa morte curriat dae buca in buca, sos bandidos non si fachent intènder, non rispondent a sa litera de sa muzere, Jubanne Mossa non cheret prus fàcher su missu, totu fàchet cumprènder, chi a isetare est tempus perdidu. Sa zustissia si moghet in secretu pro no assustrare sa zente.

Isetat chi sos duos frades ghirent a domo issoro, chene s'abizare de nudda, e in cue los cassant. Los furdichinant totu in sa carena, in sa domo e a fùrriu; a pustis nche lo juchent a sa questura de Tempio e los ponent in manos de Lombardini.

Zuane intrat in pessamentu. Sa zustissia est operande in terras allargu dae Macumele. Sos zornales non nd'ant mai chistionadu, custu cheret nàrrer ch'est operande a sa muda, suta suta, cun discretzione forte. Sos zornalistas sèmper a cassa de notissias nobas benint a las ischire a s'ispessada.

Issu s'istudiat s'addòbiu chi depet fàcher. S'abizat chi no est meda diferente dae su primu. Petzi su puntu de sa mòghida est cambiadu. Antzis. Si benint a l'ischire Sechi e Petitu nde diant fàcher unu istudiu supra sas nobidades de su cumportamentu de sos bandidos e cun resone, diant arribare a nàrrer chi sa leba noba at imparadu meda dae s'iscola de Badu de Carros, ube ant conotu sos brigatistas. Sa zustissia de securu no s'est isballiada si est arribada a fàcher indàzines in terras finas a cussu mamentu trascuradas, comente sa bidde patzifica de Oviddè.

Li benit a mente su brigadieri Piras chi est s'alter ego de sos maressallos Pilia e Serra e s'iscuadrilla issoro. Zuane non est mai resessidu a cumprènder comente est punteradu. S'abocadu non at mai naradu chi nono, antzi l'at sèmper postu in contu. Sa notissia, da ube esseret chi esseret essida, sunt unu sinzale craru, nessi pro issu.

Como depiat mògher dae Bitti e cun parte de su dinare. Si lu diant firmare in caminu, cosa sèmper possibile, nche liu diant secuestrare totu, ca gai narat sa leze, sa matesi chi at blocadu sos bene de sos Toniutti. Su problema est sèriu ma no ischit ite imbentu bocare a campu. Si diat sutzèder, una telefonada comente aiat fatu dae Orgosolo, non diat serbire a nudda. In prus, pro arribare a Nùgoro non at che unu caminu. In s'agrucadorju pro Oniferi, immancabile jobiat sa patùllia de servitziu. Ube diat cubare su dinare pro non pònner a pessare sos carabos o sa politzia? Lassat chi bi pisset s'abocadu. Fachet su caminu a mente e si pessat chi pro andare a Bitti, s'ùnica est de colare dae Nùgoro e falare a Marreri e Isalle picande pro Lugula. Gai fortzis resessit a li fughire a su Brigadieri, chi de tzertu l'est punterande.

A pustis prasu, cun sa bestimenta de campanna, est prantu a mògher. A sa muzere narat ebia chi est andande a sa sienda. Colat a domo de s'abocadu e custu li cunsinnat una valiza. In s'agrucadorju pro Orune-Bitti, una vetura prus lestra lu superat e la firmant. In cussu momentu colat issu e la fachet franca. Nche colat in Via Lamarmora amisturandesi a su trabicu chi b'acatat; artziat a via Deffenu e dae cue a Prata Italia, ube fachet una pasada pro intrare a unu tzilleri a si bufare unu tzichete. Sedit in màchina e sichit per via Ballero, ma s'afilat in via Malta. Travessat totu Santupredu, su bichinadu betzu de Nùgoro e colande in cussos gutureddos, nche falat a sa Sulidai e da ibe a Marreri. Est cumbintu de l'àer torra fata franca, ma s'isballiat de meda. In sa

Sulidai b'at duas camionetas chi li rucrant su caminu. D'òbricu si firmat. Mancu a lu fàcher a posta, cando presentat sos papiros. si l'acurtzia su brigadieri.

- Salude, sennor Zuanne e comente mai a custas bandas?

- So andande a Siniscola a cuntratate pro una partida de foragiu pro su bestiàmene.

- Andat bene, sennor Zuanne, bido chi si preocupat sèmper de su besiàmene suo. – E incarcat sa boche supra “suo”. A Zuanne non nche li fughit cussa boche de pica in ziru. Fachet fintas de nudda e li rispondet:

- Facu su chi poto.

- Andet, andet e diet cara a sos addòbios metzanos. Tempos malos sunt custos.

- B'apo a dare cara, gràssias a issu pro s'abertèntzia.

Cussa favula li benit a costare cara, Como non podet isbortare da Isalle pro colare in Lugula. L'est de obricu de arribare a Siniscola in s'intentu de isbiare sos suspetos. In s'agrucadorju pro Lùgula difatis ja b'est s'àtera patùllia. Depet ripèter sa matesi fàvula. Si una minima possibilidade aiat de isbortare in cue, su brigadieri lia at brusiada. Su radiotelefono, Piras non lu juchet pro nudda e sa colada sua fit sinzolada e a pustis cunfirmada a su brigadieri. Cando torrat a mògher est obricadu a allestrare su passu si cheret arribare in tempus a Bitti. Su fatu chi su caminu, custa borta, est meda prus curtzu li fachet pessare chi in Bitti calicunu lu diat aberguare a sa colada. Arribat chi sas sete nche sunt bene coladas e s'iscuricore est faladu supra sa bidida. Como s'abizat de s'isballiu de àer fatu firmare s'àtera màchina in cussu tretu lu custringhet a traversare pinnica sa bidida. Nche l'essit unu frastimu, ma non podet fàcher àteru. Firmat a nche bestit a sa fiat 126 sa valiza e controlla chi siat totu a postu. Eja. b'est peri s'ampulla de su binu, ma no est su cannonau suo. Si nde bufat una bubulica. Tucat lestru prus de su solitu, ca depet traversare sa bidida e timet chi carchi cumpanzu lu firmet in prata. Nemos. Fora de bidida. si controllat s'orolozu e rallentat. At recuperadu su tempus pèrdidu.

Non si diat ispantare si s'addòbiu l'ant preparadu in su matessi locu de su primu. In paca ora superat s'agrucadorgiu de Orune. Si bidet totu sa bidida rilucente ispantosa, comente unu presèpiu chi bestit timoria e sa badde de Isalle afungada in su mare de un'iscuricore nigheddu che dimòniu in d una note chene luna. Sende chi caminu caminu b'est sa caserma de Santefisiu, locu ube combinare un addòbiu non mancat dae cue a Nùgoro. Nche la colat e est torra acurtzu a Nùgoro. Sas luches de sa bidida iscampiant e si cubant a cada bortada de caminu. e cando s'istichint in palas de sos èliche de su padente de Lardine e Noddule. Cando superat s'ùrtima curba in antis de sa bia dereta chi andat a sa ferrovia, li benit de pessare chi depet torrare a colare, mancari pro pacu tretu, intro sa Nùgoro pro falare a Uliana. Sinzale non nd'at galu bidu, ma non credet chi istent chene si fàcher acatare. S'artilleria de Pradu est illughinada e crara che si esseret die e unu faru mannu illughinat su butzidorju a manu manca de su caminu.

Superat sos binarios e li falat una guta cando bidet a manu manca sas frascas de èliche allineadas in cunetta. Sas veturas li colant a costazos currende e est cumbintu chi pacu a susu, supra su ponte o pacu a zosso, b'est sa camioneta de sa politzia.

Rallentat e si firmat carchi metro a susu. Dae su bridu abassiadu de s'isportellu narat a mesu boche sas paragulas in suspu. Deretu duos òmines armados e carotados essint dae s'iscuricore e li puntant sas armas indissiandeli sa caminera chi artziat a Mortusòmine.

Non li risponent nudda.

Zuanne agantzat sa valiza e in presse traversat su caminu afilende in s'andata bezza, ispintu dae sos òmine chi li puntant sas armas. Cando nche fachent unu bellu tretu e s'istresiant dae s'istradone, Zuanne ripitit sas paràgulas in suspu. Peruna risposta. Si pompiat a fùrriu. Nemos foras de sos duos òmines. In totube iscuru che in buca. Petzi s'intendent sos motores de sa màchinas chi colant in su caminu prus a susu, illughinande a tretos su terrinu de Mortusòmine cun lampizadas de faros. Pro unu

mamentu li bestit paguria. Nche podet èsser rutu in manos isballiadas, in manos de corbos. Ripitit sas paràgulas. Peruna risposta, petzi tzinnos de avanzare.

Si firma de improvisu.

- O zente, in oche b'at isbàlliu! Dazemi sa risposta chi mi depides, pro m'assicurare chi non b'at errore.

Sos duos òmine non li rispondent mancu como e issu si rifiutat de avanzare, mancarì cuddos chirchent de l'assustrare cun sas armas puntadas. Sa situatzione s'est fachende metzana. Zuanne si pompiat a fùrriu pro istudiare comente si cumportare. Non li dassant su tempus de bi pessare meda. Un'àteru òmine, meda prus artu de sos primos duos, bestidu cun bestimenta de mecànicu, essinde dae su bòdiu de s'iscuricore, si li parat de fronte e li dat sa risposta zusta. Zuanne s'apachiat, intendende una boche chi in cussu mamentu li paret amica. Sunt issos.

S'òmine cun d una carota nighedda chi li cuzicat totu sa cara, juchet sos guantos de lana e in mano unu fusile Garand a culàrtzica pinnicaiola, de cussos chi impreant sos pacadutistas.

Est sa Boche. Sa matessi jobiata in su pradu de Orune e a S. Marcu de Orgosolo. Sa matessi chi li telefonat. Est cartadu cun istivales molitares anfibios. Si l'acurtziat e l'atzinnat a si sèder..Sos àteros s'istresiant ecante. Zuanne s'est abiatu a s'iscuru e gai resessit a nch'abirguare àteros duos setzidos imbarados a sos mutzos de sos pinos..

- Ello tando, ite ant detzisu? – dimandat sa Boche.

- M'ant dadu 40 milione de bos porrire. Bos poto assicurare chi peri su restu est prontu, ma non disponent de unu francu in prus de su chi bos aio naradu.

Sa Boche est setzidu cun su fusile Garand imbaradu a una cossa e puntat in artu. Chene s'iscumpònner:

- Bidimu su dinare. Zuanne aperit sa valiza.

- Billos! Totu dinare netu. Perunu nùmeru de serie est istadu copiadu. Est totu dinare in carta e zai impreados. Lu podides varsare peri in banca tranquillos. Sunt baranta millones. Contalos. – Nche ghetat un'ocrada a fùrriu a bider sa reazione de sos àteros. Nde lis tocat pacu mancu de una dechina a cadaunu. S'abocadu non si fit isballiadu. Sunt nessi chimbe.

- No est netzessàriu. Nos fidamus. – Li rispondet sa boche.

- Contalos.

- Si pròpiu insistis, pro sa tranquillidade tua, ti cuntentamus deretu.

Sa Boche contat cussu de duas matzettas, e sichit contande sotu sa matzetas, badiande a sos cumpamzos de banda e dande cara a cada istripizu.

- Andat bene. – Narat a sa fine.

- Contalos! – Insistit Zuanne – Contalos totu!

- Bastat goi. Non pretendas tropu.

Zuanne cumprendet s'antifona. Non si cherent tratènner prus de gai e sa richiesta sua arriscat de diventare suspeta. Podiat pàrrer comente s'intentzione de los tratènner, de pèrder tempus, comente chi esseret isetande zente. Dat una mirada a sos àteros bandidos. Non si sunt trèmidos. Nemos dat a bider peruna mancànsia de passèntzia.

Como si bident bene e notat chi totus juchent sos guantos de lana e una carota chi lis cubat totu sa cara. No est possibile a nde conòscher unu. Sos chi sunt imbarados a sos trancos parent pupas. Sa Boche torrat a contare su dinare. B'acatat duchenta miza in prus e liu narat.

- L'ischia. Lo apo azuntos deo non bi nd'esserent in mancu.

- Andat bene. Nde chistiono cun sos àteros e bos amus a dare àteras istrutziones.per telefono.

- Bos amus a dare sos àteros in su mamentu chi nos torrades su presoneri. In su fratemus podides controllare si sunt netos. Los podides ispendere o versare in banca. Poto garantire chi peri sos àteros ant a èsser netos. – Sa Boche si pesat ritzu e atzinnat a Zuanne de si mògher a sa màchina. Caminant costazu a pare fintzas a sa vetura.

- Podes andare. Apo a fàcher totu su possibile pro cumbincher sos àteros a atzetare s'oferta bostra.. – Si firmat, dat borta e isparit in s'iscurocore de sa pineta. Ghirat a domo sua chene colare a domo de s'abocadu. Sa chena est pronta e sa muzere l'est isetande, cando si lu bidet intrande in sa janna. Si aiat istentadu tropu, sa muzere si fit preocupada e carchi suspetu li fit artziadu a conca. Chi non esseret sutzesu est su lu interessat prus e prus. A pustis chena, peri no essende gai tardu, no essiti a si fàcher sa solita partita a cartas. Preferit de s'abarrare cun sa famiglia. Istat totu s'ora mudu, ma sos familiares non ant ite li nàrrer. Est zai cosa bona chi b'esseret. Leghet e torrat lègher su zornale. No est serenu. Sos contos non li torrant. Si ripitit a mente totu sas tramas de sos fatos colados. Podet andare a Orgòsolo, ma l'iscartat deretu, ca no est cosa de pònner in arguai s'amicu Riori. Bi podet e non bi podet èsser in mesu. Nemos li bocat dae conca chi non l'apet punteradu in cada mamentu e chi non benzat pedichinadu dae tando in susu. Su brigadieri Piras no est òmine chi s'isbortet gai. De securu, a pustis de sa bruta figura fata a Orgòsolo, li ponet fatu passu passu e àteru e tantu fachet totu sa zustissia in su jocu de bandidos e carabos, chi sunt fachende chene l'àer prozetadu in antis Oramai nch'est in mesu. Dae cando est fachende su missu. Est issu chi nche la podet jùcher a tènner sos àteros. Est suta sos ocros de unos e de àteros, peri si non los bideret.

Non si sunt prus intesos cun PascaleTidu. In Macumele non b'est prus coladu. In ibe lu jobiabat a curtzu a s'istatzione, cando andabat a jùcher recatu a su fizu. B'at paritzos motivos su non l'àer bidu. Su tempus cun su nibe e cun totu cussu fritu. At fatu un'iberru chi est dae meda chene nde fàcher gai metzanu e a s'ispostare dae Orune cun cussas cunditziones non est fàtzile. Sos caminos sunt belle e sèmper astragados. Si no àteru custu est unu bonu motivu a si nch'abarrare in domo. Addòbiat su fizu, carchi borta, in su locale de sos ferrovieris. Cun issu no at relatziones, sende ch'est amicu de su babu. Petzi unu bona sera andat e benit. Si nd'istat a sa larga. Pertenet a un'àtera zeneratzione. Bestit sèmper a sa rustica peri cando est in bidda e batzicat petzi cun zente de s'ambiente suo. Non tratat mancu cunt paesanos suos istudentes, comente chi no aeret nudda de partire cun issos. Paret chi li peset sa secadura chi s'est formada intro de su mundu pastorale e sos intelletuales pro chi peri esserent de bidda sua. .

Medas bortas jobiat peri su teracu de Tidu. Un òmine antzianu, de sa Planarja. De bonos tratos e alligrone. Istat cun totus, ma comente totu sos pastores, de paràgulas misuradas.. Cando si jobiant in carchi tzilleri li dimandat de Pascale, ma totu si firmat in cue. Sa sienda de sos Tidos, in purtzione est peri sa sua. Est teracu pastore, ma securu de sesi. Su pacu bestiàmene chi nd'at pro paca, lu mantenet in sas matessi pasturas, peri si non nde godiat in totu de su frutu. Una die o àtera si podet pònner a banda e àer una sienda petzi sua. Evidente chi sa cundizione l'andat bene e si nch'abarrat cun Pascale ca est un'òmine de fidùtzia.

Est dae meda chene lu bider.ma non si la sentit de andare a lu chircare in Orune. A Pascale non interessat sa sorte de su ricatadu, ma cussa de Zuanne est àtera cosa. Si conoschent e tratant tropu bene, ma fortzis ischit de si pòder fidare de s'unu e de sos àteros, sos bandidos. Cun custos at bonas conoschèntzias, comente aiat naradu cudda die apustis de nadale. Zuanne amentat chi non si fit interessadu meda de su fizu in cubile, aiat petzi presse de ghirare a bidda. Zuanne cuminzat a pessare chi sa corporatura de su fizu de s'amicu non est meda diferente, antzis, li paret sa matessi de cusa de sa Boche de sos bandidos. A si procurare una tuta de mecànicu in bidda non bi cheret meda. In àteras paràgulas si sos contos non torrant, motivu nd'at. Si su fizu esseret in mesu de sos balentes non si diat ispantare meda. A sa fine de sos contos cun s'abocadu depet àer dèpidu pro sa defesa de su fizu chi est in presone e su soddu dae carchi banda lu depet bocare. Su ricatu est unu mèdiu, duncas ...Totu sos fileddos torrant a unu tzentru. Provas in manos non nd'at, petzi indissios, filos fines fines, ma sunt cussos chi tessent una trama sùtile sùtile chi non resessit a parpare; ma sunt cussas tramas chi regulant sos raportos intro de sa zente de campu e de

monte in sa Barbaza e in totu sa Sardinna Tzentrale. In mesu de cudda rete sùtile sùtile si moghet issu puru cun sa zente campagnola, e la cumprovat peri cando est in ufissiu. Est cumintzande a dudare de totus.

A sa fine de sos contos cun zente de cussa zenia at sèmper ite fàcher. Nde conoschet tropu e de cada calidade. Est zente chi non mancat mai in domo sua. Sa familia sua est galu una famiglia de pastores. Est zente chi at superadu onzi temporada, capassa de parare fronte a totu in sas tancas, sèmper prus desertas, de su de Nùgoro e fùrrios; capassa de pònner in pedes unu secuestro e de nde tirare balanzu mannu cun pacu arriscu.

Cussu chi est tratande issu li paret diferente dae sos àteros. A bortas li paret unu jocu e belle che jocu l'at picadu a printzipios. Non s'est incuradu de s'assecurare chi su ricatadu esseret bibu e a beru in manos de cussos bandidos chi tratant cun issu, de cussos a sos cales at dadu baranta miliones; comente chi custu esseret ebia dovere de sa familia o de s'abocadu. S'única prova chi at in manos est sa litera e s'abocadu at reconotu s'iscritura de su presoneri.

S'àtera preocupatzione li benit oje a mente: est su no aerent cuntratadu s'amontu de su riscatu. Sunt abarrados e si sunt firmados a sa proposta sua. Sinzale malu. O sos bandidos non ischint aberu cantu podent pedire o isetaiant chi su basista li lu àer ghetadu in ulicras, o b'at àteru, chi issu non resessit a cumprènder. E li benit torra a mente Pascale e su fizu. Unu e àteru sunt a tretu de si segherare e, fidandesi de issu, l'ant dassadu fàcher e ant picadu pro bona sa paràgula sua. Chi pro issos peri cussu podet andare bene.

Si esseret bera sa prima ipotesi, cheret nàrrer chi b'at àpidu medas trampaduras organizande sos addòbios, ca b'at medas ricatos in pedes e tropu zustissia isfaghinas in campu e in biddu, a tretu chi non b'at caminu chi si potat colare chene acatare una camioneta firma.

S'atera ipotesi est sa prus mala: cheret nàrrer chi sa sorte de su presoneri est sinzada riscatu o nono; cheret nàrrer chi, comente siat chi andet, benit mortu e sepultadu, ca a calicunu interessat sa morte sua. Si podet tratare de zente interesada a sos benes issoro prus che a su dinare: domo e terrinos. Mescamente custos interressant a pariza zente in custos tempos chi totu los chircant, mescas dae cando est iscopiada sa prima crise de sas indùstrias de Ottana e non de cue ebia, ca b'est in mesu peri Macumele.

S'àtera possibilidade est chi Bennardu apet conotu calicunu. Tando cheret nàrrer chi sa cundenna est segura.

Si s'afàriu andat gai, issu bi fachet sa figura de s'assu de bastos. Cumintzat a pessare chi sa bida de custu pitzoccu dipendet da issu, petzi dae s'abilidade sua. Non conoschet sa familia de issu, ca non la praticat. Peroe su modu de s'assicurare chi est bibu b'est e bisonzat de si mògher in cussa direzione. Andare a domo de sa familia mancu a bi pessare, sos zornalistas lu diant fàcher a sales. S'única est de si mògher per mesu de s'abocadu. Issu ischit comente mandare una imbassada a sos bandidos chi aerent dadu una prova sicura chi Bennardu est bibu chene peruna duda. Detzidit de andare s'incras a s'istùdiu de Perantoni

SA PROVA CHI BENNARDU EST BIBU

- Pessadu b'apo pessadu e lu cherjo fàcher in antis de lis dare àteru dinare. Su zornalista curripundente locale de La Nuova m'est amicu.
- Gai est? Tando cumprendo a ite non mancat mai sa forografia sua cando b'at protzessu. Est gai chi s'at fatu fama e sa fama rendet.
- In s'arte nostra non nde podes fàcher a mancu. Sa zente ti depet bìder in zornale si cheres chi ti chirchet. Deo faco su chi poto.
- Mi nde so abizadu mi nde so ...
- Dasset cùrrer trinta dies pro unu mese, no est custu su problema. A d onzi modu, cras faco publicare sa notìssia chi sa familia est disposta a pacare, ma cheret una prova sicura chi su fizu est bibu.
- Comente pessat de àer sa risposta?
- B'ant a pessare issos. Est probàbile chi la diant a issu. Si prepalet pro un'àteru ziru.
- Cun mecus problemas non bi nd'at. Oramai nche so in mesu, ma ...- e li contat sas dudas suas.
- No,no. No est chistione de benes, domos o terrinos chi siant. L'apo naradu chi cherent bendèr totu, ma non lu cherent dare pro nudda.
- Est pròpiu custu su problema. Los cherent custringher a dare dotu in debadas. Sos terrinos pro bi frabricare e sos terrinos pro pastura piachent a medas ...
- Li torro a nàrrer chi non bi credo chi siat cussu s'arcanu, peri chi custu siet sutzedende e chi medas amicos corales si siant dados a bìder pro su chi sunt: traitores e pistrincos. Pesset chi lis ant pedidu peri su trinta pro chentu pro lis fàcher prèstidu e no est mancadu chie si nch'est avanzadu a su chimbanta. Fortzis custos non cherent arriscare e si nche sunt avanzados a cussu tretu pro non lis chèrrer dare unu soddu. Como sunt gàrrigos de presorjos, a tretu chi no podent mancu bènder e totu pro sarbare sa bida a unu fizu,
- E si at conotu calicunu de sos bandidos?
- Tando sunt bestias, jenas sunt! Sa duda non est de iscartare. Si pròpiu goi sunt postas sas cosas e, peroe, nos dant provas securas chi est bibu, tando totu est in manos suas, in s'abilidade suas de nche lu torrare bibu. No isco comente at a fàcher e non lu cherjo ischire. So petzi securu chi s'at a ischire istripozare; su tratamentu chi at, sas conoschèntzias de famiglia li podent dare una manu forte.
- Tando issu ischit ...
- Deo no isco prus de cantu ischit o est bènnidu a ischire issu. Mi si presentant sas matesssi dudas. S'est gai, a chie podet àer conotu?
- Su basista, pro nde nàrrer una. E si custu est beru sunt arguais. Su basista est sèmper unu de sa biddu; est persone chi conoschet bene su ricatadu e si conoschent a pare
- Est a nàrrer, tando, chi su dinare chi lis apo dadu, sos ziros chi m'apo fatu sunt totu un imbròddiu!
- Podet èsser puru, ma non nde semus securos, antzis bat su mèdiu de la còncruer bene. Non podimus esclùder chi sa persone chi apet conotu sia persone mai bida nen conota dae Bennardu e, duncas, su l'àer bida in fatza no at perunu importu, ca petzi in d un incontru faza a faza la diat pòder reconòscher, cosa improbàbile.
- In tribunale, a nde nàrrer una ... si los cassant!
- Zustu. Sos bandidos ant totu su tempus de picare una detzisione e podet dare chi la pessent diversa dae nois..
- Per intantu non ant istabilidu s'amontu de su chi cherent . Ant atzetadu su chi lis apo propostu deo. E non si sunt dassados prus intènder.
- Issu at cunsinnadu 40 miliones?

- Sisse e lios apo fatos contare. Peruna paràgula in contràriu.
- Ite nde l'est pàssidu?
- Ite cheret chi li nare?
- Fint tranquillos? Pistichinzosos? Pressosos?
- E chie los at bidos? Sos duos chi mi sunt parados de fronte sunt abarrados mudos che croca. Mi indissiabant su caminu petzi tocandemi in palas cun sos fusiles..
- Fusiles?
- Nessi unu fit unu fusile; s'àteru, fortzis, un'arma prus potente cun caricadore longu. A bi pessare bene mi pariant ecante nerbosos. Aiant presse.
- Custu est sinzale malu: cheret nàrrer chi la cheriant secare in curtzu..
- Ma podet èsser chi aiant ebia presse de s'istresiare dae su caminu.
- Fint nerbosos comente?
- Ite nd'isco!
- E a pustis?
- Cando s'est presentada sa Boche si sunt istresiados ecante, ma no a tretu de no intènder su negòssiu. Si sunt apizicados a sos àrbores. A la nàrrer zusta si sunt sètzidos belle e in palas de sos truncos. In pessu los bidia. Ant mantesu sèmper sas armas in manos.
- Ma cantos fint?
- Nessi chimbe. Nessi chimbe pupas apo bidu.e contadu.
- Li gheto su solitu cannonau e preferit àteru?
- No, no, sèmper su matessi, mi piachet de prus.
- Piachet a mime puru.Mi so abituadu a su biancu. In antis preferia su ruju, mescamente cussu a ocru de prèdiche, cussu chi preferint sos nugoresos. Nde bibent unu càliche peromine. S'abocadu istat ritzu a s'abitudine de s'arte sua. In su faveddare fachet una pasada a cada frase, comente chi esseret in udièntzia. Torrat a dimandare:
- Chimbe pupas!. No est chi siat meda, ma carchi cosa cheret nàrrer. Amitinde chi calicunu siat istadu bidu in cara, mi paret difitzile chi sos àteros apant intenzione de fàcher a mancu de su riscatu. Arriscant meda e non credo chi cherjant pèrder sa partida. Abarrat semper sa duda pro su chi si sentit iscopertu! Ant a èsser sos cumpanzos a lu tentare. Como ant assazadu su dinare e issu l'ischit chi a pustis de su primu pratu, sa gana non minguat. Issu no at dadu a cumprènder nudda de sos negòssios nostros?
- Ite m'at picadu pro pitzinnu?
- Non det àer dimandadu notissias a sa zente chi conoschet?
- Liu poto assicurare.
- Diat èsser periculosu si petzi lu diant pessare. Si diant sospetare chi peri issu ischit chie sunt..
- Si sunt marianes betzos, deo non so naschidu eris.
- Cada artziada a conca podet èsser periculosa, in custas situatziones; peri si a dare a intenènder chi carchi cosa s'ischit podet èsser una mertze de baratare.
- Ite m'est proponende ricatu a ricatu?
- Podet èsser unu cumbeniu, ma diat èsser azardosu pro issu.
- E no, unu azardu de custa zenia non est pro mene.
- Tenet resone: a sa fine de sos conto a Bennardu non l'est parente.
- Mi dispiachet pro custu pitzocu chene esperièntzia in manos de zente abesa a cada malasorte; ma non diat pònner in arriscu sa bida.
- Mi paret zustu. Non nos restat che de isetare.
- A ite non bi provat issu?
- Custu nono. Non poto amisturare s'arte mea cun cussa de su politzio.
- E tando isetamus s'àteru sinnale.
- Non credo chi apent a istentare, jai chi impreant su telefono. Cras e totu b'at àer in totu sos zornales su pedinzu de sa prova.. M'informet puntuale. Non facat su chi l'artziat a conca.

Zuane isetat unu bellu tretu. Sos balentes non mutint. Est torradu a su traballu e a sa bida de cada die. Si carchi cosa noba l'ischit, li benit dae sos zornales e no est bona, ca no est cumpleta; s'abizat chi b'est sa manu de su zornalista chi l'acontzat pro fàcher torrare sos contos. S'arrestu de sos frades de Orgòsolo a un'ala e de sos Addis a s'àtera, li fachtet cumprènder chi su chirco a fùrriu de sos bandidos s'est istringhende. Sa possibilidade, chi peri sos balentes "suos" nche falent in sa rete, est prus sèria de cantu paret.

Non conoschet ne a Pascale e mancu su frade Nicolau. Galu prus pacu conoschet su de tres chi nch'est rutu in sa rete de su capitano Murja, chi est a ordine de su coronello Zappi.

Li benit de pessare chi essende orgolesos non podent che èsser amicos de Riori. Benit a ischire chi Pascale est in libertade provisoria, ca su tempus pro lu mantènnere in presone est iscadidu. Est imputadu de su ricatu de Juane Sias e at una cundenna de 19 annos in pendèntzia. No est naradu chi non lia cunfirmat in su protzesu de apellu, sende chi Pascale est traballande in d unu tzilleri de sa bidda trancuillu. Narat chi est innossente, cosa chi podet èsser bera. Su frade Nicolau, est lavagista de veturas in sa sienda rezionale de trasportos publicos. L'ant assoltu dae s'imputu de àer partecipadu in Varese, in Terramanna, a su ricatu de Emanuele Riboli. L'est abarrada petzi sa difida e su suspetu de sa Politzia. Pro cussu sunt sèmper punterados dae su capu de s'iscuadra mobile de Nùgoro, Giacomo Deiana..

Zuane timet chi no arrestent peri a Riori. Li dia bènnere a mancare un'imbaru forte. Si li diat mancare issu, sa situatzione sua, in sa faina de missu, nde diat abarrare indebilitada, mescamente como chi li serbit de prus e prus.

A sos frades de Orgòsolo lis est andata bene ca sos indissios postos a pare dae Zappi e Deiana non sunt bastantes pro allonghiare sa presonia. Los at liberados dae s'imputu Giovanni Maria Serra, chi est sèmper in uspidale, a pustis chi l'ant fertu in monte Lenardeddu. Sos imputados de su ricatu de Pasqualba Rosas peri cun sos arrestados sunt prus de una dechina.

Zappi est sèmper ponende fatu a su ricatu de su tedescu, chi mortu, oramai, est cussideradu. Est in cherta de provas contra sos frades Addis, a sos cales su zuze de Tèmpio at cunfirmadu s'arrestu. Emma Bussi non s'est galu arresa de su totu. Sa boche sua sonat peri dae Maranello e pedit unu tzinnu dae sos balentes per mesu de sas pessones in Sardinna chi "issos" conoschent.. A sa jubilada sua s'aunite cussa de sos inzenieris de sa Ferrari de Maranello. Sos zornales ritint sa mutida de Sara pro su maridu Don Efisio. De issu sos zornales non nde faveddant prus nessi dae chimbanta dies.

Murja, Zappi e Deiana sichint a operare mudos mudos.

Sos bandidos si los intendent supra. Fortzant sos familiares de so ricatados a conrèver sos afàrios. Nch'ant pèrdidu sa passèntzia. A pustis de sas minetas a sos missos de Carta, su secuestro de Massiminu, ponent in campu totu su nerbosu cun Badore Pinna e Costantinu Pusceddu, su cumpanzu, ca si sunt presentados a manos iscutas a sos ricatadores de Pupo Troffa.

Custu annaghet pelea a Zuane. Sos bandidos ant firmadu sos missos pròpiu in su caminu de Orune, su matessi chi at fatu issu. Los ant firmados in sa contonera de Lardine, a una dechina de chilometri dae Nùgoro, dae ube issu at cunsinnadu sa prima parte de su riscatu pro Bennardu. "Sos balentes", a passèntzia pèrdida, ca no ant bidu dinare, ant ispozados e ligaos sos missos, pala contra a pala, cun cordiolos abandonandelos in campu apertu e solos. Male comente podent resesint a nch'arribare a s'istradone, ma su muru de sa tanca los firmat in cue. Una màchina colande non si firmat a sas boches issoro. Est sa timoria chi l'impedit de si firmare. Cussu zassu est famadu pro èsser terra de bandidos. Non bi colat, si podet nàrrer, anima biba e custu aumentat sa paguria de chie bi colat. Petzi sa Giulia de sa polizia, una mes'oreta a pustis nche los collit. Libidos, tremendesi de su fritu, nche los juchet a sa Questura de bia Salaris. Los bestint comente podent e los caentant cun tzichetes de Cognac. Su furdichinamentu,

deretu postu in pedes, acatat petzi sa 127 issoro guastada a tretu de non pònner prus in motu. Peri sas bestes sunt isparidas. Ingurtias che i sos bandidos in su padente de sa Serra.

Nche sunt bortulande sichida sa banza, pro non nàrrer chi nch'est totu in terra. Sas familias pedint debadas chi s'allarghet su chircu de sa zustissia chi est tentande cada caminu, cada coladorju. Pedint una firmada pro lis cunsentire de batire a fine sas tratativas, pacare sos riscatos e liberare sos presoneris. Sa guerra non cunsentit pasu.

Pietrino Cicalò nch'est ispèdidu in su bòdiu de padentes e tupales. Sas chircas sichint, ma tropu lentas. A Maria li falat una guta, cando benit a ischire cantu cherent pro liu torrare: unu miliardu, comente esseret cucuja.

Peri Zuanne benit a l'ischire e s'abizat chi issu puru s'est moghende in d unu rubarju. Sa situatzione sua e cussa de su ricatadu, a su cale fachet de missu, non est in cunditione mezus. Antzis, a paragone, est pejus puru.

Como s'est cumbintu chi su cumportamentu de sos bandidos suos est tale chi non b'at duda chi Bennardu at bidu calicunu, cando nche l'ant picadu. S'unicu imperò est de ischire si custu est pessone conota o nono. Li pariat chi essent zente de s'arte, ma a pustis de su negòssiu cun s'abocadu at un'àteru cumbinchimentu: cussa zente est a sa prima esperièntzia. Zente imparaiola, calicunu ebia at ideas craras. Sa Boche. Chi siant arribados a s'idea de baratare su ricatadu est cosa chi lu turmentat e non acatat pache.

A custu puntu s'amichèntzia cun Pascale e Riori l'est paca cosa. Li restat peroe un'àteru mediu: Pirro, amitinde chi l'aeret dadu cara. No est cosa fàtzile a liberare unu presoneri petzi fidandesi de una paràgula, ma no at àtera essida. Isetat dae die in dies una mutia. Su batordichi a manzanu de su mese de frevarju essit a si comporare sos zornales. Isetat de s'acatare s'imbassada cuncordada cun s'abocadu. E sa notissia b'est. Addirittura b'at un'articulu in tres colonnas. Fachet su suntu de duos meses de mancamentu. Su zornalista si nch'avantzat inditande ub'est possibile chi siet cubadu, sos zassos de sas operatziones de sa zustissia. Sos locos indissiadados sunt mannos, a puntu chi b'est totu sa Barbaza, dae su territòriu de Nùgoro, montes e baddes de Supramonte, dae Orgòsolo a Urtzullé, dae Uliana a Sarule. Totu terras malas a agrucare, in parte a foresta, in parte petzi rocas, ma ricas de coladorzos, de reparos, chi cunsentint de pessare de totu.

Non s'ispantat de atzapare: sa richiesta de sa prova chi su zovanu est bibu; b'est in ambos sos zornales sardos. Bene ispizicada in sa Nuova, sinnu chi l'at detada s'abocadu, prus lèpia e pacu cumbinta in Unione. Telefonat a s'abocadu:

- Est solu?
- Sisse, podet faveddare.
- Letos los at sos zornales?
- Sisse,
- Sa notissia l'at leta?
- La jucos suta sos ocros.
- A s'Unione chie l'at colada? Non nd'abamus negossiadu.
- Non si pichet pelea. Sunt istados sos familiares. Mezus gai, at a fàcher prus efetu.

Istet paradu. No ant a istentare a s'intènder.

- Prontu so prontu. Issu prepalet sa màchina. Probabile chi siet pro custu bortaedie.
- De acordu, ma cale? Sa prima o sa de duas e da ube?
- Pesso chi no at a essere innedda. Non mi dia ispantare si est in territòriu de Nùgoro. Las mantenzat prontas. Adiosu. – E serrat su telefono. B'at intradu zente a s'ufissiu. S'est fata isetare totu sa dies e su manzanu a pustis sa mutia.

Sa gana de chircare a Tidu l'est bènnida milli bortas., ma nde fachet a mancu. A fàcher carchi cosa, b'est sèmper pessande. Pro como est pretzisu a isetare sa risposta. Sa prima aperta de buca la depent fàcher issos. A pustis s'at a bìder. In antis tocat a issos a declare chi su zovanu est bibu. A pustis ...

Da meda non essit prus su bortaedie, a pusti de su traballu. Peri sa muzere, ispantada nde li dimandat nobas. Sa dimanda li paret, comente est, normale. Si nd'essit cun d una iscùsia. Si cumbinchet chi est fora dae totu s'afàriu e sa bida in familia andat a in antis

chene perunu malumore. Sonat su telefono, chi est cussu chi est isetande. Impessu illebiat sa correda, intendet crara sa Boche. Peruna duda, sunt issos e deretu lu cumprendet, cando l'ordinant:

- Sa moghida custu sero a sas chimbe, fachende custu biazu: Nùgoro, Orune, Bitti, Benettutti, Bono, Iskra, Nùgoro. Sa vetura siat sa matessi e gai sas paràgulas.- Deretu serrat.

Nessuna paràgula in prus. Perunu tzinnu. Si nd'ant picadu peroe de tempus a si detzìder. Nche sunt colados su 14 e su 15; petzi su 16 bortaedie sa mutida. Cheret nàrrer chi l'at pessada bene, comente l'aiat fatu cumprènder, sèmper sa Boche su sero de s'ùrtimu addòbiu. Una die lis podet èsser serbida pro istabilire ube si bìder e s'àtera pro acatare un'acordu. Li paret zai una prova e como liu depent cumprovere, chi su presoneri est bibu.

Peri s'abocadu non s'est isballiadu.

Perunu ispantu s'impreu de su telefono pro lu chircare. S'abizat chi medas cosas tarrant: regulares: sa mutia a sa duas de bortaedie; sa mòghida a sas chimbe: su ziru sèmper in sa matessi zona e Nùgoro comente puntu de riferimentu. Totu s'afàriu est a fùrriu de Nùgoro. Nessi in custu sos zornalistas non si sunt isballiados. Si l'ant fatu a pessamntu, ma petzi issu l'ischiat de tzertu.

Abisat sa muzere chi su bortaedie depet andare a Nùgoro e a in antis de issa mutit s'abocadu.

- Nos bidimus in Nùgoro custu bortaedie a sa chimbe, in su matesi locu. Puntuale! Mi nche sichit cun sa matessi¹²⁶. Andat bene?

- De accordu!. – E su negòssiu si serrat in cuche.

Li paret chi sa muzere non apet ite nàrrer. Si fachet una cosichedda in domo e derettu si bestit: sos matessi iscarpones e sa matessi bestimenta.

A sas bator e mesa est in su Motel Agip de Nùgoro bibendesi una tassa de binu. Nd'aprofitat pro si pompiare a fùrriu. Paca zente. In sas mesicheddas sas solitas cumbriculas discutende cun grandu interesau de baseball, un'isport in pessu intrande in sa panoria de sas atividades de sos zovanos. Ecante l'ispantat e lu ponet a pessare unu àteru grùstiu de pessones, duas bestidas de mecànicu e duos a sa campagnola, pastores de berbeches. Fachent finta de nudda, ma a unu che l'essit unu sinnu de ispantu. Petzi issu si nde podet abizare. Su pessu chi podent èsser sos chi depet addopare cussu sero l'artziat a conca. In s'iscuru, in palas de una tupa o suta una roca, chi los diat pòder conòscher? Si bortat pro non dare a bìder ch'est pompiande e iscambiat duas paràgula cun su tzillerarju, chi est serbinde zente noba. Chircat un'ispricu o unu bridu chi l'azudet a controllare, chene èsser bidu, sos moghimentos de cussa zente. Totus e bator juchent una tassa de birra in manos, ma non sunt bibende. Sunt a negòssiu a boche bassa. Su bridu de una pintura, dae su muru, li fachet in pesu de ispricu e li cunsenti de abirguare chi unu de sos mecànicos, dassat sa birra e essit, isparinde in su caminu.

- Bi semus! – Si pessat – Est andadu a telefonare.

Dat cara a s'orolozu. Li mancat unu quartu a sas chimbe. Torrat, a pustis de chimbe minutos su mecànicu. Bibent a un'ingurtia e essint. Lis ponet fatu dae su bridu e cheret ischire a ube afiletant; sas tendinas de sa janna de sos brido liu impedint. Aiat dadu chissai cantu pro ischire chie sunt, ma non si podet permìter de pònner dimandas.

Si pompiat s'orolozu, est in retardu a fronte de s'orariu chi l'ant impostu. Non si nde fachet unu problema. Podent peri isetare,

Est pro essire cando si bidet de fronte a Peleotti e deretu su brigadieri Piras. Fachet fintas de non lu bìder, ma non podet fàcher a mancu de rispònder a su saludu:

- Sa sorte cheret chi nos jobiemas sèmper, sennor Zuanne.

- Ite cheret chi nare: su mundu est minore e sos caminos s'agruant.

- Pessaia chi fit in biazu. Fortzis est tropu chito: issu preferit sa prima iscuricada.

- Cadaunu fachet su piachere suo, cando at de si pònner in biazu. Facat contu chi fipo totu su bortaedie traballande?

- It'est in presse? Non si la bibet una tassa. Custa borta cumbido deo.
- La collat pro un'àtera die. Apo zai bufadu. Como apo un'imperju in presse de fàcher.
- Andet, andet. A Nùgoro non si benit pro nudda. Non l'apo bidu sa màchina, it'est a pede?
- Brigadie', non det àer pompiadu bene. Billa, est cuche. E si non sa mea cussa de un'amicu non mi diat mancare.
- Non nde dudo: sos amicos non li mancant.
- Cadaunu at sos chi si meritat, brigadiè.
- Colat in Orgosolo custu sero?
- Podet dare, prus a tardu. Como apo ite fàcher in biddu. – Si pompiat s'orolozu. Malaichet su momentu chi l'at addobiadu. Non si podet fughire chene li dare cara. Isetat chi ordinet a bufare e deretu si fughit Sedit in vetura e in presse ch'est in s'ospitziu de sos betzos. Dae s'isprichitu de sa màchina nche biet in palas, bastante innedda una betura de carabos. Atzelerat e isbortat picande contramanu in Via Piave e a via Trento e torra contramanu ch'est in pac'ora in su Motel. Sèmper in presse che fùria arribat a su semaforo de via Mannironi e at sa fortuna de colare in antis chi iscatet su ruju. Isbortat a manca e s'est afilande in s'istradone chi torrat a Macumele. Unu corfu de fortuna li permitit de superare sa camioneta firma. Pròpiu a s'essida e deretu a su caminu pro Orune. Petzi tando dat un'ocrada a s'orolozu. At pèdidu unu quartu de ora. Non podet andare prus lestru, ca s'esperientzia li narat chi cae cue in gai, cada tretu est adatu pro un'addobiu.
- Intantis su brigadieri s'abizat, arribadu a prata Italia chi l'at semenadu. Dae cuche calesiat direzione est bona: A destra pro andare a Orgosolo, deretu pro Orune, pro Marreri e Siniscola, ma peri pro Uliana e Durgale e, torrande a traversare sa biddu e ponende fatu a sa tzirconvallazione sud, sèmper a Orgosolo o a Mamujada e Fonne e peri, dande borta a su Quadriviu, a Orune Bitti. In àteras paragulas, codiadu nche l'at e cun abilitade manna. E pro ite? Pro una tassa de birra chi mancu cheriat bufare.
- Ite fachimus su brigadieri?
- Ite cheres chi fachemas, Paleotti', andamus a nos firmare in s'agrucadorju pro Lùgula, a su solitu.
- In àteras paràgulas nos at torra fricadu?
- Nos l'at fata comente a duas cretauras.
- Comente? Comente a duos tontos?
- Gai, pròpiu gai, Paleò! Che a duos printzipiantes. Si sichimus goi finit chi nos mandant a dirizer su trabicu.
- Custu, brigadiere, lu semus zai fachende. In s'agrucadorju de Lùgula, cando nos bident, totus rallentant. Ca b'est su limite de velotzidade.
- Propiu gai e non ti podes dobare su gustu de una bella multa ca sunt currende tropu.
- Mezus gai, su brigadie'. Est beru chi s'istadu no incassat nudda; nessi cussos poveros mortales non nche ponent s'istipendiu. Intantis su cuberru nos pacat su matessi.
- Eja, cun su dinare de chie pacat sas tassas.
- Zustu. Si unu pacat sas tasas, non la depet pacare duas bortas:comente contribuente e comente contraventzionadu. Est una cosa zusta, ite li paret su brigadieri?
- Bido chi ses peri brulleri tue.
- Facu su chi poto. E custa a chie la sinzamus?
- Ponela binta a isssu,. Fricadu nos at.
- Semus duos a zero, su brigadieri!
- Non podimus bincher sèmper.
- Peri su biadu de babu naraiat gai.
- Sa gherra, peroe, la binchimus nois. Bi podes iscùmiter. No ant a èsser custos imbroddios a non fàcher pèrder.

Zuane, andande a bellu, si fachet sos contos: a note fata dia tèsser in Benettutti tucande a Bitti. Si cumbinchet chi in antis non lu podent firmare, b'at tropu luche. Chene mai superare sos 30 Km, sichit a andare. Si pompiat a palas: sos bidones de sa benzina bi sunt, s'ampulla de su binu nono. Zai no est mamentu de bufare e in su negòssiu cun issos, est pretzisu de èsser sincheru. Nche superat s'agruadorju de Benettutti e est afilende a Bitti. Nche colat Santèfisiu. Est in su Pradu de Orune e che lu superat. Orune l'est a destra cun sa luches de sos caminos zai allutas. Cucumache l'est a manca e in cuche nche bidet su sinzale. Si lu mirat ispantadu. Non bi podet crèder, est galu die, ma pacu de isballiare at. Su sinzale est cussu.

Firmat. No at mancu postu pede in terra e duos armados de fusile l'inditant una prata a un'ala de caminu e li fachent cumprènder de firmare in cuche e de lis pònner fatu.

Sartiant unu mureddu e lu fachent corcare suta una tupa, supra s'erba umida. Deretu sa Boche si li corcata a costazos.

- Pica, custa est sa prova chi Bennardu est bibu, - e in manos li ponet una còpia de La Nuova de sa die matessi. Supra su titulu sa firma de Bennardu. Est sa sua, tale e quale a cudda de sa litera. Cumprendet su pro ite s'addòbiu a cuss'ora: depiat lègher sa firma de su secuestradu. Borta su zornale chircande àteru. Nudda. Sa prova est cussa e basta.

- E pro s'amontu de su riscatu, ite azes detzisu?

- Su bonu semus de acordu. Su tostorrudu est su basista. L'amus a cumbìncher. Bae.

In su mamentu s'abizat chi sa Boche est cambiada. At faveddadu cun persone diferente: diversa in sa corporatura e in sa bestimenta. Sa tuta non est de mecànicu ma mimetica de sordadu, fortzis comporada in sas benda barata de s' E.I. o dae carchi militare chi l'at furada pro si fàcher carchi soddu in tempus de assutura. Unu passamontagna li cuzicat conca e cara; in manos guantos de gomma. Cun issu b'at àteras batos persones carotadas.

- Totu sa banda, foras che unu- si pessat e a boche arta lis narat: - no azes pessadu chi firmandebos in custu tretu azes cumitidu un'isballiu mannu?

- As resone, ma si ti diant firmare non liu contes. – Paret su cumintzu de unu negòssiu, Ma Zuane no at tempus de nàrrer àteru. Unu bandidu si l'acurtziat e puntandeli sas canna de su fusile in palas l'inditat su mureddu e sa vetura; a si mògher. Cando nch'est pro artziare, nche li bochinat:

- E non ti permitas de torrare a indagare. – Paràgulas chi no amitint risposta.

- Non so in cherta de nudda, ma si mi narades gai ...

E deretu intrat in màchina e moghet a sa banda de Bitti. S'at a fàcher un azicu de chilometri in prus.ma li paret zustu gai e tucat. Cando nch'est in mesu biddu, dat borta e pac'ora a pustis torrat a colare in su matessi locu. Su sinzale non b'est prus.

Li benit su nerbosu e atzèlerat prus de cantu est netzessàriu. Cussu abertimentu est unu sinnale craru e malu. Cheret nàrrer chi lu controllant e gai sunt in duos a lu kontrollare: issos e sa zustissia. Craru chi ischint de Pascale e de Riori. Ch'iscant peri àteras notissias? Petzi ponendeli fatu, àtera ispiegatzione non b'at. Ma cussu abisu cheret nàrrer peri àteras cosas. Chi non s'est isballiadu in s'aberguare chie e de ube podent èsser. O fortzis peri chi su presoneri est cundennadu? O ambas cosas?

Sichit a cùrrer a cantu su mezu li cunsentit. Depet negoziare cun s'abocadu. Est pretzisu de istudiare sa situatzione, pro arribare a bonos fines. Cheret àer ecante prus sicuresa de su ch'est fachende.

In s'agruadorju de Ottana detzidit. Essit dae s'istradone mannu a domo de Ermanno Boni. Ispantu s'annaghet a ispantu. At s'impreasione chi l'esseret isetande. Lu fachet sèder e li cumbidat unu tzichete de abradente bona. Nd'at bisonzu, siat pro su fritu de cussa die de frevarju, siat pro li calmare su nerbosu chi l'est bènnidu a pustis de s'addòbiu. Si pompiat a fùrriu. Sunt solos.

- So bènnidu ...

- Conta.

- Ischis chi est galu andande su ricatu de Toniutti ... - e dat un'ocrada a sa pessone chi at de fronte. – E deo nde so su missu.
- Negòssiat carmu.misurande sas paràgulas, pasande intro de una frase e s'àtera. Boni ascurtat a sa muda. Paret interessadu prus de cantu s'isetabat; chi cherjat ischire prus de cantu Zuanne cheret nàrrer e isetat chi sicut su contu. Li paret trancuillu e issu puru s'apachiat.
- So torrande dae s'ùrtimu ziru. Mi depiant dare sa prova chi su zovanu est galu bibu. – Boni sèmper a sa muda. – m'at fatu bider sa firma sua in su zornale de oje.. – Boni mudu, in isetu chi finat su contu. – So timende chi si nde cherjant liberare.
- Apo cumpresu. Est de custu chi ti cheres securare. E non ti ses isballiadu. Ischia chi cun tecus non si podet trampare. Sunt istados pacu abistos. Lu podiant ischirriare deretu. Sa lambidesa pro su dinare los at traitos.
- Ite mi cheres nàrrer?
- L'ischis meda bene. Non t'isetaint comente m'issu. Cando t'ant bidu e si sunt informados fit tardu. O si nono lu depiant fàcher a pustis de su primu addòbiu o pedire àteru missu. A pustis de su de duos non lu podiant prus fàcher. Tropu zente si fit impinnada.
- Non podes chistionare prus craru?
- Est gai. Est sutzessu cando nche lu fint picande, sedende in vetura. Su disisperu at fatu brulla metzana a su zovanu. At iscarotadu unu. Non l'at fatu a posta. Non credas ... Si fortzicabat che porcheddu cando lu sunt punghende.
- In àteras paràgulas, at firmadu sa cundenna sua.
- Ischis comente andant custa cosas. S'at bidu in cara chie fit.
- Tando cussu abisu cheret nàrrer chi ... - Zanne at como sa cunfirmade su chi suspetabat. Bennardu at bidu zente in cara e ...
- Iseta, non boles tropu. Chietu! As faveddadu cun àtere.
- Custu eja, ma ...
- Bidende ses? Pessant chi siant iscopertos e non nde podent èsser cuntentos.
- A ti la nàrrer zusta, non so bènnidu a ischire nudda, petzi suspetos,
- E ti paret pacu? Peri cussos pesant. Si b'at diferèentzia pesant de prus. Su fatu est chi como sunt cumpromittidos cun tecus. Ite ti sunt pàssidos?
- Paret chi non siant de acordu inter issos matessi, pro s'amontu de su riscatu. Su basista est su chi cheret de prus.
- Eh si, su basista! Custu zovanu, su basista, lu cheriat dare a mime. No apo atzetadu. Amus ritiutadu ca nd'amus un'àteru in manos. Como cumprendes pro ite so informadu de totu.
- Su basista est de Macumele ...
- Nde cheres ischire tropu. Est custu chi cheriat nàrrer cussu abertimentu.. A borta su ischire tropu est periculos.
- De issos non mi nd'importat nudda. Sas lanas issoro si las isorbant issos . Ischinde chie sunt, dia pòder intevènnere mezus pro sarbare su pitzocu.
- It'est chi podes fàcher tue pro su zovanu? Sa cundenna si l'at firmada de manos suas. Sa sorte at chèrfidu gai.
- No est gai. Unu rimèdiu s'acatat pro totu. Ischis chi poto garantire pro issu, pro lu fàcher abarrare a sa muda. B'at in prus chi nemos podet assicurare chi apet conotu su chi at bidu.
- De custu ti nde poto assicurare. Est sa zustissia sa de tìmer. Est capassa chi nche collit unu muntone de indissiadados e lios ponet suta sos ocros.
- Est beru, ma est sèmper possibile chi ...
- Chi?
- Si mi lu dant in manos cando lis do su restu, si l'apo in manos in antis chi colet in podere de sa zustissia, bi pesso deo a lu cunfessare bene e a li dare sos cussizos zustos. A fines, nd'at bidu in cara petzi unu.
- E cussu arrisicat s'ergàstulu!

- Su zovanu, a su contra, arriscat sa bida. Si pro una paràgula arrestant su chi at bidu in cara, abarrant fora, peroe, sos àteros. E custos non si nde labant sas manos. Non diat bastare pro li tapare sa buca?

- Non mi paret mala s'idea.

- Como bi so deo puru in mesu. Nde diat pèrder sa reputazione. Si m'andat male custu afàriu, no isco chie diat perdèr de prus. E tue custu piachere non mi lu podes negare.

- No est chi bi creda meda, ma si est pro ti cumpiàcher, intè, àrtzia in màchina. Andamus a chircare un'amicu duarchesu e nos fachimus acumpanzare a su cubile de Pirro de Oroteddi.

Binti minutos a pustis est in su cubile de Pirro cun Boni e su cumpanzu de Duarchi. Custu falat a primu dae sa màchina e s'acurtziat a sa domedda. Muti e deretu essit Pirro e l'invitat a intrare. Zuanne e Boni abarant fora e isetant unos cantos minutos chi los mutant.

Cando essit Pirro, s'acurtziat a sa màchina a lis nàrrer de intrare e torrat in palas deretu. Boni bocat sa pistola, una 7 e 65 e li garrigat su caricatore. Falande dae sa betura, nche l'essit, chene dare a bìder nudda:

- Non s'ischit mai. Non dia chèrrer chi non facat brulla,

Avantzant paris e intrant in sa domedda nighedda dae su fumu, illughinada in pessu dae sa frama de su focu e dae una candela de chera. Los invitat a si sèder in su mentras ch'est ghetande su binu e lis porrit manu manu sa tassa.

- S'amicu ti det àer naradu a ite semus in oche e nois ti diamus rènder gràssias si bi pones una paràgula bona. Zuanne pro parte sua ti assecurat chi si liu dazes in manos, ischit issu comente li cosire sa buca.

- Sa de Zuanne est una familia manna e si sunt picande un'ingàrrigu pesante. – Pasat, comente chi bi siet pessande. – A onzi modu si s'amicu tuo est securu de su chi est fachende, apo a bìder de isòrber sa chistione

Sos òmines si sunt apachiados. Tando Zuanne si la sentit de li rispònder:

- Isco su chi faco. Isco cale responsabilidade mi so picande a palas e cumprendo chi sa cosa est dilica. Peroe ... - e issu puru pasat in su nàrrer – Garanto ebia si su presoneri mi benit dadu in manos in antis chi lu porroghet sa zustìssia. Mi serbit tempus pro l'istruire in su chi depet e non depet nàrrer.

- Goi andat bene. – Secat in curtzu Pirro. – Amenta chi si sas cosas andant male, tue nde pacas cantu a issu.

- Isco su chi sos fachende e non mi ritiro.

- Abètilos chi issos puru su in arriscu mannu. Si su pitzinnu non mi lu torrant bibu, deo mi nch'esso lìmpiu e ant a èsser issos a nde pacare sas consecuentzias.

BENNARDU LIBERU

Su negòsiu est finidu. No ant àteru de si nàrrer. S'afàriu est concruidu. Zuanne acumpanzat s'amicu de Boni a Duarchi e Boni a Ottana. Ghirande s'isminujat sa chistione. L'aiat pessada bene. Aiat iscarotadu unu de sos ricatadores: custu fit e est su problema, ma un'iscorticu pro nche lu tirare bibu l'at acatadu e nd'est cuntentu. Est cuntentu peri, ca at cumpresu, chene peruna duda, chi Pascale e nen Riori in totu s'afàriu non nd'ant parte, si no est pro l'azudare a nch'essire bene. Custu l'apachiat su coro e nd'est prus cuntentu de onzi àtera cosa.

Est note manna e no b'at tempus pro andare a chircare s'abocadu. At petzi de acatare una bona iscusu pro sa muzere e non bi l'at chèfidu meda.

A primu manzanu, in pessu arribadu a s'ufissiu, accò sa telefonada de s'abocadu.

- E tando?

- Apo jocadu s'ischedina.

- Sempritze o a sistema?

- Sistema. Custa borta sistema securu. Ti la faco bìder custu sero.

A sero andat a lu chircare in ufissiu.

- Fache bìder s'est sa firma sua, no est fàtzile a l'imitare.

Dae su cadàssiu nche bocat una betede lente e la pompiat cantu a cantu.

- Est sa sua, non b'at duda. Garantidu chi no est copiada. Ite condizione ant postu?

- Cherent su restu.

- Cale restu?

- De su chi lis apo propositu deo. Sos 360 milione chi bi mancant.

- L'ant naradu craru?

- Mi l'ant fatu crumpènder.

- Si podet ischire comente est andada? Si detzidit a chistionare? M'est narande sas cosas a cantos e a biculos.

- Si issu mi sutaponet a unu pòrrogu, comente cheret chi li risponda?

- Beru. S'arte mi jocat de custu brullas metzanas. Contet.

Zuanne contat coment'est andada, in cada particolare chi Perantoni Bua cheret ischire.

- Non m'at contadu totu. Ite m'est cubande?

- Comente? Li so narande comente est andada.

- No. Sennor Zanne: unu sardu non nch'imbolat gai sas paràgulas. Su bandidu non s'at surbadu su poddiche. Cussu non fit unu suspetu; fit cosa segura. Issu at picadu informaciones in ziru, in sa familia, in campu, e sas cosas si benint a ischire. Cun chie nd'at chitionadu e ite est bènnidu a ischire?

Zuanne s'abizat chi non podet prus cubare totu. Li contat de sa bisita a Riori, ma li cubat cussa a Pascale Tidu. Non serbit a nudda e preferit a no nde atzinnare nemancu. Perantoni l'est amicu, ma sèmper a cando abocadu est. No apartenet a su matessi mundu de su cale Zuanne nde fachet galu parte. De sa bisita a Boni e cun issu a Pirro, mancu a nde faveddare.

- Como crumpendo, - li narat s'abocadu, - e issu l'ischiat bene. Su l'àer fatu presente chi sa bidda fit tropu acurtzu, at inchesu sa paguria de su bandidu. Como s'abertimentu est craru. Ma m'est cubande àteru. Cussideret chi sa bidda a curtu no fit un' isbàlliu, ma un'isseperu chi ant fatu a posta. Peri in cuche b'at àteros bandidos chi Riori podet conoscher. In prus dae cussu locu lis fit fàtzile a ghirare e a si la sarbare intrandesinche a unu tzilleri. Cheret nàrrer ch'est zente pratica, chi conochet sos locos. Mi benit a petorru a pessare chi sient totu de Orune. Su t'àer firmadu peri a curtu a Orgòsolo non est istadu de badas. So pessande chi siet una banda de pastores e nessi de sas duas biddas.. Podet essere zente chi at sa pastura a làcana e chi sunt pràticos peri de Nùgoro. In cuche est prus fàtzile a si jobiare, prus che in d unu bidditzolu de s'internu. L'at naradu

chi su basista no est de acordu, chi lu depent cumbìncher? Cheret nàrrer chi sa majoria at atzetadu sa proposta sua.

- A mime puru m'est pàsssidu gai.
- Mi preòcupat chi no apent cuntratadu s'amontu. Comente mai?
- Custu non liu apo dimandadu.
- De custu nde so securu. Est su l'àer atzetada chi mi dat peleas. Su basista at resone. Si pedit de prus e sos àteros si cuntentant de s'oferta tua, carchi cosa non zirat bene; no est crara. Si aiant minguadu sa prima richiesta issoro o si aiant a redopiadu sa proposta sua, dia essere prus trancuillu e totu fit istadu in sa norma. Aia àpidu una sicuresa mazore. Cussos cherent dinare, bastet chi siet, in càmbiu de su presoneri. Cherent tantu, nen de prus nen de mancu. Li cunsinnat su dinare e li torrant su presoneri. Carchi cosa non torrat. Non credo chi lu facant pro fàcher unu piachere a issu. Cherent soddu, pacu, malaitu, ma deretu, comente narant sos terramannesos. Chie nos garantit chi nos lu torrant bibu? Ch'est bibu, como l'ischimus, chi ti lu torrent est in duda. Est unu ricatu fora de norma.

Zuane s'abizat chi s'abocadu at belle e cumpresu, antzis at cumpresu totu (no est abocadu pro nudda), sa chistione est cussa, ma non cheret contare nen de Boni, nen de Pirro. A contare totu, de Boni e de Pirro, aiat àpidu azuntu dudas e anneos. Tando azardat sa carta de Riori:

- E chie li narat chi non bi siat in mesu Riori, non comente parte de sa banda, ma pro los àer chistionados e dadu assicuratziones?. Non m'est amicu pro nudda e in campu una amichèntzia contat e si rispettat.
- Non b'αιο dadu cara. Custu est possibile e m'auguro chi siet gai.
- Cudda ampulla de cannonau, finida nche l'at? – li narat Zuane pro isviare su negòssiu chi non l'est piachende in nudda.
- E chie bi fit pessande prus? Zai chi issu non l'at mancu tocada.
- Deo nono, ma ...
- L'aperimus deretu.- Andat a nche bocare a campus s'ampulla e a chircare su trastu pro l'apèrrer. Nde li ghetat una tassa e bibet issu puru.
- A cando s'àteru addòbiu?
- Non m'ant naradu nudda.
- Ma cando lu cherent su dinare? Prus bi pesso e prus mi paret fora de norma custu ricatu. So timende chi sient tentande de nde tirare su chi podent e chi a pustis non nos torrant su zovanu nen bibu nen mortu.
- Si l'ant mantesu in bida finas a eris?
- Custu est su probema. Lu podent àer mantesu, ma sa sorte sua l'ant zai detzisa.
- E tando?
- Nos la jocamus e bastat. In s'addobiada imbeniente, lis depet dimandare una cosa noba. Antzis. Lis depet nàrrer chi los pacat petzi si issu est presente. Semus a custu puntu. Soddu in càmbiu de su presoneri bibu. Si dat su dinare e non li torrant deretu a issu, adios, non lu bidimus prus. L'ochident. No amus àtera essida. Si insistint pro àer su soddu, si lis neghet e torret a propònner su càmbiu. Petzi goi amus una sicuresa. S'àtera possibilidade l'ischit?
- E diat èssèr?
- Lis facat cumprènder chi issu ischit chie sunt. Ponzat in campu totu sa potènzia sua. Est a nàrrer sa famiglia e totu sas conoschèntzia cun su parentadu chi at.
- Ma cale podere?
- L'iu apo naradu. Sa famiglia, su parentadu, sos conoschèntes, chi non sunt anzelos, sennor Zuane. Lis facat crèder chi est bènnidu a ischire chie sunt, e fortzis non m'isbàllio, e chi est bene imbaradu, bene sustentu dae zente chi no est a mancu de issos. Chi tochent su zovanu o a issu, no ant iscampu: custu depent crèder.
- E sos abertimentos issoro?
- Cosa zai intesa, intesa àteras bortas. Dia nàrrer chi la depia pònner in contu.
- Eh, no. Apo famiglia!

- Custu est beru, ma custu non li garantit nudda. Issu m'at relatadu de sos duos abertimentos e m'at peri naradu chi s'urtimu un'apizicadorju l'at. Non s'ismentichet chi a pustis de su primu addòbiu ant insistidu chi esseret abarradu missu. Cheret nàrrer chi ant cussideru mannu de isse. Li depo nàrrer chi a custu puntu si eliminant a Bennardu, issu est compritze.
- Comente diat èsser?
- La cussiderant unu de issos, sa zustìssia, cherjo nàrrer, peri non cherende, ma còmpritze, unu chi ischit e non cheret contare; chi bidet e ischit ma mantenet sa buca serrada. Sa compritzidade de sa mudesa. Pesso chi si sas cosas diant andare goi, non li diat cumbènner. Si rendet contu ite cheret nàrrer a ochìder un'òmine a sàmbene fritu? Ochìder un'òmine comente chi siet unu tilipirche?
- Zuane ascurtat a sa muda su resonamentu fungudu e sàpiu de s'abocadu. In parte sunt sa matessi cosas chi issu s'aiat naradu faveddande inter issu matessi. Non s'iseabat chi esseret arribadu a cussu puntu e cun resone. In àteras paràgulas si cumbinchet chi èsser abocadu non est unu nudda e non pro nudda est conotu in totu sa Sardinna. Non cheret peroe crarire su pianu suo e si limitat a nàrrer:
- Atzidente! Ah resone aberu. Custa non l'aio posta in contu. A onzi modu ...
- Est s'unica essida chi nos restat.
- -Andat bene. Lis pòenzo custu imperò. A càmbiu a pare. E si non diant atzetare?
- Atzetant, atzetant. Est s'interessu isoro. Est beru chi medas crimines restant non punidos: sunt de prus cussos chi benint bocados a campu. Si custu diat capitare, no apo a èsser deo a los difènder... dia essire contra a issos. Ca dia èsser deo a costazos de Toniutti in tribunale e no isco comente diat andare a finire. Si ti paret netzessàsiu, azunghebi peri custu. Non credo chi no iscant chi deo so fachende sas partes de sa familia.
- Non credo chi l'apent ismenticadu. E tando, comente restamus?
- Che a sèmper. Isetamus sa mòghida imbeniente. L'ant a mutire per telefono e at ischire ite cherent. Nos intendimus in antis de s'urtimu ziru.
- E su dinare?
- Cussu est prontu.
- S'abocadu torrat a prenare sas tassas. Bufant e si salutant.
- Su manzanu de su tres de martu, in ufissiu, retzit sa telefonada. Est sa Boche. No at bisonzu de si presentare. Oramai la conoschet. Sa solita. Su matessi italianu.
- Fache su ziru, moghende a sas chimbe de sero dae Nùgoro, Agrucadorzu de Oniferi, aggrucadorzu Benettutti Orune, Marreri, Uliana, Orgòsolo. Sa vetura una fiat 127 cun sa lampadina de intro alluta. De su restu non cambiat nudda.
- Si l'ant picada comoda. Binti dies dae s'urtima addobiada. Binti dies de patimentu pro su presoneri, binti dies de pelea pro sos familiares. Mutit deretu s'abocadu. Acatat sa muzere. Su maridu est in Nùgoro in tribunale. Muti sa muzere sua e li narat chi non ghirat a prànder. Detzidit de nche sichire s'abocadu in Nùgoro. Lu jobiat ch'est essinde dae s'udièntzia. Andant a s'istùdiu suo e l'informat de su ziru chi depet fàcher.
- Bene. Custu est s'urtimu. Bi cheret totu s'abilidade tua. S'ant picadu totu su tempus pro arribare a una detzisione. Su l'àer mutidu est sinzale bonu. L'ant pedidu dinare?
- Nono.
- Bi det àer carchi nodu de isorber galu. Ma ite? – E de improvisu li bochinat: - Cun chie at faveddadu in Ottana?
- Cun d un'amicu. – rispondet ispantadu.
- No det àer postu carchi pede in bòdiu?
- Non so unu pitzinnu minore.
- Ite ant a chèrrer galu?
- L'amus a bìder a pustis.
- Amentet: o li cunsinnant su zovanu o non bident soddu.
- In custu semus de acordu. Ma su dinare ub'est?
- Non b'at problema. Andat a domo de sa mama e si lu fachet dare. Ma s'amentet ...

- Comente faco a ischire chi est issu? Non amento de l'èer mai bidu.
 - Zustu. Non b'aido mai pesadu. In oche no apo peruna fotofrafia e a li contare comente est non balet a nudda. In prus depimus pessare chi depet èsser barbilondu e illanziadu. Unu modu b'est. Cando liu presentant li ponet dimandas a sas cales petzi issu podet rispònder.; est sa cosa mezus..
 - E pro sa màchina?
 - Lia faco acatare pronta in via Lombardia.
 - De acordu.
- Zuane controllat s'orologu. Nch'est tardu. Non b'at tempus pro torrare a Macumele. Andat a su Motel de Nùgoro e si prandet in ibe. Su bortaedie est longu e non ischit comente si lu colare. S'abarrat a negòssiu in su tzilleri cun su collega e in parte leghendesi sos zornales in sa màchina sua. A sas chimbe nch'est in via Lombardia. Totu a postu e moghet afiledesila a sa banda de Oniferi, Su tempus est bellu e su sero non est fritu. Colat in su de Benettutti e deretu a su de Orune. S'isetat sa firmada pròpiu in su pradu. Nd'est securu chi sa partida si jocat in cussos tretos. Cussa est sa base issoro, ma l'ispantat s'ora. Tropu chito. Ma cando est in mesu de Orune, cumitzat a intrare in dudas. L'abarrat cussu tretu chi nche lu juchet a su caminu mannu chi andat a Siniscola. Si non lu firmant in antis no ischit aberu in ube dialu l'ant a firmare. Caminat sèmper abellu comente l'ant impostu e arribat a Marreri. Est in su ponte pro afileare a Nùgoro. Nche lu colat, ma in pessu cumintzat su caminu de carru pro Jacupiu nche bidet su sinzale. S'acurtziat a manu manca. Aperti s'isportellu e a bellu nche narat sas paràgulas in suspu. L'arribat sa risposta dae palas de una tupa de chessa. Cumprendet chi depet afileare in cuche. Non fachet mancu chentu metros chi unu li fachet tzinnu de firmare. A s'arressada, si presentat unu bandidu chi l'indissiat una caminera chi artziat a cucuru de su montricu cuzicadu de tupales.
- Arribant a susu colande in sas camineras apertas dae crapas e sirbones. Sètzidos o isterricorjados suta cussas tupas, Zuane contat ses pessones. Chimbe carotadas e unu chene nudda in cara. Est su ricatadu. Est sa prima borta chi lu bidet. No at difucultade a lu distingher. Sa beste bruta e istratzada, ma si notat ch'est beste de tzitade. Est craru chi non est de sa categoria de zente de campu. Ispinghent a Zuane a si li sèder acurtzu. Totu mudos. Badiat in cara s'òmine iscarotadu.
- Chie ses? – Li dimandat.
 - Bennardu Toniutti.
- Una mirada a fùrriu. Nemos mutit.
- Cando t'ant cundennadu e pro ite?
 - In d unu protzessu, imputadu pro chistiones de Radiu Macumele.
- Est su chi cheret ischire. Est sa risposta chi isetabat, ca de su fatu nde sunt a conoschèntzia petzi issu e sa famiglia.. Un'àtera ocrada a fùrriu. Cheret ischire si podet dimandare àteru.
- Unu carotadu si pesat ritzu. Est sa Boche. L'abirguat dae sa corporatura e dae su travestimentu. Li fachet de tzinnu a si pesare ritzu e l'indissiat sa caminera dae sa cale est artziadu. Cumintzant a falare paris. Cando nche sunt ecante allargu li narat:
- Nos semus postos de acordu. Fachimus a càmbiu a pare. Como as bidu e cumprovadu chi si tratat de Toniutti. Anda e bàtinche su dinare. Lu pones in palas de su rivestimentu de s'isportellu de secus a manu manca. Si ti firmant non lu depent bìder.
 - Comente cuncordadu ti depo batire 360 miliones, ma non bi los ant, ca a s'ùrtimu mamentu unu chi nde depiat batire 20, non s'est fatu nen bìder ne intènder.
 - Andat bene su pròpiu. Non coles in Nùgoro. In sa Sulidai b'at zustissia.. Torras a fàcher su matessi caminu, ma a s'imbesse.
 - Poto batire unu de sa famiglia sua? Est importante pro ch'iscant chi su dinare boll'apo cunsinnadu.
 - Batilu puru. Gai ses prus trancuillu e nemos podet nàrrer chi ti l'as mantesu. Si benende t'abizas chi ti sunt ponende fatu, non ti firmes. Nois zai damus cara e nos fachimus torrare a intènder a pustis.

Zuane tucat in màchina currende a cantu sa màchina li cunsentit, colande in su matessi caminu de pac'ora in antis. A sas nobe e mesa est in Macumele. Est note manna. Deretu a domo de sa sennora Solinas. Li paret ch'est sa prima borta chi la bidet.. Pacas paràgulas de presentantzione e li pedit su dinare. Est pruntu, comente l'aiat naradu s'abocadu. Lu contat e nde dogat 20 miliones.

- Non si pichet pelea, est totu cuncordadu, Como mi facat su piachere de mutire su conadu de Bennardu. Depet bènner cun mecus. Perunu aneu, non est pro fàcher unu càmbiu. Est mezus chi benzat. Sa sennora telefonat a Franco su ghèneru, chi benzat chene nàrrer nudda a nemos. Zuane mutit s'abocadu.
- Bi semus. Est s'ora. Sichiminche a s'agrucadorju de Oroteddi e isetami chi torre. Como est Zuane chi torrat a su tue, chene mancu si nd'abizare. Franco est zai arribadu totu bene imbollicadu in d unu gabbanu
- Depet bènner cun mecus sennor Franco. Andamus a nche girare a Bennardu.
- Como?
- Non si pichet pelea. Est una cosa de pacu importu,
- Ub'est?
- In manos de sos bandidos. Nollu torrant a s'arribada.
- Deo ite bi faco?
- Nudda. Petzi cumpannia a mime. Bennardu at bisonzu de bìder una cara conota.
- Si est netzessàriu!
- Benzat, sa màchina est in su caminu.
Sedint e Zuane s'abizat chi Franco s'est tremende. Moghent. Sa tremulia de Franco aumentat. Sa timoria l'est jocande brulla mala. Sa prima pessada est de lu dassare in ibe.
Ma li serbit pro su chi at pessadu de fàcher a pustis,
- At fritu? - li dimandat.
- Sisse e meda.
- Allugo su riscaldamentu
- Fortzis est mezus.
L'allughet, peri si at cumpresu chi non si tratat de fritu ebia. Li fachtet carchi dimanda pro l'isviare e l'apachiare.
- B'amus un'ora de caminu e totu si concruit in cuche. Depet èsser cuntentu de èsser su primu a torrare a bìder su connadu.
- Ja l'isco, ma sa timoria est prus forte de mene.
- Non credat chi timoria non nd'ape peri deo. In custas ocasiones chi est chi non timet?
Su negòssiu non resessit a l'apachiare. B'at pacu de èsser alligros e Zuane no ischit comente sichire su negòssiu. In s'agrucadorju de Bortigale, Franco li pedit de firmare, ca s'est pissiande.
- Est su fritu. – narat pro s'iscusare.
Zuane cumprendet chi su motivu est àteru, ma firmat su matessi.
Tarrant a mògher. In s'agrucadorju de Oniferi, s'issena si ripitit. Li benit s'idea torra de lu dassare in cuche.. Non li paret zustu chi a arriscare siat petzi issu. Dassat chi facat sos bisonzos suos, ca est craru chi si nono si la fachtet a supra de sesi matessi. Sa timoria est diventande assustru. Su tempus est colande. Nde sunt perdende tropu. Isetat chi torret in màchina e deretu li bochinat:
- Est tempus chi l'acabes de fàcher su pitzinnu minore. Non podimus sichire goi. Arriscamus de non nche ghirare a bidda a connadu tuo, lu dassas morrer in cuche e a pustis m'acusant de m'àer mantesu su dinare. Pro chi l'iscas, non as a èsser tue a faveddare cun sos bandidos. Bi pesso deo.
Zuane curret a sa velotzidade massima chi su mezu li cunsentit. De tretu in tretu pompiat in s'isprichitu pro s'assicurare chi nemos li siet ponende fatu. Su telefono de Bennardu est o podet esser suta controllo, non podet mutire a domo de sa mama. Nche colat su Pradu e deretu est in Orune, chi traversat totu chene si firmare. Arribat a Zacupiu e picat sa caminera chi at fatu carchi ora in antis. Franco s' abarrat a sa muda,

acoconadu in su sedile che pitzinnu assustradu. In pessu ponent pedes in terra, da una mata nch'essit unu bandidu e s'acurtziat a Franco puntandeli unu mitra in cherbeddos de secus e li narat:

- E tue dias èsser su connadu de Bennardu?

Su zovanu non suportat cuss'afrentada e rughet a terra dismaju. Zuanne si lu garricat a palas pro nche l'artziare a ube l'isetat su connadu. Duos bandidos andant a sa màchina e nche picant su dinare e lu contant. Un'àteru imponet a Zuanne de abarrare a costazos de su ricatadu.

Custu si l'imbarat a supra disisperadu.

- Mi nche torret a domo.

- Unu pacu de passentzia. Luego totu si concruit e finit de sufrire.

Franco torrat a bibu. Si pompiat a fùrriu prus assustradu che mai. Non s'abizat chi b'est su conadu e custu non s'abizat de su parente. Non si salutant nemancu. Ambos si pompiant su bodiu de sa note, prus assustrados che mai. Dae sa positzione issoro petzi podent bider sas chimas de sos tupales e pessones istranzas, inimicas. Bennardu non bidet nudda. Juchet sa bista cuzicada dae pannitzolos mantesos cun cantos de tzerotos. E fortzis gai s'at coladu totu su tempus de sa presonia. Unu bandidu si l'acurtziat. Juchet in manos una paja de iscarpas de passizu.

- Bennardu, poneti sas iscarpas tuas e torrami sos iscarpones. Sennor Zuanne, che li doghet sas bendas e sos tzerotos.

Zuanne li pompiat sos pedes. Est cartau a sa pastoratza, cun iscarpones de sos cales non resessit a nde conòscher sa marca. Liberat sa cara de Bennardu e s'abizat chi juchet sa barba longa. Dae s'iscuricore de sos tupale nch'essint a campu àteros duos bandidos, S'acurtziant a Bennardu e a su connadu.

- Su dinare est su tantu cuncordadu. L'amus contadu. Sennor Zuanne, como at a èsser cuntentu. Nois amus respetadu sos acordos. Como tocat a issu a los respetare.

- Deo apo una paràgula ebia.

- Amus a bìder. Da in oche non si mogat in antis de s'impoddile. Nos serbit tempus pro nos istresiare. Issu at bisonzu de tempus pro sas abertènzias chi depet dare a Bennardu.- S'acurtziat a su ricatadu e l'istringhet sa manu. – Adiosu. Dae cara a su chi ti narat sennor Zuanne. Pone in atu su chi ti narat, si nono ischis chi ti podimus sèmper acatare e no at a èsser pro su dinare. Cumprendes? Ti racumandamus de èsser ubidente e de pònner zudissiu.

Est s'urtimu corfu a li derrùere ànimu e cussentzia. Non li podent bestire timoria prus de gai. S'iscuricore impedit a Zuanne de bìder su terrore istampadu in cussas caras.

Sos bandidos, a unu a unu, si fughint. Zuanne nd'intendet s'arrastu e s'isfracare in sos tupales, comente de zente impressida. Cando non los intendet prus e torrat su mutricore de su padente.

- Pesade. – Ordinat. - Ponidemi fatu. Andamus a sa màchina. Daze cara a non trabucare. Unu mamentu ebia e sunt in màchina. Franco si sedit a secus.

Zuanne cumintzat su pòrrogu de Bennardu. Li fachtet contare totu su chi l'est imbènnidu, dae cando nche l'ant picadu a su mamentu chi l'ant liberadu. Totu nche li fachtet contare, su chi at bidu, su chi at intesu o cussu chi petzi l'est pàssidu de cumprènder. E issu totu contat. Zuanne benit gai a s'assecurare chi Bennardu aiat bidu in cara unu de sos bandidos.

Pessone mai bida ne conota. Non nde l'est abarradu in conca mancu s'agherju. L'aiat petzi assustradu e l'aiat bestidu una timoria chi non l'aiat abandonadu mai in totu sa presonia, timende chi l'aerent mortu dae unu mamentu a s'àteru, pro cussa bisione chi non li fit mancu bene intrada in conca. Cussos disgràssias, peroe, lia fachiant pesare cada borta chi li fint acurtzu. Amentat petzi sos ocros ispararajaos, sa mirada minetosa e metzana. De àteru nudda. Contat. Contat e Zuanne lu firma petzi a li nàrrer su chi depet ismenticare e su chi depet contare ebia. Ma de contare petzi aiat su mamentu de sa liberazione. Àteru nudda, ca est istatu totu su tempu cun sos ocros tapados.

Cando nche finit, Zuanne li fachtet su suntu, cussu chi petzi podet contare, si cheret campare trancuillu. Peruna paràgula in prus.

- S'amentet s'abertimentu chi l'ant dadu.
- L'apo cumpresu. Como ghiramus a domo.
- Semus belle in s'agrucadorju de Oroteddi. Mancu un'ora e semus in domo sua.

Franco pacu at cumpresu de su chi si sunt narados Bennardu e Zuanne . Est galu assustradu e in pelea pro su chi timet li potat imbènner. Pacu in antis de s'agrucadorju pro Oroteddi acatant s'abocadu mesu dormidu intro sa màchina sua, cun sa luche alluta.. Cun lampizos de sa vetura sua, Zuanne nche lu fachtet acurtziare. A Franco li narat de picare sa de s'abocadu e de nche la ghirare a Macumele, andande a in antis de issos. Perantoni Bua artziat a sa màchina e abratzat s'amicu Bennardu. Zuanne tucat deretu e andande andande l'informat de su perìculu chi aiat passadu Bennardu e de sos acordos cun sos bandidos.

Gai a issu puru benit cunfirmadu su suspetu suo e de Scotto, de su mazistradu. Est de acordu cun Zuanne chi sas abertèntzia dadas a Bennardu sunt zustas e chi prus de cussu non podet contare. Sa zustissia non depet ischire àteru.

A sas bator de manzanu sunt in Macumele in domo de Bennardu. Sa mama, sa sorre e sos connados lu sunt isetande. Franco, arribadu in antis, los at abèrtidos. Sos abratzos e sos prantos paret chi non finint mai. A fines Zuanne e s'abocadu nche trazant a Bennardu a un'àteru aposentu.

- Non mutedas sa zustissia in antis chi siat die.- Ordinat s'abocadu e no isetat risposta.

Totu e tres si torrant a contare su fatu e istabilint su chi Bennardu petzi podet nàrrer. A fines peri issu, ecante apachiadu e prus serenu, cumbenit chi su chi l'ant naradu est sa cosa prus zusta, A pustis de s'èsser pasadu ecante cun d una dormidedda, s'abocadu autorizat sa mama a mutire sa zustissia. Est galu a primu manzanu e zai bichinos e amicos sunt in fila pro salutare a Bennardu.

Zuanne, acumpanzadu dae Foddu, andat a Nùgoro a si nche ghirare sa vetura.

A s'intrada de Nùgoro sa camioneta. Su brigadieri Piras l'est isetande. Sa notissia est arribada deretu a Nùgoro. Su brigadieri s'informat chi est su missu e bi ponet pacu a pessare chi est andande a Nùgoro. Est s'ùrtima possibilidade de lu firmare.

Nche dispatzas su parente de Bennardu, chi esseret torradu solu a Macumele, ca issu est zai arribadu.

Nche lu picant a caserma chi est zai mortu de sonnu e dormindesi ritzu. Totu est prontu pro su pòrrogu. Zuanne setzidu in d una poltrona, unu carabinieri prontu a verbalizzare e su brigadieri a costazu suo.

Cumintzant a prògher sas dimandas e pacu l' importat a su Maressallu Deiana chi naret ch'est morinde de sonnu e chi est mesu cotu.

Zai chi non li credet, pedit de telefonare a sa muzere. Su maressallu si fachtet dare su numeru e lu format issu.

Li rispondet sa muzere. Li narat de telefonare a s'abocadu e de l'informare chi est in caserma in Nùgoro e deretu serrat sa comunicatzione.

- Est brullande, sennor Zuanne. A pacu l'at a serbire su àer mutidu s'abocadu suo. Da in oche non si moghet in antis de finire su pòrrogu.

Su maressallu insistit cun sas dimandas e Zuanne a nàrrer chi s'est dorminde ritzu. Nudda. Su maressallu cheret ischire. In cussu mamentu sonat su telefono e Piras est prontu a risponder, ma:

- Est pro issu su maressa'.
- Dae ...
- ... Cumandet ... deretu ... - e dat sa correda a Zuanne..
- *Pronto!*
- *Sono il Procuratore della Repubblica di Oristano. Buon giorno Sennor Zuanne.*
- *Buon giorno!*

- *Sarà stanco a quest'ora. Rientri a casa; si riposi e domani venga nel mio ufficio. Ho già dato disposizioni perché la rilascino. Si ricordi: domani nel mio ufficio a Oristano. Arrivederci.*
- *Arrivederci. – E torrat sa correda a postu suo.*
Sa die si la colat in letu dormidu che sacu. S'incras andat a Aristanis. Si tratenet cun su zuze prus de un'ora e li contat totu su chi podet contare. S'abizat chi su Procuratore est informadu de totu su chi at fatu, ma non li cunfirmat, e non lu podet nàrrer de àer conotu perunu bandidu. A sa fine si saludant e essit dae s'ufissiu comente chi siat essinde dae una mala bisione. Ghetat totu a pala e a s'ismènticu. Est totu finidu pro issu.

Note Biografiche

Mario Sanna è nato a Nuoro nel 1934; si diploma all'Istituto Magistrale S. Satta nel 1955. Imnesso nel ruolo magistrale nel 1961, nel 1970 consegue la laurea breve in Vigilanza scolastica all'Università di Cagliari. Insegna a Olzai e Orgosolo fino al 1981, quando passa al ruolo dei dirigenti scolastici.

Animatore sociale, culturale e politico

- allievo di Altiero Spinelli, nel 1954 con Rino Macciotta fonda a Nuoro la prima sezione del Movimento federalista europeo;
- dal 1956 al 1962 è a capo del Circolo La Fucina;
- 1964/65 Consigliere Comunale di Olzai;
- 1969 Fondatore e presidente per due anni della LAUN (Libera Ass. universitari Nuoresi);
- 1978 fondatore e segretario della Ass. Archeologica Nuorese, la prima nel suo genere in Sardegna; da essa presero le mosse tutte le altre associazioni del settore che sorsero e operano nell'Isola;
- 1980 scrive **Antas**, probabilmente il primo romanzo di fantascienza scritto in lingua sarda;
- 1983 fondatore e redattore di **Sardegna Antiga**, rivista bilingue di archeologia e storia; ancora pubblica col nome di Sardegna antica per conto del Centro studi Culture Mediterranee di Nuoro, di cui è stato il primo presidente;
- 1986 Scrive in lingua sarda la favola, pubblicata nel 1990: **Su contu de Piricu** ;
- 1990 Cura la pubblicazione di **Sos Contos de Mannai** della Maestra Carlini e dei suoi alunni
- dal 1995 dirigente ARCI e fondatore dell'Archeoarci per la quale ha curato la stesura e stampa di **Nuoro Preistorica** - siti e percorsi archeologici del territorio di Nuoro;
- 2002 Cura la pubblicazione di **Su mezus de sa Poesia Nugoresa** (antologia).
- Nel 2007 pubblica per la PTM di Mogoro il saggio **Trulli e Nuraghi della Sardegna**, estesa ricognizione sulla architettura minore della Sardegna Nuragica;

- Sempre nel 2007 vede luce il suo sito web personale, **www.mariosanna.com**, curato dal figlio Maoro, che raccoglie le sue opere letterarie, poetiche e di pittura.

- Nel 2008 pubblica **Re-Impare il Sardo Oggi**, un agile manuale di conversazione per sardi e... meno sardi ;-)

Diverse sue opere possono essere liberamente consultate nel sito internet dell'Università di Colonia e Berlino (**Sardinian Text Database** : <http://www.lingrom.fu-berlin.de/sardu/textos.html>) oltre che nel suo sito personale.



<http://www.mariosanna.com>

Come contattare Mario Sanna?

Visita il suo sito personale all'indirizzo

<http://www.mariosanna.com>

dove potrai leggere e scaricare altre sue opere di narrativa, poesia ed archeologia. Inoltre sono disponibili le immagini e i video delle opere pittoriche e delle collaborazioni artistiche, le interviste e... tanto altro ancora!

Oppure scrivi direttamente al suo indirizzo di posta elettronica


info@mariosanna.com

INDISSIOS

	Licenza d'uso della presente opera	4
	Nota introduttiva dell'autore	5
Cap. 1	SU SERO DE SU RICATU	9
Cap. 2	SU PORROGU	14
Cap. 3	S'ABOCADU E SU MISSU	24
Cap. 4	SAS PRIMAS CHIRCAS	32
Cap. 5	S'INGARRIGA A SU MISSU	38
Cap. 6	SA VISITA A RIORI DE ORGOSOLO	49
Cap. 7	SU PRIMU ADDOBIU	55
Cap. 8	SU BRIGADIERI PIRAS	59
Cap. 9	SA BISITA A PASCALE TIDU	63
Cap. 10	SU ZIRU IN BODIU	70
Cap. 11	S'ADDOBIU IN SANTU MARCU	83
Cap. 12	SA LIBERASSIONE DE ROSAS – SU PRIMU ACCONTU	89
Cap. 13	SA PROVA CHI BENNARDU EST BIBU	103
Cap. 14	BENNARDU LIBERU	112
	Note Biografiche	121
	Contatti e riferimenti	122
	Indice dell'opera	123



<http://www.mariosanna.com>



mario sanna poeta
scrittore
pittore